

7  
K29-51

中國方志叢書·華北地方·第二三三號

據

民國、趙葆真修段光世等纂  
民國二十二年鉛本  
影印

陝西 省

鄂

縣

志

(二)

成文出版社有限公司印行

中華民國五十八年 月臺一版

# 鄆縣志

全二冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市羅斯福路三段279之二號

電話：三七〇一三二號

印刷者：東南印製廠有限公司

和平西路二段70巷83弄29號

內政部登記證內版台業字第一一四七號

重修鄴縣志卷之五

人物第二十

按舊志人物分類甚多孫志僅分列傳孝友義行流寓數類其於未旌節烈婦女亦附於人物之末茲將節烈無論未旌已旌均另編入列女門餘悉仍之其續入者則各以類附焉

列傳

北魏

周澹京兆鄠人也爲人多方術尤善醫藥爲太醫令太宗嘗苦風頭眩澹治得愈由此見寵位至特進賜爵成德侯神瑞二年京師饑朝議將遷都於鄴澹與博士祭酒崔浩進計論不可之意太宗大然之曰惟此二人與朕意同也詔賜澹浩妾各一人御衣一襲絹五十匹棉五十斤泰常四年澹卒諡曰恭見魏書

唐

殷開山名嶠以字行世居江南祖不害仕陳爲司農卿陳亡徙京兆爲鄠人開山涉書工尺牘爲隋大谷長高祖兵起召補大將軍掾從攻西河爲渭北道元帥長史與劉弘基屯故城破衛文昇之兵賜爵陳郡公遷丞相府掾以吏部侍郎從秦王討薛舉戰折墟音職爲舉所乘遂大敗下吏當死詔貸之除名爲民頃之從平仁杲復爵位兼陝東道行臺兵部尙書遷吏部從討王世充以功進爵勛國公征劉黑闥道病卒王哭之慟詔贈陝東道大行臺右僕射諡曰節貞觀十四年配饗高祖廟庭永徽中贈司空見唐書列傳今祀鄉賢祠

宋

楊礪字汝礪京兆鄠人曾祖守信唐山南西道節度同平章事本宦官復恭假子也祖知禮後唐均州刺史父仁儼入蜀仕王氏爲丹稜令蜀平補渭南主簿累遷永和令礪建隆中舉進士甲科父喪絕水漿數日服除以祿不足養母閑居無仕進意鄉舊移書敦諭礪乃赴官解褐鳳州團練推官歲餘又以母疾棄官開寶九年

詣闕獻書召試學士院授隴州防禦推官入遷光祿寺丞丁內艱起就職久之轉  
秘書丞改屯田員外郎知鄂州以善政聞端拱初真宗在襄邸遷庫部充記室叅  
軍賜金紫遷水部郎中真宗尹開封礪爲推官真宗嘗問礪何年及第礪唯唯不  
對後知其唱名第一自悔失問謂礪不以科名自伐甚重之儲宮建兼右諭德轉  
度支郎中即位拜給事中判吏部銓未幾召入翰林爲學士咸平初知貢舉俄拜  
工部侍郎樞密副使二年卒年六十九真宗軫悼謂宰相曰礪介直清苦方當任  
用遽此淪謝即冒雨臨其喪礪舍委巷中乘輿不能進步至其第嗟憫久之廢  
朝贈兵部尙書中使護塋礪爲文尙繁無師法每詩一題或數十篇在翰林制誥  
迂怪見者哂之有文集二十卷子嶠至祠部郎中嶧至太常博士峭至太子中舍  
少子隅詳選舉篇首並見宋史列傳礪祀鄉賢祠

元

賀賁其先河東隰州人父種德徙關中遂爲京兆鄠人有材畧善攻戰數從軍有功

關中兵後積屍滿野賁買地金天門外爲大塚收瘞之遠近聞者爭輦屍來葬復以私錢勞之嘗治室於毀垣中得白金七千五百兩謂其妻鄭曰語云匹夫無故獲千金必有非常之禍時世祖以皇太弟受詔征雲南駐六盤山乃持五千兩往獻之世祖即位賜金符總管京兆諸軍與魯卒贈輸忠立義功臣銀青榮祿大夫大司徒追封雍國公諡真獻子仁傑孫勝

仁傑字寬甫從世祖南征雲南北征乃顏皆著勞績後與董文忠居中事上同志協力知無不言言無不聽多所裨益而言不外泄帝深愛重之一日召仁傑至榻前出白金謂之曰此汝父六盤所獻者聞汝母來可持以歸養辭不許乃歸白母盡散之宗族帝欲選民間童女充後宮及有司買物多非其土產山後鹽禁久爲民害皆奏罷之民爲之立祠未幾特授正議大夫上都留守明年賜三珠虎符進資德大夫兼虎賁親軍都指揮使尋加榮祿大夫中書右丞留守如故其妻劉沒帝欲爲娶貴族固辭乃娶民間女已而喪明夫婦相愛如初未嘗置媵妾大德九年

年七十二請老拜光祿大夫平章政事商議陝西行中書省事賜白金楮幣錦袍玉帶歸第卒贈恭勤竭力功臣儀同三司太保上柱國追封雍國公諡忠貞延祐六年追封奉元王詳見元史列傳今祀鄉賢祠

勝仁傑字也字貞卿一字舉安小字伯顏以小字行嘗從許衡學通經傳大義年十六入宿衛凝重寡言世祖甚器重之大臣有密奏輒屏左右獨留勝許聽之出則參乘輿入則侍帷幄非休沐不得至家至元二十四年乃顏叛帝親征勝直武帳中詰旦合戰還侍帝側矢交帳前勝立侍不動帝一日獵還勝參乘伶人蒙采叢作獅子舞以迎駕輿象驚奔逸不可制勝投身當象前後至者斷鞞縱象乘輿乃安勝退創甚帝親撫之遣尙醫尙食視護拜集賢學士領太史院事賜一品服桑哥敗帝相完澤而以勝叅知政事未幾僉樞密院事遷大都護父仁傑請老以勝代爲上都留守兼本路都總管開平府尹虎賁親軍都指揮使既至通商賈抑豪縱出納有法供億不匱民賴以安至大三年進光祿大夫左丞相尋又加開府儀

同三司上柱國未幾以足疾請老不許賜小車出入禁闈及英宗即位諒闇中丞相鐵木迭兒誣以乘賜車迎詔不敬殺之百姓爭持紙錢哭於屍傍甚哀泰定初詔雪其冤贈推忠宣力保德功臣太傅開府儀同三司上柱國追封秦國公諡惠愍至正三年追封涇陽王改諡忠宣子二人惟一自有傳惟賢大中大夫同知上都留守司事孫均自有傳並詳見元史列傳

惟一字允中後賜姓蒙古氏名太平父勝以非罪死太平年尙幼泰定帝雪其父冤而撫恤之太平資性開朗正大雖在弱齡儼然如老成人嘗受業於趙孟頫又師事雲中呂弼太平始襲父職爲虎賁親軍都指揮使順帝元統初命爲樞密副使陞同知樞密院事遷御史中丞辭疾臥家至正二年詔起爲中書參知政事辭進右丞又辭會御史祁君璧劾佛家閹黜之乃起就職遼金宋三史久未克修至是太平力贊其事爲總裁官修成之四年陞中書平章政事五年遷宣徽院使七年拜左丞相朶而只爲右丞相明年正月詔修后妃功臣傳特命太平同監修國史



蓋異數也太平請僧道有妻子者勒爲民以減蠹耗給校官俸以防虛冒請賜經筵講官坐以崇聖學是時天下無事朝廷稽古禮文之典有墜必舉平生好訪問人材不問南北必記錄於冊至是多進用之初脫脫既罷相出居西土會其父馬札兒台卒太平力請令脫脫歸葬以全孝道以故脫脫得還脫脫既得還朝即拜爲太傅然不知太平之有德於已也因汝中柏讒間成隙遽欲中傷之九年七月罷爲翰林學士承旨既又誣劾其過失并論其子也先忽都不宜僭娶宗室女太平遂還奉元杜門謝客以書史自適十五年詔命爲淮南行省左丞相兼知行樞密院事十七年召爲中書左丞相皇太子謀欲內禪遣宦者資正院使朴不花諭意於太平太平不答皇后又召太平至宮中舉酒申前意太平依違而已未幾召拜太傅賜田若干頃俾歸奉元帝密旨令伯撒里留太平毋行太平至沙井聞命而止皇太子惡其旣去而復留也二十三年令御史大夫普化劾太平故違上命當正其罪詔乃悉拘所授宣命及所賜物俾往陝西之西居焉搠思監因誣奏之

安置土蕃尋遣使者逼令自裁太平至東勝賦詩一篇乃自殺年六十三二十七  
年監察御史辯其非辜請加褒贈

均惟一子字公秉後改名也先忽都少好學有俊才累遷殿中侍御史治書侍御史  
翰林侍讀學士皆兼襲虎賁親軍都指揮使太平之爲相也務廣延才彥而也先  
忽都以丞相子又傾已下士以故名稱藉然已而被劾罷從親還奉元居六年召  
爲兵部尙書同知樞密院事除通政院使太平再相授知樞密院事遷太子詹事  
十九年羣盜由開平東屯遼陽冬詔也先忽都以知樞密院事兼太子詹事率師  
往討太平以其年少數請改命不允至則遣將拔懿州省治盜踰遼河東奔而朝  
廷讒搆日甚罷爲上都留守尋改宣政院使以丁內艱不起搠思監再相復奏強  
起之卽日監察御史也先帖木李好直又劾罷之已而搠思監狗皇太子旨搆成  
大獄誣老的沙蠻子按難達識理沙加識理也先忽都及脫懽等不軌執脫懽煨  
鍊其獄連逮不已帝知其無辜欲釋其罪特命大赦而搠思監增八條畫內獨不

赦前獄唯老的沙逃於字羅鐵木兒大同軍中蠻子按難達識理等遂皆貶死也  
先忽都當貶撒思嘉之地道由朶思麻行宣政院使桓州閭素受知太平因留居  
其地執政知其故奏也先忽都違命杖死之年四十四有詩集十卷

張雲翼花原里人舉鄉試除知鄆縣遷同州同知多善政舊志謂其知地理今無所

徵

明

崔敬以進士授太康知縣有遺愛民皆稱之

張賢字思齊永樂中以舉人授吏部司務遷驗封郎中剛廉自持部中呼爲板張超  
拜山西右布政使威惠並流遠近悅服尋乞歸舊廬數楹僅庇風雨一統志稱其  
廉幹老成其子徒步入京省視尤爲人所難云太史王九思撰墓碣祀鄉賢祠

王琰字廷玉安太里人性剛直材貌端凝由貢士授大寧令大寧民散處山中多斃  
而負固急則益避匿死弗肯出琰與約令自至爲平其獄訟賦役俾各得所民歡

然從之再補長清令吏舞文爲百姓患琰黜老吏三四人其患頓除一日典史有失筆楚於庭及愛子有失亦筆楚於庭不貸於是人人股栗相戒奉法無敢犯者乃獨優學官弟子有段善者家貧苦學壯而無室爲聘富民女妻之後有持節使

臣

薛文清  
公瑄也

品其治行爲山東第一薦爲濟南知府奏未下而卒

馮俊字子英漢陂人豪爽明辨好爲大言鄉舉時甫十有八歲既遊太學會興師乃上書自言能製呂公戰車中貴人召而問焉言頗不遜中貴人怒指爲誑慢落籍爲民既歸於所居漢水上藝植竹木花卉相錯如繡因名其地爲錦繡溝既老猶曰我將才也惜乎世無知之者

王鉉字大器安太里人琰長子少涉經史善書及詩事父母以孝聞性寬大不與物校閭巷亡賴者酗酒狂罵輒走避以爲常未嘗言人短長鄰子夜入盜麥家人捕之欲送之官鉉訶止謂之曰不足胡不來告仍以所盜予之去其人感化終身不復爲盜其他行事多類此受高年爵卒年八十有一

王彝由舉人同知解州廉明剛斷百姓呼爲鐵王遷代州卒

張傑字世英祥符教諭補任葉縣遷國子博士陞重慶府通判未滿請老性質實剛果在祥符時天台陳先生督學政甚重之在重慶督餉其先督者多緩懦無爲否則以賄敗傑則剛以集事而自守亦嚴故獨全也家居逾二十年壽八十有八卒閻翰字文軒鑿齒村人恬退不樂仕進成化間徵爲秦府儀賓尙合浦郡主慕漢鮑宣事挽鹿車歸鄉里青鞵布襪見者不知其爲貴戚也年逾五旬與郡主先後卒無子葬於村西原

閻邦教南京太醫院醫官性聰敏謹厚於方書無所不讀而用藥復出自心裁蓋深得古人之秘而不泥於古者

上二條係補遺

王冲字文會安太里人爲諸生時以祖母賀病嘗割股授唐縣主簿督馬政政既克舉民亦無所損漢陂太史嘗過唐尙能憶唐人之稱說也後致仕以壽終祀鄉賢

祠

李儼字畏之羅什里人鄆縣以周易舉者自儼始仕爲保寧府推官註誤歸在林下久居近於澇釀酒烹魚而飲無日不醺然也縣令康汝修天爵甚敬之然不邀亦不往君子以爲各得其道也

王儒字文宗琰之孫體貌豐奇踐仁履義任巴縣教諭誨誘有方科目始盛直誕日伏臘必望鄆再拜曰兒仕爲父母也今栖栖萬里外父母惡在淚下潛然關中大饑人相食乃使弟載脯麪歸養父母餘以及宗族又移宗族可來者三十人於巴里人有來巴者亦予之貲使賈以爲活比去巴關中亦稔族黨無死於餓者後調南陽教授克立師道丁憂歸竟不仕冢子翰林檢討九思被誣謫倅壽州儒賜之書曰古之君子竭忠其主非有所不盡也修身慎行其越人非不多也然往往罹於讒古云弭謗莫如自修天地日月巍乎煥然亦求無愧於斯而已又何惑焉年七十有五卒九思及弟九紱九峯自有傳

九思字敬夫由進士選翰林院庶吉士授檢討九年滿考直劉瑾亂政翰林悉調部

屬歷練政務公獨得吏部初爲文選司主事不數月遷考功員外郎文選郎中文選之權久爲臺寺侵奪閣老李西涯蔭子赴試公以衆人遇之仕路爲之一清京師有向爲眞翰林今爲眞吏部之名然竟以此得罪會瑾敗西涯諷言官以瑾鄉里劾公降壽州同知既抵任理訟備盜俱有實聲嘗監收武平衛兌軍糧省耗大半毫民賴以復甦壽近淝湖夏霖二水泛溢幾漫其城公文告沉牲雨遂止水落者三尺公以文章厭服海內雖不獲展布而施爲亦畧見矣居一年會天變言官鈎瑾餘黨勒致仕先是公館選試端陽賜扇詩效西涯體遂得首選有名史館中時人語曰上有三老下有二討既而康李輩出唱導古學相與訾警館閣之體公舍所學而從之於是始自貳於長沙矣公之再謫以及永錮皆長沙秉國時公既歸里舍得終養二親處兄弟極其友愛又率鄉人行家禮修澇河石橋施醫藥育後學垂四十餘年絕口不譚功利事天下想聞風采卒年八十有四當其盛年屏棄無所發怒作爲歌謠及杜甫春遊雜劇力詆西涯流傳騰涌關隴之士雜然和

之嘉靖初纂修實錄議起公有言於朝者曰遊春記李林甫固指西涯賈婆婆得

非南塢耶

賈詠字鳴和號南塢河南許州臨潁人宏治丙辰進士嘉靖三年入閣

吏部聞之縮舌而止所著漢陂集

續集碧山樂府遊春記詩餘中山狼院本鄂縣志王氏族譜等書行世與李獻吉

夢陽何仲默景明康德涵海邊廷實貢王子衡廷相徐昌穀貞卿齊名海內稱爲

宏治七子外又有崔子鍾銑田勤甫汝棘孟望之洋稱爲十子而顧華玉朱升之

王穉欽之徒咸負盛名弗得與萬曆初詔建名臣坊於陝西都會公與焉今入鄉

### 賢祠

九敘字禹夫儒中子自鄉舉後未嘗赴禮部會試隱居自樂以此終身焉

九峯字壽夫儒少子由進士授御史巡視居庸開險阻簡行伍利器物時練習衛官

怠惰侵漁者必懲主將貪懦者必斥按順天貴戚豪彊無敢撓旌廉去貪畿內大

治其年秋駕幸居庸諸處率同列諫止前後三十疏不允出爲金華知府明禁令

正風俗清獄訟裁冗費四年民大服蘭谿尙書章公

名懋成化丙戌會元諡文懿

清介素著卒



而家貧孤幼

孤名接懋年八十二生者後以廕為國子生

九峯為請疏月給米二石嘉靖甲申擢山西

副使備兵偏頭關未三月當道遇非其禮遂以母病歸未幾卒所著有白閣集行

世

張紹芳字孝先潛心實學且善詩歌人謂有王太史風事父母以孝聞家居四十年

一字不入公門由舉人初仕襄陵高平教諭正身率士不受束修遷沁水知縣介

然自守請託不行以才調五臺築城禦寇修學育才百姓有張青天之謠比倅順

天名譽益著時冢宰張元州知其賢即擢河間同知嘗攝府篆庫吏進羨餘三百

金叱去次日申呈上司其行事類如此後以疾告休囊橐蕭然次子補以孝廉著

聲蓋得之家傳云

張楠字材夫安太里人初仕為山西榆次教諭

舊志未詳其出仕之由

日作文數首久而益精

遂舉山西庚子鄉試

通志入丙午科

陞平順知縣後補香河致仕歸闔門養重足跡不至

市廛常與一二老友縱步漢陂澇濱間偶有感發為詩歌得五柳先生體居官居

鄉剛方正而有古人風一時學者多尊禮之

王語字仲倫安太里人甘貧苦學尤善教一時名士多出其門有爲他人弟子不循矩者亦必面斥之其人退即改行膺歲薦不仕

張汝獻字希陳敦厚質直有前輩之風焉大復何公督學時告退何公聞其行復取入場比貢禮部不入太學求仕乃赴吏部告歸吏部予之冠服榮其身

王惟藩字子价安太里人神清姿偉家貧苦無書從友假讀竟日即還舉於鄉十試南宮不第自是竟掩扉爲子弟講孝弟淵源之學不求官亦不復問當世事終身無一字入公門有不類見之必走匿然能急人之急見孤弱爲人軋者力翼之以是爲鄉人所重

魏奉琦字錦江渭曲里人生而朗慧始爲文即出驚人語每試高等然竟以明經終初授隴西訓導隴西士多任俠奉琦裁以禮遂彬彬有鄒魯風蒲敏生者考案當食廩邑令重一少年欲越次餼之不可得其持正多類此尋遷介休諭介休令能

薦士諸文學逢迎如大府奉琦獨以禮自持復遷睢州學正署州篆發兩豪吏奸  
實之法州境肅然稱神君後補王傅慨然曰使我碌碌爲富貴何王之門不可曳  
長裾然吾終不以三寸翰從鄒陽枚乘後爲麗詞諧語以博王一日歡遂解綬歸  
里詩文自娛終其身焉

韓期維字光宋秦渡里人父訥爲山東荏平令期維童時即解詩律能屬古文詞

受詩於孝廉韓君化由進士除知河南新鄭縣抉蠹釐奸聽訟以明斷聞吏白庫  
盈羨若干金期維秋毫不入已其介凜如也素吟苦瘦又新鄭道衝煩劇交集遂  
以不任鞅掌之勞甫三閱月卒於公署所著有蒯緱集五册晴牕綴語二册三益  
館稿二册于麟絕句解二册藏家

王恆心主簿麟之子制行粹然周貧濟急意豁如也好飲延客不盡歡不止以廩生  
告給冠服

武奮揚字肖遲孝義里人少穎異累試冠軍事繼母孝謹由明經任四川彭縣令作

士愛民著有奏可初編政聲藉甚嗣以疾歸里邑令徐君卒於官素廉介不能治喪奮揚經紀其事文名義氣一時罕匹云

楊汝清字本直美泉里人性聰慧日記數千言詩長於古風初司大名府訓陞興縣諭課士之餘壺觴自樂舊志稱其有春風沂水之趣或庶幾焉

石寶玉以汝寧府訓導致仕教授鄉里純慤端方課子訓徒可謂能善俗移風者

王山木字養之漢陂之孫爲人坦夷瀟灑以詩文自娛一觴一詠興致獨高與人不較是非真名家之後也

張宏襟字象南花原里人端謹醇懿篤於孝友文學尤其所長由進士除知山東萊蕪縣調清苑陞禮部主客員外郎中擢山西參議提督學政兼按察僉事時癸酉一榜舉領案三十一人衆服識拔之精逆闖強公以僞職寧死不受賊亦不加害也至清定鼎後優游二十餘年乃卒

段行素渭曲坊人舉人遇徵子少與從兄文素俱受春秋於其父相繼入邑庠行素

善屬文屢爲學使者推賞謂乾州九屬無能出其右者崇禎中貢入成均方其習舉子業習聞王振劉瑾魏忠賢輩屢鑿喪國家元氣未嘗不切齒痛恨明亡兄弟偕隱義不食清祿徜徉肆志於山水間壽八十餘相繼卒居恆眷念故國往往形之吟咏讀誰與共挽天河水一洗中原血戰腥句未嘗不慷以慨也其爲破扇解嘲曰班姬曾寫怨此扇誠堪傷蔽目無全影迎風有半涼收來斯聚會展去各分張勁骨今仍在何嫌穿破裳又見燕子北來歎曰紫燕飛覓故廬主人弗見語欷歔羽毛尙爾能念舊可以人而鳥不如其在渭上曰河水涓涓不斷流往過來續幾春秋不知若個英雄血化作碧波無盡休又曰望洋一歎却低頭水自滔滔我自羞爲問祖生今烏在誰能擊楫在中流所謂風景不殊舉目有山河之異者此也晚年放浪形骸不事修飾自號爲撲刺先生文素號邈邇老人兄弟嘯歌吟咏更相唱和嘗曰但得方寸淨何必外修飾不見秦樓女盡行著錦衣自爲撲刺先生傳率寓言以寫悲憤篇末作歌其辭曰歸去來兮日之夕矣知足兮不辱知

止兮不戚扣關而抵壁兮何如間間而泄泄歸吾廬而清憩兮養吾平旦之幾希  
日重輝而月重輪兮我心則夷其恢復明室之心未嘗不與王船山黃梨州諸君  
子同也著述甚富惜皆毀於流寇今偶於殘編斷簡中檢得一二亦可以見其梗

概矣 此係補遺

清

張宏祚字士昌宏襟從弟由進士知歷城縣舊志云忠厚長者處鄉黨如不能言

張國瑜宏襟子字元玉由舉人知鄒縣平恕有政聲著有暮存稿

國璧亦宏襟子性行醇謹不爲岸異由恩拔任山東新城知縣新城疲邑也前官緣  
通賦革職者十有三人璧自知不能有爲即告歸

程明順字傑吾少學書未成順治二年自陝西石撫軍拔入標下効力六年從孟制  
府渡河援晉大捷黃撫軍疏薦奉旨除授撫標都司僉書兼署左營遊擊事十一  
年馬撫軍委剿大犯興安鎮夏郝等賊因署總兵事實授遊擊未幾遷叅將再遷

浙閩督標副將以入海島剿賊功轉河南都督僉事未及赴任卒子世賢自有傳  
世祿世典世貴俱縣學生

王邠字子仙自幼敏慧過人父贈公印武督課亦勤未冠補邑庠弟子員累試冠其  
曹識者即以科第許之由進士授山東文登縣令文登山東巨邑多縉紳喜訴訟  
公至因俗爲治優禮衣冠平息爭鬪俸滿以治最行取戶部主事歷禮部郎中職  
滿外轉廣東按察司僉事提督學政獎拔孤寒釐正文體士氣爲之一振其坊士  
錄出海內推大觀焉而是科秋闈所得士多公兩試所取前列於時兩臺交章薦  
以葬父歸卒於家至今邑之言制舉業者必推公爲宗匠云

騫振飛字麟祥由舉人仕爲浙江樂清知縣吏事非其所長然醇篤慈祥無愧民之  
父母也罷歸囊橐蕭然與人交一誠無僞見者無不稱爲古君子

魏惟紫字青臣涓曲里人孝子國成仲子嗣季父國垣年二十九歲以選拔令河南  
偃師縣時祖母王年已八旬失明本生父母與嗣父母具慶惟紫悉迎養宦署每

自擇果脯之美甘者手奉祖母而於父母則虔事如一晨昏定省雖公事繁迫得暇即坐祖母側捧其手撫摩數四娛悅其心甫及五年以脫走流犯罣誤歸里知者以其有才畧又年力壯盛勸之進取惟紫輒愴然曰堂上有八旬祖母六旬父母在何忍舍朝夕之養而遠離其側也自此遂絕意仕路前後凡五經大喪所營棺槨衣衾及墳墓誌銘無不堪爲鄉邦矜式者至於兄惟野弟惟尙則皆厚爲置產而其事兄也則尤不異事父一味之甘不共不食晚年以兄新葬清明拜掃慟悼不勝遂得疾延十年而卒爲人偉豐儀善談論工書法好學能文邑之大製作多借爲重官雖不顯而品重一時歿之日二曲李徵君題其旌曰孝友先生青臣魏公之柩葬時誌墓文亦二曲爲之學使覺羅逢公採其行櫬入鄉賢祠

焦桐字蔡音由進士除知浙江昌化縣昌化訟者必納白金三錢名曰壓狀蓋假周禮入束矢鈞金而後聽之意以剝民財也桐至即并一切陋規革之其禁賭甚嚴密然但設法使之知恥而好賭者自息顧性質直不務赫赫之名大計降調江南



青浦丞久之復遷知泰興縣其治如任昌化時泰興公堂所用架筆及籤筒等物舊以白金爲之每月一易皆里民輪造者其革之也自桐始任七月卒於官卒後鄉人稱其兩爲縣令家中不增一間屋一畝田可以徵廉矣信哉

張我智字愚若旌第四子旌性醇龐如古人終身教授爲生我智從父學資甚鈍父以爲不能學也一日爲同學長者講論諸長者心口多不了我智獨從旁高聲陳說爽朗如成人父異之又試授一章復了了如前自是大加督課不數年文理遂通其後入庠食餼秋闈兩呈薦皆以數奇未偶將老乃以積廩歲貢仕爲南鄭訓導不責諸生束修蓋醇德酷似其父云

王邾字子上以歲貢爲寧羌州訓導寧羌山郡土風荒陋邾至不責其束修用不足輒從家中運致之居二年以疾告歸

王心敬字爾緝學者稱豐川先生文義里人孝義忻子少孤母李氏守孀節鞠育之一言一動必勗以古聖賢成法故先生自幼遵奉母命年未冠即斷游觀博奕之

好奮然以古人爲程年甫二十五並謝諸生舉業負笈從二曲李徵君願講正心誠意之學幾十年歸仍閉戶探討事親教子不輕一步出門年四十後名聞海內一時黔閩吳楚撫軍咸卑禮厚幣聘主講席先生凡晤對卿大夫必期以致君澤民行義達道遇問學之士必期以成已成物隱居求志絕不隨世依阿所著書一十六種易說十卷江漢書院講義十卷正編二十八卷續編二十三卷外編六卷荒政考二卷尙書質疑二十四卷詩經說三十卷禮記纂二十四卷春秋原經四十卷又續集五十卷詩草十二卷關學彙編十二卷文獻攬要十二卷歷年四卷洗冤錄三卷南行述四卷家禮寧儉編四卷曲暢旁通皆本孔孟宗傳爲會歸不蹈後儒門戶偏倚之見至其待人則切切以萬物一體爲懷仁恕公平初無間於親疎遠邇其存心奉身則淡泊兢業蓋自幼至老如一日也康熙五十三年雍正元年兩次奉旨特徵俱以胸寒耳聾實疾固辭年八十有五卒乾隆甲子陝西巡撫桂林陳公宏謀題請准入鄉賢祠長子功季子勅各有傳



湖北黃州府庚午遷江南安徽副使道管蕪湖關稅務戊寅以失察所屬事奉旨入都引見卒於京邸年六十有四爲人孝友丁內外艱廬墓各三年爲祖父母建坊修祠克繼其父豐川顯揚之志事諸昆待諸姪甚篤自登仕籍所在輒有善政去任時士民莫不攀轅流涕而平日遇事有識有胆其足徵者在興安甫遷全州尙未離任適值邊苗相仇殺廉其狀甚悍同城官皆畏葸不敢往勅單騎撫之入密箐中荆棘崎嶇沙露障天苗民持刃相向勅輕衫纓帽坐小廟中召其渠魁諭以大義彼此帖服羅拜廟前信宿而去至其操守介然有光家學與長兄功蓋始終如一云

士之勳字偉生由舉人初任江南英山知縣再補北直豐潤縣爲人坦易無機械性雖嗜酒人無怨尤

程世賢字象伯福建叅將明順長子以恩貢教習除知湖廣漢川縣再補浙江湯溪爲人有儀容遇事不深刻前後兩任皆能於其官丁內艱歸值歲大饑周族黨活

人頗多服闋欲赴京以疾卒

張正字擇中原籍蒲城人年二十餘以貧廢學鬻紙熬屋聞二曲李先生倡明正學慕之乃北面受業焉後因與豐川徵君往還移家鄆縣占籍秦渡里平日雖居肆資生而手不釋卷爲人端方慎密邑士多愛敬之晚年乃手錄其自得語爲就正錄藏於家見通志子慎儀以鄆籍登雍正己酉賢書遂爲鄆人云

魯登闕字聖居邑處士嘗師事整屋李中孚先生以古之學者自期後好撫琴著琴

譜又著初學規要

李恕谷  
麟序

及會心編簫譜引等書藏於家年七十一卒

王孫謀字翼子由進士初知四川彭水縣丁內艱起復補貴州印江縣以廉能行取吏部主事陞考功司員外未一年卒於京師爲人高岸不隨人步趨累世以善書著名至公尤稱能品而功業不究識者惜之卒後子孫竟無尺寸遺業其介可知矣

王開生由舉人授湖廣安鄉知縣方赴任中途而卒爲人質實無僞鄉里稱之

王之驥雍正間任漢中褒城縣訓導甫二年即寄俸於子令構祖祠三間祭田二十四畝諭曰此吾二年中節口縮腹所留也若雜用當以不孝論其子即尊諭爲之議者以爲尊祖睦族於今僅見云

焦繩武字萬年泰興令桐第三子性孤介年十八爲縣學生抵父任僅四月父卒遺囊蕭然泰興士庶以千金爲賻繩武悉却之恐累其父之廉也乃貸於同鄉商人扶櫬而歸此後家計愈艱與諸昆弟晝則力田夜則讀書同心孝養祖母怡怡綽綽絕無外營繼而授徒家塾以窮經爲要食餼二十三年瀕歲薦卒年七十有六所著周易叅補春秋翼註藏於家無子以弟孫本立承重焉

張宋薪字橫宗榜名又載以避橫渠先生諱故易之好學攻文勤於著述由舉人選授華州學正培士風重實學不責諸生束修蓋廣文中皎皎者值大計撫軍桂林陳公列入卓異薦云學有淵源卓然師表引見陞授項城知縣廉靜慈祥無慚儒吏望誤歸下帷理舊業不入公庭不履市塵允爲儒林雅望卒時年七十有五所

著有奈園節抄四卷荆棘林四卷古文近取三卷舊志未載近時陝西文獻輯徵處彙入關隴叢書

賀從字吾好天資穎悟弱冠爲縣學生攻舉業研窮經籍頗號淹通尤邃於易制義以大家爲準繩登賢書連試禮闈薦而不售仍壹志經學平日寡言笑慎步趨不輕取與不妄交接見者皆敬禮之選授狄道州學正是時大學士桂林陳公在撫堂提試閱其文甚鑒賞因問所學知其爲醇儒也嘗稱及焉從至狄道謁楊椒山祠慨然有講明正學之思每謂諸生曰先賢可學而至其著河州學語諸生亦以此諸生多遵信焉乾隆壬申卒於官年五十九所著有易經管窺詩文稿

姚海邑處士自幼嗜讀書不以貧累其志於周易頗知觀玩彈力數十年稍覺有得著易經體傳四卷王通判又樸序

魏樞字北曜邑處士貫一子自少篤於實學以伯父生員聲一早亡無後而樞奉父命爲之後恨不及事其生也嘗賦思怙詩三章觀者擬之蓼我不忍卒讀事嗣母

集 卷 二 三  
一  
孀節王氏以舌耕供甘旨其事本生父母也雖已析居而色養備至與從兄弟歲貢生權縣學生梁友愛甚篤而皆蔚負文名當時試於乾州棚者莫不知有鄂之三魏焉平日常下帷以諸生入公門爲深恥教授鄉里亦即以是爲諄諄故遊其門者多謹飭之士乾隆三年膺歲薦後任淳化訓導某監生暮夜投金欲逞憤於某寒士樞即擲其金面責之由是諸生無敢以私干者而師道立教化行矣任六年歸年八十卒

李執中軀幹魁梧天資醇篤自幼從師頗通文義以家貧食糧本省督標下乾隆戊午由行伍中式武舉會試不第兵部揀選發本標下學習限滿選授武功千總歷遷湖北黃州協中軍都司僉書平日嗜讀周程張朱講學之書每蒞任逢朔望必率弁兵同集公所宣講聖諭使之身體力行又捐俸爲兵丁子弟延師課讀以有勇知方爲訓於營伍大有振興故歷任之所兵民甯謐卒後其子武生汝叡爲君盧墓三年亦可以知其教家之大畧矣



賈自公字應台幼失恃祖母王氏撫之自公常往村塾竊聽書聲塾師范顯基見而異之即令來學夜讀書苦無膏火每侍祖母床側暗中溫故有疑字以香火照之弱冠爲縣學生事祖母甚孝謹乾隆戊午冬祖母病在床適值地震不能起自公侍側祖母遣之出自公泣下必不肯出俄爾屋傾半間祖母幸無恙家人急扶去未幾屋之半間未傾者亦傾人以爲孝感所致後登鄉賢書教授鄉里從遊賴以成名者頗多潼關楊道臺慕其文行聘之再三自公以桑梓爲重不就知者稱之嚴思義字鼎臣縣學生鄉飲介賓自幼喜讀孝經及朱子所輯小學每遇生辰輒悲痛焉其教家也以孝友力田爲本八世同居食口常四十有餘而思義律身待物素孚於鄉終身惟知教授生徒年八十有六未嘗以片紙入公門非知自好者能之乎

閻登雲字望卿又字雨田縣北鄉鑿齒村人生而穎慧性端謹弱歲即有神童之目嘉慶庚戌入黌序戊午登賢書壬戌成進士分發江蘇即用知縣補金匱縣其地

民物殷繁訟牒填委公臨之以簡而人卒莫能欺居恆屏絕請託加意學校在任一年卓著循聲康述園方伯稱其諳練公勤章桐門中丞褒其明幹樸實調蘇州吳江縣下車伊始拏訟師逐博徒禁淫祀剔漕弊月餘而境內肅然比及一年即引疾歸居家不畜童奴布衣粗糲無殊寒素而里戚中有無力婚葬者輒飲助之優遊林下蓋二十餘年如一日也道光庚子正月卒

梁瀚字海樓小豐村人清初少保男爵江南提督敏壯公化鳳六世孫入庠後從整屋路潤生先生遊與同門朝邑閻丹初相國以學行相砥礪中道光甲午科舉人丙申進士翰林院庶吉士准軍機處行走歷官至都察院左都御史戶吏兵各部侍郎並充殿試朝考閱卷大臣顯宗御極素多病朝政悉委肅順端華二王權傾朝右內外大臣相依附公介然中處不激不隨與端肅雖不相洽然亦無隙可乘時河南巡撫出缺肅欲任公公婉謝之故端肅正罪時牽連大小臣工數十百人而公獨免初中英以煙禁搆釁英內犯文皇狩熱河京中臣民逃避一空國家無

主人心惶惶英兵據圓明園勢甚洶湧國危在呼吸間公隨恭親王後出入敵軍折衝尊俎凡三返和議始定未幾陝回亂作公外憂國事內痛家難心力交瘁遂以是獲病卒年五十有八子四積樗庠生積榎廩生二品蔭生四川候補同知曾任茂州蒲江二縣事積檀世襲雲騎尉積樟光緒戊子科舉人截取浙江鹽大使賈聯芳字棣堂留犢村人蓋屋路潤生先生高足弟子道光甲午科舉人大挑知縣歷任山西交城石樓徐溝趙城等縣所在均有政績大計卓異升授霍州直隸州州處萬山中爲川陝入京孔道時伏莽徧地公嚴辦保甲兼捐俸募勇巡緝匪氛以靖行旅便之同治壬戌陝回煽亂焚殺極慘凡避難至署者悉贍之復命其子持廉俸餘資遍視戚黨之困苦顛連者量爲賙恤李文忠公督師入陝公辦理後路糧糈積勞保升知府並賞戴花翎又令隨營差委而公宦情久淡急流勇退而歸論者多惜之公性精明寬厚折獄如神趙城洪洞兩縣爭水利戕十餘命蔓訟連年公詳勘地勢曲盡情理而案始定兼豎碑以息爭端兩造咸服遂合資爲製

石亭以頌德焉晚年詩酒自娛著有圭峯詩抄子鑫另有傳

崔志道字劭方崔家灣人年十六入邑庠食廩餼咸豐辛酉拔貢本科舉人同治紀元連捷進士點翰林院庶吉士授廣西鄉試正考官又補日講起居注官時巨璫

某恣爲非法公上封事奏摺見藝文門兩官嘉納而嚴治之光緒丁丑秦薦饑約諸侍御

聯銜請賑奏摺見藝文門得旨頒五萬金復倡集千金以助之己卯簡授四川雅州府知

府蒞任勵精圖治會名山縣某令務苛斂廉得劣跡十餘事賊以萬計飛牘糾劾

總督丁文誠公謂僚屬曰蜀道府向仰州縣鼻息崔守此舉可謂片羽吉光壬午

奏權寧遠府事寧僻在蠻荒吏治淆雜首革胥役營卒陋規數千金吏治始清省

局制幣專恃寧銅而銅輒苦滯公剔除積弊產銅倍蓰又創育嬰牛痘等局全活

甚衆滅蜡虫土貨之征商困始紓任寧五年先後裁病民項又不下十餘萬旋回

雅任寧雅文風不振公爲助膏火定課程以教之更拔士之尤彥者入署教課已

丑鄉試榜首余良遇即出其門一時傳爲盛事雅治沿邊各土司每襲職餽遺動

以萬計公詳核世系昭穆相當即飭繼職夷民莫不欣欣感頌去雅時郡人環轅泣留不可迺於雅州書院之藏經閣爲位而尸祝之旋里後青鞵布襪見者不知爲曾列清班膺顯仕者戊申年卒子向源光緒間以童子冠軍入邑庠侄向淵以庠生膺省第二屆議員向濤歷充國民軍營長餘多高中等校畢業生至今人口百餘猶同室共爨不愧書香舊家民國辛未縣長強君爲贈十世同居匾額以旌異之各機關咸製詞慶祝遠邇慕之傳爲佳話

趙凝字績臣北龐村舉人大挑知縣籤分四川初署蓬溪縣事甫下車廉得會匪冒頂唐老么周麻子李老虎等十餘人夤夜親督役數十名直搗巢穴當場斃匪數人擒獲十一人均置之法漏網各匪鳥飛獸散無敢潛匿者自此居民安堵行旅不驚捕盜之功達於上峯任未終年調署石泉石泉處萬山中匪類甚衆出沒無常公編保甲練民團復親詣各鄉按冊稽核不數月間闔境肅然旋調雙流調合川其治大畧與石泉同而合川有李周氏之獄興訟六七年矣李豪富也原被搗

巨賫路當道故前數任忽出忽入初無信讞公廉得其情嚴防苞苴一訛而兩造欣服其明斷類如此連宰數邑廉能大著上臺乃檄補巴縣巴巨邑也萬商輻輳繁盛甲於合川即訴訟一端每日不下百餘起案牘勤勞每至不遑暇食有謂宜節勞者曰事非予措置心不安也故蒞巴三年積勞成疾歿後各縣豎去思遺愛碑而衣傘匾額尤難枚舉去

張鑑堂字海若上馬營人咸豐辛酉中式第一名舉人同治初花門亂作督辦城防兼辦西征後路糧餉多忠勇公嘉其績保以知縣用並加同知升銜賞戴花翎戊辰成進士分發河南歷署汜水羅山西華固始陽武夏邑等縣實授滑縣知縣所  
在稱治著有古蓼同社吟詩草行世子僧延另有傳

賈鑫字荆三聯芳長子附貢生以賑捐議敘知縣特授四川江安縣甫抵任值髮逆石達開全隊入川鑫飭四鄉辦理團練兼調團中精壯者入城防守鑫督隊晝夜巡梭衣不解帶躬冒矢石城屢瀕於危悉賴憤激團士保禦卒克不陷然已二十

餘日矣賊退上游嘉其績保升同知銜賞戴花翎縣治濱岷江往來如蟻人類複  
雜號難治蠡日坐堂皇治理無冤抑者一時咸呼爲青天豎碑餽衣送傘尤難計  
數同治甲戌朝廷飭川督運貢木高者十九丈矮者十七丈木巨非荒山窮谷莫  
由產縣紳咸勸勿膺此差蠡毅然任之木已達雅州河奈風狂筏折竟沒於水而  
死事聞朝廷賜卹並予雲騎尉世職士民惻悼其輓聯有云憶昔時勸誠諄諄云  
不我可歎此日煙波渺渺將奈公何觀此可見其梗概矣

王經字文閣金篆長子也咸豐辛酉舉人運同銜四川補用直隸州歷任通江裏塘  
等處聰察強毅能文章嫻吏事所至有政績先是通江有土豪武斷鄉曲官不能  
制坐此罣誤者數人經到任上台屬致其人人爲經危之經乃誘而擒之檻送省  
垣不動聲色而大憝用除一時服其胆識後因事罣誤不克竟其才惜哉子焱離  
附生四川廳候補府經歷孫駿聲保薦直隸州

王兌字西侯谷子禮人咸豐辛亥舉人癸丑進士點翰林院庶吉士丙辰散館授江

西進賢縣知縣不屑小就改捐郎中籤分兵部同治壬戌回逆倡亂兌以老母家居星夜歸督辦團練誓必殺賊兵敗遇害朝廷無一字之褒惜哉

陳樹楠字筱圃同治辛未進士即用知縣籤分湖北權咸寧縣其地民物殷富案牘填委公御之以簡事不勞而政理邑育材書院歲久失修捐俸建築添籌膏火於常課外擇士之純謹俊秀者三十人別爲上舍優給膏資每月終在署親爲督試帖括之餘兼教以敦品勵行期年之間士習丕變政稍暇單騎減從周歷鄉里每至一處邀村中年高者數輩圍坐樹下省視耕斂兼咨疾苦雖無赫赫名而仁慈已洽於閭閻矣權篆二年調署蒲圻咸民稟留格於例不行蒲固盜藪公嚴定章程清查保甲且邀士紳之幹練有爲者分段核稽盡法懲治不數月四野風清閭邑豎莠除良安四字碑於通衢以紀德政居蒲年餘咸民思慕莫忘乃隱屬有力者暗爲周旋遂得實補咸寧在任三年寬猛相濟民尤德之同治癸酉光緒丙子已卯三科調文圍簾官兩科榜首均出其門人尤豔稱云



賈錫智字愚若留犢村人道光乙酉科拔貢本科舉人補邠州學政學品兼優書法精妙到任訓飭士子以敦品力行爲先每月朔率諸生謁先師後講四子書近思錄各數章望日課詩文究楷法皆就已之所心得者詳剖其奧竅在任數年士習爲之不變邠州學記其所手書規模謹嚴至今人猶摹倣不置云

張玉德字比亭邑庠生性鯁介年二十後肄業省南小雁塔寺往往終歲足跡不入城工書法得率更神髓尤善行草嘗製雁字回文詩數十首遠近爭抄一時紙貴與盤屋路潤生友善其時巨室大族每製碑版潤生爲文比亭書丹其最馳名者經呈寺法派碑韓時鳳墓誌銘爲特出滬上石印傳播通國人咸羨其肥不露肉瘦不露骨珠圓玉潤尤爲巨製會垣晁氏堂額劉文清所書後數十年比亭書其門匾魄力沉雄天骨開張僉謂可與文清相頡頏惜乎流寓省垣邑中所藏僅回文詩刻耳

王建燾字載叔性剛直道光中應童子試一不售即棄之學問淵博終日手不釋卷

動必遵禮一舉止亦不苟書法古勁蒼老酷似其人草書則龍跳虎踞神妙直追十七帖又善爲學篆書忠孝節義字於壁生平嚴守絲毫不敢逾蓋獨行君子也

崔牛權字紫閣崔家灣人布政司理問以姪太史志道貴貤封中憲大夫性聰穎嗜讀髻鬢即酷嗜太白夢天姥吟遠離別等篇果州有祖遺絲業折閱幾累家生權毅然欲整理年十五入蜀擗富若成人握算餘暇輒手一編邀蜀名宿結社聯吟寒煖無間身羈市井隨意題詠耆儒每談莫及如閨房即事云誦經妻問字貪耍女翻交山行口占云水清能鑑影花好不知名亂後有感云世亂人情薄年荒飯量嘉渝城阻雨云幸有主人知客意窗前曾不種芭蕉聞弟某嗜煙云錦幃戲添燈一穗火雲烘吐月三更其日嘲云案有琴書不算貧艱危歷盡骨嶙峋醉死便佳何用埋誰勞荷鍤效伯倫等句人皆稱之尤嗜酒每朝非數瓶吟懷終莫暢故其姪太史北上留別云多加餐飯能勝酒太露鋒銳最累身月夕花晨且吟詠時

時醞釀一腔春蓋紀實也著有紫閣山人詩抄

王星垣字象三崔村人邑庠生援例爲府經歷需次河南久之自知性慙不能諧際人遂棄官歸築別業闢地數弓蒔花木竹石客至對賞名葩若羲皇上人耽吟詠語多逸趣世傳其咏石磨一聯云回回路不知遠近個個人能轉乾坤妙語天成可稱絕唱惜不盡存

袁濟川字汝舟野口村人咸豐己未科副榜性和平不爲崖岸讀書談道至老不衰主講明道幾十年訓誨不遺餘力一時士子有如坐春風之樂邑宰王驥衢稱其淹雅頗推重之年七十九歲卒

王舟字濟臣谷子磴人咸豐辛酉舉人好古深思老而彌篤行文不假思索有水到渠成之妙每執卷高吟聲琅琅然若金石八十後猶然矍鑠和氣靄然腹有詩書氣自華信然

梁鑑字鏡潭梁家村人提督敏壯公之裔同治丁卯舉人署城固儒學訓導又任洛

川縣訓導居官以廉潔自矢身俸外未嘗有所取及歸田清貧如故在籍教授生徒計前後及門士名登仕版身列膠庠者百有餘人性伉爽嚴而不苛講學以力行爲先多所成就晚年主講明道書院年六十餘卒長子廷椿清生員次子廷棟清拔貢生

賈積中字瑩圃歲貢生留犢村人賦性純篤博極羣書淡於名利終日莊坐不苟言笑設帳四十餘年常謂文以載道代聖賢立言靡麗之體必痛滌之所立學規四方奉爲楷模門下多知名士晚年主講明道書院士風爲之一變年八十餘卒

張僧延字永齡光緒癸巳科副貢解元鑑堂之子捐內閣中書補缺後截取同知江西建昌府同知上游屢委辦要案奇其才疊保以道員用惜未盡其才而沒

孫嶽字冠五候選訓導留犢村人力學敦品孝友睦婣家清貧無守土僅恃舌耕值歲歉饑殞恆不給有饋遺者斗粟寸帛皆不納而內剛外和鄉里咸敬禮之教授生徒以器識品行爲先不屑屑章句之學以故設帳數十年門墻濟濟後學皆景

仰矜式云

王瀛字仙洲寧羌堡人候選訓導少孤貧刻苦力學年二十五入邑庠旋食廩餼光緒十八年貢入成均賦性骨鯁不阿附貴勢管理明道書院時山長某一不合則拂然去又嘗襄辦賑捐監築縣城卓著勞績邑宰劉聲琦保以六品銜先後教授生徒垂四十年循循善誘游其門者類多知名士晚年爲建德教碑列名者達百餘人又慷慨好義光緒六年歲饑出粟若干石以貸鄉黨之貧乏者村人德之贈以合里食德匾額壽八十歲卒

王綬字組珊崔村人候補儒學教諭金篆少子也幼聰穎美豐姿十三歲入邑庠文名籍甚一時有才子之稱工詩賦諳音律爲文精深簡淨每篇一氣呵成書法摹倣歐陽間架結構神形逼真而筆力勁健尤能自成一家惜數奇秋試九薦不售光緒戊子己中式矣復因咸寧首縣脫榜易之豈非命哉年四十餘即絕意仕進淡泊自甘日潛心於程朱之學研幾精微晚年尤深嗜二曲集至手不釋卷閒惟

焚香默坐息心靜慮而已年六十三歲卒所著有王氏族譜及詩文集若干卷無人付梓多致散佚宣統三年續修通志飭各縣採訪邑宰繆石逸聘爲主筆甫脫稿而革命軍起亦遂蕩然惜哉

王縉留犢村人附生篤信好古有至性祀先一遵朱子家禮祭器不假人有過恆面斥之退無後言里中稱爲長者生平好激揚風節年踰古稀邑婦女之有節孝行者嘗不遠數十里扶杖往訪自爲傳記蓋獨行君子也

孫沛福字澤宇留犢村人副貢生博聞強記兼精歧黃爲人簡易淡泊雖甚清貧與人接談輒關心於國計民生初不以家計爲念業醫數十年未嘗計謝蓋樂道之君子也

趙鴻漸字達九縣北街人監生勤學好古兼精堪輿父愛棠性豪侈宦遊歸田鴻漸事之能得其歡心父沒後舉父服御器物另置夾室以爲紀念恭儉自持生平未嘗衣帛鞋襪必子婦手製謙冲儒雅與物無爭以堪輿名於世遠近爭延之卜地

相宅一時推爲獨步而無貧無富終其身不受謝壽八十六歲卒

劉大鵬字雲九澇峪口人光緒丙子武舉幼奇貧習商業好讀書逢人問字求講解久之漸通文理同治初髮逆至舖東以六百金匿櫃下倉卒逃已而慮爲賊所發募學徒中能取者莫敢應時大鵬年十六奮勇攜刃暮夜潛歸出入賊伍中瀕危者屢卒囊之來舖東深感激之獎百金不受由是頗蒙優待亂定後奮志立功名握算餘兼習武藝光緒初入邑庠縣宰王驥衢深器重之留署教子侄射大鵬美丰標善詞令先世自其祖若父皆以武舉歷署游擊及守備詢之知將門則驚曰丹桂固有根也贈有武將家風門楣再廣文人品格神骨雙清之句後撥武科授武信騎尉兵部候選儘先千總升吉甫查南山礦務委大鵬協辦旋以與邑宰某意見不合辭卸性剛直不拘小節與人交有過必面規不少徇而舉止儒雅不類武人人咸重之

許燮輔字堯臣同治己巳縣試第一入邑庠嗣卽絕意進取不以榮利爲念好讀程

朱書每發一論輒透宗旨非託之空言者比其友顧祖香欲偕入左文襄幕府燮輔一言却之其冲淡如此

張文俊字子杰鄭庄人清廩生家清貧好程朱學嘗從三原賀復齋先生遊不屑屑章句務以力行實踐爲歸究心性理兼精算數明測繪光緒中曾徧歷邑境實地測勘繪成縣疆域圖一紙付梓刊行境內山川城郭道路邑落瞭如指掌邑人至今重之生平恬退自處教授生徒循循善誘常業外必令兼習算術鄠人士之明習數理蓋自文俊始云

周命新字鼎臣清附生言行有方取與不苟工八比爲文清刻簡淨獎掖後進不遺餘力一時科名多出其門若景凌霄凌霞兄弟皆其高足弟子居恆精勤自勵年七十餘猶手不釋卷家清貧不求進取終身教授晏如也時論以爲有道學風

張毓秀元王村歲貢生家貧力學不樂仕進壯歲即棄去制舉業專研究岐黃故於靈樞素問諸書頗有心得對症發藥輒奏奇效晚年步履艱難造門求診者無虛



日一時推之爲醫中山斗年八十餘歲卒

賀九成字丹亭南龐村人以貧習岐黃業於醫家言頗多會悟能預決人生死而用藥必將之以敬以故十病九愈遇貧難者尤極體卹至助以藥資里人爲贈匾曰仁心壽世

蘇永榮真守村人自其曾祖祖父及永榮皆以醫顯永榮則尤爲青出於藍自備一欸段按日計程度病者之緩急輕重次第以至往往日診數十脉不厭也其耐勞苦有足以風世者

夏爾儀字子敬定舟村人賦性沖淡好古深思自其父承道即以醫著承道每至病者家不煙不飯診視畢即告歸從未受謝數十年如一日爾儀自幼受讀時即從父兼攻方書研脉理久之豁然延者踵接其父以年老不出門庭爾儀繼之延醫者無貴賤貧富老少必赴且終其身不受謝亦如乃父然往往至一村轉相接引數日不得一歸其家渭瀕一帶頗利賴之

李兆南白雲堡人精岐黃診脈能判生死言十九中人皆知其爲國手而不知其通拳術也回亂作邑聯合堵禦者千數百人一戰而潰死傷枕藉兆南持鎗單身賊叢中殺出重圍一日黎明賊猝至家人促之起不起鼾睡如故及賊入門始從容撚槍徐步出賊亦素聞其名相戒不敢犯由是賊盤據鄉村數十日兆南或出入若無事然蓋兆南善六合槍法相傳得自某僧生平不談技亦不輕授人

萬景霽字錦章五庄人以廩膳生教授多年其門下士多入庠食餼亦一時之學品俱優者

崔致祥字瑞卿化羊東堡人性嚴正端方有威儀年十七持家務十八充總約排難解紛數十年村中無訟事尤敬斯文家雖貧必令子弟讀書凡士紳之公正者多與之遊家人四十餘口而多年不聞詬誶聲祖母病嘗痰以辨寒熱子姪十餘輩必令各習其業家無閒人民國初元辦學校一所使鄉人子弟無資者均得就學可謂賢矣

鸞象鼎第五橋人清廩生與張比亭友善寓情詩酒題有紫閣凝祥匾額超拔飛舞  
又有名園亦綠水野竹上青霄未識南塘路來在第五橋之句人多稱之

王清漣 字鷺洲三過村人歲貢候銓訓導爲人器宇宏深文章博雅弟家珍文尤  
精鑿邑中推知名士有林瀛杜愷王家珍之稱咸豐末年回髮變起四境騷然無  
復仕進之志兵燹後教授生徒誘掖多方至於攷正音韻剖析經義尤非他人所  
能及以故四方來學者衆一時及門先後入邑庠食廩餼者達數十人所著有王  
氏家乘行世亦云齋詩文集若干卷惜無力付梓散佚殆盡矣

王恆晉字錫侯縣北街人性孝友外和而內介清光緒甲午舉於鄉庚子補授華州  
學正到任後嚴教條免贄餽捐廉俸開月課獎勵後進不遺餘力一洗清季學官  
除索贄外無所事事陋習會兩宮西狩州牧李嘉績聘請襄辦皇差費省事集迨  
辛丑歲又大飢州牧劉崐秀又以賑務委之全活無算督學沈淇泉巡撫升吉甫  
俱廉其賢會銜明保奉特旨授直隸甯津縣知縣該縣民風好賭輕訟公日坐堂

皇聽斷之暇親巡會場躬捕賭犯賄風立息又舉前任積案日夜考較未月全結政簡刑清頌聲載道詎意爲政未逾期年其兄恆震棄世聞訃慟哭水漿不入口者數日立即託詞修墓請假開缺去甯時百姓攀轅不遂又製萬人衣傘祖餞泣別時袁總統爲直隸總督查知其篤於天倫公民國壬子覲見時袁猶溫語及之比葬兄後柯中丞逢時督辦八省土藥統捐素悉其廉能俾綜核陝局收支時清憲政初頒吾陝創辦商務教育等會公提倡之力居多宣統庚戌公舉爲陝省諮議局議長時官府以武功縣民抗拒禁煙幾釀鉅變公冒險往諭始平和完結各縣常平倉向歸官管累民提議由紳接管以杜積弊凡爲地方謀公益類如此辛亥省垣兵起秩序大亂公以議長資格謁軍政府張督曰政當以安民爲先否則一赤眉也張督大悅留與計議發倉止殺全活甚衆會甘軍大舉入陝潼關三次不守議者請棄會城南遷公曰長安萬商雲集根本地也何捨此而自取滅亡遂止及遜位詔下各軍亦退嗣充銓敘局長兼顧問院長贊襄民政事求實效不務

虛名人故鮮有知者民國元年大局雖定中央與陝省事多隔閡公以政治代表奉派入京謁袁總統詳述陝西情形京陝自此釋然並聘爲總統府政治諮議吾陝一切民隱始克上達在京歷任約法會議議員政治會議議員特授三等嘉禾章進授二等大綬嘉禾章四年春川隴爭界相持不下政府不能決得公密陳是非立判袁公韙之五年由京旋里陳督軍李省長先後聘爲兩署顧問辭謝而返六年冬陝亂又作遂避地省垣七年兼督軍省長劉公又聘爲選舉事務所所長八年選政告竣適陝大飢又照會辦理賑務九年冬全國督辦賑務處成立督省兩長以請欸推公北上爲陝數百萬災民請命奔走部院暨內外各慈善團體爭回賑欸數十萬元災民利賴嗣水災又起當道復以賑務相委先後四年昕夕從公不敢告勞乃事尙未結而疾作矣自十一年七月抱病尤日日辦公不輟迄冬病益劇始請假歸家調懾時極困頓凡親舊門生來視疾者猶命兒輩昇坐床下整躬接待如恆至十二年二月二十二日申時辭世前夕神氣清明猶自撰挽章

五聯以明宿志卒年六十有七

景棟字幹臣縣南街人少微寒以商業起家爲人爽直慷慨好急人之難念先世書香尤重斯文雖極窘迫供子輩讀書不少吝待先生忠且敬故諸子若凌霄凌霞等科第連綿名震關輔景氏遂爲鄠大姓有以也

王恆震字曙峯縣北街人恩貢生方正自持言動不苟雖居城市足迹未嘗入公庭治家尤嚴而有法於弟恆晋友愛甚篤對子侄輩有過不少假蓋獨行君子也

張慶麟字閣岑義行世益少子也幼歧嶷好讀書有遠志弱冠以院試第一入邑庠清末創辦初級學校頗著成績改革後被選爲縣議會議長嗣以縣中駐軍支應浩繁復被舉爲城防局長至第二屆議會成立又被選爲議員兼充勸業所長凡支軍籌款以及因革建設諸要務悉諳練老成動諧機宜而人無訾議者生平排難解紛不憚煩鄉黨戚友有爭訟者則居中調停委曲勸解必使兩釋而後已故終其身村中少訴訟事人以是稱之至其沉毅有識遇危難事他人所畏避者而

挺身直任卒能委婉周旋不至僨事尤爲所難云年五十五卒子三長文錦業農次文鑑保定軍官學校畢業曾以中校充陸軍第三師主任參謀暨教導營營長次文鑄中學畢業孫二駿烈駿章俱肄業學校蘭桂競秀論者以爲息事寧人之報

孝友

宋

雍熙中有京兆鄠縣民甄婆兒母劉與同里人董知政忿競知政擊殺劉氏婆兒始十歲妹方襁褓託隣人張氏乳養婆兒避仇徙居赦村後數年稍長大念母爲知政所殺又念其妹寄張氏與兄課兒同詣張氏求見妹張氏拒之不得見婆兒憤怒悲泣謂兄曰我母爲人所殺妹流寄他姓大讐不報何用生爲時方寒食具酒殺詣母墳慟哭歸取條桑斧置袖中往見知政知政方與小兒戲婆兒出其後以斧斫其惱殺之有司以其事上請太宗嘉其能復母仇特貸焉見宋史孝義傳

明

閻性廩生幼聰敏事孀母承顏順志甚得歡心母病飲膳湯藥必先嘗後進衣不解帶者累日及棄養哀毀異常時鳩鵲並巢庭前人謂孝感所致當道以綵幣旌之王應臻秦渡里人家甚貧貿布爲生以事二親夜常數起問安歲大荒倍力求給一日養不繼潛剪髮造其隣易粟食親應臻與妻食糟糠里人感服稍調之得濟於厄母亡事繼母亦篤又有拾金還主事督學旌其門且給粟優獎焉見通志

張被安太里人父紹芳早卒母王氏在堂被問安視膳未嘗一日離膝下與兄補析產拈鬪被得大宅竟讓於兄里中無賴子橫逆相加直受不報自少至老足跡不至公門懼辱親也邑令聞其賢詣其家扁以旌之

張補字退思紹芳次子爲邑庠生動遵禮度孝友本於天性鄉評重之

王遷木字慶軒安太里生員早孤事孀母色養備至潛心於學方嚴介直不妄交不干謁權貴鄉里無少長咸敬畏之



王璽萬歷四十七年由縣學生舉孝廉崇禎二年選授山西翼城知縣領憑文訖以突疾卒

騫高第字雲翥新陽里生員性至孝友慷慨好義崇禎十三年大饑傾粟賑濟全活者甚多學憲汪公扁曰宏仁高士

清

王永圖字伯固安太里生員爲文典瞻性醇謹雖盛暑不去衣冠接人無少長咸敬之居家孝友年七旬每念及二親輒痛哭流涕待弟姪篤愛時人推爲先輩典型所著有永思草鵲鳴林杜編角弓怨鰥吟諸書見通志

段作棟字國柱新陽里生員性和厚持身莊雅事親孝子堪爲後進楷模

馬之驂字次中美泉里廩生外和厚而內方正取與一介不苟入學數十年足跡不入公門甘貧好學蓋不易得也

趙宏嗣字繼世羅天里生員居家以孝友聞與人不較事非亦不干謁權貴耕田之

餘惟知讀書而已

王永清字印武太學生以孝友稱修髯偉幹崇氣節遇人急難輒纓冠救之事過率不樂人知所交結皆一時賢豪當事者知其賢累辟不就惟觴詠以自適焉

王先身中原里生員少好學持躬狷介順治二年賀賊陷城奉母閻氏避賊賊至挺身護母與其母俱斃賊手學使鄴令俱以扁旌其門見通省志

聶宏美泉里人家貧以市酒爲業輒易甘脆養親所居肆去家頗遠稍閒必歸家問父母安否雖祈寒盛暑不易母卒宏常宿父榻旁臥起定省家有畜犬客以餅飼之犬即啣飼其老犬人皆稱異以爲孝所感云見通省志

魏國成字元秉渭曲里人少工舉子業長嗜古學勤著述遂不應試精歐陽書法事孀母年已六旬猶依依膝下有老萊子風居喪傾貲爲葬具聲動郡邑時華亭沈繹堂太史遊秦中聞而慕之爲作誌銘

王曠安太里生員漢陂太史之裔孀母張氏持齋好施曠家貧供母雖菓菽必精美

隨母所施靡有不應愉色婉容務以悅親流賊入城曠被擄及歸家母已被殺一哭而絕隣人救之經夕乃甦泣血三年時謂之真孝子見通志

陳調陽安太里生員性至孝父治體居樓會樓焚調陽突入火負父出父子肢體一無所傷人以爲神助父卒調陽僅弱冠兄調元早逝遺孤輔聖甫八歲弟調中甫四歲事孀母魏氏先意承志知母素憐孤孫幼子一切家產盡以美者與之又爲延師取友日夜勸課皆底成立督學使者屢擢其優行云見通省志

王邠安太里人少倜儻有大志不治生業與人交不設城府或面斥人過人無怨者家貧竭力孝親事兄如父友愛諸弟解衣推食人所難能

陳輔聖太學生即調陽從子少孤依孀母形影不離比長制行醇篤與物無忤時人方之陳仲弓母病憂形於色衣不解帶藥必親嘗母一日不食己即一日不食及母死哀毀成疾未逾年亦卒見通省志

魏惟野國成長子字濟川生員修幹美鬚和平淵雅事親色養備至待兩弟甚友愛

一飯必共片時不偕如失左右手督學秦公旌之曰躬行孝友足式鄉閭蓋實錄云

王廷臣仁和里生員家貧養親乏資假館穀以供甘旨母病侍藥餌寢食俱忘鬚髮忽白卒之日哀毀骨立及父病卒哀毀目幾失明

張炯少穎悟善屬文十六爲縣學生邑人咸以偉器期之乙酉賀賊陷城父被執炯挺身衛父賊斫其腦而死督學楊公旌其門曰殺身成仁見通省志

劉龍洲繼母張氏性嚴急龍洲日侍左右畧無忤色父卒後事之二十餘年不少衰以明經授教職兩舉鄉飲介賓見通省志

王忻徵士心敬父也順治初邑遭寇變賊繫忻母拷索銀幣忻挺身護母賊揮刃中其肩幾隕賊平家業蕩盡忻力田服賈奉母承歡伯兄諸生慥苦貧忻分已產贍之仲兄慤妻亡遺二子鞠之如己子焉孝友之稱人無間言見通省志乾隆二年奉旨建坊祀忠孝祠

張玘父彥俊病疇醫不能治玘日夜涕泣忽有一道人曰我能治汝父病須人肉爲引奈何玘即持刀割左股肉一塊和藥父病遂愈

王賢秦渡里人家貧爲人傭供親衣食未嘗少缺或於親舊家遇有菓肉必懷以遺親親未食不敢遽嘗及親卒典身以葬見通省志

王邗安太里生員父病累藥弗愈邗日夜禱神祈藥一日視父糞白即嘗之對兄弟泣曰父病可憂也越數日其父果亡

王壬生安太里貢生漢陂太史五世孫少穎異工舉子業及古文詞每屬文下筆立就父旭愛之曰繼先人餘徽者必此子乃下帷二十餘年歷七試不售舉明經父母已老承顏養志父病革衣不解帶水粒不入口者數日父歿號泣欲從地下自是哀毀骨立數月遂卒

樊邦彥渭曲里人四世同居家人數十口毫無間言有古張公藝風

楊傑然美泉里人其弟庠生時可被流寇擄去傑然出金贖回弟早故二子俱幼傑

然代耕十五年及成立還其產一無所侵

劉雋昭中原里民兄弟二人雋昭自幼即知承順親志恭讓其兄年二十一值歲大荒父歿至無以爲歛請於兄欲典身辦喪具親族憐而助之乃克襄事隆冬與兄御車渡澧水雋昭勸兄坐車上已獨敲冰入水御車而過股脛爲冰所傷血流至足逮兄子思聰成童勸兄令之從師讀書思聰遂入庠而已子漸長其兄亦欲令之讀書雋昭謂子皆讀誰躬耕乎竟使已子終身任農事鄉里謂其不學而孝友殆出於至性云

張立功安太里張養儒長子養儒初娶史氏生立功兄弟四人而亡繼娶劉氏年僅長立功一歲性嚴急往往呵詈諸子百方苦之三子皆不能堪而立功仰體父志惟母命是從嘗手批其頰亦安然順受里中稱孝焉

閻泰臨縣學生義民閻克顧次子也弱冠即以孝名父病篤嘗糞心憂每夜禱於天願以身代及歿哀毀骨立廬墓三年先是母張氏歿泰臨甫三歲即號泣不絕天

性然也事繼母袁氏與親母無殊袁氏目已盲泰臨百方調理禱於神者三月一日兩目復明長兄干城有腿疾痛不欲生泰跪乞進食奉湯藥遂愈平日事之如事父焉待諸弟友愛終身又推恩本族濟其困窮康熙六十年歲饑捐糧二百石族人賴以存活者頗多年五十有五卒士民稔其孝友公舉於縣給匾獎之

屈乃伸縣學生耆民屈宏長子自九歲就傅時同儕有以言戲辱其親者即絕交焉年十三念父營生計於外身受嚴寒即欲棄書改業以代父勞父不許始厲志讀書母閻氏失明十七年乃承歡孝事始終不渝卒時哀毀異常廬墓三月以父命歸遂侍父寢不入內者七年與弟含琦式好無尤年五十得沉疴不肯聞於父臨危惟叮嚀子弟聚百順以承父歡并詳及其父他日附身附棺之事遂逝邑人公舉孝友王令樓堂爲之建坊即題曰孝友坊

王芝秦渡鎮人生員泰來子也乾隆二十三年芝守父墓值隆冬無廬舍痛劇傷肝寒復徹骨始則失明繼而殞命亦可哀也

孫酉峯曰離家祠而廬墓孔子未嘗爲之况無廬而隆冬守墓忍凍以傷其親之遺體者乎朱子家禮葬畢題主後祝文云形歸窀穸神返室堂又反哭奉神主置靈座祝文云敬捧神主歸於靈筵朝夕奉祀罔敢弗虔學者知此義則無庸廬墓也明矣或謂子貢以孔子之沒而築室於場獨居三年然後歸也何歟余曰子貢不得朝夕奉祀於孔子之靈筵也若人子而得朝夕奉祀於靈筵者異是

趙宋安善里民家素貧世以佃田力農爲生宋成童時即知孝養其父與弟寬及宣力田終身相友愛諸子姪宗信等十數人亦相好無尤不分親疎閭門幾四十口同釜而爨其和睦勤儉之風爲一鄉所樂道凡有求貸無弗稱力助之鄉飲公共舉耆賓

杜之蔚與弟之芾友愛甚篤姪應昌生方彌月失恃之蔚親嚼米爲糜哺之稍長即教之讀書遂入庠又能以禮教家子弟無敢違者生平舌耕自作諸生以至膺歲薦後成就人材頗多



王漢邊三過村人鄉人至今稱爲孝子者也少時其父爲仇家劉法所殺母留父血衣匿箱中誌哀思漢邊不知也及稍長法遇赦得免歸演劇誌喜大會賓客漢邊告其母欲觀劇母泣曰兒尙欲觀劇乎因出血衣告之故漢邊誓殺賊不與共戴天乃從鐵工習攻金久之得其技因鍊製鋼刀一口淬礪磨礱極鋒利曰可矣嗣後每懷刃伺法時姚村有嚴寬者貿易澇店市法往焉漢邊伺隙斫之血淋漓奔嚴寬肆寬駭恐擁之出復連番斫之臂砉然下滿市驚散法登時斃漢邊持刀投官府自首原之得不死發佩黑龍江偕其母去時道光九年事也後漢邊在黑省竭力耕田供爲子職且興家立業焉

賈埔留犢村人由增生候選訓導生時母年逾四旬稍長父即見背每念母氏劬勞左右就養倍加小心雖溺器必親自滌洗或止之曰吾恐他人不如我之盡心也爲文清腴有古致設帳村中桃李滿門修脯旣豐甘旨悉備母嘗曰不意吾晚年得兒如此孝順也埔生齒最繁家人勃谿悉癡聾處之數十年如一日

李思敬羅什操人家最貧母病率妻子侍湯藥期年衣不解帶殯後每食必獻晚必親詣墓送燈燭三年如一日後父病久不愈思敬侍之與母同時禱神求醫備竭其誠兄早亡遺侄尙幼盡心教養祝同已出延師課讀不以苦難稍輟蓋其孝友出於天性然也

王紳字書亭縣城人家世書香紳獨業農雖艱辛備至而堂上旨甘未少缺比兩親相繼逝鬻田營葬謀生無計乃於闔閭間逐什一之利堂兄紱綦貧以己業之半給之堂叔母孀居復以所置田並券紙授之不讀書而孝友如是亦天性也

王樸字貞堂附貢生許村人和平謹厚居常少怒容遇橫逆置不校性至孝早喪母每談及輒痛哭父經商畧陽以腿疾歸起居不便日夜扶持不離左右者十餘年其兩叔亦營商歿於畧跋涉間關先後奉骸骨歸以葬叔母三皆寡居竭誠奉事俱能得其歡心於從弟棟友愛尤篤悉以家事委之已惟課諸兒讀歲入不一過問以故內外肅睦無勃谿聲後棟沒棟母猶在委曲承順人多不知其非親子母

亦若忘其無子也至調卹族黨排難解紛尤難殫述光緒十八年卒壽六旬有五子四汝霖邑庠生汝玉歲貢生餘業農蠡斯衍慶鄉中悉以爲厚德之報云

萬粹崔村人與兄美終身怡怡式好無尤美生平嗜酒沒後粹每一道及輒悲鳴哽咽悽惋動人一日攜榼酒餉田者遇羊角風至泣然曰必吾兄也釋擔哭奠再拜而去

劉義成上庄人事親極孝母病篤涕泣不食沒後哀毀骨立與弟福順友愛尤篤李珍直峪口人家貧好學舌耕養親甘旨不缺里人稱爲孝子

趙有烈寫庄人力田爲業兄弟四人和睦無間言無子視姪如己出家貧在澇峪背枋爲生後家道小康溫恤困窮老而益篤年八十餘猶早起晏眠九十歲沒

吳成全家庄人事繼母孝家貧甘旨無缺親所遊處背負而行和顏悅色未嘗違忤年六十餘終

劉二者東澇峪口人也蠢愚而有至性家極貧以樵採爲生母病癱每晨起爲母造

飯抱母便溺飯已將往山樵採以午飯煖鍋內令母可隔欄取食暮歸仍爲造飯復抱之便溺明日往縣鬻柴亦如之如是者數年若一日至性然也

裴思敬裴家寨貢士也幼時敦敏力學事孀母許氏以孝聞友于兄弟力農訓子不求聞達常爲鄉里排難解紛里人德之母沒欲建碑表揚節孝以年荒未果壬戌八月思敬年七旬有一忽得危疾氣絕而復蘇語人曰冥王謂我豎碑大事未竟故送歸由是病愈卽爲母籌劃之夜夢老翁曰此地吉遂於其地豎碑焉亦異矣裴志鴻思敬幼子也性純孝其父病劇志鴻夜焚香祝天願以己壽增父算又聞人肉可療病割左臂肉和藥以進而父病果大愈精誠格天固事理所必有者

陳廷順張良寨人家貧爲人傭工而事母至孝母患痢疾轉側需人廷順日侍湯藥未嘗離且爲親滌溺日凡數次毫無倦容及母沒豎碑表母節操

鄧福益焦陽村人力農而貧守田十餘畝間以肩挑爲生涯事孀母至孝母患尻漏苦流膿血久且不愈福益以口吮之竟致齒牙毀落後有賣藥者臨門一藥而愈

人以爲至孝所感後福益於光緒初年先母而死妻唐氏亦克承其志孝養無間  
張言字慎之小王店人母晚年喪明病癱瘓言雖極寒暑未嘗一日離左右甘旨之  
奉必親自烹調動作有恆凡日用一切其時間與位置均有定數十年無或異待  
弟孝素友愛教子侄輩張弛有法度公舉爲鄉飲正賓子雄藩清甲午科武舉侄  
文華价藩俱邑庠生

義行

明

侯峪景泰時出麥豆二百石賑荒有司以聞賜勅書獎勵勞以羊酒旌之曰義民詳  
見紀事

魏綱通判奉璋之父少家貧孤介不妄取大戶王元飲綱肆中遺官銀二十兩次日  
不知所亡幾欲自縊綱聞之即出原金與之封志如故一時傳其高誼後子貴愈  
謙謹里人咸推重之己丑歲邑人有事城隍廟四方捐貲約千金餘出入其手功

卅

系 系 卅

卅 卅

人物 孝友 義行

三四一

成人無以私疑之者

王振世字安卿安太里生員萬曆乙巳歲大饑與兄生員輔世輸粟百石濟貧載通志振世沉靜端凝遇有橫逆不與之較所著有浪吟草五陵秋古豐八景圖詩并善四體書法

魯潮江中原里人性好施萬曆甲寅歲大飢潮江親詣撫臺請輸已糧賑荒撫臺詢之曰輸三百石乎江少之又詢曰五百石乎江又少之竟自輸一千石撫臺喜遂舉義官扁其門曰惠濟羣生其孫廩生駒當崇禎庚辰歲飢亦量捐已貲濟之又貸隣邑大家糧二百石分給里人可謂不愧其祖矣

王惟祐安太里人萬曆時歲飢司檄輸米七十石者冠服榮身祐少之輸倍其數邑令知其爲人凡公務悉委之事完即退終其身不敢私入公門劉令璞高其誼後爲御史聞祐卒遣使致賻焉

劉堰文義里人少讀書未成性慷慨嘗散雜糧救荒施棺木葬骸骨又輸資建堡修

橋刻勸善羣言行世里人爲之建祠豎碑

趙守文渭曲里人性好施嘗出粟賑飢捐金修堡里人稱爲義士上臺以扁獎之

張惟炳羅天里人遇荒散粟以振貧民邑令表爲壽官扁曰齒德皆隆

王藩花原里生員才行兼優崇禎十三年大饑悉出所有以振貧乏平日焚積券甚多值闖逆作遂絕情仕進詩酒自娛

張篤字漢德美泉里人崇禎十三年嘗施糧百石濟饑其里又遭山寇猖獗捐金七十兩修堡築城里人至今賴之

吳大猷文義里生員率鄉勇拒賊力戰村破被殺時有劉學鑑率鄉兵救援與大猷同死

仝調鼎丈八里生員闖賊西來領鄉兵堵截格鬪而死

張奇英花原里生員拒賊見殺

王福新陽里生員亦拒賊見殺

郭 系 系 志 卷五 人物 義行

三五二

王良志太平里人賊至手刃其驍勇者十餘人賊不得入村因刀柄折爲賊所殺  
劉慎太平里人賊至力戰殺賊十餘人救父出復入援村人被賊射死

靳之翰生員爲人敦厚重義輕財崇禎十三年遇奇荒濟活甚衆入學三十年公門  
曾無片紙後因流冠猖獗辱及其身罵詈不絕自縊死

孫振字公起花原里生員修髯偉貌凝重寡言闖逆僭號向北流涕自是隱避不出  
平生沉酣五經尤好春秋三傳教授生徒務令存理遏欲署邑篆賂公扁曰高風  
儀世

清

賈應隆字棟伯縣學生文行兼優將膺歲薦值逆闖之變足跡不入城市居家教授  
無心進取署公篆賂邑扁其門曰節義流芳

趙守成字秉一渭曲里生員鄠邑學額自明末迄清初從下縣例守成曰吾邑諸差  
役俱從中縣奈何學獨以下縣例乎於是呈請呂文宗始准升中學至今邑士大



夫稱頌不衰素忠信善誘後學不計束修門人遊庠者數十人

全騰霄生員言動有矩矱教授生徒重道誼不計束修從學者甚衆

王圻美泉里生員順治乙酉賀賊陷城圻不少屈以罵賊殺身

張筮字漢卜舊志美泉里生員里人張閻知無辜陷法筮出銀力爲辯冤其人得以不死兄夔故遺子學渠效渠俱幼筮代理其家多方教訓皆底成立順治二年賀賊陷城周令之輔被賊刺傷奸人欲害之筮率族人百餘左右保護至今稱爲義舉

按筮當賀賊劫周令出城時筮聞變即率族衆追至澇峪口岳家堡賊見來勢甚勇兼觀之者衆以爲勁敵也遂棄周令入山而周令已被數鎗昏迷倒地奸民欲乘間害之賴筮得免俄而周令蘇見左右多人惟識筮呼之曰微君幾不免及歸與僚屬曰如筮幹濟洵有用才於是免其本戶雜徭又舉筮爲叅謀訓練鄉兵後周令知有欲乘間害已者詢其人筮終不言

王永嘉安太里人性樂施閭黨有婚喪忠難無不周給稱情又嘗焚積券置義塚順治間知縣趙之璧表其門曰厚德可風

劉必壽劉昶俱中原里人順治丁酉歲飢里人不能自存必壽偕昶捐已貲賑濟不足又出券轉貸隣邑大家得銀二百兩粟一百餘石計口分給里人得以全活同扁其門必壽縣學生昶歲貢生

李發榮花原里人重義輕財康熙十三年蟲傷二麥秋禾弗登又多徭役發榮出金并粟賑之全活甚衆鄉人豎碑頌其德

王珣安太里人素介直不苟賀賊陷城遭其毒虐珣恥之賊去七日不食死

張呆俗以呆爲癡獸字吳村人名不傳幼嘗從學以家貧未試而廢年近三十始娶妻生

一子終身居草屋其婦紡績子彈棉爲生從不與鄉里往還即見亦不輕與之言親知問其故曰渠輩不欲見我我亦不欲見渠渠言非我所欲聞我言亦非渠輩所欲聞相見何爲多言何爲人因號爲張呆聞之笑曰我不呆誰當呆者因以張

呆自號年五十後每歲冬自裹糗糧過盤屋詣李二曲先生請教先生必留住數日嘗對二曲曰某不知學但覺人生以此心爲根本人能將此心如琢玉使之無瑕如拭几使之無垢便是天地間一個光明人不然縱多才多能亦算不得眞人品二曲亟稱之每舉以勵及門嘗親題今人古心四字贈之壽八十餘以康熙二十七八年間卒至今吳村人尙道其生平以爲美談云

屈順秉孝義里人性和厚能濟人之急劉令舉耆賓

杜世芳安太里人持身恭謹導人以善巡按扈公賜扁旌之

張綬花原里人素醇謹鄉黨有爭者皆往質之無不各釋其意而去里人服其公平王和安太里人漢陂太史四世孫父母早亡堂孀張氏憐而撫養和後成家以母事之生平能濟人弗望其報交友不凶終蓋無愧爲太史之後云

張養廉安太里人質直無僞守分力田年逾九十未嘗一至公門

王琛安太里人居鄉謙謹不雌黃人短長邑人重之

全誥丈八里人能周急生平不入公門見里中子弟無賴者輒以大義責之無不愧服

王尙魁花原里人性剛直尙氣節生平未嘗以私害公年八十餘舉鄉飲耆賓  
焦萬水中原里人家素饒與其子穩好善樂施里中喪葬婚嫁有不給者輒出財助  
之邑令屢表其門

張瑛羅天里人約已守法樂以財濟人不望其報鄉閭稱爲善人

高屢昇丈八里人質樸無僞年近八十未嘗以惡忤人嘗教其子曰吾家世醇良爾  
等宜力農守法慎勿生事以貽吾憂里人由是敬之

王志賢中原寺人幼貧未嘗從師受學後因性喜醫藥濟人乃從人間字研究醫書  
久之醫道通文義亦漸明鄉里延以治療者隨手多效即不大效亦不至乖悞故  
志賢之醫於時號爲平穩人爭延之又其性度和平不貪財賂不厚於富貴而慢  
簡寒賤故邑人無貴賤賢愚皆知爲醇厚長者其後漸通養生家言無事輒閉門

靜坐有時與知交談元理亦娓娓中聽晚年家藏經史及方技修真等書盈几案年八十步履尙健鄉人羣以半仙稱之八十七歲偶感微疾卒時神志如常人以爲靜修之驗云

李君愛花原里人天性朴實重本務農樂施予里中有不給者當出已積散之邑令重其人累舉鄉飲賓年八十二終

楊荅安善里人自少勤力奉公及長教子弟守法尤以急公睦隣爲要義生平門無追呼未嘗與人構一訟年逾九旬黑髮健步見者羣推爲人瑞云

山效質道安里人生平醇謹守分畏法和鄉睦隣年九十一卒尤爲盛世淳民蕭廷輔文義里谷子磴人也事母甚孝母歿廬墓三年而性又好施鄉人冠婚喪祭有不能舉者必量力助之雖稱貸弗恤也雍正九年嘗捐麥三十石貯公所令鄉人春出秋收爲每年濟困之資如秋收不足原數廷輔復捐補之乾隆辛卯歲歉又嘗捐米濟貧鄉人多感戴焉舉鄉飲耆賓子祚顯祚昌俱成名

楊作棟字輔天縣學生鄉飲介賓嘗教授義學司約正邑令有公事倚任之性尤仁厚乾隆壬午辛卯兩年皆捐米施粥解囊焚券鄉人勒石誌德而其家百口共食則又有唐張公藝宋陳兢之遺風焉

關志仁秦渡鎮人性尚義年十四途中拾一銀封即書其事揭於門招人認取數月無認取者乃施原銀於城隍廟則十兩有奇也繼而收養族姪郁爲之娶妻始令外居及其歿也復出棺材衣衾殯葬焉又出銀三十兩爲族弟天相娶妻且嘗常給之衣食其厚待族人概如此鄉人王某典其身於大姓有年矣一日大姓威逼贖身王某不堪其苦欲投澧水死志仁聞而憐之代出身價贖歸跡其素行名曰志仁殆無愧云

崔景嶸字巍然邑諸生世居鄆之化羊村讀書談道尙氣節嘉慶戊午春教匪滋擾終南山二月望後由郿縣東竄近山居民相率徙避景嶸令家眷入城而身留里中守廬墓二十九日黎明羣賊突入其室欲奉景嶸爲帥將以肩輿舁之去景嶸

諭以大義誓不肯從賊環跪固請景嶸怒罵賊賊亦怒揮刃斷其兩臂割其耳目  
口鼻後剗刃於腹一身之中幾無完膚時有僮奴數傷而未死遂述其事當時有  
爲立傳者

王思升羅什南堡人性剛勇正直嘉慶七年二月間賊起思升奮勇拒戰死之縣宰  
王賞銀於家又爲立義勇碑焉

張源澈字竹邨五竹村人究心經史掌故不專治帖括中道光甲辰科副貢房師會  
稽顧淳慶以策問淹通深器重之源澈即與顧長公子壽楨締交尋淳慶歿以粵  
匪之亂喪不能歸遂卜葬邑東鄉壽楨因奉母居鄠同治元年三月漢回相仇殺  
戕張文毅公於渭南全陝震動時源澈掌明道書院邑宰沈淦奉檄團練推源澈  
爲紳首源澈引壽楨爲副凡製造軍械募選鄉勇督飭訓練悉壽楨主之源澈指  
揮紳民諭以防守部署初定回氛日急一日東自同州西至涇原南及長鄠雲合  
響應幸邑回民僅城西灰渠頭一村督各團先發殲之內患既除人心稍固是年

八月川匪郭擺擺擾鄆境以城防嚴密不敢犯旋逸去初回匪之亂也殘殺焚掠備極凶悍每至一村不遺噍類至十二月攻縣城堅守禦之焚東關廂而退自是間日來攻同治二年元旦賊以新年防守必懈督率死黨四面環攻自辰至申槍礮齊發勢不稍卻嗣以天晚始去源澈與壽楨謀賊雖屢攻屢卻而駐紮非遙終慮乘隙一逞非誘與野戰大創之不可三月初四日暗調曲抱村鄉團遣團紳袁榮貴等督率練勇誘賊至西郊夾擊之斬獲甚衆賊由是畏而引去全城獲安悉源澈力也尋以積勞病卒

方玉池邑庠生化羊村人貢生方栗祖父也慷慨有志節同治元年回匪突至時方黎明村人皆不之覺玉池登高一呼衆始攜男負女踉蹌以奔甫入峪口賊已至玉池與長子文順據高擊以石賊不敢近四年髮匪又至男婦數百人避入山寨推玉池爲長玉池毅然任之謂守寨不如守山讓賊入山危道也部署既定分據要害以待賊攻木石交下斃賊無數一寨獲安



閻振軍鑿齒村人武進士侍衛麟閣之子身長七尺咸豐八年武舉授漢中府寧羌州鐵樓川守備署沔縣右營都司髮匪突至從某帥駐軍黃壩驛賊游騎侵擾振軍率勇士三十人逐之賊逸追兩日夜至城固之山岔河賊伏出力戰數小時被重傷賊勸之降罵不絕口而死事聞贈雲騎尉

閻振澤振軍從兄也少豪俠有膽畧尤工拳技同治壬戌回變奉令各鄉集團村當要衝可爲縣犄角縣令沈淦委充正北操團長禦賊涓濱鄉民畏縮振澤以身先於是鄰村難民皆依之一旦匪突至三面圍攻振澤帶鐵尺背城以戰二子浩凌持槊侍側殺賊數百賊怒鬻集卒莫敢近振澤曰鼠輩無鳥鎗能如乃翁何賊始從旁覲定暗發一鎗遂被害二子繼沒衆遂潰城陷死尸枕藉轍土皆赤村落墟焉妻王氏在褥聞城陷偕未字女投井死賊退遺衆漸聚時已昏遙見一人屹立不動驚視振澤持械未墜鬚眉如生二子臥側倉皇昇尸而瘞時同治元年七月二十四日也後邑孝廉張鑑堂惠駿上其事學使汪區其門曰一門正氣喪亂旣

平堡人輦遺骸於村西村北擇地瘞之一曰義塚一曰百骨塚宣統元年堡紳集資建節義祠祀焉

閻槐堂文童少從長安柏子俊學有豪氣村城陷與賊巷戰被傷無數力竭被執罵賊死

閻應公禦賊城外創劇其兄應方持矛赴敵鏖戰移時殺數賊圍益堅矢集徧身兄弟俱亡

閻立春少負任俠督團遇敵躍馬前驅持木梃擊賊當者悉斃其父學彥以寇深城急遙呼求援立春遵命登城賊焚城樓父子皆死

閻永安禦賊於城上被重傷其子俊明聞之奮力擲石擊賊父子俱死

閻殿元登陣守禦賊猝至肆口大罵賊怒割首懸於樹枝而去

閻應真素精拳術膺團副長城陷登譙樓被執死之

閻際元賊來舉家藏窖室賊蹤跡之探身欲入際元持械從背後擊之路滑身仆被

刺死

閻有安年八十城陷賊入室有安長衣博帶扶杖出數賊暴虐殘酷之罪賊挺擊死其子大豐持械往護亦遇害

閻德潤少負豪氣嫻武藝團防頗重賴之一時羣賊咸憚其勇城陷闔門死

閻興可素監守城門城陷罵賊死

毛鴻達剛方嚴毅堅強不屈賊至被執罵不絕口賊怒凌遲以死

張克棟字步雲文義村生員鍾嶽之祖父也至性過人雖寄身闖闖間而義氣慷慨有古烈士風咸豐末年克棟歸自金川植花門變起衆推爲團長毅然任之比與賊遇團潰被執罵賊不屈賊支解之其妻盧氏亦於是日投井死

宋士傑武生許村人貌魁梧善騎射嘗畜一良馬鄉試時與衆演騎射衢道間爭馳馬忽前一馬踣後至四五馬觸之悉踣士傑馬至超羣踣者而過之由是士傑之馬名大著未幾回亂作賊中有知其馬者率衆賊來取士傑躍馬持弓當者悉斃

賊大恨去士傑知賊必復至遂逃入縣城助守禦會賊燒東關裸婦人爲陰陣攻城甚急城上火砲不得發士傑覷賊之凶悍者射之連殪數賊賊始退偵知爲士傑益銜之後邑宰張命士傑辦鄉團數與賊戰卒以衆寡不敵被執不屈賊支解之

王寅清少保敏壯公守墳園丁有胆氣以任俠自負往來河北涇原間人咸壯之其在主人前恭謹未嘗少失禮回逆亂守墳不忍他適及賊屯留犢村少保七世孫總兵翼之先嘗糾合鄉團勦賊故賊謀洩憤於其墳村民有與寅善者知其謀密告之使自爲計寅曰吾食此墳之祿當與此墳共存亡翼日賊果至寅挺戈立大門間手刃數賊賊莫能近頃賊毀垣入前後夾攻力盡死

賈光輝大良村人精拳術剛而有禮鄉人咸敬畏之同治初回亂作焚殺極慘與光輝遇光輝執木梃左擊右格百餘賊圍之自午至酉莫敢近後一賊持鎗暗發遂斃而屍不倒猶怒目相向云

陳九益龍台坊人武生同治元年回匪倡亂村中糾團防堵舉九益爲團長嘗領團衆殺賊甚夥時匪營屯紮渭水以北見村人來用巨砲轟擊九益奮勇爭先遂遇害

張世益字受珊定舟村人自幼負氣節有膽識同治元年回亂起世益率村中健兒結團抵禦與賊戰渭北殺賊二人賊引却不敢犯嗣渭濱各團潰敗尸橫遍野賊勢張世益攜眷屬逃入南山澗峪之子房街賊至率山民扼賊於隘口之仙人橋據險擊之斃一賊賊衆引去一市獲安五年髮匪擾鄂境世益被擄已而賊命代索鴉片一賊目監俱往世益賺賊目至某城下已薄暮不得入偕賊宿古廟中晚伺賊睡熟解賊佩刀殺賊遂脫禍亂定後充正北操總約剔除積弊鄉人頌之王棟字草廟人同治元年回亂熾追殺逃人於道中棟字以勇技殿其後賊追急時與賊搏戰傷賊匪多名救人無算蓋裕方技術兼勝以勇畧者也

王全義字宜齋例貢生崔村人精明渾厚樂善好施喜讀書有至性憫其父自冬多

病弱冠廢讀擗當家政任勞怨無偏私分爨時田廬器物推多取少侄拱宸幼失怙恃格外溫卹有薛苞風道光十八年城隍鹵簿竄敗易舊增新約費四百餘金二十六年歲飢捐穀五百石全活鄉民無數邑宰謝公重其人請監修明道書院葺號舍增膏火寒士賴之子金篆優增生孫經舉人綬歲貢生俱有傳

段大全字健齋鄉飲正賓渭曲坊人少孤貧學賈平涼嘗以暇時受讀於其舖長諸生由是得通文義慷慨有至性以幼失怙恃依胞兄大裕撫養故一生事大裕如父賊亂後大裕病沒大全以遠賈不及親視含殮引爲終身大憾其從堂兄大用夫婦瘠老無依薄田五畝不能自贍大全迎養於家每食必有酒肉自市歸必躬詣榻前問所欲而致之後大用年屆八旬病痿痺不能步履者凡三年大全服事愈謹復呈請學使者得賜高年爵以慰老懷司馬溫公之於伯康不是過也又有大賢者於門次爲族兄游蕩異鄉家貧落魄復染鴉片嗜好大全念其垂老無依延之家以地若干區爲煙田使歲吸所入而衣食之者殆二十年人多稱之大全

之父母及諸兄生前頗爲其從叔繩新所虐遇賊亂時繩新歿葬宅後荒園中其子婦兄弟斃於賊者亦藁葬於此亂定後大全一一爲具棺木改葬於先人之兆又爲繩新孫生元營婚娶及生元妻歿且收其遺女其待族黨也如此二甥王正安正康兄弟幼孤貧大全視若已出婚姻嫁娶以及鹽米瑣屑無弗代爲經紀至以已地畀之使耕不計租課者殆三十年其他若戚黨中有孤老無依者必遣人存問告借必量力予光緒三年歲飢人相食渭北飢民求食者率止宿村南廟中大全又出粟若干計口授食全活不少睦嫻任卹之風又有足多者至其於受讀之舖長某每年清明祭掃歸必焚鑼歧路間北嚮叩頭以報篤老未嘗忘也其仁厚爲何如耶大全年四十餘始生子光世弱冠入邑庠後畢業高等學堂得獎歲貢生論者以爲厚德之報云

閩書堂子西山從九品銜爲人伉爽富而好禮光緒庚子歲飢散糧數十石全活甚衆歿後里人匾其門曰遺惠不忘

閩文會兆倫村人鄉飲介賓同治四年師旅飢饉閩凋敝文會於本村人給錢一千並將道安里軍民糧如數代納又於橋工施石板十丈里人贈匾曰寬仁厚德

王世乾字惕若留犢村人幼嗜讀精堪輿學同里有孩提交犯大辟罪不赦世乾賄守卒挺身入囹圄代被拷榜留獄應名俾友歸處分家事與兄弟妻孥永訣人多義之

賀遇霖字雨亭先世邵陽人幼隨其叔父來寄居澇峪口後以木商起家積資鉅萬村南馬尾坡峪每暴雨發水村人恆有其魚之歎遇霖慨然捐錢千緡買山上下地數百畝荒爲森林水患遂息村人感之共匾門且刊石頌德邑令楊玉章爲之記

劉彥芳澇峪口人少好游俠精拳術結納多江湖技師性嗜酒每飲必醉醉後輒慷慨悲歌若有不勝其感者里有爭輒居間調解至挺身奮鬥必求其平而後已陵



轍者雖銜之莫敢犯年五十後忽屏絕葷酒潛心佛學朝夕懺誦非因果勸戒不出口言行雅善較前若兩人焉又以醫道濟人不受餽遺求者踵接無間遠邇必應暮夜風霜不避也清貧自守不受人憐世俗嗜好不少染鴉片尤痛絕之終身不種一莖晚年家益落絕口不言貧年八十四卒鄉里稱善焉

王夢兆字雪年紳少子也以商起家事親色養備至於骨肉親友間尤能有無相通義所當爲必急爲之亦賢矣

趙遵南鄉篤庄人心地光明非義不取曾道拾白金數十兩璧原主無德色年逾四十連生二子皆賢達人以爲盛德之報

孫成章留犢村人與妻節口縮腹以養父母父年逾九十甘旨備供不類貧家性贛直鄰舍有爭得成章居間一言即解充堡約十餘年村無訟累壽九十八歲卒

閻大成鑿齒村人貧無立錫不受人憐耕田自給於本族尊卑之分最嚴年少而輩高必呼之曰某丈兵燹後堡衆重修宗祠典衣送錢數千光緒丁丑歲大飢絕粒

三曰族人溶堂負米一斗與之弗受後別使人送去給之曰此汝至戚某所贈也始受焉其品概類如此

全維疇曲抱村人遷居羊圈庄性勤儉好施光緒三年歲大凶放糧一次十六年又放穀五石餘壽七十餘歲沒

王生金東團庄人勤儉好善光緒二十六年大祲散糧六石餘後澇河水漲救二人出水孝友忠信里人稱之壽七十餘歲終

蕭天德字于純水磨頭人爲人忠厚樸茂家富於資自奉儉約救災恤貧急人患難待以舉火者數十家尊師重學至老不倦年六十餘歲終人咸思慕之

白玉吉西遙指頭人性溫良正直勤儉立業鄉人慕其行三舉總約凡九年而操內秩序秩然合操贈匾曰偏黨俱無壽七十六無疾而終

楊彩黃堆人性豪俠好義舉咸豐時與親戚裴成章宦遊湖南及歸出資在鄉立義學一所村南門外多稻田不通大路每年收穫糞土輒以人負擔彩鳩衆修大路

以便往來至今人猶稱之

屈閔中字大業李伯村人賦性孝友急公好義回亂屈氏宗祠被燬閔中乃以同治九年拮据經營以恢復當日舊觀屈氏先靈始得妥侑其敬宗收族之意有足多者至於修築城垣補葺廟宇以及排難解紛尤爲村人所敬信光緒二十四年壽七十四終鄉里贈懿行牌曰孝思維則德重鄉曲其生平爲人可想見云

胡秀業石井村中堡人貢生性寬仁好施光緒三年歲大飢嘗出粟賑濟活人百餘家鄉里贈牌以表其德

王廷瑞字輯菴石井村東堡人廩貢生性沉重嚴毅以勤儉致富治家遵古禮不從流俗孝友之行里人稱之民國初理本邑財政宿弊革除旋爲城防局長勤慎節用所省鉅萬又修衙署倉房及西關太史橋費省而工固潔身奉公數十年如一日士紳中之不可多得者壽六十餘歲終

姚賢字德臣官亭營人性任俠好義遇人急難必周卹之如婚喪等事有貧無力者

必給貲財以扶助之以故人服其德嘗推爲鄉約又能庇蔭閭里如室人公歛來則墊之終三年間堡人未出官款分文從未過而問焉沒後閭堡贈匾額曰質直好義

甯佩卿張良寨人好義樂施村東舊有關帝廟係明正德間創建歲久傾圮佩卿於宣統元年募貲重修且添房二進其妻孫氏亦能周卹貧乏於民國十九年時值大飢輸米二十石以濟困窮曾經中央政府獎給二等金質褒章一座夫義婦從甯氏有焉

李元堃字厚菴坳河村人承審家珍之父爲人廉正不阿好作社會公益事兼善排解鄉里有爭者多願得一言以調息捐貲百金構造碾房又督築其村城垣創修李氏宗祠晚年復設立渭濱高小學校嘉惠後生並補葺村中廟宇民國十七八年間歲奇荒每年正二臘等月嘗施柴米以救濟飢民至今鄉人稱之

張金盛字德菴文義村人少失怙恃迎族叔之貧無立錫者以居冀相關照居數年

叔有異志且壞生產戚黨遂勸令分異時金盛年十八忠信樸茂無異成人以叔遺累飲泣鬻祖遺庭房以畢債厥後力稍紓即復建之蓋恐以毀業貽先人羞也年二十五被合族推爲戶首釀貲權息慘淡經營不數年遂營建宗祠廟祀克修姑子某於回亂逃亡金盛多方覓歸爲之置產授室始克成家其他戚友緩急靡不量力仗助生平以幼孤失學對子弟讀書尤特重二子稍長即令負笈從師而以身任田事故二子均馳聲黌序光緒末年詔停科舉興學堂命次子留學陝西大學堂舍其家園地數畝營建小學命長子主辦此蒼溪學校之所由來也先後成材甚衆今鄂士之官軍政各界者出蒼溪之門爲多皆金盛有以育成之也金盛有氣概重然諾從不爲損人利己事某年家畜驟一患肺病醫云此傳染病宜速賣之金盛曰明知禍胎以遺人不忍爲也後果全槽倒斃不之悔其存心類如此晚年以興學故被縣令繆呈請褒以聖廟五品執事官銜長子急濟創辦蒼溪學校名聲藉甚後在縣辦公鄉邦推重次子聯濟兩宰郃陽卓著循聲今則孫

輩亦且聯翩登進欣欣向榮從軍從政方興未艾厚德之報不亦宜哉

李抱經涓曲坊人任俠好義回亂前曾任社倉正比亂倉中積谷損失一空亂定有司盤查抱經鬻地以償生平好排難解紛村有爭端輒居間調停以故晚年雖失明以事實成者無虛日其見重鄉里如此先是抱經先世富於資亂後家雖中落而祖遺文券且巨萬置之篋笥抱經悉令其子焚之曰無以此歛怨噫亦難矣邢守節字子經性仁厚家不富而好施與清光緒三年歲大飢節口糧米四石餘按村中貧乏大小戶口而分給之兩任西操總約潔已奉公少孤撫幼弟友愛至老彌篤人無間言爲人排難解紛杯水不擾自備口食或縮腹必百計了其事而後已親族鄉里受賜者旣多故屢贈匾額以頌其德卒年七十有三

流寓

漢

朱雲字游魯人爲槐里令成帝時上書求見願賜尙方斬馬劍斷佞臣一人以厲其

餘上問誰也對曰安昌侯張禹上大怒曰小臣居下訕上廷辱師傅罪死不赦御史將雲下雲攀殿檻檻折雲呼曰臣得下從龍逢比干遊於地下足矣未知聖朝何如耳御史遂將雲去於是左將軍辛慶忌免冠解印綬叩頭殿下曰此臣素著狂直於世使其言是不可誅其言非固當容之臣敢以死爭慶忌叩頭流血上意解然後得已及後當治檻上曰勿易因而輯之以旌直臣雲自是之後不復仕常居鄴田時乘牛車從去聲諸生所過皆敬事焉

晉

摯虞字仲洽京兆長安人武帝時以賢良方正歷官秘書監衛尉卿後從惠帝幸長安東軍來迎百官奔散虞遂流離鄴杜之間轉入南山中絕糧饑甚拾橡實而食之及還洛官至光祿勳太常卿懷帝時洛京荒亂人相食虞素清貧以餒卒虞少事皇甫謐才學博通著有文章志四卷注解三輔決錄古文章類聚區分爲三十卷名曰流別集各爲之論辭理愜當爲世所重見晉書本傳

唐

李綱字文紀觀州蓀人少慷慨尙風節始名瑗慕張綱爲人改焉仕周爲齊王憲叅軍事憲誅去事隋爲太子洗馬擢尙書右丞時楊素蘇威用事綱据正不詭迎隨素等參憾會大將軍劉方討林邑素言林邑多珍貲非綱不可任遂署行軍司馬方揣素指數危辱之幾殆軍還不得調稍除齊王府司馬復詔出南海應接林邑久不詔乃身入奏威劾綱擅去所部以屬吏會赦免屏居鄴高祖平京師綱上謁拜禮部尙書兼太子詹事貞觀四年爲少師以足疾賜步輿聽乘至閣問以政事及疾帝遣立齡至家存問明年卒年八十五贈開府儀同三司諡曰貞

韋丹字文明京兆萬年人周大司空孝寬六世孫蚤孤從外祖顏真卿學擢明經調安遠令以讓庶兄入紫閣山事從父能復舉五經高第歷咸陽尉殿中侍御史江南西道觀察使

蕭穎士字茂挺梁潘陽王恢七世孫四歲屬文十歲補太學生觀書一覽即誦開元



二十三年舉進士對策第一補秘書正字爲有司劾免留客濮陽於是尹徵王恆  
盧異盧士式賈邕趙匡閻士和柳并等皆執弟子禮以次受業號蕭夫子召爲集  
賢校理宰相李林甫欲見之穎土方父喪不詣史官韋述薦穎士自代召詣史館  
待制穎士乘傳詣京師而林甫方威福自擅穎士遂不屈愈見疾俄免官往來鄴  
杜間林甫死更調河南府參軍事倭國遣使入朝自陳國人願得蕭夫子爲師署  
中書舍人張漸等諫不可而止

元

楊奐舊志字煥然乾州奉天人金末舉進士不中乃作萬言策指陳時病皆人所不  
敢言者未及上而歸隱居鄆南山下柳塘教授鄉里前後凡四十年蓋遠近從遊  
者以百數稱爲紫陽先生云居有讀書堂清風閣其旁有紫陽泉從遊者爲植柳  
千株戊戌太宗詔宣德稅課使劉用之試諸道進士奐試東平兩中賦論第一耶  
律楚材奏薦之授河南路徵收課稅所長官兼廉訪使歷參議京兆宣撫司事累

上書得請而歸乙卯卒年七十賜諡文憲所著有還山集六十卷天興近鑑三卷

正統書六十卷行於世

按免金末舉進士不中歸教授鄉里見元史本傳未嘗言隱居鄂之南山而志亦未詳所據然志有免紫陽閣詩云碧瓦

朱慶動紫煙清風吹袂渺翻翻夢回意得三生事梅落黃塵六十年又有同時李汾柳塘詩云長安西望少城隈楊柳陂塘手自栽渭水波光搖草樹終南山色入

樓臺平生事業書千卷浮世功名酒一杯我亦陸渾山下去擬尋佳處副莓苔商左山讀書堂詩云牙籤聲散絳帷風人在參乎一唯中名教會心真樂在區區休

歎事雕蟲據此免教授柳塘必非無據俟再考

清

顧壽楨字祖香浙江會稽舉人博通經史兼精攷據其父淳慶以大挑知縣調簾薦

鄂士張源澈卷中副車淳慶由潼關同知解組養病長安時粵匪擾蘇杭欲歸不

得源澈來謁以鄂有稻田竹林之勝頗類南方力請移居淳慶領之未行而卒壽

楨遵命奉母居鄂葬父於邑東北鄉坡頭村之原源澈方掌教明道書院同治紀

元回逆倡亂邑令沈淦奉檄團練任源澈為長壽楨為副壽楨悉檢篋中兵書詳

籌戰守沈令虛心採納源澈亦倚以為重乃募集鄉勇數百人招獵戶技師督飭

訓練悉壽楨主之營署有鐵器數枚貯養花草一老兵識爲巨礮告壽楨拂拭移城上容積雖淺口徑甚大騰擊面寬丈餘後賊攻城多賴是礮之力又製長龍劈山抬槍木礮多件環置城堞嚴守以待是時粵匪餘黨曹沛時由商山竄入鄆境陟巘涉淵如履平地山鄉水區並受其害壽楨請親赴山勸商民築礮禦侮十二月十八日偕邑紳王轍入山連日宿山中二十日早餐甫舉箸探馬報山南髮匪大至急從間道疾行一百四十里比暮抵縣城至天明而回匪鬻集攻縣城矣川匪以有備旋逸去而回匪間日來攻歲除日壽楨謂諸紳曰賊必以元旦來若徹夜守至曉皆憊非計也請諸公三更後皆歸寓吾先歸祭拜祖先三更即來獨任城守兵卒團勇亦令更番休息分班登陴以均勞逸諸紳皆如約壽楨乃于夜半登城是爲同治二年元旦甫黎明賊果大至亟鳴鐘爲號守者畢集城上諸礮齊發斃賊無算初賊偵見除夕守城兵少以爲無備至是知不易攻氣大沮始潰退嗣瘟疫大作壽楨病幸守具大備城賴以安

鄠 縣 縣 志 卷 之 五 終

人物列傳補遺

趙繼聲字鶴皋邑之定舟村人也少負才名磊落有氣概讀書過目不忘弱冠後入邑庠旋食廩餼光緒壬寅登賢書應禮部試不第主講邑高等學堂嗣考取舉貢以鹽場大使分發雲南歷充學務憲政諸要差擢保知縣并以同知升用辛亥改革間關歸里當道即畀以教育廳總務科長嗣任陝南道署祕書後缺裁復充漢中銀行總理及商稅以忤某權要被誣歸兼以兩親相繼謝遂絕意仕進息影青門與諸名流結社聯吟陶情詩酒辛酉歲飢襄辦陝賑懋著勤勞敘績以簡任職分發河南任用未赴任而卒年僅五十三士論惜之君生平博極羣書尤致力于詩古文辭爲文精深雅健右陽湖而紉桐城一時碑版誌銘多出其手著有趙氏念典堂族譜及渭濱文存若干卷

按君生平著作甚夥惜後裔零丁無人闡揚遂爲採訪者所遺畧現人物志已經印竣又得其墓誌因爲一傳以附於人物志之末名曰列傳補遺庶後之修者得

以編入列傳當不至終於湮沒也故識諸此

重修鄆縣志卷之六

列女第二十一

按孫志於建坊入祠者二十七人已旌者五十二人符年例題給扁額鐫姓氏於碑者二十一人俱志於節義祠之下而於未旌節烈則另見人物志竊謂婦女節烈出自血誠旌與不旌非所計也其未得旌者咎在無人題請耳非節烈有虧也似不宜分彼此今一律入列女志特入祠已旌者敘明本傳後

節婦

元

楊氏閻楨妻鑿齒村人楨卒楊甫二十二歲誓志守節五十年至元元年詔旌其門見續文獻通考並入節義祠

明

王氏朱威妻邑人知縣琰之女十九歲歸威四年威亡生一子甫晬姑已先卒舅中

道盲有側室與其二子甚不惠共欲嫁氏百方苦患之氏誓以死晝夜紡績自給抱哺其子子長為納婦生有二孫孀四十年正德丁卯詔旌其門壽九十二歲入節義祠

李氏高徵妻徵亡氏年二十有五事姑育子苦節五十年詔旌之入節義祠

魏氏生員王應元妻元死氏守志不二其子生員徵妻高氏以徵病故毀容輟餐日夜悲號成疾歿于守制之八月年十九邑令扁其門曰一門雙節見通省志

高氏羅季士妻季士知永和縣時氏適季土方八月而季士卒氏苦節二十餘年見通省志

王氏里民曹日龍妻年二十三守節撫孤有求婚者氏持刀攜子以死自誓當道給

糧表之見通省志

何氏舉人王堉妻年二十三而寡安貧苦節守志終身見通省志

張氏李庫妻年二十一而寡養姑撫子備嘗荼蓼如是者垂五十年見通省志

張氏李庫妻年二十一而寡養姑撫子備嘗荼蓼如是者垂五十年見通省志

張氏李庫妻年二十一而寡養姑撫子備嘗荼蓼如是者垂五十年見通省志



南氏新陽里魏邦開妻年十八于歸僅三年夫仁子方六月誓守三十餘年教子詡  
成廩於庠見通省志

楊氏何津妻太平里人二十五歲喪夫守節四十餘年詔旌其門見通省志

高氏武輻妻三十六歲夫亡奉姑撫子矢志守一經申獎旌表其門見通省志

王氏曹進節妻進節以地震斃蒲州旅舍氏聞喪毀容絕食欲以身殉父母親戚以  
有子女數勸之乃止苦節終身見通省志

仝氏李勤妻勤故氏年十八家甚貧遺孤未三月氏勤績紉奉孀姑姑稱其孝既歿  
謁蹶它葬事成禮子亦成立見通省志

王氏張文囊妻年方二十有三文囊病卒遺二孤俱在襁褓氏堅持貞節撫育之當  
道給糧表其門壽八十二

李氏舉人張初妻夫卒氏方一十九歲子女無出日夜哭泣誓不他從奉事舅姑待  
妯娌若姊妹守節四十餘年

清

王氏生員陳調元妻幼失恃事繼母盡孝年十六歸調元生子甫六月調元亡氏誓以死守值歲荒傾貲濟貧其子爲仇人誣陷氏鬻產營救得免後子列成均孫捷南宮皆氏六十年苦節所致雍正六年旌入節義祠

李氏王忻妻徵士心敬之母也莊敬孝慈鄉里重之年三十夫歿矢志撫孤勤苦備嘗鞠養二幼侄無異己出聞盤屋李徵君頤講學命子心敬從遊務使裨益身心遂成名儒時人比之陶孟苦節五十餘載壽八十二卒雍正三年旌入節義祠

戴氏邑民王收妻年二十有八夫亡撫孤守節姑性嚴事之惟謹節衣縮食稍能自給憐姪奇窘與己子均析家貲氏年七十有九雍正八年旌入節義祠

戴氏邑民王模妻年二十三而寡翁姑憐其少欲嫁之氏聞即自縊賴救獲甦孝親育子荼苦備嘗卒年七十有六雍正八年旌入節義祠

王氏邑民劉創業妻結縞甫數月而寡生遺腹子匏聲舅姑懼氏有異志具酒食乞

氏父母令勿再醮俟一二年後子能飲食始議之氏聞言痛絕復甦誓死不二舅姑喜慰過望愛之如己女氏亦曲意承歡孝養備至舅姑俱八十五而卒氏卒年七十有四雍正九年旌入節義祠

高氏邑民牛義心妻年二十二夫亡氏矢志撫孤孤既長娶婦生孫子婦又相繼歿孫騰雲生未期月氏勤苦鞠育迄於成立雍正九年旌壽七十餘卒入節義祠

張氏邑民李哲妻性孝謹事舅姑能得歡心夫亡後薄產盡罄賴紡績以供朝夕雍正十年旌時年六十有六入節義祠

譚氏孫詔妻仁和里譚易教女十七歲適詔未逾年詔亡有遺腹三月後生男紹裔家故貧氏誓不二操忍死撫孤紡績度日蓋節之最苦者乾隆元年旌入節義祠

楊氏曹倫妻美泉里楊若蔚女年二十六而寡有二子俱幼家無尺寸之產日不再食冬無重衣或有勸之改適者氏矢志靡他朝夕紡績育子於成亦節之最苦者

乾隆二年旌入節義祠

陳氏邑民張岸妻子甫三月岸卒翁姑俱老值歲飢氏脫簪珥勤紡績爲養子惰學輒涕泣不食自二十七孀居苦節三十餘年卒乾隆二年旌入節義祠

劉氏邑民騫炯斗妻年二十三夫亡越翼日遺腹子生氏零丁孤苦奉孀姑鞠孤子艱辛備嘗垂歿時五孫繞膝壽七十六歲乾隆四年旌入節義祠

張氏生員魏榮妻年二十四而榮亡子甫二齡氏撫孤操作不輟苦節三十年乾隆四年旌入節義祠

王氏杜宗韓妻年十九而寡翁姑高年又生長邑城飲食皆有常性夫亡後資生計窮氏力勤織紉或製襪履帶囊之屬鬻市以供甘脆苦節至六十二卒歲乾隆四  
年旌入節義祠

姬氏邑民溫歲妻太平里姬繼祖之女年十九而溫卒家素貧又無子女母家屢勸之改適氏終不從其姑以長男蘭次子乃輯爲氏嗣氏辛苦撫養性命與之相依乃輯成童氏晝夜紡績爲給從師受學之費守節四十餘年乾隆五年旌入節義

祠

王氏魏聲一妻年二十五而寡無子父母欲奪其志氏不從撫姪爲嗣苦節歷四十年又王氏聲一弟儀一妻年二十一而寡生子甫三月教育成人備嘗艱苦年五十七卒一門雙節俱乾隆五年旌入節義祠

王氏陳我愈妻生一子我愈卒氏甘心守節上事舅姑下撫幼子迨姑卒舅益老調劑飲食備盡其心我愈弟我慮其妻崔氏亦能守志王氏待之甚厚鄉黨稱爲雙節王氏乾隆五年旌崔氏乾隆六年旌其守志之年俱無案可攷

楊氏袁福妻道安里人年十七適福逾二載生子仕成又四年福病亡氏年二十有三家故貧茹苦守志五十年如一日年七十而卒乾隆七年旌入節義祠

傅氏生員陳夏聲妻太平里傅子常之女年二十適夏聲而夏聲頓以病亡臨訣謂之曰無子守節爲難氏誓以死守卒踐其言苦節三十五年乾隆七年旌入節義

祠

劉氏張奠妻漢泉里人夫故氏年二十有九撫孤守節治家勤儉子學渠效渠成立俱登武鄉試榜氏年七十二卒乾隆八年旌入節義祠

楊氏郭綉妻漢泉里楊義太之女年二十七而綉亡氏守節歷四十四年堅貞直如一日乾隆十年旌入節義祠

蕭氏司琮妻花原里蕭玉女年二十有五琮亡遺孤僅一歲無舅姑可恃又值兄弟析居其分產不給朝夕或勸之改適氏不爲動守貞撫孤歷三十五年乾隆十五年旌入節義祠

張氏李培英妻咸寧張太守文謨女也年二十二而寡遺子二翁姑在堂仰事俯育苦節四十二年乾隆十五年旌入節義祠

崔氏劉孔蔚妻年二十有六夫歿無子女慟不欲生私念有姑當養乃止及姑終絕粒數日不死又自縊叔孔芬夫婦救甦迎養於家年七十五卒見通省志

陳氏王永妻性聰穎精女紅善書畫年十九夫亡杜門守禮苦節彌堅卒年六十五

歲見通省志

溫氏何騰蛟妻年二十四而寡家故赤貧向恃騰蛟樵採以給朝夕騰蛟歿益益熒熒無倚踰年舅姑繼殂氏艱苦營葬志操彌堅撫孤成立年七十餘卒見通省志

魏氏生員張國紀妻孝事翁姑甘心守節孀居四十年縣令匾其門

王氏生員屈有伸妻年未三十夫亡無子矢志守節舅姑感其志堅以有伸兄子宗韓嗣之婦道母道備至

王氏生員陳治隆妻夫故氏年二十矢志守節撫育遺孤年七十八卒

王氏生員王永極妻順治乙酉賀賊陷城罵賊被斫其腦以血塗面不爲所污夫亡二十有八守節二十年卒

閻氏韓鐸妻秦渡里人年二十七夫亡守節家至貧而其志不移年七十八卒

張氏王德用妻文義里人于歸七年夫亡遺孤甫二歲家貧或勸之嫁氏誓與子以死相守日嘗一食晝夜哭夫雙目俱盲年七十餘卒

楊氏張我忠妻安太里人適忠八年忠故子女無出守節七十一歲

薛氏惠昇妻安太里人昇卒氏年少誓不他適家甚貧志節甚堅壽六十歲

李氏魏國華妻渭曲里人夫故氏年少苦節終身壽六十七歲

趙氏潘昆妻天和里人年二十五夫亡姑老子幼誓志守節事姑教子三十餘年終

楊氏武進士王天良妻年二十七夫亡堅志守節紡績育子年七旬卒

楊氏高興妻丈八里人年二十五夫亡遺子世寵甫數月守節育子世寵娶妻仝氏

生子錢兒甫二歲世寵亦亡仝僅十九歲與姑楊氏共砥操作里人稱爲一門雙

節云

張氏商金礎妻右衛人適金礎僅月餘金礎故氏哀毀骨立幽居守節壽七十八

歲

楊氏閻攀桂妻道安里人年二十有九夫故無子紡績守節七十餘歲卒

姚氏生員沈中奇妻年二十有七夫故遺子三齡父母欲奪而嫁之剪髮自誓百苦



備嘗年踰六旬以節終

劉氏張闇然妻花原里人夫亡年二十有四以貞節自矢四十餘年

焦氏生員高恆妻年二十九夫亡翁姑相繼而逝子甫六歲苦志守節年六旬見子成立而後卒

周氏生員喬搏妻年二十有四夫亡子在襁褓守節撫孤事孀姑敬養備至七十餘卒

李氏仝調宣妻丈八里人年少夫亡子在襁褓翁姑逼令適人氏剪髮毀容矢志守節繼而家愈貧志愈堅歷四十餘年如一日

魯氏孫德修妻花原里人十四歲適德修及年十九德修亡氏紡績自給矢志守節八十四歲卒

王氏生員仝廷璽妻年三十三夫亡遺子甫二歲誓志守貞六十餘歲卒

劉氏張養儒妻安太里人年二十二夫故矢志守貞紡績育子不二其心年八十餘

卒

薛氏閩中立妻道安里人年二十四夫歿家無田產氏甘貧守節撫遺孤訓之成立

年六十三卒

孫氏張世德妻兆豐里人年二十三夫亡上事孀姑下育幼子荼苦備嘗歷五十餘

載

王氏武世貴妻秦渡里人年二十五夫亡伯叔逼嫁氏誓不他從仰天號泣遂斷其

髮苦節七十年卒

員氏生員韓國璽妻年二十八夫亡內外無倚艱苦備嘗教子成立六十餘歲卒

王氏生員王琪妻琪故氏年二十八誓志守節孀居五十餘年卒

騫氏生員段植體妻年二十七夫亡矢志守節五十餘年如一日

李氏生員董學顏妻年二十四夫遭兵害遺子未離襁褓家業漸消僕婢星散族姓

貪賄逼氏改嫁氏投身井中賴家人救出自是人不散言改嫁事六十餘歲卒

宋氏溫含璞妻太平里人年二十有四而含璞亡遺孤周泰甫二歲氏守貞育子弗貳其操後周泰又亡妻王氏年二十有五生一子方在襁褓王氏與姑合志守節張令以雙節匾其門

鄧氏侯耀妻焦楊村人年二十八耀以微故自縊死二孤執信執躬俱未脫襁褓氏誓不他適竟能育子成立張令給匾表之

王氏李夢麟妻花原里人夢麟亡遺子方在襁褓氏年二十四矢志撫孤辛勤四十餘年六十五歲卒

閻氏趙純嘏妻坳河村人生子穰及稹而純嘏以疾亡氏年僅二十二茹荼守節育子成立以壽終

王氏郭奮勉妻新陽里王愈培女年十六歸奮勉及年十八而奮勉頓以疾亡氏孝養舅姑以禮送終鞠育遺腹子克底于成守節五十九歲

高氏溫周孝妻安太里高政女年十九夫亡遺孤祥生甫二歲家計素窘旁無所輔

氏矢志守節歷三十二年卒

吳氏石元度妻新陽里吳銓女年二十五元度亡上有孀姑下遺幼子生業素薄給用維艱氏早夜辛勤之死靡他及歲荒親身灌田守節四十五年

孫氏王若堯妻花原里孫光照女年二十八歲若堯死遺一子兄以氏年幼勸之改適氏以頭觸柱誓死不從是後兩經荒年飢寒切膚而終無變志守節四十三年  
騫氏生員李鷗妻新陽里騫高飛女也年十七歸鷗生一子及年二十有四鷗亡守貞育子凡四十四年

王氏曹敬昇繼室安太里王永熙女年十八歸敬昇視前室子女無異所生年二十八而敬昇死家無生產老姑在堂子女幼弱待哺又值歲凶矢志守貞終養老姑育子於成年五十七卒

汪氏王邁妻邁無子女而死氏矢志守貞上事舅姑撫姪又振爲子年六十有五卒  
焦氏陳玠妻中原里進士焦桐女生二子玠卒氏年甚少能矢志守貞事舅姑撫二

子於成年逾六十卒

劉氏左衛任道遠妻年二十而孀遺孤永傑甫三歲氏柏舟撫孤有逼之嫁者氏即自縊以救免家徒壁立紡績爲生隆冬指節凍裂血淋漓見者心惻氏不知苦也康熙三十年關中大饑氏携孤赴漢中求活嘗剪髮易食卒能全節保孤歸卒年六十乾隆二年旌

袁氏中衛陳爾道妻與爾道弟爾祿妻周氏於乾隆三年以一門雙節旌者俱年二十有三而寡遺孤俱六歲袁氏之寡也先周氏四年時爲康熙二十七年家貧尊章俱老二氏先後孝事尊章爭任艱苦周子慨多病袁氏憂曰子不成立守節亦徒然耳周答曰守節爲夫非爲子也子即不成節不可失且無子而守節者何以稱焉袁氏年五十有七卒周氏哭之哀數日不食或勸之節哀周氏曰吾非獨哀妯娌之失伴乃深哀同志之無侶耳後又爲袁氏撫其孤孫旌時年六十有九尙存

孫酉峯論曰守節爲夫非爲子周氏之說似矣其實守節止爲己耳非爲子亦非爲夫也

魏氏安太里陳渤妻年十八孀居無出以姪太夏爲子拮据紡績孝事舅姑又教從師身列鄉校乾隆三年氏五十七歲尙存蒙旌

章氏張惟彥妻兆豐里章標女年二十有一惟彥病故遺子通方三歲舅姑憐氏年少命之改適氏誓死靡他晝夜紡績敬事舅姑養子成立康熙六十年氏年五十有七卒乾隆時旌

傅氏羅天里趙孟實妻孟實病亡遺子鐸甫四歲氏年二十有一上事姑嫜養生送死以孝聞撫孤專借女工至於成立守節艱辛至矣年五十有八卒乾隆三年旌  
侯氏馬寵妻生員馬河圖之母也自二十三歲而寡是時河圖生纔八月明年康熙壬申關內大饑氏同胞兄侯王愛就食河南扶姑抱子徒步艱難得免於死歸而拮据紡績教子成名乾隆五年旌

陳氏張權妻兆豐里陳志玉女年二十有二而寡子涵生甫四歲舅姑尙存氏立志守貞備嘗辛苦孝事舅姑教子有成身列縣學雍正二年氏年八十卒乾隆五年旌

閻氏美泉里陳錄妻乾隆五年與錄弟紀妻楊氏以一門雙節旌者是時閻氏年六十有三楊氏年六十有一其孀居也閻氏年二十生子可傳甫一歲時爲康熙三十六年楊氏年十有七生子可法甫三月時爲康熙三十五年舅姑早逝家甚寒二氏守柏舟之志式好無尤惟勤紡績爲活劬勞撫孤各至成立

王氏生員陳于典妻興平縣生員王廷臣之次女也年三十而于典故遺三子生計甚艱氏歷嘗荼苦教子成人雍正八年氏年五十有四尙存以節蒙旌

仝氏右衛儒童任昌宗妻舉人任鉅之母也乾隆十一年以節婦旌自康熙十四年氏年二十有二而寡子鉅甫二歲是時尊章在堂氏明于大義誓柏舟願以婦代子職孝事舅姑養生送死其教子也拮据紡績示以勤勞有斷機之遺意焉鉅年

三十有二始爲縣學生踰年氏卒苦節三十一年後二十有九年而鉅舉於鄉  
康氏右衛霍鴻度妻長安生員康賜祿之女也年二十有一而寡生遺腹子劬勞撫  
育至八歲而殤其翁念氏年少無子生計復艱勸之再醮氏誓死靡他翁知其志  
堅莫移乃以伯子廷雲爲之嗣氏飲食教誨如己出焉乾隆九年氏年八十有六  
卒此節而壽者踰年旌

山氏安太里王作仁妻年二十有二作仁亡遺子始有甫一歲氏誓志守節晝夜紡  
績孝事姑嫜撫子成立乾隆十年氏年六十有六尙存十一年旌

譚氏中原里劉方深妻年二十有四而孀其子之柱甫三歲老翁在堂室如懸磬氏  
堅志守貞勤于紡績孝事其翁竭力送死育子劬勞至成立乾隆十一年氏年六  
十有九白首完節蒙旌

劉氏生員穆釋妻年二十有二矢柏舟時爲康熙八年其子光先甫一歲生計甚艱  
氏持家勤儉事尊章以孝聞劬勞育子自幼命之從師長入縣學氏年六十有三



完節而卒乾隆十四年旌

單氏生員王景著妻景著卒時氏年二十有四生遺腹子覺自幼多病鞠育艱辛至于成立又孝事七旬之姑惟拮据紡績順志承歡是婦之節而兼乎孝慈者乾隆十三年氏年六十有二尙存明年與王景厚之妻姚氏同以節婦旌景厚之卒也氏年二十有二子棟甫七歲舅姑俱存氏晝夜紡績上事尊章養生送死撫其子至於授室育孫守節三十二年題旌是時氏年五十有五尙存

姚氏道安里韓養基妻年二十有三而養基歿生遺腹子良植家貧晝夜紡績身受飢寒而舅姑不至失養撫孤至于成立嗣世繩繩乾隆十七年氏年五十八尙存  
次年以節婦旌

程氏監生李翰臣妻翰臣病故其子世琛未晬氏年僅十有八惟孀姑在堂更無所倚氏剪髮守節誓死靡他勤儉持家事姑育子乾隆十七年氏年五十有三尙存  
次年以節婦旌

嚴氏渭曲里全養氣妻康熙六十年氏年二十有四而寡遺孤景顏生纔五月家貧舅姑憐氏年少勸氏攜孤改適氏剪髮自誓惟願從一而終自是孝事舅姑養生送死教子有成得遊鄉校乾隆十七年氏年五十有五尙存次年以節婦旌

徐氏仁和里劉唐妻乾隆十八年以節婦旌者自年二十有二孀居遺孤景信甫七歲家計甚艱有勸氏再醮者氏剪髮誓死靡他書耕夜績教子有成實爲苦節旌時年五十有三

沈氏韓村里王國俊妻國俊歿子良甫四歲家貧舅姑俱在憐氏艱辛令其改適氏即剪髮自明死不易節勤紡績孝事翁姑送終撫子成立乾隆十三年氏年六十有一完節而卒十八年旌

童氏舉人李振年之繼室也振年卒時氏年二十有四無出誓柏舟撫育前室子韓臣成立乾隆十七年氏年六十尙存次年以節婦旌

王氏風調里張守妻年二十有一夫亡遺子方五歲氏哀毀幾喪明家貧無倚惟姑

在堂氏紡績度日常自忍飢寒事姑能供甘旨始終以孝聞其撫子也每逢朔望必泣拜籲天以祈成立後果如所祈焉乾隆十四年氏年五十有七以完節卒十八年旌

楊氏兆豐里李朋妻朋歿氏年二十生遺腹子延壽家計甚艱氏拮据紡績兼竭力耕耘上事老翁養生送死其撫孤也孤多病氏日夜號泣籲天忽有醫者不延而至醫之即愈鄉人以爲節義所感乾隆十七年氏年五十有一尙存明年以節婦旌程氏羅天里王民諒妻年二十有二而民諒逝遺二子長經甫五歲次卷其生甫兩月也家計甚艱無翁姑媪妯可倚氏惟晝夜紡績爲活教育二子皆以農業成家乾隆十五年氏年五十有三完節而卒後五年旌

段氏王寨里姚際盛妻乾隆二十八年氏年八十有六以節婦蒙旌其貞壽之榮蓋不多見也而苦節亦不多見自年十九而夫亡遺孤琛甫生尙未彌月家計甚艱內外無可依者而氏從一之義耿耿於中惟有紡績爲活養育遺孤而已迨子已

有室不意夫婦相繼亡遺孤學成生甫三月當是時氏之所遭又依然年十九孀居撫孤之日也雖偉丈夫不堪其苦矣乃氏歷盡諸艱又撫孤孫至於成立嗚呼豈不難哉

騫氏道安里閻齊妻康熙四十九年氏年二十有二夫亡遺子緝甫三歲翁姑在堂氏堅守從一之志勤女工孝事翁姑養生送死嘗自食菜根充腹劬勞育子及時命之從師早入縣學而又嗣世繩繩氏之苦節成就多矣年五十有七卒乾隆二十一年旌

張氏文義里劉學妻學故貧嘗傭于外氏之歸學也舅姑俱逝學以傭病勞康熙五十八年生子懷卿甫四月而學亡矣氏拮据營葬鄉黨有助喪具者他日氏以紡績償之繼值歲荒氏磔榆皮蓬實充腹自分與孤子俱死於餓耳孰意其撫子有成而諸孫繞膝也厥惟艱哉乾隆二十二年氏年五十有七以節婦旌

康氏興仁里儒童史庭祚妻長安生員康士祿女也乾隆二十二年氏年八十有三

以節婦蒙旌初孀居僅十八生遺腹子宗學時爲康熙三十一年家貧無倚上有孀姑寡孀相依爲命氏善事之姑與孀俱年逾七旬而卒其撫孤也惟紡績爲活身歷諸艱乃得親見其子之成而諸孫繩繩也天之報苦節不爽矣

弋氏安善里趙士貞妻年二十有一夫亡遺子之珣甫二歲家徒壁立上有六旬老姑病臥呻吟不能動移氏日夜紡績菽水承歡養生送死無不竭力撫育孤子自幼教之勤勞長而有室生子七人族黨謂氏節孝之報乾隆二十一年氏年五十有六尙存次年旌

張氏秦渡里孫永烈妻乾隆二十三年以節婦旌者旌時年五十有八尙存先是氏年三十有三而寡有一子即於是年殤其姑尙在家甚寒氏以柏舟之義爲重自稱未亡人恃紡績爲活孝其姑竭力送終卒守節以終焉

白氏文義里段普妻康熙五十六年氏年二十有三而寡守節至六十三歲得旌其夫之亡也遺子尙忠甫四歲翁姑垂白家計甚艱氏誓不再醮勤紡績以奉翁姑

養生送死育子劬勞親見其成立亦難矣

朱氏均河里楊芳妻乾隆二十三年氏年八十有一以節婦蒙旌當其守節也年僅十八無出其姑以哭子失明後患痿痺不能移動而家又貧甚氏志在栢舟竭力紡績善事其姑嘗自節縮衣食之費銖積而寸累之爲姑送終計以族子中林爲嗣克承其家可謂知大義矣

郭氏中原里王文才妻文才歿時氏年二十有二至乾隆二十三年計守節三十四年矣生而得蒙旌典蓋自夫歿遺子尙在襁褓中家貧翁老氏惟以紡績爲活而能孝事老翁養生送死撫孤親見其克家嗚呼一婦人耳豈不難哉

張氏安大里王京妻年六十有一以節婦旌時爲乾隆二十四年其孀居也年甫十九子守柱甫一歲耳家亦貧氏惟明於從一之義誓不更事二夫用是拮据十指撫養幼孤至於成立誰謂婦人之操不如男之哉

賈氏生員劉古文妻乾隆二十四年以節婦旌者是時氏年六十有五尙存自年二

十有五而寡時爲康熙五十八年子琪堂甫四歲德堂甫二歲家故貧其翁老病氏以紡績爲活孝事其翁養生送死撫二孤親見成立而次子德堂又以諸生克成父志氏之苦節非徒然矣

郭氏王寨里李學聖妻乾隆二十四年氏年六十有六尙存以節婦蒙旌自年二十有五而寡時爲康熙五十五年子世榮甫一歲上有孀姑可依而家計殊窘氏惟紡績爲生事姑育子值歲凶誓云寧死於餓不再醮也養姑送終子亦成立而諸孫且振振焉非苦節何以致此哉

范氏後衛焦文會妻康熙六十年氏年二十有一而寡其子仁甫三歲上有翁姑值饑饉氏誓柏舟以紡績爲生計事翁姑菽水承歡養生送死嘗自取菜根雜以糠粃爲食甘之如飴用是撫孤至於成立乾隆二十四年以節婦旌是時氏年五十有九尙存

童氏龐村里韓文煥妻氏年十七而寡生子甫三月未幾殤孀姑尙在患痿痺家計

殊艱氏惟晝夜紡績以布易粟孝養孀姑自甘寒餓繼而姑以族姪匡爲氏嗣姑遂壽終乾隆二十五年氏年五十有二尙存節孝兼全次年旌

張氏安太里焦元沛妻年十九而寡生遺腹子成章家計甚艱孀姑尙在更無所依氏惟晝夜紡績易粟養姑有勸之再醮者即剪髮自誓寧死不事二夫守節四十年子復生子諸孫繞膝乾隆二十六年氏年五十有八明年以節婦旌

劉氏孝義里屈含琰妻年二十而寡其子永達甫晬家計甚艱翁姑俱老氏勤紡績菽水承歡繼而姑逝老翁病篤氏於寢門外設榻躬侍湯藥七十餘日竭力送終撫育其子壯而有室嗣世繩繩乾隆二十六年氏年五十有七明年以節婦旌

王氏中原里劉禮昭妻年十八而寡生子思正甫數月上有孀姑多病惟賴氏紡績爲生氏甘貧守節奉姑育子誓不更事二夫值年荒鄉人攜家而逃者踵相接也氏則效死不去姑卒族人有助以棺衾者他日以紡績餘貲償之其子成立氏親見其有室有孫矣乾隆二十六年氏年六十有二明年以節婦旌



賈氏生員賈珽女保峪里傅懷璧之妻也年二十孀居其子甫一歲上有孀姑多病家又寒衣食不給而氏明於柏舟之義恃十指拮据奉姑育子姑卒後子方有室而夭遺媳年僅十七氏又與媳撫其孤孫祚安至於成立乾隆二十六年氏年六十有一明年以節婦旌

劉氏兆豐里屠信妻年十九而孀無出有姑嫜在堂素多病繼而失明家甚窘氏明從一之義惟拮据紡績孝養其姑自甘凍餓其後姑病漸危氏抱姑而坐者數晝夜姑歿氏哭之痛氣絕復生族黨感其孝爭給喪具殯葬焉氏自夫亡之三年以族姪生保爲嗣生保甫二歲氏劬勞撫育成人乾隆三十五年氏年六十有四次年以節婦旌

李氏秦渡里賈經畧妻生員李澍之女也乾隆二十八年氏年六十有二以節婦旌其孀居時年二十生遺腹子學中是時孀姑在堂家計甚艱氏夙知柏舟之義晝夜拮据以紡績易粟孝事其姑送終如禮撫子勞劬親見成立嗣世綿繇苦節之

力亦大矣

高氏興仁里張國祥妻年七十有九以節婦蒙旌時爲乾隆二十八年其孀居也年二十有一子崇嶽生甫九月舅姑已逝家計甚艱氏明于柏舟之義以紡績兼耕耘拮据育子有逼氏改嫁者氏即欲舍生取義遂投井幸不死自是逼嫁之謀頓息氏得白首完節親見其子之成立焉嗚呼氏非有子也其殆爲烈婦矣

李氏風調里姚德顯妻雍正七年氏年二十而寡子自善生甫七月姑尙在堂窘於家計氏誓志守貞惟拮据紡績孝事其姑預以手工易棺木爲送死計者甚周可謂婦代子職矣其撫孤也自幼至于成立備極劬勞氏年六十有二完節而卒時爲乾隆三十五年踰年卽旌

施氏新陽里賀三仁妻乾隆三十一年氏年八十有五以節婦蒙旌鄉人皆榮之而樂道其守節之苦也謂氏年二十有四而寡時爲康熙五十年子文斐甫四歲三仁在日傭於人者歿而家徒四壁賴氏誓柏舟勤勞十指凡紡棉織麻飼蠶之女

工無不竭力爲之用是孝養翁姑送終而撫孤成立氏得見其曾孫含飴貞壽形  
管流芳嗚呼彼身爲未亡人而欲更事二夫者聞氏之操亦可以自勵矣

以上五十二人俱清乾隆二年至三十六年已旌節婦存有卷宗孫酉峯補傳入  
志者下二十一人係節婦已符年例題給匾額鐫姓氏於碑孫酉峯採編入志者

程氏右衛李喬朋妻石氏後衛張文博妻李氏花原里南琮妻以上俱乾章氏兆豐里張文榮妻施氏新陽里石崗妻

張氏化成里毛振翼妻王氏美泉里靳待遜妻鄭氏太平里王謙妻王氏花原里崔宗妻楊氏化羊里卜鎬妻劉氏兆豐里王成士

石氏重雲里李乃植妻以上俱劉氏渭曲里嚴全倫妻段氏道安里閻象初妻以上俱乾

李氏劉復初妻乾隆二十年奉部文給匾崔氏高應璋妻乾隆二十年奉部文給匾王氏姜輔妻張氏焦沆妻以上俱

奉部文給匾郭氏後衛陳盛德妻乾隆二十年奉部文給匾張氏秦渡里劉浩妻高氏草廟里王度妻以上俱乾

商氏第五橋騫煥斗妻年二十三而寡先是煥斗疾篤以氏少艾無子恐已死而氏

再醮也謀毀氏容未果氏窺其意即剪髮誓志焉煥斗遂瞑目而逝氏值家貧姑

老日勤紡績奉姑會姑有疾氏嘗割股療之愈守節逾五十載享年七十有三卒

無爲之後者遺舍爲墟

山氏吳村閻琪妻生員山仲彰之女也年二十四夫亡遺孤宗儒方四歲家無隔宿之糧惟勤女工撫孤度日饑寒交困遂終其身七十八歲卒鄉人哀其苦節爲文祭之

孫氏草廟寨王任賢妻任賢病故遺孤乃選氏年二十五以柏舟自誓事翁姑撫弱息艱苦備嘗乃選娶妻劉氏生子元臣劉氏亡繼娶童氏不數年乃選亦亡童氏亦以柏舟自誓事姑送死孫氏卒時年八十有五童氏當乾隆四十二年己年五十有九矣

劉氏秦渡里羅名美妻名美之歿也氏年十九無出家甚貧其翁八十歲矣有逼氏改嫁者氏誓死靡他惟晝夜紡績孝事老翁送終以族姪鏹爲子娶張氏張氏亦年十九而值鏹沒其堅心守節與劉同事劉之孝與劉之事其翁同而其時有逼之改嫁者張氏誓死靡他亦與劉同而亦無所出亦以族姪清爲子嗚呼何其節

之著於一門而兩世之遭又如一也劉氏年六十有九卒張氏於酉峯修志年七十有五尙存

張氏第五橋騫思信妻年二十七而寡長子朗甫四歲又生遺腹子冉家貧無依氏誓柏舟撫孤拮据度日雖芻蕘事亦身爲之有勸以再醮者氏之死靡他鄉人匾其門曰閨中鐵漢年八十有二卒

孫酉峯曰余觀節婦張氏其拮据之苦雖芻蕘事亦身爲之者以更事二夫爲恥不以芻蕘爲恥也令更事二夫者見之方且哂之矣嗚呼彼漢書稱鮑宣妻桓少君與宣共挽鹿車歸鄉里提甕出汲修行婦道非歟

李氏淇村仝林妻年二十有三而孀長子甫三歲次子生甫兩月上有八旬老姑而家又貧甚氏明從一之義朝夕拮据養姑育子兼撫其幼姪遭數喪僅有薄田數畝盡鬻之以送死者而氏惟紡績爲活教子克家年六十有九完節而終

張氏馮村高彪妻彪故時氏年二十二歲生子甫六月有老姑在堂氏誓柏舟勤紡

績事姑撫子及子七歲鬻嫁衣具束修命就外傅繼而其子應試累躋於場家貧氏常并日而食以子未能成名爲憂遂病年五十五卒

王氏西關焦世甲妻世甲病故遺孤在抱氏年二十有七守節撫孤備嘗艱辛六十四歲卒

程氏小豐村前衛軍籍陳世榮妻年十七歸世榮生子文會未晬世榮以運糧身亡氏年二十有一事翁姑撫幼子備嘗苦辛又遭兄逼嫁始終誓死完節文會亦成立入庠氏歿於乾隆七年壽七十八歲

梁氏陂頭堡劉安妻康熙三十四年安病故遺一子在襁褓中氏年十八誓志守貞事翁育子無何子殤是時家貧嗣絕而氏貞操愈堅不得已撫養三歲外甥爲嗣送翁終爲嗣子完婚已有孫未幾嗣子忽早逝時乾隆七年也氏復憐寡媳幼孫勞心撫卹迨孫又有室有子而氏卒矣

張氏陳兵坊李謙妻謙死遺孤甫彌月氏自十九歲孀居家貧紡績撫孤至於成立

苦節七十載親見曾孫享年八十有九卒於乾隆三十三年

陳氏秦渡里生員韓疇妻疇之死也氏年十九家貧無依以夫前室子秉英方六歲不忍改適日勤女紅爲朝夕之資撫秉英成立入庠乾隆十八年氏卒壽六十

歲四

趙氏西倫公村陳瀚妻整屋縣學生趙丹鳳女也康熙四十九年氏二十七歲夫歿遺一子有祖姑在堂年九十氏堅心守節仰事俯育數年祖姑逝氏之子亦亡家中只有幼姪大勤氏盡心撫養至於成立娶妻王氏無何大勤又死王氏年二十有五無所出亦堅心守節趙氏因與王氏商取族子錫蕃爲嗣孫以承先祀趙氏年八十有六卒乾隆四十二年王氏年六十有六尙存

戴氏中原里王祐妻康熙四十九年祐病故氏年僅十九無所出誓不事二夫其嫂張氏改嫁遺二子俱幼是時家無隔宿之糧氏惟晝夜拮据撫育二姪至於成立六十餘歲卒

張氏南陂頭許光源妻光源歿時氏年二十有一無所出明於從一之義堅志守貞

孝事翁姑撫姪孫連登爲夫承重乾隆四十二年氏年八十有五

袁氏韓旗寨東堡營兵尙維周妻于歸之次日維周即出征巴里坤陣亡氏年十七聞之欲以死殉轉念翁姑年老復有幼叔仰事俯育俱已責也乃強進食紡績爲生不給毀粧奩佐之翁姑相繼卒母家屢勸改適氏屢拒焉遂至康熙三十八年壽七十八歲

劉氏庠生紀中立妻溫氏中立弟處士中英妻皆庠生紀又信之子婦也中立卒於康熙五十五年氏年二十有二遺孤德崇甫三歲中英卒於雍正七年溫氏年二有三遺孤德壽甫三歲溫氏之寡也劉苦節十三年矣謂溫曰節非有堅志者不能守溫曰昔嫂值兄亡家素貧薄田僅數畝破屋僅數間或勸其嫁誓死不從者明於從一之義念翁之老子之孤不忍割耳嫂何自任者重而輕視我乎自是與嫂同志守節翁歿鬻田二畝以禮送終妯娌閉戶惟晝夜紡績撫孤自守而已劉苦節三十一年溫苦節三十二年鄉黨扁其門曰名節雙高



李氏秦渡里羅振宗妻振宗歿時氏年二十有二遺二子長昌甫三歲次智甫兩月翁姑俱在而度日甚艱或勸之再醮氏誓不從竭力紡績以布易粟自食糠粃或日不再食而翁姑朝夕之養未嘗缺焉乾隆四十二年氏年八十一尙存而子孫蕃衍家業富饒亦孀節之報也

周氏禹泉里馬明傑妻康熙五十六年明傑亡遺孤甫一歲氏年二十有二家貧姑老度日甚艱惟拮据紡績之死靡他事姑克孝教子有成七十七歲卒

閻氏文義里谷子磴蕭明妻與明之孫良士妻王氏祖姑孫後先以節著者也閻氏年十九夫亡無所出堅心守節取母家三歲姪爲嗣事老翁以孝稱守節五十六年卒於乾隆壬辰生員楊作棟等公舉苦節有案王氏年二十有一而良士亡王氏有遺腹子折桂亦堅心守節晝夜紡績孝事其翁亦如祖姑閻氏之事其翁焉乾隆四十二年年五十有四可謂一門雙節

韓氏秦渡里楊大用妻大用歿氏年十九生遺腹子魁是時惟祖姑在堂更無可依

者家故貧值歲歉或謀嫁氏可以存活氏寧死不從躬勤紡績易粟以養祖姑而自食糠粃或日一食母家亦濟其乏時遂送祖姑終子早成立卒於乾隆四十年正月壽七十六歲

萬氏北街王宓妻年二十有二宓歿遺孤有爲未離襁褓而家又赤貧朝不謀夕也氏堅志撫孤守節身歷諸艱年八十餘子早成立已有孫而卒

賈氏白楊里豐盛堡劉漢宗妻漢宗歿於康熙五十七年遺子忠氏年二十有三典嫁衣塋其夫誓不再醮家甚貧紡績育孤日不舉火者屢矣子稍長傭於外日出則命之往日入則命之歸迨子有室生孫而氏年五十四卒

劉氏秦渡里張一靈妻一靈歿遺孤甫二歲氏年二十有三舅姑早逝家貧僅有薄田數畝復值康熙六十年二麥不登或勸氏改適氏誓死靡他時家僅存粟八斗氏以草根樹皮雜於粟中噉之或日不再食更或間日一食始得生逢大有秋焉嗣以薄田付母家代耕氏勤紡績又嘗負孤至陌上身親耕耘如是者有年及

孤成立有室夫婦俱死氏復撫其所遺幼孫後已有曾孫矣年八十餘卒

單氏秦渡里路勳妻生員單永綏之長女也年二十有二夫卒遺孤甫一歲家寒其翁已老每日涕泣惟恐氏之不能守節撫孤也斷髮誓不再醮日夜紡績養翁送死教子從師苦節五十載卒

印氏秦渡里姚振旗妻振旗歿時氏年二十有一遺孤在抱其翁姑與夫同月死連遭三喪氏皆拮据營葬而翁姑又遺二子俱幼一甫四歲一甫二歲氏以從一之義撫養三孤至於成立亦難矣氏卒於乾隆三十九年壽七十三歲

郭氏沈家營張賢繼室年二十生子兆麟甫五月而賢亡氏之舅姑以家貧恐氏不能守節撫孤也嘗抱孤臨其柩而哭曰天絕我張氏乎氏喻其意即取柩前箸折爲兩端跪而誓曰媳不能事舅姑至老育遺孤至成立者有如此箸翁姑信其矢志靡他氏從此勤女工仰事俯育苦節五十三年卒

丁氏秦渡里吳昌妻昌本臨潼人也占籍秦渡雍正二年昌病故氏年二十有一無

戚族可依而又貧甚鄰婦有勸氏再醮者氏泣下如雨曰婦人之道從一而已本夫義重不忍再醮辱身且辱其夫也繼而母家亦有勸之再醮者氏堅拒之以十指爲活日夜拮据柏舟詩曰之死矢靡他其氏之謂乎久之臨潼本族聞其節以族姪永福爲嗣氏教養成人已授室生子矣氏年七十有三卒

全氏三過村牛鍾麟妻雍正三年鍾麟病故遺孤甫一歲氏年二十有五誓志撫孤而同居叔某毀其家業逼氏改適氏抱子哭於夫墓哀動行人叔亦知氏之死靡他也乃與氏析居僅給氏灘田三畝而叔又不顧其父之養氏拮据紡績孝事老翁養生送死皆身任之迨子又生子而復值歲歉日不舉火者數矣縣設粥廠濟飢民氏雖面有菜色弗往惟戚屬以禮餽者始受之後孤孫亦有室矣乾隆四十二年氏年七十有五猶存

宋氏邵堯倉妻安太里人雍正三年堯倉病故遺孤尙在襁褓中氏年二十有四撫孤值家貧堅心砥節之死靡他其卒也年七十有三

李氏西倫公村焦應瑚妻雍正四年應瑚亡氏年十九矢志守貞撫姪世厥爲子無異已出又嘗撫姪生員世英之子永清至於成立乾隆四十二年氏年六十有一張氏兆豐里賀開妻生員毓牲之女年十七歸開爲繼室開亡氏年十九子方二歲矢志守節事翁撫孤晝夜紡績不以家貧貳其心子進往弱冠入庠酉峯修志時氏年七十有一尙存

劉氏文義里蕭貞恆妻生於康熙五十四年及歸貞恆甫二載貞恆卒卒之三月生遺腹子維統其翁失明家甚貧氏紡績養翁撫孤有勸之改嫁者百折不回翁歿殯葬如禮鄉人稱孝焉守節四十餘年

賈氏太學生高漢妻也漢卒於雍正五年氏甫二十二歲無出孝事舅姑厲志守節辛苦備嘗年七十卒

戴氏三過村牛麟義妻雍正六年麟義卒氏年二十無子其父歸義勸氏再醮氏即斷髮誓天堅心守節父不能奪其志也從此孝事翁姑三十餘年翁姑俱享大壽

率而氏於孀居之十三年以姪生孝爲子自襁褓撫至成立備嘗苦辛又督姪光斗勤學得遊鄉校鄉中目爲女中丈夫信哉乾隆四十二年氏年六十有八

王氏羅什村王武生妻雍正六年武生無子而逝氏年十九誓不改適是時翁姑俱歿氏每食必獻主前有不舉火時則跪而哭告之終其身如一日也每日惟勤女工得生撫養嗣子從二歲至於成立自忍飢寒者數矣乾隆四十二年氏年六十有七

解氏秦渡鎮陸金貴妻雍正四年金貴死氏年十九無出矢志從一而終舅姑勸之改嫁不從乃以氏姪爲之嗣未幾殤舅姑亦相繼而亡氏鬻田殯葬不爲養身計也後又以族姪爲嗣撫育成人而氏年六十有四卒

劉氏涓曲里李廷桂妻長安生員劉秉直女性溫柔幼讀論語女孝經雍正五年于歸八年夫亡無子翁年老氏奉養甚虔及翁將卒以無後爲憂氏誓不改嫁願撫姪爲子以承宗祀末幾嗣子殤又撫一子十歲又殤乃撫姪孫爲己孫可謂守志

而達義者亦讀書之力也乾隆四十二年氏年六十有七

趙氏丈八里邢績妻年十九夫亡遺孤甫八月上有孀姑家無田產生計甚艱其姑勸氏改適氏跪而泣誓願從一以終自是十指拮据事姑孝謹養生送死撫子至於成立乾隆四十年氏年七十有三尙存

任氏靈山寺堡弋振乾妻振乾歿於雍正八年氏年二十有三無子堅心守節惟以紡績爲生孝事舅姑竭力送終又養育夫弟振坤自幼至於成立不絕宗祀乾隆四十二年氏年六十有九

童氏秦渡里楊績妻績歿遺一子在襁褓中無翁姑可依與績叔父同居日夜紡績辛苦備嘗事叔翁及孀甚謹教子讀書至於成立乾隆四十二年氏年六十有五王氏北街魏桐妻雍正十年桐病故遺孤正位方在襁褓中氏年二十有六誓志撫孤家甚貧有勸之改適者氏不爲動惟晝夜紡績資生苦節數十載鞠子成人氏卒年六十有五

劉氏姚村嚴全義妻雍正十年全義歿氏年二十有一遺孤在抱值家貧勢難存活而柏舟自矢不讓古之共姜事翁姑撫幼子惟有日勤紡績茹荼自苦而已不意子方授室忽焉早亡而氏守節四十餘年竟獨老無依也

李氏稻谷庄生員南秉鉞妻雍正十二年氏年十九值秉鉞病故無所出惟有孀姑在堂而家甚寒氏自誓與姑同志躬勤紡績事姑二十餘年竭力送死撫義族子爲嗣至於成立苦節四十餘年乾隆四十二年尙存

王氏孝義坊何陵妻陵歿時氏年二十有一無子嫂鄭氏生三子皆幼而嫂卒姑七十三歲得癱疾氏念姑老姪幼誓柏舟竭力養姑撫姪姑享年八十有九姑卒戚屬以姪廷統爲氏嗣守節四十一年矣乾隆四十二年尙存

解氏生員解必隆女原任定邊鹽場大使劉經邦子松齡之妻也年二十有二而孀遺孤甫四歲公姑在堂繼而公歿官署家計蕭條氏奉姑教子紡績拮据卒能白首完節乾隆四十二年氏年六十有一



王氏中原里李相堯妻相堯卒於乾隆二年遺孤孟端甫一歲家赤貧氏年二十有四堅心守節紡績爲生日不舉火者數矣寧死不稱貸餬口遂撫孟端至於成立氏六十有一歲完節而卒

蘇氏東關范效魯妻生員寅之母也年二十有六效魯卒寅方四歲家計屢空而氏明於從一之義不以貧爲憂也事孀姑以孝聞蓋嘗自節其口體之奉食無鹽梅自竭其力拮据紡績隆冬夜不篝火而孀姑甘旨之奉無缺焉如是者十有八年其教子也謂成人之道始於讀書寅方齠髻即命從師凡所以資其費者甚艱而無不備後寅品端文進有聲鄉校與叔效淹相繼入庠亦由平日見氏苦志堅貞感而發憤以至於成者氏守節三十八年乾隆四十二年六十有四卒族黨匾其門武氏孝義坊武生白士傑妻士傑病故氏年二十有六無出事翁姑以孝聞翁姑卒時囑其再醮氏惟有痛哭而已守節三十八年乾隆四十二年猶存

嚴氏秦渡里許斌妻乾隆五年斌歿氏年二十有五無子家甚貧以再醮爲恥惟晝

夜紡績孝事其姑有屢勸改適者之死靡慝也以姪登龍爲嗣自幼哺養至於成立氏年六十有一卒

劉氏李伯村屈永發妻永發病故氏年二十有四惟生一女誓不再醮事其姑以孝聞姑亦劉氏以節旌者氏可謂能繼姑志矣撫從姪成塏爲子視如己出後已入庠乾隆四十二年氏年六十

陳氏李伯村陳朴妻年二十有五而孀二孤俱幼氏誓志撫孤日夜紡績備嘗苦辛二孤後俱有室有子乾隆四十二年氏年六十可謂白首完節矣

倉氏秦渡里郭又儀妻乾隆六年又儀病故氏年二十有二無出上有老翁甚貧氏堅志守貞晝夜紡績易粟養翁撫外甥爲子未幾送翁終氏茹荼完節於乾隆四十二年已五十有八

譚氏重雲里史昇閣妻年二十有六而寡其孤子珍方五歲內外重無所依而家又甚貧氏明於柏舟之義拮据撫孤已成立乾隆四十二年氏年六十有一

王氏安太里范仁妻漢陂太史裔孫女也夫卒遺一女無子年二十有三事其翁以孝謹聞翁病篤以守節撫嗣爲囑氏誓無他志遂撫戚屬幼兒爲子家雖飢寒交迫而氏處之不辭其艱後所撫之子已成立乾隆四十二年氏年五十有七猶存劉氏西關王械妻年二十有三而寡遺孤丕發甫二歲氏誓柏舟撫孤至於成立西峯修志時氏年五十有五

嚴氏三過村田世忠妻乾隆九年世忠病故氏年二十有三生遺腹子家甚貧氏勤紡績以餘布易麥孝事姑嫜自食糠粃撫孤同居伯叔逼氏再醮氏嘗自擊其面姑初亦惑於譖以不情之事加氏既而知氏苦心誠孝乃曰願他日汝媳事汝如汝事我也其伯叔諸孤氏又育之如己出不以當日逼嫁藏怒宿怨焉乾隆四十二年氏年五十有五

張氏西關王岱妻岱亡妻年二十有一子女俱無而明於從一之義是時翁姑已逝遺一幼子氏撫育之又撫育戚屬子爲夫嗣惟苦力紡績資生後翁姑所遺幼子

已成立析居而氏嗣子又不可靠氏苦節三十餘年竟艱辛以終命也悲夫

曹氏北街張克敏妻乾隆四十二年氏年五十二自二十一歲而寡生遺腹子綏矢志撫孤惟紡績爲活繼而綏娶妻戴氏以姪連登爲嗣而綏忽夭亡曹氏與弱媳幼孫誓共死生絕無他志

閻氏新陽里鴛善繼妻年二十有七善繼卒遺孤甫三歲氏守節撫孤晝夜紡績備嘗艱辛三十餘年

白氏秦渡里劉永寧妻年二十有七而孀事姑育子更無所依惟晝夜紡績爲活其父屢勸改嫁氏堅志不從苦節三十餘年

王氏趙王村史正行妻年二十有四遭夫喪無出即矢志從一而終居無何母屢逼改適已暗受財矣氏知之號哭兩日夜不欲生幸有救之者氏遂剪髮毀容其心匪石莫轉而母家自是亦不敢復言改適事氏念已既無子而姑又歿翁無少子如宗祀何乃盡出其嫁時衣物鬻之爲翁娶繼室甫生一子而翁與繼室俱卒惟

紡績撫育翁之遺孤後已十有餘歲從師讀書氏年五十有五爲乾隆四十二年也

閻氏孝義里屈含佩妻與含佩弟含和妻魯氏並以節著含佩之卒也遺孤甫三歲閻氏年二十有四又生遺腹子焉含和卒時魯氏年二十有二遺二孤一甫二歲一甫數月閻氏孀居時其姑年且七十而魯氏孀居時姑年七十一妯娌守節先後不相遠其時同其志同值家貧拮据紡績奉養老姑送終其孝同含佩兄弟負逋百金未償而死妯娌二人不欲其夫身後各蒙負逋惡名竭力織屨陸續償之其意同度日之艱有時采薪於道拾穗於田鳩面鵲衣見者無不心惻而二人俱以再醮爲恥不以貧爲恥亦不受人憐也其苦同始無卓錫之地諸孤成立置田三十餘畝其教子克家同閻氏年五十有三卒乾隆四十二年魯氏年五十有二允爲一門雙節

文氏渭曲坊閻曾妻曾病故氏年二十有二矢柏舟身兼耕織不以家貧改節事翁

姑養生送死撫二子成立乾隆四十二年採訪入志時氏年五十有二  
以上節婦六十五人俱孫酉峯修志時由採訪入志者按節婦自元以迄乾隆丁  
酉入節義祠見縣舊志并通省志者二十有七人見縣舊志及通省志者十有四  
人見縣舊志者四十五人而孫酉峯修志時其已旌未旌共續入者竟一百三十  
有八人嗚呼盛矣蓋當康乾之世民物康阜風俗醇物在上者又提倡節義時加  
旌表以鼓勵民氣故其時婦女咸以守節爲榮競相效慕遂至成爲風氣觀於酉  
峯志風俗可以想見矣以後則此次修志所續入蓋猶有遺風焉

貞女賈氏名清邑東留犢村賈錫璧女字花原頭閩朱銀兒童養夫家咸豐元年朱  
銀兒死於水氏年甫十四號痛幾絕既哭墓易髻爲髻以婦禮見舅姑舅姑憐其  
幼且慮來日大難送之母家勸他適氏泣誓之以死舅姑知不可奪乃以禮迎歸  
氏勤女紅致孝養甚篤舅姑歿喪葬外僅餘田十數畝又逋負累累乃更節衣縮  
食負累日清而生產且日益同治六年髮逆擾縣境氏投井自全不死賊使數健

婦引出甚敬重之伴以老嫗戒他賊勿入其室先是氏遵姑命撫甥印熬爲嗣既日印熬歿茹苦又多年光緒己丑邑紳等爲請旌豎碑立族孫炳耀爲嗣孫卒年六十有九邑宰宋潤之王筱圃俱旌表其門長安舉人柏景偉撰有碑銘邑太史崔志道亦撰有碑銘見金石

楊氏盪屋人幼受聘於曲抱村王五福五福食烏頭中毒死氏年十五驚痛欲絕往哭其墓以子婦禮謁舅姑跪陳其志許乃起事在光緒初年貞靜之操歷五十餘年不渝邑紳爲之請旌

以上受聘未婚夫死守節不渝者二人謂之貞女

葛氏名如玉幼失怙恃村中有白氏嫗者爲其子奉聖媒定而童養之未婚而奉聖病且篤氏泣告嫗曰願作媳終爲白氏婦及夫未亡請急行合卺禮以正名分禮畢而奉聖死其後養姑二十餘年三取繼子以緜宗祀備歷艱辛終爲完人壽七十三歲道光八年旌

按葛氏實與奉聖未成婚亦貞女賈楊流也然奉聖未死而行合卺禮名分定矣故屬之節婦實較節婦更難故列於此次所採訪節婦之首

白氏王殿選妻屈氏王殿吉妻俱許官寨人清附貢生王樸之胞叔母也殿選經商卒於外妻白氏年二十三歲子棟無後以姪樸之子汝霖爲嗣殿吉死時妻屈氏年二十一歲無子以姪樸之子汝舟爲嗣孫二氏俱青年矢志勤女紅王家政數十年如一日故當時有一門兩節婦稱白氏年七十有三卒屈氏年六十有八卒馮氏花原里賈福先妻年二十而福先死無子取胞姪景昌爲嗣撫育成人娶媳潘氏年二十三而景昌又死又無子氏使潘取胞姪景興之子爲嗣且慰之曰患鞠勞不盡心耳豈必已出而後孝哉卒承其祀至於無窮

孟氏郭村人年二十歸百福村馬維璜維璜死家無儋石子女俱無氏依堂弟以居弟死無姪艱苦備嘗者數十年

屠氏年十六歸新寨劉福成琴瑟甚諧屠病革福成以不娶爲誓屠以無後不孝勸



之既而屠愈而福成病不起一女在抱或勸再嫁氏泣然曰我垂死而夫欲守義今夫死而我再醮乎卒以節終

楊氏宋狀元楊礪裔年十五歸牛東孫才甫半年而才死姑憐其幼勸再醮不從歸寧時母家欲奪其志怒而去路遇求婚者尾於後氏覺下馬作跛足狀謀遂寢撫戚子建寅爲嗣子媳王氏以孝聞氏病王割股作羹病尋愈氏孫佛坪訓導懷玉事其母王亦如王之事氏云氏壽四十二嘉慶四年旌

蕭氏花原里李雲注妻年二十而雲注死遺孤發玉未週歲家貧舅姑俱在舅嚴厲稍拂意即怒氏承順維謹佐其弟擗當家事井井有條無玷家聲後子已成立矣壽六十有六道光四年旌

樊氏邑西鄉人歸崔村生員王全智全智卒子拱宸幼當時雖痛不欲生幸有姑在猶堪依賴然以悲夫之故憂鬱成疾遂不起道光丁未年旌

譚氏縣南關人歸崔村王自冬自冬早卒子全義全禮全智殿臣俱幼氏擗當家政

井井有條他如修宗祠設家塾倡捐書院膏火種種義舉在人耳目蓋氏富而節者也年逾古稀而卒之前一夕執爨婦夢鼓吹交作彩輿到門氏冠服升車而去明日氏果卒以子殿臣貴誥封安人道光丁酉年旌

張氏穆家庄處士高士忠之妻也青年矢志至老不渝道光七年建碑路旁

嚴氏百福村郭海妻年二十四而海亡老姑在堂氏以養志爲本子永康幼日夜勤苦俯仰賴以有資無何永康死永康子亦相繼亡氏號痛不欲生或有勸其再醮者氏垂泣謝之勵志彌篤以壽終道光七年旌

杜氏魏映斗之妻于歸時止一十六歲未亡人僅二十五齡姑善病躬侍湯藥不託妯娌曰恐他人不似我之盡心耳養生如此送死可知子二文怡邑庠生文超太學生曾元繞膝三十年苦節之報也道光十一年旌

張氏趙家堡趙學禮妻青年喪偶守從一之義于道光十八年九月勅旌節孝立碑路旁

劉氏牛東小堡李兆芳妻年二十餘夫亡家貧翁姑老邁子女俱無氏矢志節孝苦行冰心有逾恆情年七十餘終道光時學使以節孝全歸旌之

王氏仁和里劉宗智妻也嘉慶十三年歸宗智僅二載而宗智死時氏年一十九歲雖子女無出而頗知從一之義撫抱姪生玉爲嗣守節四十五年卒年六十四歲咸豐元年題旌

劉氏長安縣苗家庄劉秉儉之女年十六歸顯洛村李良棟良棟歿氏年二十二歲八十二歲卒苦節六十一年咸豐元年旌

劉氏牙道村劉鴻聲之女年十七歸興仁里惠宗禮閱四載而宗禮死計苦節四十年咸豐元年旌

劉氏新陽里劉天泰之女年十八歸龐村里鰥澄清閱六載而澄清死計苦節四十年咸豐元年旌

張氏花原里王志麒之室也年二十而志麒死家無僮石愁苦不堪氏養親教子支

持門戶者三十年咸豐五年旌

喬氏王大發妻年二十有五夫亡或以無子勸之嫁氏曰守節非守子且老姑在堂何人奉事卒志不渝壽逾七旬咸豐六年旌

袁氏文義操袁成德之女年十七歸道安里張仁輔閱五載而仁輔死計苦節五十二年咸豐九年旌

程氏李友桂妻年二十一而寡事舅姑克盡婦道育兄子成立家以漸裕壽七十一歲咸豐十二年旌

嚴氏生員嚴廷理女年十七歸渭曲坊李良爵事繼姑備極孝敬能得歡心逾七年而夫死又逾年繼姑及長子亦死氏一身支持門戶矢志靡他撫幼子成立咸豐中邑人士請旌如例

高氏陂頭馬見浩之妻見浩死於咸豐四年氏年二十有一姑老弟幼子在襁褓艱苦之狀萬難圖存氏乃心如鐵石矢死靡他卒能於戎馬惚惶之際養其姑撫其

弟教其子至於成立一婦人之力如此得不謂巾幗中之丈夫哉

薄氏元村樊永夏之妻年二十二歲永夏死遺孤一同治初復爲回逆所傷氏子然一身紡績糊口者六十年壽八十二歲卒

李氏黃堆堡楊殿更妻年十六于歸未一載殿更出外客死無子女有祖父暨翁姑均在堂衰老弟亦幼貧無立錐地或勸之嫁氏峻拒之卒藉十指以孝養同治初回亂作氏以祖年逾八旬不忍遠離乃蓬首垢面與賊相出沒伺隙以供祖食飲令翁姑攜弟避匿翁歿於賊亂定姑亦病疫歿獨遺祖老病顛連氏於凶荒饑饉之際百計營求必供甘旨與弟婦食糠粃度日撫弟子若已出苦節四十餘年而卒

楊氏雷家寨雷某之妻也年十七子生夫亡氏矢柏舟撫子成人娶婦後子死於髮逆之亂氏念雷門無後收賀氏子爲嗣茹苦食淡七十餘歲而終

雷氏雷家寨人歸本村劉某年二十夫亡守志七十餘歲終

陶氏南羊村蕭運琴妻年十七于歸二十有五而寡遺孤甫三月舅姑尙存時回髮亂作氏扶姑抱子四處潛逃而家徒四壁事畜之資皆氏爲之年六十三卒  
焦氏張氏姑媳也焦十八歸豐川嫡孫王頌頌死子幼母家慮氏年少氏泣曰吾王氏道學名家敢不自愛以辱吾祖乎後果不負斯言壽八十二歲無疾而逝張歸頌子邑庠生作霖合沓後知夫有弱症婉勸曰病須自醫寡嗜慾即養生之道也毋徒恃藥餌作霖聽其言奈數奇竟不起氏撫子芸及遺腹子菑矢志靡他養親教子三十年如一日卒年六十有四學使沈旌

李氏富村姚士元妻年二十三歲回匪亂士元以禦賊歿于戰事氏聞耗痛不欲生不料賊突至欲加以非禮氏投井七次末後經村人拯救得不死壽八十八歲卒  
守節六十五年

趙氏富村楊發祥之妻賦性溫和事親至孝同治元年回匪亂發祥病歿氏姑文氏年七十餘雙目失明弱女愛蓮甫二齡氏扶老携幼避難於鑿齒村不幸村城被

賊攻陷氏自忖姑與女不能兼顧乃將女愛蓮投於井中負姑避荒草間姑始獲免時賊往來倏忽村落爲墟復負姑逃鄆城繼逃盤屋又逃扶風後姑歿於扶風氏以女紅餘資購備衣棺搬柩而歸鄉里至今稱之

印氏崔景雅之妻年十七于歸僅二載髮逆擄景雅去亂定後婦女價值頗昂每娶一妻輒數百緡兄豔其值逼氏再醮氏持志堅兄逼益甚氏知無可奈何絕食七日求速死鄉里多以危詞戒其兄兄懼乃遣子跪懇始復食然自此忍氣度日瘳痺症作居平聽某某再醮履厚席豐輒慨然曰身敗名裂生不如死年三十有七以氣鼓疾卒惜哉

劉氏大良村處士解恆茂妻同治間髮逆亂兄嫂病亡恆茂爲賊掠去兄遺二孤俱幼而家貧如洗雖至親咸勸氏嫁氏曰解氏所遺只兩孤我去則存亡不知解氏將絕祀矣不從嘗食棉子度日後兩姪成立且生孫焉氏年七十有八卒

高氏東羊村杜迎福妻同治元年回匪至夫婦俱被執賊殺迎福而逼氏詭以夫

屍未斂乘間投井賊去村人拯出雖餘息尙存而左足已折時年二十九歲痛欲  
殉夫轉念子甫五齡無人撫育遂未遽死茹苦含辛數十年如一日年八十餘卒  
溫氏美泉里李乾妻乾死氏年甫二十家貧甚舅遠遊無確耗姑死山中氏扶柩歸  
葬備極辛苦弟亨甫三歲大劫之後復值歲祲草根樹皮悉挖食之後生計漸裕  
亨亦成立皆自氏茹苦含辛來也事在同治初年

潘氏獨庄堡楊其有妻氏年二十餘夫亡矢志堅貞撫三孤成人同治年間旌  
馬氏洪洞菴孫治太妻年十六而治太死子幼家孤氏無異志同治元年回匪至村  
婦邀氏避難氏不出曰吾將死於此出門一步便無一塊乾淨土矣閉門待斃而  
賊竟不入踰月後氏歿賊復至始燬其室人咸異之媳許氏年二十有八而寡孤  
潔之操不異其姑兩世清芬尤爲難得云

閻氏張氏李氏三世姑媳也閻適牛東賈立仁不數年夫亡無嗣即矢靡他志取弟  
達仁子生員蓮塘爲嗣蓮塘娶張氏有順德事孀孤與本生舅姑俱恭謹鄉黨稱



孝道光二十八年蓮塘歿張年二十一惟一遺腹女撫弟春塘子孝先爲之嗣昕夕勤女工寡言笑居恆足不出戶庭同治五年四月初九日髮匪至密縫周身衣服懷執投井賊去家人出之得無恙嗣爲孝先娶李氏李邑貢生茂甲之女也十七歲于歸本生姑鴛氏染奇疾李以新嫁弱質悉心奉侍即十六閱月不一歸寧後嗣姑張病癱瘓事之一如本生姑而於本生舅繼姑王尤能先意承志和衷婉愉云光緒辛巳子日新甫週歲而孝先亡李年二十二以親老子幼不能身殉奠墓歸即忍痛操作如舊以慰親心迨日新漸長教之讀督責甚嚴不以一子而稍存姑息故日新未弱冠即得入庠食餼焉張壽七旬有一光緒戊寅以苦心完節匾額旌之李現年七十有三計苦節已五十一年宣統元年旌以美玉精金四字扁文三世清節鄉里稱之

劉氏花原里紀守信妻童養夫家年十七易髻而髻甫二載而守信死取弟之子奎爲嗣家貧姑老子幼矢志靡他者數十年先是祖母劉叔祖母溫妯娌雙節事詳

邑乘叔母王亦早賦柏舟久符旌例後先輝映無玷家聲若劉氏者可謂德并四難而人擅四絕者歟

王氏六老菴五璞之女年十七歸東羊村劉建功甫三載而建功亡姑老子幼家貧如洗氏誼堅金石不以境遇移其志蓋巾幗中完人也光緒三年旌

劉氏定舟村張之愷妻年二十四歲生一女之愷死僅有灘地數畝近族中有惡少數人欲逼氏嫁而得其值乘夜塗朱墨鬼裝恐嚇之而氏志堅金石卒不爲動謀遂寢母女二人零丁孤苦紡績之餘惟禮佛誦經光緒戊子辛丑間陰雨連縣灘地被淹無人佃種氏益無聊賴遂依其族曾孫武生鵬翼以終天年壽八十歲卒

蔣氏小王店張和妻年二十五和亡二子均幼孀姑性極嚴厲稍拂意輒怒詈之氏下氣怡色事之幾四十年鄉黨稱孝同治初元花門構亂閤家避居縣治母老子幼事畜之資咸由十指間出光緒三年歲大歉艱難困苦又備嘗之泊子成立家亦小康光緒庚子學使沈旌其門曰節勵冰霜卒年七十有五

馮氏定舟村張乃鶴妻子歸後越四載乃鶴死于髮難遺一子一女俱在孩提既而花門變起戎馬倉皇之際流離轉徙艱苦備嘗亂平後辛勤紡績夙夜罔懈困苦萬狀而堅持雅操終不少易及子成立家計日充生齒漸繁三孫衍慶長孫學孔生員卒年五十八歲光緒戊戌年旌

張氏馬營張倉之女十九歲歸北索村石中興中與歿時氏年二十有五姑老女幼貧無立錫地有勸其再醮者氏曰死生事小廉恥事大且吾去吾姑將誰依乎命也復何辭後取族子爲嗣年六十九無疾而逝光緒甲辰旌

鄒氏安善坊王棣妻年二十六夫亡無子家貧或勸之嫁氏以死自誓惟晝夜紡績孝翁姑撫姪文煥業耕文治讀得遊邑庠光緒九年旌匾其門曰冰霜砥節卒年六十有一

靳氏小王店張景秀妻武舉雄藩之祖母也年十七于歸翁業商於外姑治家極嚴氏獨始終見愛咸豐間姑翁相繼逝花門亂起夫死於難攜其二孤避地終南亂

平歸村中多絕戶其子女無依者皆依之氏亦任之不辭光緒初生齒漸繁家亦漸裕命長子言起厦六間作書屋聘名師俾里中子弟就學以此成就者衆族黨中有牴牾者氏聞必召至家開諭務使怨解而後已以故數十年村中少訟事婚喪等事其貧力不能具者每解囊飲助鄉里咸稱頌焉光緒十年旌壽七十餘歲卒

劉氏東韓村王吉夢妻吉夢死氏年二十餘遺子女各一未幾而子女又亡撫姪忍事以承宗祀生平艱苦備嘗人所弗堪光緒十三年學使林旌以白首完貞匾額計守貞四十二年以壽終

楊氏安善坊耿喬妻喬病故氏年二十有三生遺腹子重光勤紡績姑以氏年少恐其守志不終一日跪姑前折箸誓曰媳不能事姑終老育子成立者有如此箸後卒如其言光緒十三年旌匾其門曰懷清履潔卒年八十一

馮氏李發榮妻年二十有三而寡家貧紡績自給以弟之子爲嗣教養成入壽七十

有八光緒十五年旌

張氏龐村賀應選之妻年二十一而應選死當時姑已七十子逢麟尙在襁褓艱苦萬狀勢難圖存氏則仰事俯育終始不渝數十年後家計漸裕逢麟已入庠何嘗非苦節之報也光緒十七年旌卒年一百零四歲

甯氏喬家庄段永義妻年十九夫亡子富纔一齡翁年邁而瞽家徒四壁無寸土田氏矢志守貞決不爲無義婦日操女工勉度艱辛子稍長翁嘗泣謂曰若非爾母吾與汝早葬狐狸之腹矣後翁歿教子益嚴漸且爲子娶氏于光緒十七年逝世享壽八十五今子且有子家亦稍給矣

元氏宋村石鏡銘妻鏡銘歿氏年甫二十無出舅姑慰之曰嫁固恆情守非易事來日苦多可奈何氏泣曰婦人之道不二其天所不終始維一者有如天旣而矢志靡他五十餘年如一日焉享壽七十三歲光緒二十年學使匾其門曰志儷松筠魏氏龐光鎮關西智妻也年十八歸西智六年而夫死時年二十四歲遺孤學義甫

週歲上有舅姑家徒四壁氏日夜紡績以供甘旨後舅姑棄養氏營喪塋竭情盡禮今子已成立守節四十餘年矣享壽七旬無病而卒光緒二十一年旌

屠氏新寨劉元登妻年十八元登疾革執氏手曰吾身後此門閉矣蓋以其有女無男妻必嫁也氏泣然流泣誓言君如不諱吾取螟蛉必開此門塋後即取族姪爲嗣教養成立兒娶女嫁不幸嗣子復夭媳他適又取族孫復殤或以取繼不成勸再醮氏曰吾華年誓開此門今近老而閉之乎卒以貧寡終其身壽七十九光緒二十一年旌

李氏牛東王繼閔妻年十九于歸夫亡氏年二十六無子女翁尙存撫姪保鼎爲嗣事親教子艱苦備嘗壽八十二卒光緒二十一年旌

楊氏年十八適牛東王遇泰二十六歲遇泰死持身守節志堅金石事繼母尤委曲承順內外無間言光緒十一年旌

馮氏吳鳳岡之妻羣稱事親以孝夙著宜家之賢遭家不造甫二十而夫死未三十

而翁姑又相繼死弟新芝未離襁褓自撫之以成人姪宗泰尙屬孩提急取之以爲嗣真不磨之鐵漢無瑕之玉人也光緒二十三年旌享壽六十有五

趙氏康王村靳自行妻年未二十而夫亡無子女時孀姑已邁氏事之色養兼至能得歡心嗣取近族子承祀子又亡顛連困苦歷五十餘年卒年七十餘歲光緒二十四年旌

李氏化羊村方文純妻廩生方栗之母也年十六歸文純逾五年文純病卒氏年二十一歲翁姑在堂子方栗甫週歲矢死靡他養姑教子子成立即使就傅修脯之費罔使或缺方栗遂得遊庠食餼年六十卒守節三十九年光緒二十四年旌

王氏道安里生員張管妻年二十七歸管甫二載而管死生遺腹子效雅上事翁姑下撫孤子孝慈並盡年八十有二卒其孫成允之妻楊氏歸成允五年成允病故氏年二十四歲子育賢亦甫週歲氏紡績度日養姑撫孤艱苦備嘗其苦節之貞歷四十餘年與祖姑畧同後先繼美可謂一門雙節光緒二十四年旌

萬氏洪洞菴劉永言之妻武庠生劉俊清之母也年二十六而孀居歲饑家貧以十指謀生計其姑與子倚以存活後俊清成立家計漸裕曾孫滿堂論者以爲氏三十餘年苦節之報年八十有七卒光緒二十四年學使旌其門曰柏舟遺範

劉氏南城寨孫儒妻年十八于歸生子必興必起二十九歲孀居必興伯父以氏寡子幼逼分爨氏所分甚薄兼有債累乃苦荼紡績令二子更替樵讀後必興生子成章已七歲家道稍裕氏淡泊如前取兩油瓶謂孫成章曰我以一瓶儲油半斤供一歲潤紡車之用一瓶儲桐油半斤供一歲燃燈之用如此者二十年矣今稍裕勿忘貧也性好施予每歲必視族黨之貧乏者量予薪米無稍靳光緒二十四年旌卒年七十三歲

李氏禹泉里朱大德妻也道光八年大德病故氏年二十三歲痛夫亡欲以身殉嗣以親老子幼不忍遽死翁姑棄養喪葬盡禮子亦成立年八十五歲無疾而終光緒二十五年旌



李氏李伯村北堡張疇妻年二十而疇死遺一女氏矢志靡他處娣姒無詬誶聲日勤女紅不出戶庭貞靜之德鄉里咸稱光緒二十六年壽六旬餘卒

周氏中原里王換銀妻咸豐六年氏年十七歸換銀未及一年換銀出外氏事舅姑甚得歡心舅姑雙亡氏又無出依叔孀紡績度日撫其幼弟至於成立同治初元回匪作亂夫被擄身亡氏即撤其環鈿誓以死守時年二十四歲計守節四十餘年光緒二十六年旌

王氏柿園堡王慎行妻年十八夫死僅一女薄田數畝邁姑在堂所得租課三口不給氏躬自作苦紡績度日四十餘年裕如也壽六十有五光緒二十七年旌

張氏小王店張德福妻年二十夫亡二子俱在襁褓僅有地二畝氏於千辛萬苦中撫育其子同治七年歲大禋氏與二子每米一升和菜而食者十餘日其堅苦如此後家道小康孫曾滿堂人以爲苦節之報光緒二十九年七旬有三終

羅氏定舟村趙九齡妻武生羅騰霄之女年二十二而九齡歿無子以姪爲嗣祖姑

與姑老且衰氏矢志靡他維家計蕭條而仰事俯蓄養生送死必極力經營無遺憾蓋數十年如一日也光緒三十年旌

樊氏均河村趙芝玉妻年二十而芝玉卒子在襁褓家亦極貧氏誓不改適撫孤成立其堅苦卓絕之心有非一般人所能及者年八十六卒光緒三十年布政司樊旌其門曰霜筠雪柏

趙氏化東堡崔來亨妻年十八于歸同治元年夫被賊傷時年二十有一即矢志靡他堅苦自勵無子撫姪成立家道煥然卒年八十有一光緒三十年里人贈以矢志柏舟匾額且以表其德云

趙氏東屯里農民傅斯立妻也于歸後僅八年而斯立病故家貧母老下遺雙孤氏竭績織之力以爲事畜及老母謝世族中有逼氏改適者氏曉以從一之義誓死不從今二孤成立家亦漸裕皆氏苦節之報也光緒三十二年旌壽六十五歲

宋氏宋村人年十六歸劉天合甫八載而天合以癆瘵成疾氏躬親湯藥衣不解帶

者三年之久天合歿子建章尙幼氏以嚴爲慈不作舐犢愛嘗語建章曰汝不成人汝父爲無子吾敢誤汝以誤汝父乎其識大義如此光緒三十三年旌

盧氏待詔村劉壽元妻年十七于歸壽元未三年壽元身染痼疾氏日夜祈禱欲以身代及壽元歿思吞鉛粉以身殉念母老子幼忍痛中止後老母壽終子亦成立氏苦節之貞五十年如一日云光緒三十四年旌

周氏崔爾龍妻拔貢周鴻緒之姑母也幼嫻姆教于歸五年爾龍死川中氏攜孤扶襁由川數千里旋陝塋後節縮口腹紡績度日守節五十年請於朝祀節義祠

孫氏武進士菁莪姊生員崔岑妻武舉廣居之母也于歸三年岑病死氏撫遺腹子廣居守節茹苦數十年如一日廣居中武科後請於朝入節義祠

吳氏王氏姊姒也歸王氏俱以二十餘歲而寡一日姑哭謂曰守固好嫁一恆情願留一人爲老嫗伴可乎吳曰姊年少宜自便兒必終爲王氏婦王曰嫂無子何依媳在即兒在也姑請勿疑姑曰來日苦多得毋貽後悔乎二氏哭失聲跪而自矢

日所不養其姑撫其子者天厭之後十餘年而姑死葬如禮今子已成立且抱孫矣二氏皆七十餘歲卒

周氏韓村周用之女年十六歸寧羌堡王煥煥少狎遊不知所之氏不得已依叔嬸以居事嬸如母含辛茹苦者四十餘年卒

劉氏花原里賈經本妻年二十而寡兄老嫂病奉事維謹取族子爲嗣苦節數十年如一日

邵氏年十八歸李伯村屈有翼甫一年而有翼死遺腹子曰之堅家貧紡績供子讀之堅十七歲入邑庠未幾死遺三子皆幼時值回髮亂作徧地荆榛氏卒撫育孤孫至於成立

閻氏涓曲坊文在斯妻光緒三年在斯死氏年二十有五堂上之姑已衰懷中之兒尙幼苦莫苦於此難莫難於斯矣氏乃甘旨備供效登堂乳姑之義嚴慈並用有趨庭訓子之誠計苦節三十餘年

康氏年十六歸生員張欽甫三載而欽死家無儻石以紡績易甘旨翁姑雖老若不  
知有無兒之苦者非色養備至者不至此今遺腹子泰岳已成立矣青年勵志咬  
菜根者四十餘年白首完貞逾花甲者二十餘歲允符旌例急登志書

馬氏縣南關譚登第妻登第死時氏年二十七歲子女俱無情殊可憫既而回髮亂  
作舉家逃至城內厲疫盛行數十口幾無子遺譚之不絕如縷有疑其再醮者氏  
曰我去而二姪將誰依乎禽獸之行我不忍爲於是隻手擎天出萬死一生中卒  
使其長姪慎次姪維祺均得成立後維祺以積廩作歲貢氏之再造譚氏豈小補  
哉

馬氏晉候村人年二十歸陂頭趙玉魁玉魁死氏年二十有五當時祖父母俱近百  
歲翁姑亦年逾七十子尙在襁褓氏以身任事畜始終無少懈

王氏崔村人年及笄歸定舟村張世棟世棟歿氏年二十有五無子撫幼女以針黹  
自給茹苦含辛數十年如一日壽七十歲卒

鄭氏馬營人歸崔村王金騰金騰歿氏年二十有七子縉在襁褓中適髮匪突至欲擄氏氏以刀砍其頸仆於地賊疑其死置之後八十餘歲以天年終

王氏崔村人歸定舟村石顯顯死二子俱幼家計頗艱氏辛苦備嘗撫二子至於成立年七十餘卒

董氏長安人歸崔村王紀紀歿時子錦堂尙幼盡心撫育能以慈母兼嚴父之職後子成立入邑庠氏年六十餘而終

吳氏趙王村吳建忍之女年十七歸史秉義甫四載而秉義死遺一女老姑在堂諸姪俱幼氏仰事俯畜不以貧苦移其志年七十餘卒

賈氏牛東人南鄭訓導賈誥女太學生孫述先妻四川候補巡檢孫濤之母年二十九而述先死氏守節數十年村中築堡垣捐二百金助其役官爲旌其門曰功侔洗氏

廉氏秦氏姑媳也阿姑泉人廉適王甲三載而甲死秦適王丙三載而丙又死遺子

幼姑媳相依秦尤孝廉亦能慈故數十年茹苦含辛不渝其志後孫曾繞膝里人稱羨廉年九十秦年八十餘而卒

高氏靈山寺人年二十歸楊鴻順逾年生子懷珍又三年寡時食指繁多家人無不欲奪氏志者惟曾祖母崔氏眷氏特深恆以大義慰勉氏矢志靡他曲盡婦道後析居家計窘迫氏茹苦甘貧以紡績課兒讀凡三十餘年饑饉兵荒不渝其志年六十四卒

崔氏靈山寺鄭從昌妻生子步雲甫三歲而寡其嫂迫之再醮氏堅志不從事叔母傅氏以孝聞後年七十餘卒

溫氏草廟人年十八適許振吉逾年夫服賈打箭爐旋客死家甚貧氏事姑極孝數十年無疾言遽色紡績兼治農事以供甘旨無子取外甥爲嗣後姑歿嗣子亦成立守節五十餘年而卒

姚氏康王村靳玉辛妻年十七于歸二十四歲夫亡僅有二女翁姑憐其幼勸之嫁

弗從勤織紡操井臼守節四十九年壽八十二歲卒

解氏宋村人年十八適何通海無子夫亡守節四十餘年茹苦甘淡不易貞操性樂善鄉黨老幼莫不敬之年八十餘卒

馬氏宋村陳世權之妻生子紀方夫亡守志安貧撫子成人粗立業產年六十餘卒  
李氏龍台坊趙思賢妻年十六于歸逾年夫亡氏矢志守節家無可依因生父老病無子遂常住母家自忘爲女養生送死皆身任之且爲李氏立後迨老病歿始歸葬龍台坊

劉氏大良村解巨昌妻十七歲于歸生子正科連科巨昌病死親老子幼又家貧如洗氏以針黹備甘旨之奉又課子讀書後二子成立俱有聲計氏苦節共五十餘年

屠氏十七歲歸崔智溫二十四歲而寡守節四十六年壽七十歲以疾終

薄氏白雲堡李煥妻年二十一歲生女甫兩日煥以貧赴川經商客死於外家徒四



壁舅姑皆依氏爲命氏慨然以事畜自任機杼之聲連宵達旦雖寒暑無間也舅姑歿鬻布營葬曰今日後可見亡夫於地下矣遂携女依母家女嫁後織紡自給年五十餘歲卒

趙氏澇峪口劉大祥妻端謹寡言笑年二十三夫死遺子女各一家貧如洗氏矢志五十餘年學使表其門曰松柏爲心壽七十餘歲卒

劉氏土門街蕭萬春妻澇峪口守備劉登第女也性莊嚴精女紅年二十一夫死遺孤在抱氏茹苦勵節刺繡度日壽六十八歲卒鄉里稱之

胡氏元村白用忠妻年二十四歲而寡矢志守貞撫孤子至於成立苦節數十年卒王氏豐川六世孫女也年十八歸任正不四載任正死無子取族子爲嗣守節三十年始終不渝

張氏坳河村段永齡之妻年十八于歸時段家道中落永齡應童子試嘗脫簪珥以助二十七歲而永齡死上有老姑下遺弱女薄田僅三畝氏以織紡供事畜人爲

氏慮而氏處之晏如也姑年九十餘歲終氏年亦八十餘歲終

張氏縣北街典史趙良治之繼室年二十有八良治死氏矢志守節撫前室子如己  
出勤儉自持不類宦家終其身目不窺戶年九十八卒

陳氏馬營張晉陞妻進士陳樹楠女也年十九晉陞死遺孤未週歲氏矢柏舟事繼  
姑以孝聞晉陞之弟若妹七人婚嫁什物皆氏手置年五十髮白如雪守節數十  
年無稍渝現年五十有七子繼志充山陰正化學校教員又充永裕倉經理孫二  
人以爲節孝之報

甯氏土門街程保順妻年二十五保順溺死家無儋石氏備身事姑甘旨備俸年五  
十先姑卒姑痛不欲生

馬氏南羊村蕭運琴妻年十七于歸年二十五夫死遺孤甫三月舅姑尙存時回髮  
亂作氏扶姑抱子四處潛逃而家徒四壁事畜之資皆氏經營年六十三卒

王氏邑北街生員陳隆遇妻舉人王恆晉之妹通文字識大體年二十一于歸僅三

載而遇隆死無子撫姪哲娃爲嗣上事舅姑得其懽心陳大族人口繁多氏處之咸宜終其身無間言年五十卒縣宰旌其門曰節孝無虧

楊氏秦渡鎮張煥翼妻年三十賦柏舟家奇貧負債纍纍氏質簪珥典衣服傭作撫孤夜無燈火恆於月下操作堅苦卓絕到死不懈子四使於農工商醫各執一業家道以成鄉黨稱之

吳氏澇峪口寧老七妻寧傭身木廂死於水貧無立錐廂主議恤錢六十串時氏年十九子法林甫三月即矢志撫孤刻苦自勵人罕見其笑語孤漸長教之營業雖稍權子母置田宅恆淡泊自誓麥不逾十石不食餅惟啜粥度日或連宵不寐機杼之外繼以樵穫每出門村中蕩婦輒避後田地至九十餘畝猶日雜傭工操作壯健有逾男子年八十三卒苦節孤邁可謂絕無僅有矣

趙氏渭曲坊生員段光第母年十七歸大裕爲繼室回亂大裕歿遺光第甫六歲家貧如洗氏常並日而食或勸再醮弗聽整日撤夜紡績不輟貿布易鹽米光第能

讀書督責尤嚴不爲媁嫗愛年五十有六卒

賈氏姚村嚴茂亭妻年二十三歲茂亭歿撫孤成立且抱孫矣未幾子死媳亦死復撫孤孫備極坎珂茹苦七十年壽九十三卒

趙氏元村劉望義妻年二十九歲夫死遺一子貧無立錐賣餅度日茹苦四十餘年壽七十餘卒

安氏保安灘費家庄費永富之妻年二十九歲而寡遺孤一而不慧莫辨菽麥且家無立錐地氏歸母家借田耕兼紡績以自活卒能爲子娶婦育子以綿費氏之後全氏元村樊必高之妻年二十八而寡遺孤四家甚薄光緒三年歲大祲攜子挑菜根煮食勤勞堅苦鄉人稱之年七十餘卒

姚氏元村劉望斌之妻年二十歲夫死無子撫外孫爲劉氏後苦節四十餘年

白氏元村常有慶之妻年二十九寡居撫孤子成立苦節三十餘年

李氏元村常有餘之妻年二十八夫死子殤依其從堂昆弟以居家業卒爲所侵歿

之日幾無以爲歛哀哉

鄧氏什王村女適定舟村李江源年二十生子世貴未彌月而江源死時家道零落兄弟不相顧氏抱子往依母家母家貧且乏嗣二親老病氏紡績度日事親撫孤艱苦異常後二親相繼歿俱具衣棺葬如禮及世貴長生數子使一子承鄧門祀買田構屋遂家於什王村焉氏年五十三歲卒計守節三十餘年

孫氏年十六歸什王村李生才二十五歲生子興福甫歲餘夫死堂上尙有老姑且貧氏仰事俯畜皆由十指間出堅忍之操至死不渝共計守節四十六年壽七十歲卒

吳氏白雲堡生員崔獻春妻年二十八夫死家人欲奪其志不可凌辱備嘗其志堅決終身不變六十餘歲卒

劉氏白雲堡崔味娃妻生兩子俱啞味娃死氏年未三十茹苦含辛數十年無笑容李氏土門街蕭永泰妻早寡無依節儉自持始終無渝

向氏張家堡張萬春妻萬春死氏年僅十九呱呱在抱矢志靡他萬春兄弟五人相繼亡無子妯娌亦先後嫁有勸之同行者氏泫然指懷中孤曰張氏五門所存者此我去誰撫之織紡自給年六十猶能賃屋縣城操澆濯業供其孫肄業縣校校長聞而義之爲免學費助膏火名之曰勉吾俾其自勉也氏年七十三卒聞者難之

劉氏東韓村王金堂妻年十六歸金堂甫七載而金堂歿姑以氏齒釋勸令再適氏泣曰婦人之道從一而終矧姑老女幼事畜無人若再適是禽獸也兒不忍爲旣而姑死嗣子夫婦又死零丁孤苦窮無所告年六十餘卒

賀氏于清之妻貌醜而有德合昏後其夫憎之遂遠遊久無耗于固家貧遺其母與賀賀能婦代子職以養其姑三十餘年一日于攜一妾歸妾咎姓色頗豔麗賀處之怡然不啻其姊妹行也未幾其姑死其夫亦死賀經紀家政其中條理爲鄉之人所欽仰

楊氏王寨李甲之妻年二十四而寡子進財在襁褓上事其姑下撫其子家計賴以不隳年七十卒

朱氏沙河寨丁培儒妻二十三歲而培儒死取弟之子爲嗣事祖父母暨翁姑先意承志得其懽心計守節三十餘年鄉人稱之

趙氏龍台坊宋連計妻年十九而寡家赤貧傭身撫孤後孤又夭愈無依矢志益堅年八十餘尙能紡績自給宣統二年旌

周氏六老菴劉汝賢妻年二十九而寡遺孤欽甫十二歲氏矢志完貞儉樸自持髮匪之亂欽被虜者十餘年氏痛夫思子備嘗艱辛宣統二年余學使旌其門曰鍾禮郝法

呂氏呂源海之女年十六歸吳家堡吳光福閱八年而光福死子效棟僅週歲恆產又薄堂上有姑又有兩弟暨弟媳光緒三年歲大祲弟媳勸氏再醮不從強之且曰飢死何益必留其子以鬻其母也氏恐被暗算出門自謀生活姑憐其少且賢

依氏以居咽糠粃草根樹皮得無恙而姑死葬如禮子亦成立家號小康氏年七十有四卒計守節五十餘年宣統三年旌

傅氏元村白玉璽妻年二十五而寡紡績度日門設常關撫子成立苦節四十年以歿

劉氏百福村馬獻妻武生仿周之祖母也年二十二寡居子八歲地數畝受弟某凌辱氏不與校惟紡績撫孤勵志守義後子已成立家臻小康氏年六十餘歲卒

牛氏姚村嚴鳳吉妻年二十二歲寡居生遺腹子家貧如洗氏常住母家藉十指之力以撫子成立壽七十歲終

張氏辛栗村西堡周鐸之妻年二十有六夫亡堅守貞操六十餘歲以壽終

王氏年十八適辛栗村西堡馬步全二十三歲步全歿茹苦撫孤數十年如一日壽七十餘歲以完節終

曹氏辛栗村北堡蕭賢妻二十五歲夫亡撫同宗子爲嗣矢志終身不二六十餘歲



終

趙氏石井村王庭祥妻年二十七夫亡撫兩孤子成人孝慈勤儉嚴守閨範壽七十歲而歿

萬氏石井村范崇功妻年二十七歲夫亡子又亡艱苦萬狀心如鐵石壽七十三歲終

王氏何家庄王元慶妻年二十五夫亡子僅六歲撫孤成人性勤儉慈惠遇荒年食菜咽糠不二其心有男孫五人教以耕讀里人咸稱之壽七十有六

吳氏何家庄王元廣妻年二十三歲夫亡子數歲氏矢志堅貞持家業不墜教子讀書力田一生苦操無有瑕玷年八十歲而終

潘氏何家庄邵登明之妻也年二十七夫亡撫子成人娶婦得孫僅三日婦又亡氏復撫孫成立壽八十二而終

馬氏窩庄葛長所妻年二十六夫亡無子氏守從一之義勤儉支家七十三歲而歿

張氏水磨頭張振江妻年二十五夫亡撫四子成人堅持苦操至老不渝年八十餘歲而終

王氏歸雷家寨雷生才年二十七夫亡無子兄弟無依鄰人有勸再醮者氏堅志不從苦節以終壽六十餘歲卒

王氏東團庄王宗初妻年二十夫亡矢志不二撫子三人皆成立壽七十餘歲終

張氏焦家庄焦夢雲妻年二十七夫亡守志撫子成人行誼清潔壽七十餘歲而

曹氏龍西灘王仁妻年二十二夫亡撫孤成人冰霜其操壽七十歲終

曹氏龍家寨蕭某妻年十八歲夫死無子氏守從一之義誓死不渝壽七十餘歲而終今匾額猶在

李氏全家庄周義成妻年二十二歲夫亡守志不移性慈惠好施予鄉人稱之無子撫姪爲嗣壽七十餘歲終

萬氏東澇峪口劉文友妻年二十五夫亡撫孤彥芳成人彥芳好學精醫術氏享壽

七十三歲終

齊氏石井村東堡方某之妻夫亡氏年二十八歲撫養三女出嫁後零丁孤苦操志益堅壽七十四卒

劉氏羅什堡王國正妻性貞潔青年喪偶守從一之義至死不渝有勅旌節孝碑  
吳氏穆家庄高建堂之妻青年守節子生六十九日夫亡嚴守從一之義撫孤成人七十三歲以壽終

張氏呂公寨單建璋之妻年二十而寡勤儉慈惠視姪如子諸姪皆依氏撫育成人以兄子尊賢爲嗣清操勁節至老彌堅年五十餘歲而終

單氏呂公寨劉天一妻年二十八夫亡二子從祿從福俱幼一貧如洗氏忍飢勵節辛苦異常卒能撫二子成立有田半頃諸孫皆讀書識字壽七十餘卒

王氏呂公寨賈文通妻年二十五夫亡二子俱幼氏撫育成人艱苦備嘗壽七十餘歲卒

楊氏麥張寨朱僞妻青年喪偶守志不移淑德懿行堪爲婦女矜式村東南建有勅旌節孝碑

楊氏陳兵坊李貞之妻年二十餘喪偶子僅數歲家貧甚氏織紡度日撫子成立有田六十餘畝後子任羅什操總約秉公持正人以爲氏之教也壽八十歲終

劉氏崔村楊士爲妻士爲經商扶風客死氏年十九歲舅姑早沒家貧子幼含痛茹苦十餘年始挾父攜子扶櫬歸葬鄉里以巾幗丈夫稱之生平挑菜爲食拾草爲薪紡績度日人不堪其苦而氏處之晏然至死不渝卒年六十歲

萬氏李伯南村屈敏行妻年二十而敏行死子作耕甫數歲氏督耕課子家業較前更裕光緒十八年戚黨贈以金閨令範匾額學使葛又以苦節可貞旌之後作耕年近四旬因獲竊伐墳柏之盜反爲所戕氏痛憤鳴官論抵其時孫士奇方五歲稍長即教之讀後士奇畢業於陸軍小學甫生子雲而士奇又亡三世孤苦氏一身經之年八十三歲終

劉氏北郭村羅福佑妻年二十二而夫亡子文錦甫二歲氏事姑孝理家勤及文錦稍長即命之讀嚴加督責不爲姑息故文錦得早入邑庠氏以壽終

蕭氏北郭村羅久之妻生員文錦之祖母也年二十六而寡房一椽地八分母家勸之嫁氏誓志撫孤紡績度日厥後諸子成立而家道昌長福浩太學生次福佑三騰霄武生例授武信佐郎時人以爲苦節之報

萬氏西郭村魯魁妻生員志仁之母年二十三而魁死適回匪之變氏挈子攜姪匍匐縣城口食賑粥少許困苦不堪言狀迨亂定一貧如洗貿布度日撫二姪如已出教子讀書得入邑庠年六十二終

王氏霹靂李生玉妻年二十九而寡孀獨無依遺兩弱女地二畝房一間雖飢餓不乞憐於人確守婦道無故足不出門母家及鄉鄰咸勸之嫁氏曰我生爲李氏婦死爲李氏鬼自始至終以紡績爲生活之計宣統三年年八十二歲卒

方氏石井村譚某之妻也年二十二夫亡撫一孤子成立茹苦食淡壽八十餘卒

陳氏真花衛吳汝杰之妻年二十七夫死二子均幼有以家貧勸氏再嫁者氏誓死  
不二以織紡爲業撫子成立奈一生苦命至七十二歲而二子皆喪竟以丐終卒  
年七旬有四

王氏魯家寨楊大成妻年十七于歸僅二載而夫亡家貧如洗負債纍纍舉遺腹子  
一紡績度日杜門不出賣布以清結債務事姑教子守貞四十餘年年六十餘卒  
段氏程家灣程某之妻年十七于歸甫十九而寡居無子女子然一身惟夙夜織紡  
縫紉以爲生境遇雖艱節操愈嚴年七十餘終

薄氏留南村劉穩妻年二十七夫亡姑老子幼田數畝困苦難堪或勸再醮氏曰余  
寧死不失身於人藉十指力以孝親撫孤子興利已娶妻生子矣未幾媳亡氏又  
撫孫備極苦楚雖飲冰茹蘗歷數十寒暑而志不少懈劉氏之祀賴以弗墜者氏  
之力也後家計漸優孫又生子享年七十歲卒

姚氏定舟村李某妻早寡遺一女歲一破屋家無僮石日夜紡績備嘗艱苦迨女出

嫁家亦甚貧氏與女更相爲命清貧徹骨而能白首完貞真巾幗中之鐵漢者後七十餘歲無疾而終

袁氏大王鎮生員姚世玉妻年二十四世玉死於回難氏矢志堅貞義不再醮堂弟二人以氏年少勸之嫁不許茹苦含辛撫堂姪伯仲如已出至於成立後伯仲勤儉家亦小康氏年六十三歲卒

沈氏梧桐村山鳳連妻年二十九夫亡氏撫養三子日夜紡績志不少渝四十年殆如一日卒年七十有三

王氏梧桐村韓必虎妻年二十生一子夫爲回匪所傷零丁孤苦斃無所依至爲傭作藉給饗餐苦節數十年人無間言卒年七旬晋三

陳氏桐梧村吳順妻二十八歲夫亡遺一幼子貧無立錐氏爲人縫紉紡績以餬其口卒能教養幼子成家立業苦節四十五年壽七十三終

楊氏崔村萬志德妻年二十三孀居子方七歲家貧如洗弟某屢逼之嫁氏正色拒

之日夜紡績志不少移者歷四十餘年後孫曾繞膝家道小康人咸以爲苦節之報云

申氏梧桐村杜林妻年二十而林爲回匪所戕氏攜子播遷拮据南走艱苦備嘗不可言狀卒能撫子成立苦節歷五十餘年六十九歲終

張氏梧桐村劉成穩妻年二十而成穩亡家徒四壁氏志堅金石紡績糊口後養甥以延宗祀歷二十餘載人無異言

馮氏梧桐村山定娃妻年十七于歸未週歲而夫亡事祖姑暨其姑克盡孝道後祖姑年近期頤而卒氏與其姑相依爲命紡績度日備歷艱苦姑八十餘卒氏年六旬餘終

段氏坳河村趙恆貴妻年二十七而恆貴歿子幼家貧氏以紡織代耕供其衣食雖境極困而心愈堅年六十二卒

楊氏元村李克讓妻年二十二生一子夫被回匪所傷氏矢志靡他顛連困苦計五



十餘年七十三歲終

王氏東牙道孫文義妻年二十七夫亡無子薄田數畝誓不改適撫一螟蛉又亡零丁孤苦守節五十年七十餘歲終

閻氏西牙道堡張儒居妻年二十七夫亡一子方六歲堂有翁姑氏事之能盡其孝撫子成立七十歲卒

楊氏西牙道堡張學滿妻年二十六夫亡家貧一子尙幼氏紡績勤勞嘗爲他人作嫁衣裳養子成家孫曾蕃衍七十六歲終

宋氏康王村北堡張茂順妻年二十一夫逝無子翁姑俱邁氏壹志守貞凡晨昏之奉皆賴十指以給卒能頤養二親皆八十餘歲終後取女弟之子以延宗祀計苦節五十餘載壽七十六歲卒

吳氏龍台坊陳振壁妻年二十而振壁歿無子僅有二女氏金石其心至老不易年六十五歲卒

李氏龍台坊生員陳振瑛妻年十八夫亡無子家式微氏守從一之義以紡織縫紉  
佐饗殞飲冰茹蘖苦節四十餘年卒年六十歲

郭氏興仁堡楊永登妻年十七于歸越四載夫亡子樹椿未二歲上有老翁氏矢不  
再醮惟思竭力事親紡績不懈久之家漸小康子已成立三孫繞膝計四十餘年  
從未輕出門戶卒年六十四歲

夏氏定舟村生員楊士俊妻年二十三士俊爲髮逆擄去生遺腹子朝謹家極貧藉  
紡績以養生其父無子歿於新疆氏偕娘屋堂弟搬柩還家跋涉數千里來往幾  
一年歷盡險阻艱難卒能歸其父骨此在男子猶難而氏能之詎非庸中佼佼者  
乎晚年孫曾蕃衍家計亦裕年七十五歲終

邢氏兆倫村毛庭生妻庭生死氏年二十四遺二子尙幼薄田數畝日織夜紡以爲  
生活淡泊自甘養二子以至成立雖時值困阨而數十年處之如一卒年六十歲  
雒氏定舟村趙大順妻年二十餘翁姑俱逝無子女夫病革時語氏曰汝守我心慰

汝嫁我心戚汝在猶我在也夫歿家貧如洗無立錐地勤於紡績日夜拮据後取姪爲嗣日用稍給晚年長齋茹素猶鬻布以易香貲卒年六十餘歲

安氏祁村仝懷行妻年十七于歸閱四載夫亡生子建利甫一歲家徒四壁夫於彌留之際喃喃謂氏曰家貧子幼汝宜再嫁氏泣而矢以天日夫歿後日夜辛勤以紡績易鹽米鄰婦見其貧甚勸之再醮氏志愈堅勤益力且令其子讀書現時孫已成立家亦小康壽七十五歲終

余氏化東堡崔致和妻年二十四夫死生遺腹子江海孤苦自持紡織度日守節三十五年子亡媳死嗣又撫孫年六十餘卒

方氏五庄萬玉樹妻年二十五夫死即守貞不渝事姑以孝聞六十二歲歿無子族人咸稱揚之

溫氏許振吉妻年十九于歸夫出外多年回家未幾卒無子氏奉姑孝取外甥爲嗣姑亡家益貧氏且耕且織撫嗣子成立後又生孫許氏之門賴以不墜

于氏朱祥仁妻年十七于歸僅年餘祥仁出外不知所終氏與寡嫂楊氏同居事之如母未幾髮匪亂攜姪逃難山中艱苦備嘗堂弟寬仁爲請封贈豎碑卒年八十有五

雷氏朱大倉妻年二十四夫亡子長林僅四歲薄田五畝而外債數百氏堅承夫志情甘守節卒能撫長林以成立年七十三終

宋氏李遇文妻年二十四夫亡撫幼子守貞孤苦不堪卒年八十四歲

劉氏辛家庄段震娃妻年二十餘夫死姑老子幼薄田十餘畝氏能養姑以終撫子成立卒年四十餘歲其節孝村人今猶稱之

黃氏沙河寨王茂林妻年二十歲夫亡子義祥生甫四月有田二十餘畝族人逼氏再醮氏矢志益堅艱苦自勵後教子力農成家增田百餘畝歲六十餘終

魏氏北焦陽村生員杭中之妻青年守寡僅田十餘畝無子有兩女回亂攜女潛逃冰操凜凜兩女後皆妻以儒生氏臨終時將所遺產業盡與其姪孀節賢名有口

皆碑

裴氏南龐村賀志瑞妻年十七于歸越十八日志瑞貿易口外一往無踪氏矢志守貞始終不渝者五十餘年卒年七十有六

韓氏李吉春妻年二十二夫亡乏嗣翁姑垂暮氏為夫立嗣子兆祿事親終養當七旬有九時西安府儒學張給有節孝可風額

馮氏秦渡鎮薛生蘭之妻歸薛氏生二男一女未及十年而生蘭卒二男亦相繼夭殤氏年二十六歲茹苦含辛遭繼姑日夜詬詈躬操井臼復備鍼指以孝養如是者三十一年卒年五十有七

鄭氏渭曲坊王新貴妻年二十二寡居撫子成人葉學使以矢志堅貞匾額旌之

李氏春解張氏春妻張氏賈昇張氏高士武氏郭廷山氏閻文楊氏林晚王氏熊章上俱

乾隆年旌李氏趙永石氏劉廷萬氏魯明王氏宋建孫氏張杰萬氏崔福王氏

段景張氏吳建王氏馬學王氏魯文鄭氏萬明劉氏屈茂賀氏萬年馮氏劉思

郭

系

系

卷六

列女 節婦

四八一

賀氏張時收妻 閻氏山仁賢妻 楊氏韓均芳妻 馬氏閻承統妻 郭氏張芝廉妻 劉氏鄧煥章妻 劉氏紀宗壽妻 馮氏

賈福先妻 劉氏崔思孝妻 孫氏陳萬忠妻 侯氏賈經實妻 范氏王安有妻 王氏王晶妻 朱氏賈順章妻 萬氏宋之有妻

劉氏曹應得妻 路氏張懷信妻 張氏張士彩妻 韓氏田生蘭妻 耿氏吳文淵妻 董氏陳汝玉妻 張氏高祥妻 吳氏

陳登連妻 朱氏裴德望妻 楊氏王化成妻 張氏閻增璘妻 陳氏南際午妻 曹氏張自重妻 鄭氏劉景高妻 陳氏趙經邦妻

上俱道光旌吳氏賀重輝妻 常氏史興雲妻 南氏胡遵智妻 李氏閻建有妻 南氏陳萬榮妻 閻氏劉天元妻

夏氏劉恆玉妻 趙氏劉文炳妻 上俱光緒年旌

以上有傳者貞女二人節婦二百一十四人無傳者節婦五十八人共二百七十

二人係陝西此次續脩通志鄴採訪局所採訪截止清末者

民國

鄧氏什王村農家女年十七適定舟村楊本俊年二十生子在襁褓夫為仇家所殺

氏抱子往母家同其母詣縣訴宰令仇家與氏持錢數百緡息事氏弗受宰怒以

鬪殺斷欲殺人者不至死氏復抱子同母詣省鳴冤時久雨連綿往返泥水中數

十日艱苦萬狀百折不回卒至大冤昭雪仇人論抵然數十畝田產已費罄矣氏紡績度日供子讀與子娶及孫向榮甫生而子又亡氏撫遺孫歷盡坎坷幸向榮長能賢奮志耕讀又由高小畢業後即經理家務現時家道小康氏曾孫繞膝年九十有三尙存

董氏生員董殿英之妹呂懷堂之妻生員呂慶吉之母懷堂歿時氏年二十九歲子慶吉尙在襁褓比長氏課之讀取紡績資爲日用費人稱其持家教子均可爲法學使匾其門曰堅守雅操迨民國三年慶吉死於白匪之難復與寡媳撫養遺孫廷杰使肄業學校後廷杰充縣教育局長又歷充省中學教員氏年屆九十尙存陶氏許村史振江妻振江死氏年二十餘老姑在堂二子俱幼家貧甚氏矢志堅貞凡事畜之資皆自十指中出後二子成立家亦稍給計苦節五十餘年民國十九年氏年七十有三卒

屈氏東羊村牛廷仲妻年二十一生子瑞霖甫三月廷仲死其姑哀痛喪明後又得

癱瘓病常臥床褥氏日夜扶持委曲奉事不離於側者殆十餘年鄉黨稱孝又性勤儉早起晏眠兩手痿裂妯娌有小恙顧視維殷輒代操井臼有所犯弗與校故終氏之世門內無勸譏聲年四十餘頭髮盡白蓋積勞致之也民國十八年氏年五十有四卒

李氏什王村人年十八歸本村鄧生耀事舅姑稱孝年二十四生耀試武考不售嘔血死子長春甫二歲氏矢志撫孤勤苦不少輟舅姑極鍾愛之家事無鉅細必與商議而後行舅姑歿弟姪謀析產多遊惰氏不得已攜子別居一小室所分產業甚薄教子讀不以他事累而紡績而井臼而耕耘皆一身任之堅忍之操數十年弗稍渝故村人有鐵人鐵心之稱後長春成立家亦漸裕氏現年五十有九計守節已三十五年矣

樊氏年十七歸定舟村楊宣定舅姑俱亡夫多病且貧入門即以針黹度日歷二年生子世昌而夫死日夜紡績艱苦自勵由是家粗給族黨有凌欺者氏嚴正自持



惟以理家教子爲心畧弗與校久之凌欺者復轉生畏敬心世昌稍長命之讀有過輒嚴責之弗稍貸初不以一子而爲媼愛也現年五十有二家計稍裕抱三孫矣猶勤苦異常云

張氏真守村維克儉妻年十七于歸十九歲生子俊德甫五月而夫死氏忍慟撫子事舅姑極孝舅姑歿事兄克勤夫婦如舅姑數十年恬靜冲和鄉黨無間言其姪明德之妻王氏克勤之兒媳也幼端靜寡言笑年十七適明德年餘明德病亡生遺腹子天佑時舅姑弱病哀慟欲絕氏忍慟惋勸凡衣食所需俱先意承志久之舅姑若忘其無子者事孀叔母張尤能曲意承奉得其懽心後姑歿舅繼娶某氏年尙少氏下氣承順門內無嚮響聲氏工女紅勤針黹井臼外日夜不少休所製衣布盈篋累笥民國十五年嵩軍據大王鎮時出搶掠氏聞兵將至即攜兒媳遠避比歸衣物一空人或爲氏惜氏曰若不獲己命猶可舍况衣物哉卒不介意其識大體如此民國十年張年四十三卒子俊德現已三十餘歲王今年四十餘歲

守節已二十餘年矣子天佐已二十三歲中學畢業生時人謂之一門雙節

趙氏舉人趙繼聲之妹年十九歸康王村張學裕越八載學裕病故無子女家又極貧氏矢志靡他事姑以孝聞暨姑歿恆居母家受其兄訓粗知文字日惟閱善書勤女紅足跡不出戶庭其夫兄亦無子氏養一螟蛉兼祧兄祀今其子已成立矣張氏之祀賴以不墜氏現年六十歲尙存

張氏元村白玉平妻二十四歲夫死生子一撫養成人子亡又撫孫歷盡坎坷矢志靡他現年七十有四

劉氏生員魏宗晉妻年二十九宗晉死遺一子氏矢志堅貞撫子成人年五十四歲趙氏縣東街華州訓導山鍾靈之子媳年二十一寡居子死撫姪爲嗣年九十餘猶在生平苦節人所共稱

李氏馮村段大倫妻年二十六夫亡子未周歲氏守貞育子歷盡艱難現年五十有

鄭氏祁村全懷錦之妻年二十八寡居家甚貧賴紡績浣濯以自養雖艱苦受盡而  
堅貞之志不爲稍移鄉里咸憐而稱之現年五十餘歲

弋氏辛栗村西堡何公妻年二十六歲夫亡撫子成人矢志不二今年八十餘歲

李氏辛栗村北堡人二十三歲夫齊思安亡守節撫子成立五十餘歲終

王氏羅什堡人也歸石井村東堡張鳳翔年二十五鳳翔死守柏舟之操茹苦食貧  
不二其心今年六十餘歲

陳氏年十八歸石井村楊百忍年二十三百忍亡撫一子成人節勵冰霜至死靡他

李氏水磨頭張蒼妻年二十三歲蒼亡茹苦食淡撫子成人今六十餘歲

全氏水磨頭國有德妻年二十五夫亡撫子二人矢志不移今七十餘歲

周氏雷家寨聶計良妻年二十六夫亡子二俱數歲家極貧所居敝廬一間以紡績  
爲生撫子成人村人未嘗見其出門冰霜之操至死不渝今年七十餘歲猶在

張氏歸東團庄李萬龍年二十七萬龍亡撫一子成人備嘗艱苦不渝其操今已六

十餘歲矣

王氏龍家寨趙詩之妻也年十八夫亡撫遺腹子成人艱苦備嘗今已六十餘歲矣  
陳氏歸土門子蕭景鵬年二十五夫亡子幼撫養成人堅持婦道品誼清潔今年八十二歲猶在

張氏石井村東堡人適西堡閻登坤年二十七夫亡遺孤子四氏撫養成人家業不墜今年七十餘歲矣

王氏石井村西堡范應傑妻年二十歲夫亡守義撫子懷滿家貧茹苦至於成立壽八十餘歲歿

王氏直峪口楊長妻年二十夫亡守志堅貞現年五十七歲

崔氏靈山寺鄭恆義之妻也夫亡氏年二十五生子子俊甫八齡翁姑早逝氏紡績度日事伯母若親姑及伯母逝而子媳亦相繼亡遺孤同生紀生俱幼氏復以祖母代生母教養兼至鄉人稱之現年六十二歲

梁氏靈山寺弋生榮妻年二十三夫亡子保善方九歲有地一畝餬口無資戚族咸勸再醮氏守從一之義惟恃紡績自給或并日而食猶能供保善讀書數年現保善已生三子一女家漸小康人以爲氏苦節之報云氏年六十八卒

王氏雙庄蔡成妻年二十八而寡家甚貧孀姑年七旬二子秉坤秉錫俱幼氏堅矢柏舟凡事親育子悉藉十指爲生活者殆數十年如一日也現有三孫氏年六十一尚在

張氏林家堡林脩竹妻脩竹死氏年二十八遺孤子三女五長者未成立幼者尙襁褓薄田數畝食指浩繁氏書耕夜績度日如年親鄰咸勸再醮氏矢柏舟之死靡他現年七十五歲有孫五人但家道猶貧紡績猶不釋手云

楊氏曹家堡曹恆有妻二十五歲恆有病故繼母王氏亦繼逝遺一子甫週歲氏二次子方哺乳憐弟幼分乳乳之歷盡艱辛矢志不渝能爲弟若子皆婚娶現生一姪七孫蘭桂競芳鄉人羨之氏現年五十九歲

耿氏曹家堡劉俊妻生員耿濤之姪女也年二十一俊亡遺子志善甫十月翁姑年六旬氏念親老子幼誓不再醮晝耘夜績爲二人供甘旨兼教志善讀親若不知其子亡也者翁七十四卒姑八十八卒皆沉病數年而後逝氏親湯藥晝夜侍不離床喪葬悉如禮遠近稱之氏現年五十一歲

馮氏向家堡李先春妻年二十九夫故老姑六旬三子俱幼薄田十畝饗殮不給氏勤紡績兼耘耔事孀姑以孝聞撫三子悉成立姑七旬有四病數年始逝氏侍湯藥輒數日夜不交睫殯葬如禮爲三子次第完娶辛苦難以罄述現有孫四人年八十猶在

余氏西爐丹村楊秉林妻年二十一歲夫死遺孤占魁八歲上有七旬孀姑僅租薄田五畝晝耘夜績食不足往往日一餐或隔日一餐親族目擊苦難皆勸改醮氏立志堅卓自誓不能終養老母育子成人無顏見吾夫於地下後母八旬餘終盡哀禮教子成立已生孫十一歲矣氏現六十八歲猶紡績不輟

王氏西爐丹村鄭如喜妻年二十五歲夫亡遺孤二長秀雲六歲次倉雲三歲有地六畝貧不能給氏紡績之外繼以耕耘艱苦備嘗父母憐其太苦欲奪而嫁之而終不敢明言知其心如堅石不可轉也氏撫養二子俱成立又爲次第娶婦現已生三孫矣氏年五十有九尙健

趙氏馮官寨馮中驥之妻年二十八歲中驥卒無出翁姑俱老氏以媳代子職奉養周至不數年弟夫婦相繼死遺二子一五歲一二歲氏視之如已出教養兼施取次姪牛娃爲嗣終養翁姑殯葬如禮現年六十三歲

石氏御下堡劉明善妻年二十四明善病故遺二子長七歲次二歲翁姑又相繼逝窮無所依氏誓不嫁一心撫養二子教之讀書束脩皆從十指間出及二子成立娶婦各生一孫氏年六十二卒

弋氏華氏姑娘也適沈家營南堡牛致祥年二十九致祥死矢志守貞拮据度日撫遺子十五歲不幸短折乃取姪新爲嗣娶媳華氏生子振魁甫三歲新以疾死華

不以姑孀家貧二其心晝夜紡績以資事畜草根樹皮雜糝糠咽之無戚容民國四年七年七旬有四終華能盡哀盡禮人皆稱之現年六十有一可謂一門雙節程氏東屯里傅安妻年二十夫亡無子氏孝事孀姑取兄子從發爲嗣已抱孫焉節孝之名遐邇無間現年五十六歲

吳氏東屯里生員傅錫鏞之妻錫鏞入泮十餘日以病亡氏年二十九無出以兄子作相爲之子矢志守貞百折不回後爲子娶婦生孫三作相又亡與孀媳撫養三孤孫晝耘夜績歷數十年如一日氏現年六十三歲

楊氏沈家營沈建義之妻年二十夫死遺一子浩方三歲上有七旬孀姑家貧甚氏矢志守貞事姑以孝聞撫子成人教讀婚娶績紡之外兼事耕作姑逝殯葬如禮生孫一曾孫三種田四十畝人以爲節孝之報云民國八年壽八旬卒

王氏後寨里劉紀印妻年三十歲紀印病故遺二子長有潤九歲次有萬方週歲破屋兩間薄田十餘畝皆押抵外債氏守貞堅苦耕不傭工晝耘夜績無片刻暇每



年賣布不下三十匹教子讀書七八年內陸續清償外債又爲二子婚娶生孫各一氏現年六十九歲

錢氏占管營程淮妻年二十八歲夫故遺一子一女上有孀姑氏奉親撫子備歷艱苦當光緒二十六年大荒之際往往日不舉火或掘取草根樹皮雜糠粃與子女咽之而堂上甘旨不使稍缺民國八年姑始逝世喪葬如禮又爲子娶婦生孫二皆幼慧人以爲節孝所感云氏現年六十歲

劉氏年十七適南慶叙曹應德二年而夫亡無子惟遺一女堂上翁姑俱衰氏事之能得其懽心及翁姑亡撫堂兄應智子禧爲嗣日夜紡績家計賴之現年六十餘歲

劉氏南待詔村屈茂誠之妻子歸年餘而回匪亂茂誠被擄無蹤弟茂士年幼氏紡績度日艱苦備嘗而志不稍移後取弟子爲嗣民國十八年卒壽八十有四

馬氏北待詔村王居忠妻年二十歲喪夫遺孤子二薄田數畝氏矢志堅貞不以貧

易及回匪亂攜子奔竄雖瀕死者屢而其志終不稍渝民國十六年壽九十四歲卒

王氏北待詔村馬起彥妻于歸半年起彥西往口外而沒無子氏矢志不二撫姪度日紡績耕耘常以身任之後姪成立宗祀賴以不墜鄉人稱之壽六旬餘卒

司氏真花衛韓梗之妻年二十六歲夫死遺一子甫七歲上有七十二歲孀姑家貧無度氏以紡織爲事畜資堅貞自矢苦節三十八年壽六十有四而終

毛氏文義村張登瀛妻年二十一登瀛以拒回亡家赤貧苦節終其身卒年七旬有八

王氏西遙指頭楊懷振妻年二十八夫亡遺一孤家極貧氏守柏舟之操紡績爲生兼勤耕稼撫子成人今六十餘歲矣

王氏西遙指頭白正妻年十九夫亡撫三子節勵冰霜之死靡他今六十餘歲

王氏西遙指頭白玉祥妻青年喪偶勵從一之志撫二子成人清如冰霜今七十餘

歲矣

王氏東遙指頭王崇仁妻二十六歲喪偶矢志堅貞撫孤子成人冰清玉潔無有瑕玷今年七十歲矣

張氏朱家堡張崇興妻年二十九夫亡守從一之義撫一子成人淑慎有德里人敬之今六十歲矣

吳氏夏家堡夏熬之妻二十餘夫亡守志家甚貧撫一子成人勤儉持家現年六十有四

譚氏夏家堡夏活妻年二十餘夫亡矢志堅貞撫孤成人今六十餘歲矣

樊氏崔村楊德順之妻年二十而夫亡子未週歲貧無所養氏抱子爲人代庖者十有餘年泊子長耕織度日有望無何子又亡遺孫尙稚媳欲再醮氏長跪不起遂止然婦姑之間輒起齟齬氏乃持齋居古刹有年其媳悔悟自咎始請氏歸現家道小康孫又生子是楊氏宗祀賴以弗墜者氏之功也氏年七十有七尙在

段氏年二十一歸東羊村劉孟義僅二載餘而夫亡子在襁褓堂上翁姑俱存薄田止有數畝氏矢志守貞全賴十指爲生活卒能撫子成立事翁姑以孝聞現時衣食弗缺氏年五十有四

王氏東羊村劉夢周妻年十八于歸二十九而夢周亡子甫八歲田數畝氏以縫紉紡績爲生辛苦度日不幸其子又喪遺一孤孫後賴氏撫養堅苦之操始終如一時年六十二歲

王氏東羊村劉彥成妻年三十夫亡遺子建祿幼氏矢志靡他回匪之亂氏潛藏於村西苜蓿地中匪至馬踏折左手將指得無恙亂後氏與子製竹器爲生濟以耕織家遂漸裕宣統二年邑宰繆旌其門曰貞壽之門民國紀元氏年八十有四卒現時建祿夫婦均八旬有餘五世同堂曾孫秉璋秉德皆中學畢業生論者謂爲貞苦之報

周氏李伯北村張銘鼎妻年十七于歸十八而銘鼎死子女俱無或以氏年穉勸之

嫁氏曰我嫁若老姑何遂誓志守節克盡孝道與姑同床相依爲命者殆三十年餘姑年八十乃終撫姪勤爲嗣已生二孫矣氏時年五十有五

程氏北郭村王順妻年二十九夫亡遺孤二地僅數畝氏晝務稼穡夜勤紡績艱難困苦一身備嘗後二子成立家道小康而孫曾亦繞膝矣氏年八十三尙在

劉氏霽霽李廷蘭妻于歸六載而廷蘭亡僅一弱女氏矢志靡他事翁姑孝處娣姒睦撫姪若已出尤操井臼不憚勞苦計守節已二十餘年矣時年五十二歲

王氏孝義坊劉懷德妻畢業生文進之曾祖母結縭七載而懷德亡遺子一女一氏矢死靡他經回髮之劫老幼數十口祇存四人一切衣食悉氏一人是賴後子又先亡而孫已成立家道日昌論者以爲苦節之報民國二年氏年六十四卒

王氏孝義坊劉克寬妻年二十八而寡地四畝房二間一子一女零丁孤苦人所不堪而氏不以貧寒易操日夜紡績始終罔懈其子又能勤稼穡家道遂昌孫曾亦林立矣民國元年氏年八十六卒

王氏洪洞菴劉俊杰妻年二十五而俊杰亡子五歲女在襁褓氏念姑老子幼節哀  
守義姑年近九旬始卒獲其孝養氏處家教子勤而且嚴現子已成立孫又繞膝  
計守貞已三十一年矣時年五十有五尙在

張氏坳河村生員段象離妻于歸三年象離亡翁姑在堂嬰女在抱氏誓志守貞慈  
孝兼盡處娣姒間無嫌隙閑靜寡言撫姪耀祖爲嗣鄉里僉以節孝稱時年五十

九

張氏崔村萬廷貴妻年十七于歸未三載而夫亡生遺腹子家道式微氏性莊嚴而  
和順於翁姑娣姒之間以孝睦聞鄉鄰婦女有爭者輒邀氏調停反復勸解無不  
欽服於是有女鄉約之稱氏含辛茹苦六十餘年末年境遇日優孫曾蕃衍年至  
八十六歲含笑而卒

張氏崔村萬代才妻年十六于歸二十三而寡子方孩提氏忍痛守義言笑不苟撫  
孤成立苦節昭著年六十四卒

吳氏崔村生員萬愷悌妻年十六于歸僅五載而夫亡舉一遺腹子氏矢柏舟孝敬翁姑和睦妯娌子有過則督責極嚴不假辭色厥後子果成立孫已繞膝民國十一年氏年六十四卒

李氏寧羌堡王作楫妻年二十五而作楫亡二女一子均幼氏事翁姑以孝稱長子霽已於高小學校畢業未幾亡次子亦亡氏雖痛憤填胸而深明從一之義恆謂天能阨我以境遇而不能阨我之氣節立志守貞人無閒言時年六十歲

沈氏寧羌堡劉思義妻年二十九而寡二子一女俱幼氏上事老姑下撫子女苦節四十餘年二子成立孫曾繞膝現年七十二歲

陳氏趙王村于儀鳳妻年二十七居孀其夫臥病數載奉侍湯藥衣不解帶夫亡二子俱幼氏艱辛撫孤支撐門戶弟某欲謀產業逼氏嫁氏立志愈堅誓死不奪現二子已娶婦生孫氏康健猶昔時年六十一歲

張氏黃甫村李萬妻年二十二而萬亡上有孀姑下有遺孤氏耕耘織紡養親撫子

數年而姑死氏哀毀骨立葬之以禮幸子克家已抱孫矣時年六十有四歲  
樊秀貞定舟村趙大柱妻年十七于歸慈惠溫良事舅姑以孝聞甫二載大柱貿易  
甘肅成縣之土河坪一往不返氏誦經茹素待姪康健如己出洎舅姑歿兄嫂又  
相繼亡薄田數畝氏紡績縫紉衣食藉資後爲康健娶媳生子光緒庚子歲大祲  
家益窘康健出外謀生氏以鍼疋傭工撫孫茹苦含辛五十餘年民國十年七十  
六歲終

姚氏梧桐村山生有妻年二十二生有死氏誓以身殉念邁姑在堂節哀奉事久之  
姑亦若忘其無子也迄今三十餘年鄉里稱孝尙在

劉氏崔村王本吉妻年二十九而本吉死二子均幼老姑在堂氏矢志守貞克盡孝  
道撫孤成立年六十尙在

劉氏南真守村雒平書妻年二十二歲夫歿老姑在堂生遺腹子又亡氏堅貞自矢  
百折不回姑深愛之以紡績縫紉佐饗殮居恆足不出戶後依姪志義以居時年



近六旬

魏氏大王鎮姚春銀妻年二十七夫殤二子俱幼家貧甚氏義不改適日夜紡績以育子後家漸裕孫亦成童苦節三十餘年時年六十三尙在

楊氏兆倫村張永高妻年二十六永高亡一子甫二歲老姑在堂氏矢志靡他孝慈兼盡後其姑八十餘歲終子已成立時年五十八歲猶強健

萬氏大王鎮趙大振妻年十七于歸僅四載而夫亡一子二歲餘賃屋而容身紡績自度後攜子住娘屋多年子已成立三孫繞膝時年六十五歲尙在

郭氏真守村雒文馨妻年二十三夫亡子進琳甫三歲翁姑在堂兄嫂早逝遺二子二女氏撫之如己子而又克勤克儉孝事翁姑故翁姑八十餘歲終子姪亦皆成立諸孫縣縣不可謂非節孝之報時年六十有三

胡氏王守村李懷智妻年二十五夫亡二子俱幼家極貧氏携子爲人司庖廚兼縫紉以養其子辛苦幾三十載時年五十八歲尙在

劉氏什王村劉萬成妻年二十九夫亡無翁姑兄弟子甫數月田二畝紡績之餘常爲人編織篩底以自度苦節五十餘載時年七旬有九尙在

孫氏北宋村西堡申士正妻年二十八夫亡遺一幼女氏義不再醮藉紡績貿布以度日含辛茹苦人無間言時年五十有五

申氏康王邨生員靳瑞琦妻年二十三瑞琦殤遺一女甫二歲子凌雲生僅四月家有孀姑事畜之資全賴紡績洎凌雲稍長俾入師範學校畢業所需學費又多從機杼中來矢志三十餘載戚鄰咸以節孝稱時年五十四尙堅苦異常

馮氏康王村靳喬崢妻年二十八歲夫亡一子甫三歲氏孝事老姑姑亦愛之如女備嘗艱苦始終不渝時年六十一歲尙在

陳氏龍台坊馮麥計妻年十七于歸未一年而夫亡家徒四壁田僅一畝氏日夜紡績不以貧苦易心後撫螟蛉承祀辛苦三十餘年時年五十一尙在

郭氏兆倫村毛春茂妻年二十三夫亡子在襁褓家極貧藉紡績以養子成立含辛

茹苦漸至小康時年五十三尙在

姚氏兆倫村閻步鴻妻年二十六步鴻死翁姑早逝子女俱無孤苦零丁窮無所告  
後撫姪爲嗣苦節三十餘載時年五十九尙在

夏氏定舟村楊義明妻年二十九歲義明歿遺一子甫三歲又生一遺腹子家計蕭  
條內外無依日則耕作夜則紡績卒撫子成立苦節三十餘年時年六十三尙在  
王氏化東堡崔致祿妻年二十八夫亡無子事姑以孝聞處妯娌間無閒言現年七  
十有八

關氏穆家堡穆鎖之妻年十八于歸逾年即遭回亂夫被虜去氏以青春守貞矢志  
不渝現時八十五歲仍苦力自耕無子無家窮無所告

李氏黃堆南堡李信妻年十七于歸未幾信即出外氏事姑以孝聞歷數年信歸僅  
三月又死氏矢志柏舟一意奉姑數十年如一日姑亡氏以無子居女家年已六  
十四歲

孫氏付子村朱長林妻牛東孫副榜沛福之第三女也孝姑佐夫任苦耐勞生子蔭璽甫三歲而長林病故氏年二十三外債纍纍養育幼子摒擋家政故姑雷氏得享壽七十餘子亦經商於外氏現年五十餘歲

姜氏付子村朱文舉妻年十四于歸家貧如洗常與人傭工以供二親之養文舉業商口外歸家未幾即死氏年二十有七節操自持無子養姪爲嗣現年六十六歲張氏朱春權妻上馬營師長張靖伯之姑也年二十一歸朱逾年生子夫即亡氏柏舟矢志守節茹苦者三十餘年現年五十六歲

石氏焦陽村鄧彥海妻二十六歲守節無子女田數畝與夫弟夫婦同居節操賢名人皆稱之現年六旬有二

李氏焦陽村杭永泰妻永泰客商川邊打箭爐死焉氏時年二十餘守十數畝之田撫育兩子中年食齋茹素清苦自勵現年七十二

楊氏南焦陽村何榮妻年二十六守節無子僅一女時諸姪輩皆弱小親戚有憫其

無子勸再醮者氏嚴拒之回亂時氏嘗以天塵塗面自污終能撫諸姪以次成立  
民國五年卒享壽七十有六承重孫何澗等立有石

李氏北龐村丁五潤妻年二十二守節無子女姑賈氏亦孀居現年八十餘歲姑媳  
二人相依爲命一門雙節人盡稱之

李氏唐旗寨唐存妻存業農光緒二十七年死氏年二十四無子與夫弟經營度日  
將依以終而弟於民國十四年八月十五日又爲土匪掠去與姒同居共苦撫孤  
姪以成立亦足多矣

安氏涓曲坊師大芸妻也年二十一大芸死生遺腹子懷純氏念上無舅姑終鮮兄  
弟呱呱在抱其何能立乃依從叔名穩者以居閱數載叔有異謀復析居又依從  
叔名某者以居氏晝力耕耘夜勤紡績辛苦數十年卒撫子以成立今七十餘歲  
尙健懷純亦克肖子念母劬子之哀也二十一年春曾請諸當道爲母樹貞賢碑  
云

趙氏姚村嚴真修妻年二十六夫死只守一子甫三歲辛苦備嘗現年五十有九  
馮氏待詔村馬元著妻子歸後生二女一子年二十四夫死家極貧氏矢柏舟志不  
稍移撫子嫁女多恃女紅後子年幾五十亦死零丁孤苦備極艱難民國二十一  
年秋季八十四卒

姚氏許村宋重華妻年近三旬生子接堂甫四月而重華亡僅有薄田十餘畝兼值  
家庭新析兄弟每相仇視而村中橫暴者又多凌欺之氏矢柏舟堅苦不二後攜  
子居母家歷盡坎坷卒能撫子成立保守遺業現接堂年三十餘歲家道小康氏  
今年六十有五猶在

烈婦

按舊志烈婦以秦范植妻孟姜居首姜澧人今湖南澧縣喬三石馬溪田均辨之  
甚詳澧澧字近似舊志誤之耳今不錄紀實也

明

張氏王漢妻漢病誓與俱死及卒氏哭之正寢抵暮入室飲藥死事聞樹碑表表其墓張太微爲述烈婦傳

仝氏諸生趙日昇妻與昇同被賊掠給賊曰吾兄也釋之吾從汝賊信之日昇得脫免氏度其去遠據樹大罵賊以刀劈之至死猶抱樹不解同里何氏楊遇妻遇亡守節賊至強挾不從乃縛於樹氏忿罵賊以刀割乳塞其口氏仍罵不絕賊割其腹而死又姚大錫妻閻氏閻祚昌妻沈氏俱遇賊不辱大罵而死舉人陳治衡妾某氏投井死

馮氏生員李宗直妻年十四歸宗直五年夫亡氏長慟不食數日而卒遺女甫一歲後三年忽奔哭於父母墓上家人抱之歸而氣絕人皆異之

清

魏氏生員陳治徵妻朱氏邑民劉于陞妻順治二年賀賊至鄆二氏皆被掠逼之不得遂見殺

趙氏王郢妻史氏王郢妻居平妯娌相愛聞賊警共誓必死既被掠趙投火死史投井死見陝西通志

彭氏邑民王鷺妻賀珍之亂氏聞賊至避兵城樓賊登城氏知不免墜城死

邢氏邑民王教成妻賀賊自漢中寇西安所經郡邑靡不殘破鄂城陷教成遇害氏見夫死大慟與十四歲女同投井死

王氏生員全調鼎妻順治初明之遺賊尙有未靖者劫掠時聞調鼎率鄉人與賊格鬪以衆寡不敵被殺氏泣嘔血死

李氏韓光隆妻爲山賊所掠逼之氏罵不絕口因殺死

劉氏邑民屈崇山妻夫死無子氏矢志養姑康熙辛未歲饑姑勸之嫁不從無何饑益甚鄉人多鬻身乞活姑泣謂氏曰我死在旦夕汝自鬻尙可活我氏泣不應良久姑大慟曰死耳夫何言氏復哽咽久之忽起曰如姑命遂鬻於豪家得銀付姑乃號泣登車而去入豪家親鄰釀酒稱賀家人懽呼氏乘間入廁自縊比覺則死



已久賀者相顧驚歎去豪家大恨以敗彙裹尸棄野外積骸中鄉人聞之多淚下  
孫酉峯曰屈劉氏之以死全節其烈可嘉其鬻於人得銀自縊譎矣不可爲訓也  
然所遇甚難實無兩全之策孔子曰自古皆有死程子曰餓死事極小氏見及之  
惜其姑未能與氏同志耳

李氏邑民楊孟弼妻秉性端嚴其夫堂弟孟重逞暴強姦氏堅拒不從以致殞身雍  
正八年旌見陝西通志

王氏邑民王可吉妻年二十六夫歿一子甫生含哀鞠育備歷艱辛子四歲而殤氏  
零丁無倚浹旬後直夫喪三週悲哀致祭翼日沐浴自縊死

以上烈婦十九人係舊志所載者

孫氏余下堡劉宣妻宣亡氏年十八堅心守節母家與夫家屢勸改適不從繼而兩  
家又強逼之已受財訂期矣氏即於前夕自縊時雍正十二年也

萬氏興仁堡楊維新妻年二十有五而維新逝矢志守貞因逼嫁遂於乾隆二十八

年十月十三日自縊遺子甫三歲賴舅氏縣學生萬世傑撫養之

萬氏原村劉鳳德妻鳳德卒氏年二十有八無出踰年姑憐之屢勸改適氏曰舍姑再醮非義也姑曰我死爾復何依氏曰俟葬姑後自刎墓前耳姑知氏性至烈遂不敢強再踰年復有勸其改適者氏即厲言拒之無何早起爲姑推礎訖從容梳洗更衣扁戶端坐自經死姑覺啟戶視之面如生探其懷抱物則書一卷鏡一圓也嗚呼此可知氏志矣時乾隆三十七年冬十月二十五日

孫酉峯曰氏與楊萬氏同族皆素知從一之義者其自經時懷書一卷謂此心可對聖賢也鏡一圓謂此心明於倫常所在不忍自昧也村婦乎哉從容就義足與文信公爭烈矣

以上烈婦三人係孫酉峯脩志時所續入以後則此次脩志所採訪編入焉

烈女一爲馬繼鐸之女一爲馬堃童養之妻年俱十五同治五年髮匪至村婦攜二女避罾中被賊給出惟二女端坐不動悉薰死

文九芝邑人文登榮之女同治五年髮匪至九芝匿窖中被賊搜獲厲聲大罵賊刃之死而復蘇賊又欲載歸營中九芝乘間投井死時年一十八歲

孫玉貞年十六耆民成章之女賈娥娥年十四生員忻之妹俱牛東堡人素爲閨中密友聞賊至賈謂孫曰吾輩義不受辱姊意如何孫曰寧玉碎毋瓦全決不偷生貽人笑議甫定聞賊搥門聲甚厲孫急毀姿容投井中賈繼至窺其屍未沉恐續投之莫能死迺至廚取菜刀刎頸而死家人歸拯女屍毀面爪痕猶十餘數云

賈房兒牛東堡童生賈芝之女年十八同治甲子髮逆突至投身入井賊拯出欲辱之女罵不絕口視隙復投井中如是者再賊怒鬻割之身無完膚而死

熊氏澇峪口熊智仁女幼受聘於化羊村某氏未嫁值髮亂倉卒送夫家逃黃柏峪避難被賊獲罵不屈賊強掖馬上至澗邊猛撲墜死

以上女子遇賊死難不辱者七人謂之烈女

某氏西坡生員田維垣妻夫歿時子女俱無葬後氏即輟哭閉門臥久之不出亦不

食排闥視之已吞毒而死事在咸豐初年

張氏雲南富明縣某宦之女秦渡鎮李治賈於滇以禮聘之合卺後治病瘵氏泣曰夫不起我何生爲割左臂爲肉糜進之夫病果愈後歸秦夫病復作竟不起氏亦仰藥卒事在咸豐七年

喬氏大屯里王明德妻夫歿後事親教子各盡其道咸豐丙辰已受旌者也同治元年花門煽亂氏隨家人避南山中賊突至焚殺最慘氏與子媳俱死於火

楊氏盩厔郝村楊有財之女年十九歸邑寧羌堡王維甸結縵三月夫以癆瘵死屬續後氏將自經家人嚴防不克死後竟絕粒八日以身殉

黃氏東索村董二妻夫死後仰藥死

劉氏西韓村沈登瀛妻夫死後氏遂自盡

某氏崔村萬羣生之妻有殊色回匪至欲擄獻其渠魁氏罵不從賊強載之氏罵愈厲墜馬數次賊知終不可致支解之時溫風已至而顏色如生蠅蚋不集無腐臭

氣蓋清潔之操固結不散雖死猶生理固然也事在同治元年

程氏年十九歸大屯里屠汝霖閱六年而汝霖死氏即欲以身殉念親老子幼未敢捐生同治元年花門禍作氏隨翁姑避南山中賊至被執欲污之罵不絕口而死死數日顏色猶如生云

仝氏曲抱村人年及笄適兆豐橋喬支二十五而喬支死子幼家貧氏辛勤撫育艱苦備嘗同治元年花門變作氏往曲抱村母家村民結團自衛賊被創不敢攻恨之值癘疫大行村中十人九病賊入屠之氏死尤慘

馬氏百福村附貢馬文炳之姊也年十八歸留南村張思武思武性癡而貌寢人謂氏于歸後必不相能而氏則勿逆勿違曲盡婦道結縵二載花門禍作思武旋病時避亂者紛紛逃走氏獨守病夫死生以之賊持矛刺思武氏以身翼蔽被數十創死不釋手思武遂得無恙

文氏渭曲坊師懷玉之妻年二十歲頗有姿色同治二年回匪至被執欲辱之氏罵

不絕口賊怒斷其舌猶喃喃作罵賊聲而死

李氏新寨史貞喜妻其弟貞升妻劉氏年俱少艾同治二年貞喜貞升兄弟俱爲回匪所戕李恐被污投井死時劉奉姑避化羊峪中聞凶耗欲自裁姑憤曰爾等皆死我將何依不如先死劉恐姑之死非命也即順其意曰道路傳聞未可盡信果爾媳必養以終也後竟茹苦含辛養生送死無遺憾

王氏待詔村馬萬成妻僑寓盤屋年方少艾適髮匪突至城破氏覓死或止之曰稍遲則不及矣遂閉戶自經事在同治二年

賈氏牛東堡賈致中之女霽霽村生員張彬之妻同治五年氏年二十一歲適髮匪至不及避氏罵賊求死賊不忍殺欲擄去氏乘間取賊刃自刎暴屍數日顏色如生賊亦歎息不置

張氏年十八歸大屯里屠煥貴煥貴好擣蒲氏愧勸曰君若是何以教子弟也煥貴自是不復賭同治五年髮匪突至氏隨衆奔避南山至馬尾坡賊追及擄之氏大

罵扶置馬上倒墜者數次厲聲罵曰爲賊子母且不屑况從汝乎賊怒支解之  
程氏大屯里屠重輝妻年十九遭回匪亂逃至馬尾坡賊追及欲掠之去氏大罵不  
休強扶上馬則撲顛而下者數次賊迫不已遂撲墜澗底賊怒以長椎亂刺死  
賀氏南龐村賀九成之女吳家堡吳廷玉之妻也廷玉死時氏年二十一歲同治髮  
匪至投井死六年旌

盧氏文義村張克棟妻回匪之亂克棟被衆推爲團長與賊戰衆潰被執不屈死氏  
聞變投井死

陶氏牙道堡沈發丁妻發丁死於回匪氏守屍罵賊不絕口賊殺之

呂氏張秀峯妻病臥床褥聞賊至求鄰媪負已投井將近井賊奄至挽留氏給曰我  
病渴若得痛飲即如願是從信之至井令媪釋已匍匐作將飲狀聳身入井賊頓  
足自恨

王氏北宋村申繼孝妻有姿容聞賊至扃戶將入嘗賊踰牆入握其手且執刃作恐

集 卷之二 十一  
嚇狀氏怒罵兩媪從旁溫諭罵愈厲賊以利刃剖腹肺肝俱見而死

楊氏崔村萬國興妻田間拾穗回突至視其閑雅扶抱馬上墜而下誓不偶賊賊知  
難強刺死

郭氏陶官寨陶讓之妻歸甯遇回匪縛馬上氏躍下復扶上凡上而下者數次賊怒  
勿氏首去

譚氏陶官寨陶留紀妻夫賈外不歸氏奉姑惟謹賊至堅坐不起賊強解衣帶欲辱  
之氏切齒怒罵至死賊莫能亂

某氏許官寨李常娃之妻年十七于歸甫一年而夫亡又一年而回匪至賊豔其色  
欲辱之氏罵不絕口賊強扶馬上倒撲而墜者數次賊怒剖氏腹五臟俱見而死  
里人自今猶有稱者

王氏鑿齒村閻振澤妻回亂率精銳圍其村振澤偕二子浩浚與賊戰殺賊數百卒  
以衆寡不敵與二子相繼死之氏正在薨聞城陷偕未字女投井死一門俱盡時



同治元年七月二十三日也

張氏鑿齒村閻聯科妻有殊色城陷賊共爭之氏罵不從賊輾轉逼迫罵益厲賊害之死最慘

毛氏鑿齒村閻隨過妻年十七適隨過家貧如洗攜籃拾穗奉養衰姑堡不守姑命之匿不忍去賊至刺姑直前抱護賊刳其四支與姑俱亡

夏氏鑿齒村閻義治妻賊至匿身磨房長女俊英年方及笄賊曳出不屈死次女佻英僅八歲見其姊死亦投於井氏怒持木擊賊賊亂殺之

趙氏鑿齒村生員閻繼續妻進士登雲冢婦也生自舊家能嫻姆訓夫死守節不渝賊至投井掖之出欲辱之罵不絕口賊憤氣持矛亂刺殺之

劉氏鑿齒村閻鑠娃之妻年少美姿容當城陷賊爭取之氏義不受辱至斷手足而死

趙氏鑿齒村閻應方妻應方禦賊村外力竭而死其母陳氏聞警趨出與賊遇賊刺

之氏持賊矛端以身蔽姑被賊支解陳亦投井死

周氏南梧桐村山定雅妻年十八于歸經年餘回匪亂作氏偕堡人逃縣西曲抱村村陷氏被賊逼誓死不從乘間身撲城壕水中以死

樊氏渭曲坊生員文殿元妻年二十爲回匪所擄氏誑賊取其衣遂投井死

李氏龍台坊武生陳煥國妻同治初回匪突至被擄氏罵不絕口賊令一老嫗守視別尋婦女氏乘隙投井死賊至以石下井亦慘矣

劉氏白虎堡楊清桂之妻沉默寡言事翁姑撫子姪孝慈兼至而於夫婦間尤能致如賓之敬光緒三年旱復大疫清桂死氏即痛不欲生曰夫死未亡人安用生爲閱日哭于墓突觸古楸而死衆趨救之已額血模糊弗及矣

柳氏邑北鄉六老菴農人柳通滿女也幼端謹寡言笑年十九歸客民徐恆治恆治虞鄉人僑居縣城杜家巷家赤貧氏義命自安一無怨懟力操作勤女紅以資衣食事夫尤敬順里黨稱賢甫四年夫遭癆疾侍湯藥晝夜罔懈者五閱月及夫病

不起一慟幾絕自念孑然一身無舅姑子女累不如一死殉夫母家欲奪其志伴應之葬事既畢悉出衣物償夫債三虞日痛哭陳奠訖入室整衣飲毒而臥詰朝日出門猶扁舍婦訝其晏起呼之不應比啟視則氣息微矣其甥來視將解以藥忽張目厲聲曰我孀婦也甥無得近須臾遂逝時光緒十六年十月也黎學使爲題節重軀輕字旌之

侯氏康王村劉作梅妻年十九于歸律身淑慎不苟言笑光緒二十六年作梅患疽死氏形容憔悴葬後月餘仰藥而死

吳氏大屯里王守敬妻宣統三年土匪時出搶劫守敬見賊至逃避賊牽氏手氏大罵之遂遇害

以上烈婦死於髮難者四人回難者二十六人土匪之難者一人及殉夫者八人合前烈女七人共四十六人均係此次續修省通志鄠採訪局所採訪截止清末者

民國

朱氏付子村人黃堆南堡王自修之妻也年十七于歸甫三月而白狼亂起時屆清明氏以青春新婦方整裝歸甯賊突至避之不及賊強之氏怒罵自毀其面投身溺中賊怒以槍擊之遂死

張氏文義村邵陽縣長張子乙之長女縣北街省諮議局議長王錫侯之孫媳也幼受讀於其伯父子甲能明大義通書算年十七于歸越數載值白狼陷城氏避賊樓上爲賊所得急投身樓下廁中不死以糞穢自污賊又逼不已復投入井賊去家人撈出又不死扶之鄰家方擁被自煖而賊又至氏見逼不已乃拔賊刀自刎喉斷血湧昏迷腥穢賊始去幸得好藥敷之數月始愈噫亦烈矣

按夫在非節未死非烈例固然也然當其墜樓不死至於投井投井不死乃至拔賊刀自刎喉斷血湧腥穢賊去此其時何嘗稍存欲生之念哉其能得生者以幸耳余時在縣城知其事最確非同得諸傳聞者比亟宜表章以爲婦女勸故雖夫



臘薦先必手自潔治與子孫言及先人輒涕泣以未及孝養爲恨振世先臥病氏  
憂慮亦病三日間夫婦相繼逝人以爲靜好之驗云

鄭氏生員傅作哲妻事翁姑甚孝又以已無所出勸夫娶妾撫妾所生如己出夫亡  
氏教子入庠

才女

王氏舉人九叙曾孫女盩屋龐源妻源以孝廉累官至知府氏幼聰慧與舅趙愜同  
學詩文其詩溫厚和平雖愜亦自謂不及也著有文集

封贈

韓氏 順治八年以孫程  
明順貴誥贈淑人

張氏 以子程明順  
貴誥贈淑人

高氏 懷遠將軍程明  
順妻誥封淑人

王氏 以曾孫賈士威貴  
地贈一品夫人

張氏 以孫賈士威貴  
誥贈一品夫人

張氏 以子賈士威貴  
誥贈一品夫人

劉氏 以子陳璋貴  
勅封孺人

張氏 守備羅名爵本生母康  
熙五十二年地封宜人

劉氏 守備羅名爵  
母誥封宜人

李氏 雍正十三年以孫  
王勅貴誥贈恭人

魏氏 以子王勅貴  
誥封恭人

溫氏 知縣王功妻雍正  
十三年誥封孺人

孫氏

乾隆十六年以子劉攀龍貴封孺人

張氏

乾隆二十六年以孫李執中貴誥贈宜人

黎氏

以子李貴誥贈宜人

李氏祈氏

俱以孫楊作棟貴地贈安人

楊氏

以子楊作棟貴誥封宜人

賈氏裴氏

俱守備楊作棟妻俱誥封宜人

鶯氏

乾隆三十六年以子候補千總借補階州把總王仁惠貴勅封安人

吳氏

王仁惠妻勅封安人

柳氏

乾隆三十六年以孫劉光第貴地贈安人

張氏

以子劉光第貴勅封人

以上自明以至清乾隆丁酉孝婦六人才女一人封贈二十四人俱前志所載者


鄧縣縣志卷之六終



重修鄠縣志卷之七

金石第二十二

周豐宮瓦當文




瓦當面徑六寸四圍作朱雀玄武青龍白虎之飾中有一字曰蹏

芸臺先生學經室文集云嘉定錢君既勤得古瓦作蹏字上下左右作四神形甚奇古可愛爲之考曰周豐宮之瓦蹏即聲引鄭康成大射儀注証之云豐字從豆喆聲古人作豔無口明可消去

桂味谷明府云嘉定錢君東垣拓所藏瓦見惠其文曰蹏即此

漢上林苑瓦



漢書楊雄傳武帝廣開上林南至宜春鼎

湖御宿昆吾旁南山而西至長楊五柞北

繞黃山瀕渭而東周袤數百里

上林秦時舊苑漢武開廣之周袤數百里

離宮別館七十餘處此蓋其垣衛所施耳

姚秦三藏法師鳩摩羅什之舍利塔

在草堂寺

塔高七尺許八面十二級其石舊志稱西域所貢洪楊之亂塔頂毀于賊寺僧以山

石補之今其下層亦多毀損上刊鳩摩羅什之舍利塔其西南面題有孫陽來三字  
丁酉仲秋晦權邦彥侍親來禮而作偈言曰

大士入東土姚秦喜服膺當年羅八俊盡是詰三乘翻譯明佛旨圓通並祖燈如何  
生別派南北強分明

魏故涇雍二州別駕安西平西二府長史新平安定清水武始四郡太守皇甫

君墓志銘

君諱麟字真駒安定朝那人也卿士之苗胄渡濟之瓊胤荊州刺史之孫辟主簿  
部處士之元子金紫扶疎冠冕今古風節朝畧載在史籍君胄藉深厚性自奇拔是  
以早延休譽夙播高問刺史王公簡高梁澄練涇士余日搜揚無先君者辟君爲州  
都君諲才舉第稱允羣望平直之選歌聲滿路刺史嘉君忠篤即拜爲主簿君輕賤  
儒術意夢經讀照賞之情自然孤解即年中復貢秀才君仁恕寬洽接畧瀾到共事  
之處無不樂仰延興中涇士夷民一萬餘家詣京申訴請君爲統酋然戎萃理隔本

不相豫朝議不可聖上以諸民舟情難奪中言特許太和廿年中仇池不靖扇逼涇隴君望著西憇勘能服瘕旨召爲中書博士加議郎馳驛慰勞陳示禍福兇頑盡悟面縛歸降動有數萬刺史 城王嘉其遠量表爲長史君策謀深立聲振朝廷復除爲清水太守領帶軍鎮景明元年中旨格初斑簡選臺資窮盡州望辟君爲別駕而君佐弼有方士民悅樂從景明三年至四年督護新平安定二郡事正始元年中河州刺史梁公以開塞地嶮非賢不御而君矛猛互張善能綏撫復表爲武始太守正始三年秦涇 逆大軍征討督都楊公以君權畧多端深達軍要表君爲都長史特廩高等君雖胄藉安定墳井在雍正始四年中還鄉刺史元王以君量勘執物復表爲別駕君辭以夕年沖讓不許王重加厚禮頻命乃就凡所佐益血心奉公惟直是斷雖伯魚之無私楊震之 賄方之於君未足嘉也 曆名宦垂登方岳意氣蕭條猶若凡素每欽想四公企懷商洛焉是以逸問遠流聲蓋四海視片意如丘山散千金若草土朝野榮賤望風送歎方應進登臺鼎永憑高試昊天不弔春秋七十有五

遘疾不損薨于家以延昌四年歲次乙未四月癸酉朔十八日庚寅葬于鄆縣中鄉  
洪澇里高山美木誰不名賢背世孰不痛戀前雍州主簿橫水令辛對與君纏  
篤臨柩悲慟彌增哀切遂尋君平志刊記金石其辭曰

三才啟曜五氣流暉名川峻阜靈感特徽誕生君侯獨稟玄資綽矣高度希世間出  
金鏘河右飛聲挺逸賞不擇讎誅不辟戚唯理是從渾之若一深量難測冲識孤融  
矛能撫衆武亦折雄丹磨不異鑽仰彌崇深信志味通仙如雲開月如枯出煙

瓊岩頽睥玉韵車玄親舊悼惋痛惜緜緜圖記金石式揚名賢妻安定梁氏州  
主簿郡功曹洪做女妻鉅鹿魏氏鎮西將軍女都太官黃龍鎮將趙興公留孫女

唐圭峯定慧禪師碑

裴休撰文並書

圭峯禪師號宗密姓何氏果州西充縣人釋迦如來三十九代法孫也釋迦如來在  
世八十年爲無量人天聲聞菩薩說五戒八戒大小乘戒四諦十二緣起六波羅密  
四無量三心明六通三十七品十力四無畏十八不共法世諦第一義諦無量諸解

脫三昧總持門菩提涅槃常住法惟莊嚴佛土成就衆生渡天人教一切妙道可謂  
廣大周密廓法界于無疆徹性海于無際權實頓漸無遺事矣最後獨以法眼付大  
迦葉令祖祖相傳非私於迦葉而外人天聲聞菩薩顧此法衆生之本源諸佛之佐  
証超一切理離一切相不可以言語智識有無隱顯推求而得但心心相印印印相  
契便自証知光明受用而已自迦葉至達摩凡一十八世達摩傳可傳璨璨傳信  
信傳忍爲五祖又傳融爲牛頭宗忍傳能爲六祖又傳秀爲北宗能傳會爲荷澤于  
宗爲七祖又傳讓讓傳馬馬于其法爲江西宗荷澤傳磁州如如傳荆南張張傳遂  
州圓又傳東京照圓傳大師大師于荷澤爲五世于達摩爲十一世于迦葉爲三十  
八世其法宗之系也如此大師本豪家少通儒書欲干世以濟生靈偶謁遂州遂州  
未與語退游徒中見其儼然若思而無念朗然若照而無覺欣然慕之遂削染受教  
道成乃謁荆南荆南曰傳教人也當盛于帝都後謁東京照照曰菩薩人也誰能識  
之後謁上都花嚴觀觀曰毗盧花藏能隨我游者其汝乎初在蜀因齋次受經得圓

覺十三章深達義趣遂傳圓覺在漢上因病僧付花嚴句義未常聽受遂講花嚴自後乃著圓覺花嚴及涅槃金剛起信唯識孟蘭法界觀行願經等疏抄及法義類例禮懺修証圖傳纂畧書偈議論等凡九十餘卷皆本一心而貫諸法顯真體而融事理超羣有于對待冥物我而獨運矣議者以大師不守禪行而廣經論遊名邑大都以興建爲務乃爲多聞之所役乎豈聲利之所未忘乎嘻議者豈知大道之所趣哉夫一心者萬法之總也分而爲戒定慧開而爲六度散而爲萬行萬行未常非一心一心未常違萬行禪者六度之一耳何能總諸法哉且如來以法眼付迦葉不以法行故自心而證者爲法隨願而起者爲行未必常同也然則一心者萬法所生而不屬於萬法得之者則于法自在矣見之者則于教無碍矣本非法不可以法說本非教不可以教傳豈可以軌迹而尋哉自迦葉至富那凡十祖皆羅漢所度亦羅漢馬鳴龍樹提婆天親始開摩訶衍著論釋經摧滅外道爲菩薩唱首而尊者闍夜獨以戒力爲威神尊者摩羅獨以苦行爲道跡其他諸祖或廣行法教或專心禪寂或蟬

蛻而去或火化而滅或攀樹以示終或受害而償債是乃法必同而行不必同也且循軌迹者非善行守規墨者非善巧不迅疾無以爲大牛不超過無以爲大士故大師之爲道也以知見爲妙門寂靜爲正味慈忍爲甲冑慧斷爲劍矛破內魔之高壘陷外賊之堅陣鎮撫邪雜解繹釋籠遇窮子則叱而使歸其家見貧女則訶而使照其室窮子不歸貧女不富吾師恥之三乘不興四分不振吾師恥之忠孝不並化荷擔不勝任吾師恥之避名滯相匿我憎慢吾師恥之故遑遑于濟拔汲汲于開誘不以一行自高不以一德自聳人有依歸者不俟請則往矣有求益者不俟憤則啟矣雖童幼不簡于敬接雖驚很不怠于叩勵其以闡教度生助國家之化也如此故親大師之教者貪則施暴則斂剛則隨戾則順昏則開墮則奮自榮者慊自堅者化徇私者公溺情者義凡士俗有捨其家與妻子同入其法分寺而居者有變活業絕血食持戒法起家爲近住者有出而修政理以救疾苦爲道者有退而奉父母以豐供養爲行者其餘憧憧而來欣欣而去揚袂而至實腹而歸所在甚衆不可以紀真如





而悟道終身而守護者僧尼四衆數千百人得其氏族道行可傳於後者紀于別傳  
休與大師於法爲昆仲於義爲交友於恩爲善知識於教爲內外護故得詳而敘之  
他人則不詳銘曰如來知見大事因緣祖祖相承燈燈相然分光並照顯說密傳摧  
邪破魔證聖登賢漸之者入頓之者全孰紹孰興圭峯在焉甚大慈悲不捨週旋以  
行以翼恐迷恐顛直示心宗傍羅義筌廣收遠取無棄無捐金湯魔城株杌情田銷  
竭芟伐大道坦然功高覺場會盛法筵不染而住淤泥青蓮性無去來運有推遷順  
世而歎衆生可憐風號

夜川

而去溺者誰前岩崖荆榛阻絕危懸

錫而過踣者誰肩不有極慈孰能後先吾師何處復建橋船法指一靈徒餘三千無  
負法恩永以乾乾

故柔公法師塔銘

此石存什王村勝光寺

公諱義柔本弘州永寧縣獨山村人也俗姓張氏十三歲甫出家禮感聖院僧德圓  
爲師年二十三普渡受具居數載喟然歎曰爲僧不達教典如何杜門不出乃振錫

西遊郡縣名刹靡不經歷大定癸未春來于是院遂居焉公賦性質樸有古人之風嘗精究華嚴故俗謂之華嚴法師罄已之有並充常住衣孟囊篋一無所取與院宰元公同力修建大願未酬而世緣已謝忽一日無疾而終是夜有紅光感應子之瑞焉時明昌四年七月十一日也享年七十有四敢摭其實而爲之銘曰

彼美柔公遊方自東薄惡今俗朴還古風華嚴妙典刻意研窮玄談至理深務精通立志高潔匪衆齊列身同孤雲行同皎月來兮雲生去兮漚滅清夜寂寥紅光暉映異瑞嘉祥應斯靡常骨與塵化高名遠揚

金泰和癸亥孟秋晦日大覺禪院主僧祖元立石

古幽鄉貢進士張希仲撰文並書

大金京兆府鄠縣重雲山長興寺故遵公法師塔銘

蓋聞佛日圓明豈熒光而比並法雷震擊非布鼓以同倫幸有空門梁棟梯航若非贊揚孰爲歸仰今有重雲蒞菖法諱普遵醴泉人也俗姓張氏自童歲出家禮

本寺顒和尚爲師至二十五于宋建炎二年七月二十三日落髮受具師德行孤高自幼至終未常有破戒之愆真佛子心也重雲古刹屋宇荒蕪師舍衣盂一新如舊而師天性純和常懷二利其於經論無所不通在圓覺禪定天性之宗深得其理遊歷諸方屢爲上座至七旬之後常謂法乳門人等曰吾幼質非堅預料年月日時乃吾寂滅之際而於本院未辦勝因乃與同力遂竭力而幹至大定十四年季夏忽染小疾于七月二十九日寂然而逝時享年七十三僧夏四十八有法乳等哀啼捧師靈柩當寢閣之前時值炎暑停經七日而色澤如故蠅蚋聞之自然遠退此師戒行力也緇素哀送者千有餘人闐溢鄴郊當茶毗之際遂於西北忽有微風祥雲而起繚繞于火焰之中逾時而罷人人競獲舍利者莫知其數間有得戒珠大如朱櫻者晶明可愛人皆寶之今有師弟資公戒師及小師善隆等奉師遺骨起宰堵波於重雲蘭若乃直書其實以爲銘曰

大哉佛子割愛辭親處心孤潔離垢出塵經論既通性宗深究住旃檀林作獅子吼

崇修精舍備歷勤勞輝華嚴飾壯觀鄠郊忽爾歸空感應自有名等重雲綿綿不朽  
師弟講經論傳戒沙門普資書

京兆鄉貢進士宋長源撰

明故通奉大夫山西布政使司右布政使致仕張公墓碑 王九思撰

昔公之考終也葬無誌銘墓無碑表歷歲滋久荒壠僅存過者弗式廉名雖著懿德  
弗傳往歲丙申巡撫御史榆次周君鐵移檄郡邑祠祀鄉賢予鄠官師去取恐謬奉  
以委予予下上古今得六君子入我明者惟公一人予生也晚於公世行未獲其詳  
于是取公誥身及予少年聞之父老者與五君子各著世行畀官師復御史矣既又  
播爲贊辭刻梓以傳匪獨我師亦以覺後進法往哲也及嘉靖丙午有司始建鄉賢  
祠妥神主春秋舉祀事之學官弟子鵬公之六世孫也追慕先公形諸夢寐顧茲荒  
壠怛焉疚心于是率其族人買石渭北將以磨之文之刻之立之墓前以殫厥衷以  
顯厥祖以詔厥後人乃又檢其家乘詢之族老得公遺事數種乃自述狀再拜請予

曰文非先生其孰宜爲予曰唯唯闡德彰孝予安可辭鵬復再拜曰謹奉教矣于是爲之碑曰公姓張氏諱賢字思齊予道安里人也居縣北衙道村家世業農父諱宣配王氏二室劉氏生公公自少磊磊有氣節嘗讀書里塾既乃棄去躬稼穡久之年瀕三十矣一日爲里中人所困公豪邁人也氣霍霍不能堪乃拊几歎曰嗟乎丈夫當自樹立羣小侮我齊民耳不學何爲乃復取舊書讀之尋入爲學官弟子從師取友朝夕淬礪或時廢食寢踰數年而永樂乙酉舉鄉試矣其性敏而志篤如此屢赴會試不第謁選授吏部司務薦陟驗封司郎中云公在部剛廉自持權貴不避關節不通親友饋遺一無所取部中呼爲板張蓋言節之堅也三載考績誥贈其父如已官母俱贈宜人云少子綱徒步入京師省問公見之怒曰農務方殷汝來何爲此中何所有而汝來也居旬日遣歸戒之曰勿復來也當是時國有戎事山西例輸饋餉踰期不完朝使往者或以才屈罷或以賄敗當道忌公者欲中傷之乃以公往公至執其奸惡者數輩痛懲之乃下令曰不輸者如此罰晉人前此以聞公名見其威令

如此成股粟爭輸之無敢後者果及期完矣事竣返命天子嘉悅超拜山西右布政使吏民聞之相與語曰包閻羅復來也比視事令出而人信不戒而事集威惠並流遠邇悅服以爲數十年旬宣之政未有如此者長子紀徒步入太原道過曲沃曲沃令見其良苦以一驢送之既見公怪其跨驢也詰之曰奚從得此紀不敢隱其實對公怒痛箠紀還令驢仍正其罪公一日浩然歎曰老且至吾盍歸乎當是時吏部方以都御史擬公疏未及上投牒而西矣既歸林下舊廬數椽僅庇風雨布袍疏食無異寒素秦藩一參議公部中舊僚也見其用乏以其所餘俸輿送之公固謝曰田入自足用此君養廉之資不敢拜賜仍遣之輿歸嗚呼此豈直予鄒之罕覲哉居嘗教子孫曰資性可讀書者教之讀其不能者盡歸之農慎勿爲吏壞身心辱門戶也閱數載老病卒餘資僅具棺殮葬村之西北隅祖塋方病臥時語其二子曰身後毋納賻傷我節毋作誌表虛譽失我真毋聽人言作石獸噐物侵我墓二子於是奉遺命不敢違顧於公生卒及葬之歲月壽享幾何皆不可攷公配任氏先公卒追贈宜人

生子紀綱及兩女紀生二子勳爵生一子銘由此以後迄于今相繼而生者共一百又三人皆於公爲曾孫而女子不與焉其繁盛如此鵬綱之後也乃今嗣公而興器識凝重勵志苦學業授毛詩綽有端緒人方英英然以科第望之嗚呼公神如在亦當欣然于地下矣語曰賢者必有後其在茲乎爲之銘曰

南有山兮岩岩公之行兮山之巔北有清渭兮其流湯湯公之廉兮名與之長濁世紛紛兮鴟梟翱翔安得覩公兮孤鳳凰豺狼擾擾兮橫道旁安得公兮殲彼貪狼公之墓兮草離離歲月遙遙兮式者其誰公有曾孫兮莪莪表公墓兮碑始立嗟鄉人兮生遲遲公之烈烈兮罔聞知其始至今兮肅爾儀下馬拜公兮讀我碑

登仕郎河南南陽府學教授封翰林院檢討徵仕郎王先生墓誌銘

明康對山

夫賢人長者流風餘韻可以敦薄俗起頑懦當道衰文弊之曰其掾正開誘至不小也然往往莫之能及故禮樂廢絀維常不振君子有憂焉海于是述王先生之行而



納諸其墓王先生者鄆人也諱儒字友宗其先河南人仕高陵遂家不去子孫乃爲高陵人今有諱元亨者墓在高陵或即其始來者歟其子孫皆不可考人第稱王大使家墓云元亨以後有三人繼祖繼容繼先然莫能詳所出元末兵起繼容繼先由秦嶺東行出關避兵而繼祖攜妻子渡渭入鄆匿居終南山中至明興始徙鄆城北街子孫遂世世居鄆焉繼祖生克誠克誠生敬仁敬仁生琰讀書起家仕爲大寧長清知縣以廉直顯名卒于官生子鉉寬厚博大鄆人稱長者受高年爵年八十一卒配李氏生三子其長爲先生先生隆準奇頷炯目廣輔而背後若負進退居止非禮不行年十五遊學山東於布衣蘇先生受蔡氏尙書三年盡得其學歸爲鄆學諸生成化辛酉舉陝西鄉試試禮部不第慨然憤曰吾長清公之元孫也昔長清公英英烈烈莫能舉進士蓋嘗謂予曰是在爾小子矣今不舉異日何以報地下再試戊戌不第以乙榜遂爲保寧巴縣教諭于是仰天歎曰嗟呼志士若是矣其命也夫其命也夫至巴品第材質以爲教其子弟皆興行踴躍巴素少科目至是連舉三人焉宏

治已酉復任祥符學教諭其教一視巴無損益居七年遷南陽府學教授教授三年以外艱歸遂不復仕云先生始仕巴時欲奉父母入蜀就養李夫人以道險弗往止高年公往居一年高年公還歲時伏臘及父母誕日未嘗不東向泣拜甲辰關內大旱人相食先生以俸金與仲弟歸養父母召其宗族可來食者三十人于巴又推其餘令鄰里已之巴者貿易爲食已雖益困則益休然樂也在祥符日謂去鄠愈近可奉親來養乃數上書高年公弗許欲罷歸去高年公又不許故思慮浸淫至髮盡白及聞高年公喪痛恨擊面若不欲更生也故既葬高年公事母李夫人終身不易焉此其誠孝懇至者蓋何如也海曩遊京師見先生之門人皆稱服先生之教嚴毅切至有古人循循之益各言其與先生送別時眷戀之事猶泣下沾臆其浹洽于人心者若此也此豈區區聲音笑貌可至耶宏治甲子予拜先生于鄠時先生已受封爲檢討當母李夫人之喪悴悴蹙蹙不得聞其言論前年壬申予再如鄠拜先生望之休休乎其容洋洋乎其度也接其言淵乎其深粹乎其理也曰此有道者古伏生戴

公董生之流也乃吾身親見之乎宜其子孫彬彬然執禮而好義勤問而好賢此其初有然也踰年而先生卒蓋癸酉冬十月某日也先生雖嚴以自治而天性溫厚未嘗無所容而中情淡然毋以富貴利祿少動諸子科第相接聲望相踵天下識與不識莫不欣異仰慕而先生如有所弗聞者居鄉日與故舊置酒高會洋洋而樂蓋有廣受之風焉配夫人劉氏封孺人生四男子長九思以庶吉士任翰林檢討文名才行聞于時爲上經筵講官纂脩孝宗實錄成劉瑾用事同翰林諸公以未習時務出轉吏部主事遷員外郎郎中瑾下獄言者以有罪劾謫壽州同知會天變言者又劾詔以同知致仕歸次九敍甲子舉人九皋義官九峯舉戊辰進士河南道監察御史孫男子五人瀛癸酉舉人譚沐渭漢孫女子八人已嫁者二人鄴學生楊顯蓋屋學生徐永圖婿也餘與曾孫女一人俱幼未聘九年月日葬鄴北六老庵之原先塋九思語予曰曩九思罷壽州會盜起不得行先君賜書開導以理懼九思有所惰也及歸值舍弟九峯以病得告先君見九思來甚喜慰九思日日率諸弟以奉先君之歡

雖即已病先君中無一留也乃再踰年先君卒矣其痛蓋何可言夫完德厚行閭巷固宜有之亦奚必尊官盛位然莫能一二數者蓋利欲所灼鮮有弗化者斯賢人君子世固所愛慕焉先君之行蓋可觀矣其賜九思書曰蓋聞萋菲之讒詩人歎息流言之興聖人懼焉此天下古今萬世共聞觀也故曰衆口爍金積毀銷骨此非過語也其有見而言之也夫古之君子竭忠其主非有所不盡也脩身慎行其越人非不多也然卒以罹于讒是故屈原放而離騷興其辭悲惋憤厲讀之颯颯焉使人心悲泣下小子何爲哉古曰弭謗莫如自脩此吾所嘗奉教於君子天地日月巍乎煥然仰而觀之俯而察之求無愧於斯斯已矣而又何惑焉夫賢者以一世之絀成百世之名其道固有然矣小子將何爲哉其言理直而指明義精而引長若此故予得以著于篇詔後世焉銘曰云云

王母李太君墓碑銘并序

太君李姓陝西西安府鄠縣太平里人也父培相母溫實誕太君年十四歸于理學

大儒豐川王先生之考中悅公罹寇燹中悅公嬰刃幾斃賴陰相之乃免家四壁矣太君內外縈拂所爲生計甚苦猶先意以供中悅公豪舉人已賢之泊生豐川才十齡失怙迨甲寅滇黔告警軍需窮餓叢於太君之一身內督耕織外持門戶猶課豐川讀書不輟午夜篝燈與寡姒陳孺人東西對績陳之孤與豐川亦手書卷而誦焉踰年豐川補學官弟子旋食餼旦夕且飛鳴矣太君不屑也聞整屋二曲李先生學極天人之蘊俾往而受業焉豐川年甫二十九即命棄巾衫專隨二曲講學且諭豐川云丈夫要當爲天地間第一流人富貴過眼畢耳若尹母之勗其子也曰吾聞以善養不聞以祿養汝能爲和靖吾以有以謝乃父于九原矣豐川居二曲且十年歲時定省留一二日即促之去曰汝學不成吾恥見汝汝亦何顏見汝妻孥無戀戀膝下爲也豐川以是益加淬厲得二區之真傳關中號再生橫渠海內節鉞巨公如今司空實齋先生之在黔楚家弟孝先撫閩皆走書幣敦請爲士林祭酒則太君之賢有以成之也太君母教詳具二曲所紀竊聞其訓豐川曰吾聞學仙者期至於

仙學佛者期至於佛學聖賢者安可不期至于聖賢又豐川之去二曲也太君淬然問曰古來學聖賢者皆如何用工對曰以存心盡性爲實踐以成已成物爲分量太君喜曰勉之讓古人以獨爲非丈夫也又時提存心盡性成已成物之旨以問豐川能自信於心乎太君之高論迴識即謂爲閨內聖賢可也慨自大道隱而功利詞章之學熾賢父兄之教子弟詹詹當世逢悅爲功名富貴之梯耳幸而捧花縣之輿聽江州之鼓角金章紫綬籜箛冠披極一時之寵擢以博老親歡無不嘖嘖稱曰孝子孝子是眞能顯親者孰如太君教其子向寂寞門庭尋師講道蚤知聖賢之必可爲雖丈夫行猶難之而况巾幗女流乎太君性純孝中悅公常臥疾誓終身素食以祈代語及舅姑輒淚下一味之新必薦和于宛若視其子女若己出馭下以慈而閨門整肅關中言家範者必先之此猶賢智母之所能而勗其子以聖賢之學明于擇師淡于恥辱炳炳大節當世謂爲孟母無愧辭矣太君年八十神明猶健堅坐常至夜分對家人說忠孝事不倦豐川之應海寧陳公講學江漢之聘而來也太君期以五

旬往還入院甫浹旬即辭去歸及太君誕辰未幾疾作踰月而太君竟卒事同嚙指萬里感精即豐川之大孝而太君之母教可知矣太君生于明崇禎庚午二月二十五日酉時卒于康熙辛卯年四月初三日巳時春秋八十有二子一豐川先生孫四勉功庠生勸業儒勅庠生功年十四通四經以父爲師得性命之秘工帖括其餘緒也勅年十三已通五經大母之教爲多曾孫二師智勉出師仁功出曾孫女二具家乘以明年正月二十五日合葬於鶴鶴原之先塋與中悅同穴太君之軼行不索書書其大者爲之紀而系以銘銘曰

教嚴三徙孟擇其鄰儒宗二曲李契其眞賢哉二母東西一人青牛惑世白馬誣民尼燈歛燄濂火輟薪太君何見望氣浮秦經臺遂築道德用陳浮雲富貴糠粃麒麟子賢孟聖至教通神星頽寶婺月隱鏡輪登堂虛約磨鏡無因鶴鶴原上華表嶙峋千秋萬世不羨紅蕭之三公纍襲而美白牛之將相紛綸

康熙五十年歲辛卯孟冬朔三日賜進士翰林院侍講加一級提督浙江學政充

國史一統志明史纂脩等官楚黃年家後學張希良頓首拜撰

烈婦賈孺人墓碑銘

邑太史崔志道撰文

烈婦賈氏名清鄂留犢村賈錫璧女字花原頭閩朱銀兒童養夫家咸豐元年朱銀兒死於水孺人年甫十四號痛幾絕者屢既哭墓易髻爲髻以冢婦禮見舅姑舅姑憐其幼且慮來日大難送之母家勸令他適孺人自矢靡他將繼以死知不可奪乃以禮迎歸孺人勤女紅致孝養甚篤舅姑沒喪葬外僅餘田十數畝又逋負纍纍乃更節口縮腹次第取償且益生業同治六年髮逆擾縣境孺人投井自全不死賊使數健婦引出甚敬重之伴以老媪戒他賊勿入其室先是孺人遵姑命撫甥印熬爲嗣既而印熬沒茹苦又多年光緒己丑邑紳等爲請旌豎碑立族孫炳耀爲嗣孫嗣立而貞魂逝矣天挺名姝爲閨門昭大義爲妻道樹大防奇節哉奇人哉孺人沒于光緒丙午年七月十八日亥時距生于道光戊戌年四月十六日吉時享壽六十有九以嗣孫遠賈未即葬今炳耀歸筮吉光緒三十三年十月十二日扶柩詣村北祖



瑩艮山坤向申時安厝銘曰

古留犢村鄠治東山水清曠靈秀鍾男多才良女德充賈媛生性純孝恭內含堅貞  
外和冲已字待婚夫命終年雖未笄節比桐哭墓總髻執婦功許嫁無二若臣忠慷  
慨陳義言乃雍人歌關雎樂鼓鐘我泛柏舟詠邶鄘德耀生不事梁鴻豫占吾穴死  
則同荆布裙釵首飛篷孀閨以外絕行蹤敬養姑章憑女紅保抱麟嗣期亢宗雙親  
告逝螟蛉從堂前冷落膝下空負郭十畝草蒙茸債臺百級高崇墉鍼帶託命敢告  
傭三更殘夜五更風且織且耕給租庸炊煙恆斷非歲凶戚族同聲憾蒼穹困阨孤  
貧何太窮霜清冰操方縱容勁金寒玉冬嶺松昔逢關輔罹兵戎投井自分飽沙蟲  
脩綆引出衣尙縫敬之莫敢露利鋒扞衛如保鄭司農始知至行堪折衝五十五年  
榛莽叢清潔骨格謝塵封維天有耳非癡聾誠感自與神明通聖皇恩詔下九重鸞  
書鳳紵光罷熊繼立孫枝氣蔚蕙昂然野鶴鷄羣中烈祖彝訓聽思聰慈蔭裕後幽  
魂濃旌幢亂山導仙童歸擁蓮座青霞宮黃土一坏鄰鎬豐班超載筆慰苦衷

大宋京兆府鄠縣逍遙栖禪寺新脩水磨記 地肺山沙門志陸撰并書

夫關市農田之賦邦國所以備于年儲疏流變磨之功人事所以資于日用矧茲匠  
妙俾自輪行實濟物之殊功乃厨須之要務長安鄠邑有逍遙精舍焉即後秦三藏  
法師什公譯經之地也此寺名標勝槩面對終南况草木以靈奇常高僧而間出

秦自隋唐皆高僧譯經之地

境稱絕異具載豐碑

此不復序

寺之東南隅三里以來按圖經曰高冠之

谷其谷口有隙地先是尙行溫之地乃前寺主崇恩端拱年中以金帛易之從始迄  
今皆以荒墟曾未田種今寺主法普始一日與同志曰此處地墀澗口水會濑流欲  
樹建于磨亭似不煩于巨力既陳厥議咸心悅隨乃剪伐榛蕪鑿開峻岸方興功力  
會乏資財有信士張彥實拖青蚨百繩助充營建是以掄材聚墨選匠鳩工徘徊盡  
合于規模巧拙皆依于制度於是危樓崛起疑蜃吐而雲成駭浪奔輪若虬蟠而轉  
影且觀其源也危峯巘岫狀怪形奇下之流也瑩碧澄潭深沉無底人而過者莫敢  
而窺故九夏絕于炎殃則可滋于稼穡一方溉于畦隴則挹之弗窮其磨亭正座五

間都成七架西開客館東做僧房俾來者洗以塵襟醒乎耳目望遼天而空濶夜月  
良多覩雨霽于秋光屏觀疊嶂闐然世外杜絕喧繁豈止獨利于禪林抑亦務資于  
閭里約費羨鏹三百餘緡歲月未周土木功畢是知地之興也故有其時物之盛衰  
良因其主今寺主法普與供養主法明並以精勤無怠道行有聞皆繼踵于真宗爲  
鄉閭之所仰也苟非積於勤儉安以樹于勝因者哉乃以庠事既周慮遷陵谷志陸  
隈承見託固讓弗遑輒述蕪辭誌于翠琰時天聖八年八月二十五日記

住持寺僧法普

其磨地窠東高冠澗南至澗西至坡坡頭通人過往北至草堂寺以上四至

宋張伋空翠堂記

余昔時嘗聞士大夫稱關中多山水之勝而漢陂在終南山下氣象清絕爲最佳處  
及誦杜工部所賦詩行愛其語大而奇益欲一往遊之以慰所聞道阻且長斯願未  
遂每以爲恨宣和元年冬被命爲邑於有扈而所謂漢陂者實其西郊焉于是始得

償夙昔之願時往遊觀翠峯橫前修竹蔽岸澄波浸空上下一碧信乎其氣象清絕爲關中山水最佳處也陂之北岸有堂舊矣久弗加葺棟宇傾撓來遊者跼壓是懼余喟然興嘆曰有此佳山水而堂構不脩晏賞無所大非其宜因顧從役而詢其故乃知自清平建軍縣澇水之西割地以隸故陂雖近鄠而地非所屬雖屬終南而距邑爲遠遠者不喜脩近者不得脩歲月既久浸成敝壞瓦木之類至爲小人攘竊而莫之問可不惜哉逮四年春二月以寒食休暇率聯事諸公會于陂上因相與爲議曰漢陂之地雖在他邑而頃者漕台移檄嘗令吾邑就近管轄此堂不脩無罪鄰邑亦吾邑之過也吾屬到官日久行且受代後來君子謂如不好事何今欲繕完稍加宏壯以稱山水之勝且以待使者按部之經由備邑人歲時之遊樂可乎諸公欣然咸以爲當時故人吳景溫攝政清平聞其將有是役也亟命工徒共力成就于是增卑補薄基址廊焉去故取新棟宇壯焉前駕虛閣以臨清流後闢軒窗以快雄風規度適中不僭不陋氣象具存苟完苟美經營于二月之晦斷手于五月之朔升堂遠

望豁達無礙南山之秀陂水之廣舉目可盡猗歎此堂庶幾不負佳山水而吾將東歸爲無憾矣乃以五日率諸聯事及邑居士大夫置酒以落之是日也小雨乍收微風四起嵐光水氣相爲氤氳若煙之浮若露之潤有見于簾櫺軒檻間者明滅變態不一而止是何清且麗耶酒半坐客共諷杜公工部詩行咸請以空翠名其堂蓋取杜工部詩中語且以誌所見也姑敘是堂興廢之由刻諸石以示久遠將有望于後之君子毋以此疆爾界距邑遠近強自分別而廢前修也

### 大元重修四真堂記

洞元純素致虛履常大師教門高士井道泉大淵撰

通奉大夫陝西等處行中書省參知政事何約書篆

秦渡關中名鎮也左清澧而右澇水背大渭而面終南木茂而土沃物豐而民繁介于鄠杜之間實一方之都會也初正隆間我重陽祖師遇仙甘水成道南時旣而東遊海上以應金蓮七朶之會及其上征及期乃挈四子西歸于汴蓋九轉成入南京

得知友赴蓬瀛此祖師純陽公所授秘訣中語也重陽返真四真西邁以物色舊隱遂得和李史嚴而師友之乃復抵汴奉柩而西焉既襄事而其心遑遑然以爲師傳之道有所未習力行之工有所未盡一夕會于是鎮之西真武祠柳陰之下而言志焉于是相揖而退各居一方刳心練形金精圖氣莫不確然各以大事因緣爲己任及其致精微極廣大揮斥六極提挈兩儀其成功一也自是祖師之道風行天上水流地中矣全真之學既闢像設之教方弘社之稷之尸之祝之乃以廟以觀述事而文志道之名於是乎立大德間清真居士梁公興召公甘棠之思於穉柳之南拓地而祠焉庀工訖像以四真敦請神峯牛君以主之君還居數稔徒侶方集會天陽宗師召致忠京師而觀事索然清真老矣復能窮誠竭力大加修葺以復其未竟之功俾四方雲朋霞友往來食息知所欽慕及四真所以造道之端開教之由昭昭乎著于百世之下而不泯者公之力也元統甲戌余家京師公再四致懇義弗克辭姑爲誌其歲月耳仍系之詩曰

仙伯瑰蹤四海聞清真肯構著清芬神峯事業雖無述志道淵源自有文秋靜清澧  
閑浸月素深紫閣澹留雲功成指日應飛去水怪山靈盡識君

至元二年歲次甲子重九日功德主清真居士梁德清男壽孫惟善則立

元寇伯衡德政碑

翰林編修鄭均撰文

聖天子以安養斯民爲治乃選守令嚴科條明黜陟于是京兆寇君由進士倅乾州  
守來尹于鄠至即興學校課農桑懇懇教化不尙刑威百姓愛戴如其父母識者謂  
寬而不弛有古循吏之風興平路當衝要行李往來不能供蓋屋協濟其不足者有  
年至是欲引鄠分代之君以鄠地狹民寡昔已割四鄉之一畀蓋屋矣茲又嫁重負  
于我民將不堪命乃詣府爭論竟得仍舊貫澧水歲潰堤岸壞民田府檄須千人往  
役作藁榘欄是吏每因緣爲姦君程其工只發三百人仍損其用之半事治而民不  
擾時諸官府職田租石當楮緡五十實贏市值什四五君以國家立法謂地遠不可  
輸將者不過如此所以寬民力也今委是例取之豈爲民父母之道哉終其任惟入

租不計緡境內生嘉禾瑞麥皆抑而不聞曰古人不奏祥瑞况吾輩耶人益以此重之既去官三年民追思而不忘相與買石求文以著遺愛至于使民由之而不知所以爲之者又莫得而記焉君名靖字伯衡予益先生之孫繫之以辭曰聖明之世惟民康乂匪資循良孰任斯寄溫溫寇君世德而文名高桂苑藹然清芬始政于乾公無留務尹茲鄂邦民歌來暮其歌謂何惠政孔多緩彼刑畏陽春載和每愔昔人蒲鞭示恥亦有寇君令聞不已公田有租時高其估衆利于贏惟君不取一同之內載見休祥君讓弗居其德愈光蔽芾甘棠詩人所美勒文茲石爲示無止

金靳康侯劉令修城記 其略曰

鄂城完者不過尋尺蹄痕轍迹四通莫禁大定二十二年秋七月劉令以壽州酒使來鄂集邑民而諭之曰比者承上司准省文上計二萬八千限以三歲每歲俟農隙興之若能一舉而成暫勞永逸衆皆願之經始于九月五旬而就城壁斯立濠池既淵環植嘉木異卉引南山皂栗澗谷諸水注之用力少而爲功多此君子之作爲政



之本也

鄠縣重修廟學記

明翰林侍講楊鼎撰

建國君民教學爲先凡學又必設先聖祠宇自唐以來皆以孔子爲先聖自門人以及後世有功聖門者爲祀從鄠縣廟學在城外蓋依元之舊址爲之洪武甲寅教諭張紳始移建縣治之西永樂甲午方蘄掌學事而馮翊佐教重撤而新之然皆師儒自爲正統丁卯湖廣慈利徐純德善來尹是邑下車謁廟喟然歎曰學校王政之大端先聖廟貌爲學校之瞻依守令布王政而不先急大端民何由而化風俗何由而厚哉於是鳩工聚材卜日就事撤壞而易腐廣其舊規加其雕繪始于戊戌之冬成于己巳之春一時佐尹成功者南漳劉通爲承孝義李忠爲簿贊襄其事者則有教諭安岳吳憲訓導魯山張翥

明道先生祠碑記

明宏治時巡案李瀚命有司建翰林學士王鏊撰文

聖賢道被天下萬世而深於過化之地鄠爲縣界京兆西南宋嘉祐間明道程先生

嘗主其簿其南山白雲紫閣高冠谷長嘯岩凌霄峯皆嘗徧覽題詠遺刻往往猶在庭有巨槐相傳爲先生手植其辨藏錢止佛怪興水利諸政猶赫赫在人自今而言先生之道在萬世不獨行于鄠自當時而言先生之道不行於天下猶幸行於鄠鄠固先生過化之地哉自宋理宗朝從祀之典徧天下亦非獨鄠也而其流風餘惠在鄠尤深迄今三百餘年鄠之一草樹一禽魚一泉石猶起敬生愛詩云蔽芾甘棠勿剪勿伐而廟無專祀人奚以慰宏治二年沁水李君瀚以監察御史按陝行縣至鄠則命所司治之八年復蒞茲邑顧瞻廟宇庫隘粗樸弗稱初意時巴陵楊君一清以憲副董學政議以克合命知縣事房嵩撤文昌舊祠以拓其址作祠五室周垣外繚重門中伉黝堊圭潔像設孔肖憲副謂予文其事於碑以示來者蓋自孟子歿而斯道絕先生兄弟起千四百年之後獨得不傳之妙至於今雖遐荒絕徼咸知誦程氏之書而先生所得之妙則有不在言語者矣固非鑿之所能贊述也獨二君協心一力表尙正學激起頽俗使鄠之人穆然如復覩卿雲霽月之度被和風甘雨之澤無

異於親臨而炙燬之者乎二君可謂知所重矣故附書之銘曰有嚴學宮祀事孔時  
新廟再登維鄴之思伊昔夫子蒞我鄴人辨奸折獄惟誠與仁孔孟既沒道墜何啟  
天續斯文生兩夫子惟兩夫子尊自遐方豈伊鄴人俾也可忘南山岩岩白雲在天  
夫子遠矣何日來還

邑侯呂公阻分澇河記

縣西南二十里曰牛首山者澇水出焉東北流瀕城之西再折而入于渭蓋鄴之巨  
浸云沿河居民灌溉爲利載在縣志非一日也戊申歲盤屋縣謬爲風水之說稱引  
元制疏濬古河欲鑿而分之實侵其利也彼已申允院道鋤耨具而後告鄴民之不  
知者半即知而無所事與怵于强大之素付之誰何者又相半時我公蒞鄴數月詢  
風叩俗疏滯剔蠱民用懷孚而茲檄之下也尤穆然有守土之思焉乃集邑縉紳士  
耆而謂之曰有分若河者奈何僉俯首謝唯命業私計轄者有成命不無難色而公  
因曰可否者理順逆者勢以侵衡守可否如何彼爲侵所未有我爲守所固有順逆

又何如故圖度之若移山之難而挽迴之亦轉丸之易也乃具文申白院道疊疊數千百語大都言元制不可遵疆域不可亂風水不可信民利不可奪是非陳之掌上利害如在目前觀者心折聞者意快乃得首肯而下節推王公案之按悉如公言遂罷其事于是當道莫不直鄂而不直盤屋矣而盤屋者亦詘于理知幾倖之不可圖無有怨我公者夫澇幾爲鄴失矣而復全此千百年不涸之澤皆公之力也邑紳衿父老僉謀刊揭前詞勒之貞珉以昭永久而實有感于我公之爲民真父母也公諱大章號唐字晉之禹都人

明劉士龍遊釣臺記

釣臺廣不踰畝高僅倍尋屹立澇水中如金焦數點汎汎長江千峯秀色逐波俱來幾許紅塵一水隔斷自漢陂而外勝無踰此矣臺之西稻畦相錯沿岸皆桃杏開植春來花發紅露爛漫臨風欲妖照水增妍光華亂射乎遠山姿媚映發于疏柳此子友張克甫所愛而忘返者也予謂克甫此中春事固妙矣至秋冬之際更難爲懷水



百眼長亘一里許高三丈餘濶二尋有奇可容並軌當肇造之初勞民大役恐叢怨  
藪不意西伯之遺俗尙在民咸樂于趨事儼若子來之日勞而不怨詎非幸哉曩爲  
巨津俄成大道利於攸往車不濡軌徒不濡足而病涉免矣昔鄭子產以乘輿濟人  
于溱洧孟子譏其惠不知政而命車濟人遺愛自在孟子之言有爲而發也余非知  
政者第旣爲王臣敢廢王政于是效子產惠人之心遵孟氏徒杠輿梁之訓爲民拯  
溺要亦聞風而起者歟

邑侯白公重開呂公河記

張宏襟 邑進士

呂公河發源于潭皂二峪橫可跳而越也蜿蜒而來橫經東關外北折而西入澇水  
于鄆雉若縈抱然還映紫閣湊成帶礪以其開于前邑侯呂公故名先是呂公請可  
兩院台 司道上下移文可覆案也呂公去後河旋塞緣佃其旁者貪尺寸之利于  
波臣之口快眉捷而忘遠利故聽其淤不復疏耳白公侯于茲土蒿目民艱擦一切  
積蠹釐之于是歷趾原野躬親勞來尋一綫之故道于蔓草埋沒之間督工疏通是

爲萬歷癸丑季春之朔當滌綠潺湲之初正不佞弘襟濫竽甲榜適家報之日吾邑自漢陂王太史後甲榜故寥寥曩此河一開而得韓君期維今再開而謬得不佞不可謂非祥也公但曰偶然耳公更慮暘旱不均厥水弗繼捐俸金命石工鑿栗峪之口闢直峪之壑引水自南鄠旁共入呂河湧湧而下流派不絕羅二君張幕君及前幕王君嘗左右之以觀厥成且沿堤樹柳數萬餘勢如藩屏環邑人無老若穉咸舉手加額喁喁然歌無疆之澤也豈直謂有增風氣然耶計瀕河之田可引灌數百頃及令嘆魃失權枯槁無功眞萬世之利所補匪細故也古云民不可與慮始而可與樂成于茲益信

下略

### 脩河小記

邑令冷大蒙

余承乏鄠杜

鄠邑父老請興

事適鄉紳衆南張先生以省親里居每爲余言

邑東南舊有呂公河歲久湮滯白公承而新之暨河工成而余不佞會捷之報適至然則斯水不獨便民灌溉實與文運相關今復就壅亟宜濬導之勿緩余聞而唯唯

顧簿書旁午幾成道旁築舍余入覲還諸父老再申前請余乃乘公餘與先生徐步南山之澳察其原委高下見阜峪泉渟毓淵泓可引而長四時不涸余輒然喜曰斯可藉以完是局矣爰屬邑佐王君力肩其任督工開創深濶各三尺許自方勝村起而天和村陳兵坊因勢疏鑿計十里與白公河匯遂繞城而歸併于澇焉落成之日王君酌余而觀綠波滌繞快目賞心且不費民間一錢不損民間半菽而工告竣余不勝舉手稱慶時農峻婦子環聚而樂觀以百千計僉欲歸功于余余惟昔者翟方進壞陂而黃鵠怨興召杜開陂而父母歌作夫余令也墜將焉治興其誰咎今而後不爲呂白兩公所珊笑而後之繼余而令者倘亦心余之心乎余竊有厚幸矣

邑侯張公建文昌閣記

張弘襟

余讀詩見西周之時以關雎麟趾之意流而爲壽考作人之化菁莪棫樸之美可謂盛矣當是時其所興作者不過璧雍泮水之役禮樂文章之事下此固文治之極哉然干城之咏見于周南整旅之什歌于大雅又何說焉及觀在泮獻囚之詩與周制



授兵必于學宮然後知文事武備交藏互用所謂寓大順于不測寄軍容于俎豆者彼固自有微意也今鄠之爲邑固古西周地也自

興幾三百年人不

知兵士民樂業風俗淳固說者以爲猶有西周遺風焉數年以來流寇竊發居人震蕩遷徙不寧是時適我邑侯定襄張公來蒞茲邑以爲不逞之徒飄風驟雨難與爭鋒吾獨可以固吾圉耳于是下令邑人各于險塞築堡團結保甲呼吸相應又于縣城四隅築爲敵臺間以懸樓城門又各爲高樓冠于其上于凡守禦之備纖悉必具寇來野無所掠攻城不敢人恃以安公猶居恆深念以爲彼方狡計百出竊規可虞又况城樓列峙中心無主必至地脈散越人文不振議建文昌閣于城之中以鎮之過余而語其故且曰任勞任怨所不敢辭第恐民力已疲無以應也余曰此舉實鄠百世之利佚道之使誰其後之公意遂決乃鳩工庀材創建有曰鄠之士民知公之爲已動也富者輸財貧者効力欣然赴役畧無齟齬公又心計腹畫創爲成規躬操繩墨指授方法立爲程期數月而竣不愆于素高閣嶙峋上薄雲漢緣以欄楯周爲

複道暇日公則邀余飲于閣上四望無盡心曠神怡中南太乙羅列如屏渭水灃潏  
潏洄若帶雲霞變幻草木蒼翠稻畦麥疇交錯龍鱗堡塞櫛比依稀可數酒半公顧  
予而言曰不佞待罪貴邑羣盜狎至亦唯是寢不貼席食不甘味日夜圖畫創爲大  
作豈故以以罷吾民乎亦不使天地清淑之氣磅礴而鬱積者雜于妖氛散越而不  
收遂令百年人文之盛有愧于昔時且以爲登高望遠以度兵于枕席之上詎曰侈  
土木之盛誇游觀之樂使人謂子實生我而乃浚我以生其何以謝斯民也今敢微  
惠大筆俾登之石非敢謂紀盛績垂久遠亦以達吾之苦心焉耳余謝曰公之心誠  
苦矣使公春秋耀其甲士幸不可知之功以不教之民驅之鋒鏑之下萬一少利悔  
敗何及則挑釁嘗禍不可爲也不然即使寇患少息憚于創作坐令天地清淑之氣  
磅礴鬱積雜于妖氛散越不收無乃使斯人居西周之地而不得復昔時人文之盛  
又無以爲游觀遠望之具使賊得潛至其下肉薄相攻即令矢石交下力爲格鬥然  
亦危矣又不可爲也今公于斯閣之建既有以禦寇患又有以振文風所謂文事武

備交藏互用寓大順於不測奇軍容于俎豆斯真有得于關雎麟趾之意者使其經濟之才大展于時則西周之盛不獨行之一邑且以見之天下矣

### 邑侯張宗孟重建漢陂記

余任鄆時即有寇警于是四鄉建堡使民避賊鋒去城西三里爲陂頭鎮有高阜上爲空翠堂按其地可拒寇因建堡濬壕爾時匆匆未暇悉所繇來丙子被誣去丁丑復爲士民保留日夕計所爲鄆衽席謀幾殫心血至簿書期會分爭辨訟非予所難也已卯寇稍平余無復事矣春莫出遊空翠堂詢父老所繇來咸唏噓咋舌若不忍言者久之曰此漢陂故址也傳聞唐杜工部嘗于是泛舟抵終南山麓時有陂在漢水之側逮元人以漢陂之魚能治漏因決陂取魚陂之亡也迄今三百餘歲矣水落土出盡爲稻壠惟漢水無恙僅留陂之一字與漢水共存焉耳即其上故有堂亦傾圮莫識而空翠之額出宋張令創建而向之裁露襍彩因風迴蕩菁蔥掩映百羽萃止啁啾弄喧者杳然無存矣余爲之惋惜因鳩工庀材相形度勢移堡後古道于北

集 卷 一  
百步外而高大之則漢陂當年所決處也爲橋以通往來橋北建武曲廟鎮之堡東建書院樓房三楹東西號舍各三楹又東舊有文昌廟亦更新之環濬魚池濶五丈與堡壕通鯖鯉鱸鮪雜畜其中置小船以利涉而資釣間植桃李梅杏榆柳松檜之屬數年後松濤篁韻相映參差不恍然舊勝之猶存乎堡前造水磨一所從堡內居民之便且引水入壕作金湯之險則又不僅選勝尋芳之是急也工成當爲之記

邑令朱文卿創建杜工部祠記

已卯春觀察可齋賈公以公事道經漢陂慨然想見唐杜子美先生泛舟賦詩遺韻憑弔久之顧文卿而謂云子美先生當年遊歷此地蕭什吟咏不一而足其精神靈爽當且眷戀于此竟令勝蹟無存乎文卿揖而對曰自古有大功德于其地以及名賢碩儒忠臣孝子節婦義夫足爲百代矜式者鄉邑咸祠而祀之以勸將來先生當唐天寶之亂位不過卑散間關數千里奔赴行在至其平時則觸時感事憂國憂君之義形諸楮墨一腔忠憤皎皎乎貫日月而泣鬼神故其足跡所至後之人往往追

念餘芳建祠刻詩矧此地先生杖履遊覽而宋令張公伋亦嘗于其上爲空翠堂今堂雖廢而址則存即其故址構堂以祀庶幾遠山拱翠碧水呈波如覩先生丰采焉鳴泉水磴松韻竹聲如聞先生嘯歌焉以表前賢則芳徽不墜以風後世則勸善有型視世之敝所事以事無益糜有用之財以媚不經之鬼者得失不有間哉觀察慨然曰可歸而遂捐俸四十金委某經營不足者某倍以俸補成之其制爲臺五尺爲堂三楹外繚以垣塗之白堊也正前爲門外爲坊共費錢凡百二十餘貫越三月而告厥成觀察手題扁聯懸簷楹書片石置諸壁間某念不可無記以識始末也于是本其緣起而碑之嗚呼工部之烈不顯於唐史獨以一念忠憤鬱鬱于胸惓惓于口千載下遡其流風遂至睠念無已俎豆不忘况于實建奠國安民之勳者乎後之觀者亦可以觀感知勸矣

漢陂鎮重修石橋記

邑太史王九思撰

漢陂鎮在縣西三里許人有數百家因住陂水之上故自稱爲陂頭云鎮之西南七

八里有胡公廟廟下泉水湧出東北流灌秣稔之田又合諸泉水流于鎮之東南鍾而爲陂空洞闊遠可行舟楫唐杜子美所謂半陂以南純浸山者是也陂魚美可已痔漏故名之曰漢陂云漢之從水後人加之也元末兵起盜決堤岸取魚其出流爲數支不復爲陂矣其一支北流經鎮之東復轉而東流入于澇水當鎮之路衝處爲津岸高不可徑涉昔人甃石爲橋一巨空以便行者屢敝屢修至是復敝鎮民馮榮輩修之旣成告于縣令西平王君君曰美事也不可無記其請諸漢陂太史云予少年時聞父老言成化己亥鎮人楊公諱通者以鄉舉士爲夏縣令謝政家居嘗重修此橋且以名其孫焉今者舊石記乃成化甲辰鎮民馮敬輩爲之絕無一言及于楊公不知其何說也即以成化甲辰計之迄今嘉靖甲辰六十有一年矣往來車馬殆無虛日橋之敝壞無怪其然不有更作其何可行斯役也用石視昔益多橋則益固始于甲辰冬十月越明年乙巳春二月功告成首作者有四人焉不具書書之碑陰而已嗚呼百餘年後復有四人者出焉何慮乎橋之或敝也夫此漢陂者關中之奧

區也自有子美之詩而其名益著海內豪傑磊落之士想慕風景思一遊賞而不可得宋元祐間縣令張君伋嘗築空翠堂于鎮之東南岡上自爲記刻諸石堂今廢而石存焉每一登眺南山蒼翠舉在目前風景萬狀難以具述予非鎮人也心竊愛之嘗自謂漢陂山人云自罷官歸里舍踰三十年老且衰矣苦于貲乏不能買一畝之田架數椽之屋徜徉其間以償吾興塵鞅束縛不能脫去可鄙可笑不獨困于貲焉爾矣故于石橋之作因並述之以誌吾過

創建太史橋記

陝西巡撫趙廷瑞撰

鄠縣在終南之麓山水靈勝即古豐鎬之地有澇河者關中八水之一山海經云牛首之山澇水出焉是也其水自山下經流二十里許過縣城西爲津又十餘里北入于渭津當孔道西走鳳漢東走省會每歲夏秋之交霖潦奄至波濤山立浹旬弗落百里之人暨行客之往來者患之縣人漢陂子養高鄠杜之間睹茲慨嘆竊甚而欲爲石梁者久矣嘉靖庚子之歲其族有材諧王諧者獻計曰澇河非石梁不可久幸

茲歲登閭無事太史公若倡義舉之可不煩官府而成矣漢陂子乃置酒召城中大姓數人爲首領次四鄉又次盤屋之接壤皆有力者各數十人聞召無後期至者乃舉觴告之授之規畫衆曰王先生老矣尙爲永濟之圖吾儕小人敢不從事是年十月農務罷衆約伐石于山均出車運之津壩明年辛丑之春會予有事于灞橋丁夫以萬計鄠當三十人漢陂子遣縣人詣臺愬曰灞橋之役無鄠之夫不爲妙若鄠人赴灞上則澇河之工病矣予遂令有司蠲鄠之夫鄠人聞之皆謹趨澇水之次又明年壬寅夏五月澇河石橋告成以高計丈有六尺廣三丈六尺長二十五丈有奇總十空遠近之人過者大悅而吏于茲土者拱手受成若罔聞知焉漢陂子喜曰此吾鄉人之財力胥成之也吾何力之有於是鄠父老議以王太史倡此義事吾等老矣後世子孫誰復知橋之所自盍刊之以石以永垂示漢陂子乃自敘其事託長安張比部孟獨請予文記之趙子曰橋梁有司之職也而乃俾一方耆碩率其里人自爲之長吏者愧矣雖號曰太史橋可也漢陂子當敬皇帝在御之九年舉進士爲翰



林檢討正德初遷吏部郎中與慶陽李獻吉汝南何仲默武功康德涵並名海內今年七十有六歲耄脩罔怠猶強健不廢著作雖其經濟不克宏施而其不忘世之志每於言議發之若此橋者可以畧覘其存矣漢陂子姓王氏名九思字敬夫居漢陂之上自號漢陂山人學者稱之曰漢陂先生

延齡會記

王九思撰 王瀛書

住持王崇璣者吾縣秦渡鎮人也少嘗慷慨有志立功名不屑羈絆乃去爲住持寄迹老子法中屈鎮之志道觀觀在鎮西蓋自勝國時王重陽羽化創建祖庭廼築別宮于此後其徒四人者馬譚劉丘有志於道插柳爲期而興於茲地故稱爲四師堂至我明興有道士孫碧雲者嘗居于此奉詔入對天子嘉之乃賜名志道觀云景泰中知事徐君蓋嘗重脩事在紀工之碑然歲久滋敝崇璣亦嘗葺補其殿宇靜深其青木蒼鬱翛然絕塵真物外一佳境也崇璣年六十矣碧瞳玄髮長身玉立乃一日仰而歎曰南山疊翠白雲在天澧水東注不舍晝夜風景猶夫昔也而豪杰安在哉

吾欲訪大道於重陽問玄秘於四師指碧雲於大 之下寥寥曠野孰與指迷徒見  
夫斜陽冉冉衰柳參差而已而吾欲何為哉吾惟樂其心以久其身者斯可矣于是  
與鎮之逸民王斌王文十有三叟相率為會會以月朔望推一人為主方其酒酣耳  
熱高歌擊筑起舞蹁躑飄飄然乘虛而御風醉則藉草枕石嗒然就臥不知海月之  
高東方之明也若是者蓋三年於茲崇璣告于衆曰古之人有言心勞者悴心佚者  
休若是而名吾會曰延齡可乎衆曰可矣崇璣又曰身無恆存惟名則壽請記諸石  
以垂不朽於是謁予予在縣庠序時已識崇璣誼不容辭乃記以歸之

大明嘉靖元年歲次壬午十二月季冬上浣

吉 旦 立

王德甫 馬守中 韓 奈 王 翥 姚崇純

本鎮逸民王 斌 張子康 蕭 盛 本觀住持王崇璣

王載道 韓 石 韓 杰 吉得成 王得用

鄆縣常平倉碑記

邑舉人趙繼聲撰文

漢之常平與隋之義倉宋之社倉并爲備荒善策然義倉之流弊在有司因緣姦利勒民出粟每至從而多科社倉之流弊則在百姓拘守成法積久不變以致困于納息惟常平則穀貴糶之穀賤糶之操縱自官出納惟市舉穀價之低昂不平者而使去在常平盡酌盈劑虛之法無重科納息之累意至良法至美也乃踵行既久名存實去在有司之賢者拘泥功令往往出納後時民尠實濟其不肖者又復規取盈餘私虧勒派吾民更受實害矣矧其瓜代頻仍官如傳舍不及躬親盤查有無霉爛虧空惟吏胥之一紙切結是憑吏胥且從而弄權矣是故今之常平其流弊且駕義社各倉而上之寢寢乎倉爲吏設官民交病而無可如何迨光緒庚戌歲某月經陝西諮議局議決各縣常平倉由民間公舉殷富紳耆管理咨准撫院報部立案吾鄂奉文後遵舉王紳廷瑞王紳定邦等首先照辦迄今已八閱寒暑官民稱便恐日久弊生爰集合邑紳約徵求意見擬定管理章程二十八條刊諸碑陰以資遵守因敘厓畧以諗後之管理本倉者

重修枯骨塚記

塚在秦鎮北門外舊有廟以祀孤魂年久傾圮嘉慶間重修鎮人張有為之記

聞之周文王作靈臺掘地得人骨王曰更葬之天下曰王賢矣澤及枯骨况于人乎相傳吾秦鎮此塚即當年葬枯骨處也以有孤魂像訛傳孤魂塚今扁其門曰枯骨塚云

重脩鄂縣太史橋碑記

邑人趙繼聲撰

醴泉宋伯魯書

漢唐近畿山水之佳鄂杜為最而鄂境名勝多萃於西南稻塍竹晦柳港桃源之屬十九夾澇委蛇而至鄂鹵郊盡態極研始北趨渭宋明道程子主鄂簿時有雲澹風輕傍花隨柳之句可見西郊勝概矣其地通澇之津舊有石梁一乃明嘉靖壬寅歲邑人王漢陂太史所創建後人稱為太史橋者也攷諸邑志橋至康熙四十四年王豐川記中已稱凡四脩此後垂二百年訖無大損至光緒中葉橋洞年久沙漸淤塞邑侯中江劉少芸懼碍行水釀金謀增高時董役者弗諳工拆卸未如法即增築潦

草竣事橋之病自此伏矣民國辛酉秋山淫雨洪發沖圮橋兩洞餘雖末圮亦礪  
不勝車當議興脩以兵荒接軫而止客春干戈弭寧閤邑紳約踵前議推王紳廷瑞  
董其事侯總約琳山鄉約維翰左右之王君普平司出納部署既定廷瑞觴同事而  
進之曰吾輩受諸父老託而爲此橋也欲議新之如何脩須思舊之所以圮築室與  
道謀圮一時詘舉羸圮二十羊九牧圮三此圮之生於官者也今父老授吾輩以全  
權官弗牽掣是三者可無慮矣至於興作掘不及泉則圮椿不應石則圮石不中程  
則圮灰不實罅則圮腹石不準面石與鬪筭不相犬牙積久亦靡弗圮者此吾輩所  
當究心也衆皆踴之即於其月選匠程工計橋之高爲尺十六長之尺二百四十闊  
視長爲九之一舊洞十重新者九共需錢三萬五千緡得諸陝西賑務處工賑頒款  
者五之一不足則括諸常平倉及糧秣籌收等羨餘者三之一不足則派諸十三操  
者九之一募諸閤邑商會者三十五之一猶不克敷更向好義者爲將伯之呼鎮嵩  
軍第一統部共捐錢一千八百餘緡第五路統部共捐錢一千緡王縣長捐助錢一

百緡終南祖菴兩鎮募助錢五百餘緡各界善信聞聲興起又量力樂輸以襄成之計壬戌仲春興工至今年孟夏凡十四閱月而落成其間工料之費經營之方與捐助者之好義任事者之賢勞皆弗容沒屬予記諸石以垂厥後予惟周禮夏官司險知川澤之阻而達其道路橋梁設有專官春秋時周大夫適陳見橋梁道路不治知其國之必敝徒杠輿梁子輿氏謂爲王政所先橋梁攸關顧不重哉後世政尙苟簡即在平時官府且鮮視爲急圖者矧更值羣龍無首師旅饑饉之際孰尙復暇顧此號爲民牧猶且弗遑過問治軍旅者孰尙注意乎此不意以茲橋而丁茲時閭邑諸父老獨能不俟官督兼顧通籌而立之基豫軍諸統帥暨隣封富商又能樂善好施以濟其乏督工諸子且能視公事如家事不辭勞怨以底於成俾行旅往來從此占利濟而忘病涉惠澤所屆澇水共長豈僅茂林脩竹間虹腰斜跨爲我鄠鹵郊增一勝概哉起漢陂太史於九原亦應喜嗣武之有人也夫千古無不敝之物千古有不敝之人後之覽者慎毋令諸君子專美於前則又予之所深望者耳

中華民國拾貳年夏歷歲次癸亥六月 穀旦

明都御史長安何棟鄠縣復額輕稅碑議

今天下郡縣各有輕糧蓋自邊運存留之外額設以備災患使輕則易輸誠我聖祖優恤民隱之重典也鄠有輕糧乾州折布八百二十三石原額數也爲鄠民之永賴云嘉靖乙卯冬關陝地震渭南尤甚百姓以稅負累訴之當道議以起運換鄠縣輕稅八百二十三石權借一時非常例也鄠令彰德賈侯許之迨丁巳夏鄠地被澇河水崩甚苦邑民吳世寶祁永武時景焦良美等訴鄠災傷督糧者令縣查鄠輕糧卹災傷人戶鄠之輕糧爲渭南借去不復久矣時盟津陳侯來知邑事剛明果斷不畏彊禦興滯補弊剔蠹革奸以安養斯民爲心尤於借稅事激勸百姓期以必復四人遂結盟舍其家事力於奔馳訴於巡撫比例諸州縣通復輕稅方准行矣以渭南權豪故爲之束閣者三年四人以予於鄠寄有田糧詣予舍哭泣將如京陳情予憫其冤苦於撫臺陳方伯孟備道其故蓋陳孟二公先爲藩司督餉曾憫其訴又察見四

人以死力爭也方以輕糧准復矣自始倡議至復稅凡八年經撫按二司郡縣申訴者殆無暇日鄠始得原額之輕稅云當時撫按行縣立石儀門以杜後患永爲遵行至今未舉予垂老林下鄠之輕糧予其關心四人懇求予言以垂後因道鄠令濮陽李侯下車以來清介不污剛果自持均田肅清編審詳允古循良吏也鄠之輕稅之復諒亦感陳侯之倡議憫四人之艱辛知衰朽之曲成樹碑之事關於鄠民至重所望於賢侯者多矣鄠之輕稅之權借尙有折布一百石在耀州之未復者尙有華陰縣紅德倉重糧換鄠粟米黑豆輕糧三百石之可復者國初原額已定當道者任其那移久假不歸有乖國法况所換邊運至重鄠民尤苦者也往往撫按言及興革事宜今猶未復誠若有待鄠四人訴之亦將有垂成之勢矣所惜者功虧一簣也李賢侯令鄠百姓爲之屬望云維爾鄠民建立貞并刻二侯之賢以告來者蜀巴陳侯冀石王侯繼盟津陳侯者經議輕稅之復咸與有功亦爲之附書云

唐太宗贊羅什法師詩

其石刊舊存草堂寺今佚



秦朝朗現聖人星遠表吾師德至靈十萬流沙來振錫三千弟子盡繙經文成金玉  
知無朽口吐蘭芳尚有馨堪歎逍遙園裏事空餘明月草青青

宋鄂令李章草堂逍遙寺詩

羅什留真嗣 扉掩碧松鄰僧來紫閣遠逕接圭峯雨氣晴光潤庭陰午後濃依稀  
祖師意瘦倚一枝筇

紹聖二年其子百堅復知鄂事奉祀高冠神廟過草堂見其先大夫留題恐歲  
月滋久將遂湮沒因刊于石

李周 李邵 楊致祥 种古弟 診 聯雙檜

草堂寺石刊

古樹列雙檜森鬱欹簷角 古高幹若偃蓋低枝羅翠幄 周葉硬攢蝟毛子團如雀殼

診 盤根雖輪囷呈才終卓犖 邵枯冬傲霜霰炎夏宜雨雹 致祥蒼皮遶龍蛇危巔巢

鳥鷺 古歲寒知後凋清風到先覺 周月涵煙影孤雨溜苔蘚駁 診願逢繁輅用勿使

爲榱桷 致祥春姿筆工偷風韵溪虎學 古松筠比節操蟲鳥敢蠹啄 周黛包晚山分

清香朝露濯診桃李恥妖饒椅梧羞齷齪致祥犧樽雖備儀真性惡剪斷古俗名強

雌雄奇勝重古樸周氣勢已千尋栽培從一握邵五松慙忝位秦封受殊渥致祥

慶歷中家君蒲尹集賢尉長安日常與种太質昆仲泊一二僚友遊草堂寺有聯

雙檜之句厥後五年而處訥始生又四十年處訥以左宣德郎來知鄆縣事被府

檄奉祠高冠神更衣是寺歷覽壁間留題而墨蹟具在因命刊諸石以永其傳云

時元祐壬 秋八月甲戌也 住持賜紫紹利立

又

雙樹輪囷五百年開華結實兩爭妍我來問道師知否祖意元無法可傳大觀己丑

九月二十九日孫熬扞才甫遊因至紫閣留宿此寺

羅什寺淨土樹詩

王 寬

淨土標奇蹟攀條仰大賢七株雙鳳立萬古一燈傳樹老猶留晉僧高可訂禪道心

真不朽長此住金天

和王敷五羅什寺淨土樹

康弘祥

古刹由來遠名因羅什賢兩株留法種

姚興與羅什宮女二人曰不可  
令法種少嗣一交而生二子

一本續真傳

此樹至今  
七易其本

花艷上林色菓空祇樹禪色空原不異東土自西天

淨土禪宗

傅龍標

桐城人

茫蹊帶得一枝春羅什東來蹟有因無事移根蔥嶺外自然挺秀白雲津歷來海宇  
無多本七易原身仍一真樹以土名總是淨禪家妙諦此中尋

雙槐

邑令王九皋

疇將二樹留花縣明道先生手自栽豈是陶潛叢五柳寧同王氏植三槐千尋老幹  
天機發萬丈靈根地脈來酷似甘棠遺去後至今餘蔭覆琴臺

又

雙槐佳氣日氤氳光澤相貽百世芬棧樸常生豐芑苞甘棠永燦洛川文枝疏分得  
南山雨蔚蔚常屯渭北雲拱護在人無剪伐何煩禁令出齊君

四師堂詩石刊

太常寺少卿任宇瞻題

重陽手底有遺宗元氣分 志氣同一自四師歸去後古今楊柳在春風

又

道錄司右至靈黃嘉祐題

四師昔此駐仙踪金石心同志亦同白鶴不歸楊柳在令人千古仰高風

又

臨晉縣儒學訓導杜表題

清虛與衆最難周萬古傳來是一宗一自重陽歸化鶴羽流濟濟慕遺風

又

西安府學訓導丘陵題

仙柳原含太極胎重陽曾此手親栽海天回首塵寰遠何日令威化鶴來

明正德己卯永壽王謁泰岳行祠詩刻

泰岳行祠建此山羣峯聳漢勢難攀飛雲舒卷迷遙嶺過雁高低下遠巒溪水雨添

生碧浪林風霜醉染丹顏溫泉浴罷臨仙境忘却塵寰半日間

戊寅歲王浴于太白鳳泉是歲秋便道過鄠留題于祠凡七十二字效古篆七十

二體爲之并附釋文

大梵王字尙書古文垂露外篆水草文夏鼎象形漆書鳥跡花篆小篆偃波摹印  
玉函梵篆銀鈎玉墨玉鼎紫霄文漢體金篆大篆鵠頭芝英虎篆剪刀石經古文  
尙方古文懸針遊絲署篆倒薤氣候水書華岳古文返鵲柳葉轉宿書氣候金書  
連珠刻玉刻苻秀竹葉碧落奇字上方穗書垂雲金鐸竹節鳳尾古風文古蛇篆  
墳書玉箸龍書雕虫鼠尾龍爪松枝寶帶籀文科斗金錯團玉麟書及書鸞鳳書  
飛帛鳥書鐘鼎

正德己卯菊月永壽王題并書

又程明道先生高冠潭詩

洞壑積陰成氣象鬼神憑暗弄威風噴崖雨露千尋濕落石珠璣萬點紅

又永壽王泰山次韻

遠嶂參差浮瀨氣陰崖蕭瑟響松風千年廟宇威靈壯五色晴霞照晚紅

甘亭十二景詩刻 碑存文廟

康熙甲子龍岡吳廷芝書

中樓遠眺

鎬京東漸與西被此地猶傳豐芑遺近眺爨煙雜曉露遠瞻山色帶晴曦冲霄鶴向  
圭峯缺潑隈花重漢水躡氣象萬千憑太乙登臨直上逼南離

繡溝春禊

繡溝灑潑漾清波會記蘭亭憶永和座有羣賢聯坐次庭餘逸韻雜音歌攜尊偃仰  
觀無極結伴臨流喜若何到處徜徉忘物我春風沂水怡情多

釣臺花浪

環臺四面皆春水花膩漣漪碧底非仙瀨源流通渭埃重岬石畔傍磴磯魚噓桃影  
吞紅浪人照柳潭染綠衣誰釣金鰲同海上垂綸岸泚對斜暉

西郊花柳

蔭翳花柳遍郊西極目川原著眼迷路接青雲垂綠萼芳蹇紫魏間長堤有懷持贈

歌三疊恍若尋流過五溪禽鳥春晴爭出谷幽亭深處夜鶯啼

漢陂泛舟

漢陂晴泛木蘭橈石畔鳴泉雜洞簫曳上布帆風送棹拖成正練浪漂綃波瀾轉折  
仙源路桃李陰濃太史橋佐酒魚羹牛首薺流連日暮亂雲飄

玉蟾稻塍

井廬溝陰陌阡連月印塍痕繡錯徧 返人麥浪滾飄飄拂袂稻風暄斜穿石徑  
依臺榭曲抱村墟列澗瀼野色蒼芒煙霧起還將歸路下花田

紫閣青冥

紫閣隣霄欄巖築涇濛混固古乾坤遙穿雲幕爲綃帳俯視煙嵐是遠村隱見諸墟  
成海市高低羣岫侍兒孫開窗放出凝霞去始識峯頭特地尊

圭峯夜月

皓照圭峯樹影重天雲斂 澹春容銀河斗轉橫輪閣鐵鳥風清雜晚鐘青嶂遠脚

秋夜月輕雲暗抱大夫松山家乘興恆孤往石徑穿林護短筇

草堂煙雨

煙雨涇濛障草堂毘盧古刹現毫光一乘慧業超千界萬斛明珠照十方爐篆氤浮嵐霧合林岩香散野風涼迴廊細讀圭峯紀遙憶當年翰墨章

重雲雪嶺

終南不老長年秀倏轉東風白了頭羣岫兒孫蟠鬢侍一時林總玉田遊散鹽盡是官山嶺飛絮疑同柳岸丘疊疊重巒惟瑜屑翹瞻我亦擁瓊樓

高冠瀑布

憑陵紫閣擁高冠萬丈飛濤瀉碧瀾溜滴梨花摧蕊萼飄霏玉屑鎚琅玕斜拖機練三分白瀑漲懸泉六月寒山際涇濛夜浙瀝瀟瀟風雨灑龍盤

靈沼瑞蓮

荷華爛漫致輕盈秀濯污泥出水萍綠萼叢中朝露渥可人時節午風清地靈還憶



豐京澤種異宜膺君子名爲羨愛蓮周茂叔鍾懷坐對月初明

終南草堂寺爲天下之名藍以什師圭峯二大士之故也野衲來秦中幸獲一遊亦所謂還盡生平願見者之一也勉爲二絕句書以遺寺住持應公法師

一

元至元三十年雪菴野衲溥光題

草堂名利歲年深三藏談經事莫尋惟有千章雲木在風來猶作海潮音

其二

圭峯去世幾經春道價光輝四海新要識吾師真面目晴嵐萬丈照西秦

次晨欲去適天雨爲寺內住持所留再爲一絕以遺之

溥光又題

春雲飛雨靜幽林梵刹留人古意深應是二師羅什圭峯憐我過故將法水灑塵心

輓詞

明劉麟題并書石存漢陂祠

碧山人去拾遺詩秀句空傳海嶽悲槐種廣庭眞有待桂生仙嶺更何疑春風座下

諸生誅秋草原頭太史碑百歲幽潛如白日士林相恨及門遲

感舊

焚魚學士住西秦空谷相逢語甚真念我昔曾投散地知君獨是愛才人羣峯影裏  
秋陰合落木聲中白髮新點檢同胞舊兄弟濟南詩賦解傳神

時邊庭  
實有寄

述懷三首

日日銷憂登古臺南山色色幾時開心如越鳥終難定身逐秦雲忽漫來一郡見收  
猶是誤三都欲賦恥非才湖邊舊侶應深詫吹盡秋風客未回

其二

劍匣流塵慚更磨壯年誰道已蹉跎心關華岳登臨少臥見南山悵惘多故吏有時  
來問疾門生何意數相過風塵不隔還家夢夜入浪滄鼓柁歌

其三

勝年榮祿幾人辭病骨經秋倦莫支興逐雲鴻成獨往情多慙馬向誰悲花深草閣

紅塵少柳暗閒門白書遲此去若逢西使便報君惟有碧山詩

有明正德甲戌冬封君王先生將歸於立堂安仁劉麟以束芻來獻獻之明日乃與先生之子九思九峯往觀其吉已而盡哀哀而有言是爲前章二子聞之又哀哀畢乃慰慰而復言是爲後章二子進而告曰茲有貞石願請勒之麟辭不獲乃再拜而書之因以末三章附焉十月三日劉麟記

雁字迴文詩刻

碑存城內張氏祠

張玉德

道光間邑諸生張比亭玉德仿各家名蹟爲迴文詩凡三百餘首上下往復宮商悉調時人以雁字二字爲詩三百爲一絕迴文二絕書法真草隸篆悉仿各家名蹟爲三絕詢藝林之傑構石墨之奇珍也盤屋路閨生先生跋曰行行印水曾傳戲海之篇咄咄書空大有摩天之筆題標雁字代著鴻章然皆侔形揣稱體物爲工鄭谷以鷓鴣得名崔珏以鴛鴦爲號洵屬藝林之佳製究非文苑之奇觀吾友張子比亭慧識禽言神搜鳥迹東塗西抹具活潑之機暝寫晨書極騰翻之致飲醇助興萬紙供

其一揮弄墨忘疲千毫因之盡禿吾昔慕其跳龍之妙翰初不知爲吐鳳之詞人也  
甲午秋見惠石刻雁字迴字文詩一部宛轉相生循環不斷按沈約之韻織蘇蕙之  
圖雲譎波詭之思目送手揮之態如斷崖絕壑策杖獨行如駭浪驚風挂帆竟去句  
中有句奇外出奇憂憂其難多多亦善讀未畢竊歎曰文心之幻一至此乎至其書  
臚各體派衍諸家躡斯邈之蹤入晉唐之室雲間寫思羣瞻遊鶴之天沙上談經快  
靚換鵝之帖既資諷誦復便臨摹誠可寶也漢陂之上紫閣之陰山水娛人文章假  
我鷗盟鷺侶並助其吟情爵籙鷄碑益探其古趣訪君他日會看風雨揮毫笑我今  
番也似雪泥留爪

城隍廟祀神樂章

邑太史漢陂八十二翁王九思撰

雙調新水令

降神

碧空白露報中秋喜逢着八荒開壽金湯蒙聖德歌舞繼前脩衆志綢繆願神靈早  
臨邁

水仙子

初獻

天邊五色瑞雲流殿角須臾瘴霧收風詞派仙音奏致齋明齊頓首荷洪恩海嶽難

酬罄涓埃少伸微敬薦蘋藻雜陳庶饒獻壽杯共祝  
神休

折桂令

亞獻

衛封疆百里諸侯廟貌尊嚴松柏清幽翠嶂南開潞河西注澧水東流賀聖節年年  
奔走看排場個個淹留星閃燈燭綵結棚樓自古相傳三日方休

鴈兒落得勝令

終獻

乾坤萬古留日月常依舊輔  
皇圖共久長保赤子無災咎風雨應春秋禾黍滿

田疇歲歲享昇平樂人人將孝弟脩壽酒也新芻滴點馨香透壽曲也新謀抑揚取

次謳

沾美酒太平令

侑食

想着那神明心照管的周順天道不差謬福善災淫隨判剖無些兒滲漏涇和渭怎

同流任從他詭計邪謀怎能逃寶鑑神目若還能正直忠厚自然的人興業就呀有  
一樣惡醜信口亂囑昧着心神前說咒

尾聲

送神

享神明要把虔心叩見威靈來格應應想着那幽明交感意周流保佑的百里蒼生  
爲善的人家世悠久

萬曆元年歲次癸酉本廟道人

真通喬真容同立石

今石陷廟獻殿東壁尾  
有羨陂孫玉山木跋語

鄂縣縣志卷之七終

重修鄠縣志卷之八

藝文第二十三

自祝穆方輿覽勝采入詩文於是後之志州縣者舍地理而濫徵名宿畧方域而博采詞章不無舍本求末流蕩忘歸之失焉是編所載或爲鄠人所作或人非鄠而因鄠之地與事而作要皆取其有關於世道人心政教風俗之要者而記錄之非徒濫采詞華以供人賞玩已也

詩

扈從鄠杜

唐蘇頲

翠輦虹旗出帝京長楊鄠杜皆知名雲山一一看皆異竹樹叢叢畫不成羽騎將過持袂拂香車欲度捲簾行漢家曾草巡遊賦何似今來扈聖明

望終南山寄紫閣隱者二首

李白

出門見南山引領意無限秀色難爲名蒼翠日在眼有時白雲起天際自舒卷心中

與之然託興每不淺何當造幽人滅跡棲絕巘

君子有所思行

紫閣連終南青冥天倪色憑崖望咸陽宮闕羅北極萬井驚畫出九衢如絃直渭水

銀河清橫天流不息朝野感文物衣冠何翕赭音赭大赤廐馬散連山軍容威絕域伊臯

運元化衛霍輸筋力歌鐘樂未休榮去老還逼圓光過滿缺太陽移中昃不散東海

金何曾西飛匿無作牛山悲惻愴淚沾臆

寄鄴杜李遂良

高 駢

小隱堪忘世上情可能體夢入重城池邊寫字師前輩座右題名律後生吟社客歸

秦渡晚醉鄉漁去漢陂情春來不得山中信盡日無人傍水行

題鄴南李生舍

李 洞

圭峯秋後夜亂葉落寒虛四五百竿竹二三千卷書雲深猿盜粟當作雨霽蠲沾蔬

只隔門前水如同萬里餘



鄂杜舊居二首

韋莊

再到山陽事事非，谷雲溪鳥尚依依。  
阮咸貧去田園盡，向秀歸來父老稀。  
秋雨幾家紅稻熟，野塘何處錦鱗肥。  
年年爲獻東堂策，長是蘆花別釣磯。  
一徑到村渡碧溪，稻花秀滿禾千畦。  
雲中寺遠聲難識，竹裏巢深鳥易迷。  
紫菊亂開連井合，紅榴初綻拂簷低。  
歸來滿把如漉酒，何用傷時歎鳳兮。

過漢陂懷舊

辛勤曾寄玉峯前，一別雲溪二十年。  
三徑荒涼迷竹樹，四鄰凋謝變桑田。  
漢陂可是當年事，紫閣空餘舊日煙。  
多少亂離無門處，夕陽吟罷涕潛然。

漢陂詩

鄭谷

昔事東流去不回，春深獨向漢陂來。  
山前別業依然在，雨裏梨花寂寞開。  
却展魚絲無野艇，舊題詩句沒蒼苔。  
潛然四顧難消遣，祇有佯狂泥酒盃。

灃頭送蔣侯

岑參

君住豐水北我家澧水西兩鄉見喬木五里聞鳴鷄飲酒溪風過彈棋山月低徒聞  
蔣生逕爾去誰相攜

首春渭西郊行呈藍田張二主簿

回風度雨渭城西細草新花踏作泥秦女峯頭雪未盡胡公陂上日初底愁窺白髮  
羞微祿悔別青山憶舊溪聞道輞川多勝事玉壺春酒正堪攜

初授官題高冠草堂

三十始一命宦情多欲闌自憐無舊業不敢恥微官澗水吞樵路山花醉藥欄祇緣  
五斗米辜負一魚竿

與鄠縣郎官泛漢陂詩

萬頃浸天色千尋窮地根舟移城入樹岸澗水浮村閒鷺驚簫管潛蚪像酒樽暝來  
喧小吏列火儼歸軒

自雲際精舍歸高冠潭石淙望秦嶺微雨貽友人

昨夜雲際宿旦從西峯回不見林中僧微雨潭上來諸峯皆晴翠秦嶺獨不開石鼓  
有時鳴秦王安在哉東南雲開處突兀獼猴臺崖口懸瀑流半空白磴磴噴壁四時  
雨傍村終日雷北瞻長安道日夕多塵埃若訪張仲蔚衡門滿蒿萊

鄠郊別墅寄所知

溫庭筠

持頤望平綠萬景集所思南塘過新雨百谷生容姿幽鳥不相知美人如何期徒然  
委搖蕩惆悵春風時

因假歸白閣草堂

雷聲傍太白雨在八九峯東望白閣雲半入紫閣松勝概紛滿日衡門趣淡濃幸有  
數畝田得延二仲蹤早聞達士語偶與心相通誤狗一微官還山愧塵容釣竿不復  
把野磴無人春惆悵飛鳥盡南山聞夜鐘

鄠杜郊居

槿籬芳援

員去聲  
注衛也

近樵家隴麥青青一徑斜寂寞遊人寒食後夜來風雨送梨花

早秋草堂山居

山近覺寒早草堂霜氣晴  
樹凋窗有日池滿水無聲  
菓落見猿過葉乾聞鹿行  
素琴機虛靜空伴夜泉清

寓居澧上精舍寄于張二舍人

萬木藂雲出香閣西連碧澗  
竹林園高齋猶宿遠山曙  
微霰下庭寒雀喧道心淡  
泊對流水生事蕭疏空掩門  
時憶故交那得見曉排閭闔奉明恩

登西南岡卜居遇雨尋竹浪至澧壩

軟平聲  
岸邊地

縈帶數里清流茂樹雲物可賞

登高創危構林表見小流微雨  
颯已至蕭條川氣秋下尋密竹  
盡忽曠沙際遊紆直水分野綿  
延稼盈疇寒花明廢墟樵牧笑  
榛邱雲水成陰澹竹樹更清幽  
適自戀佳賞復茲永日留

澧上醉題寄滌武

芳園知夕燕西郊已獨還  
誰言不同賞俱是醉花間

晚歸澧川

凌霧朝闔闔落日返清川簪組方暫解臨水一翛然昆弟忻來集童稚滿眼前適意在無事携手望秋田南嶺橫爽氣高林繞遙阡野廬不鋤理翳翳起荒煙名秩斯逾分廉退媿不全已想平門路晨騎復言旋

澧上與幼遐月夜登西岡翫花

置酒臨高隅佳人自城闕已翫滿川花還看滿川月花月方浩然賞心何由歇

觀澧水漲

夏雨萬壑湊澧漲暮渾渾草木盈川谷澶漫一平吞槎梗方彌泛濤沐亦洪翻北來往涇渭所過無安源雲嶺同昏黑觀望悸心魂舟人空飲棹風波正自奔

紫閣東林居士叔緘賜松英丸捧對忻然非塵侶之所當服輒獻詩代啟

碧澗蒼松五粒稀侵雲采去露沾衣夜啟羣仙合靈藥朝思俗侶寄將歸道場齋戒今初服人事葷羶已覺非一望嵐峯拜還使腰間銅印與心違

月夜會徐十一草堂

空齋無一事岸幘故人期  
暫輟觀書夜還題翫月詩  
遠鐘高枕後清露捲簾時  
暗覺新秋近殘河欲曙遲

扈亭西陂燕賞

杲杲朝陽時悠悠清波望  
嘉樹始氤氳春遊方浩蕩  
况逢文翰侶愛此孤舟漾  
綠野際遙波橫雲分疊嶂  
公堂日爲倦幽襟自茲曠  
有酒今盈滿願言盡宏量

與鄆縣源大少府宴漢陂

杜甫

應爲西陂好金錢罄一餐  
飯抄雲子白瓜嚼水精寒  
無計迴船下空愁避酒難  
主人情爛熳持答翠琅玕

城西陂泛舟

青蛾皓齒在樓船橫笛短  
簫悲遠天春風自信牙檣  
動遲日徐看錦纜牽魚吹  
細浪搖歌扇燕蹴飛花落  
舞筵不有小舟能盪漿百  
壺那送酒如泉

漢陂西南臺

高臺面蒼陂六月風日冷蒹葭離披去天水相與永懷新目似擊接要心已領仿像  
識鮫人空濛辨魚艇錯磨終南翠顛倒白閣影嶒峯增光輝乘陵惜俄頃勞生愧嚴  
鄭外物慕張邴世復輕驪吾甘雜鼃黽知歸俗可忽取適事莫並身退豈待官老  
來苦便靜况資菱芡足庶結茅茨迥從此具扁舟彌年逐清景

詩偶與張邴合注謂張良邴漢及曼容

漢書谷口有鄭子真蜀有嚴君平謝靈運

漢陂行

岑參兄弟皆好奇攜我遠來遊漢陂天地黯慘忽異色波濤萬頃堆琉璃琉璃汗漫  
泛舟入事殊興極憂思集鼉作鯨吞不復知惡風白浪何嗟及主人錦帆相爲開舟  
子喜甚無塵埃鳧鷖散亂棹謳發絲管啁啾空翠來沉竿續縵深莫測菱葉荷花淨  
如拭宛在中流渤澥清下歸無極終南黑半陂以南純浸山影動裊窕冲融間船舫  
暝憂雲際寺水面月出藍田關此時驪龍亦吐珠馮夷擊鼓羣龍趨湘妃漢女出歌

舞金支翠旗光有無咫尺但愁雷雨至蒼茫不曉神靈意少壯幾時奈老何向來哀樂何其多

崇寧改元三月十四日過草堂望終南山題

宋吳郡梅澤說之

兩峯高插碧天寒雖得春風雪未乾謝履自忘登覽倦草堂終日凭欄干

崇寧甲申冬至前二日因捕盜題逍遙棲禪寺

朝奉郎通判軍府事唐邁

圭峯大寺繙經處雅俗今猶說草堂十頃筠篁環殿閣百年松檜老風霜臨溪洗鉢憐僧野卷旆搜山憶盜藏試取禪詮滌吾慮蕭然心地頓清涼

和劉君兪遊華嚴寺謁文禪師

寺在縣南石井村

李復

華嚴法界出諸天帝網重重絕世緣昔有高僧開寶刹今留飛閣聳瓊田身遊色相無窮境心悟虛空不住禪碧眼番人香一炷分來今欲對師燃

靈山勝致古今同下種開花一綫通峴首道安酬鑿齒江西馬祖對龐翁圓珠廻耀千淵黑滴乳微傾六斛空吾有宿緣香火念閒來相與論幡風



柳塘

長安西望少城隈，楊柳碧塘手自栽。  
渭水波光搖草樹，南山色入樓臺。  
平生事業書千卷，浮世功名酒一杯。  
我亦陸渾山下去，擬尋佳處鬪莓苔。

暑退病起沐罷倦，臥芸叟詩招爲草堂。  
寺紫閣之遊，酬以來韻。楊 奂

八月秋高肺病蘇，深居吾亦愛吾廬。  
晚風剌剌初衣袷，白髮蕭蕭不滿梳。  
困着藜牀眠北牖，遠飛蝶夢防清都。  
覺來聞有雲山興，親寫新詩欲啓予。

宿草堂二首

百頃逍遙苑，千年羅什家。  
荒林藏吾小，細逕逐溪斜。  
老檜今何主，瑞蓮春自華。  
山靈僧俗駕，朝暮白雲遮。

廢寺人蹤斷，幽溪野性便。  
魚鬚分浪細，虎跡印沙圓。  
馴雀偷僧飯，缺蚊破客眠。  
獻芹吾豈敢，直欲鬪山田。

紫陽閣

牙籤聲散絳帷風人在參乎一唯中名教會心真樂在區區休用歎雕蟲

和楊飛卿

吾宗久零落之子亦中年紫閣堪高臥玄經擬共傳前言非戲爾舊處想依然留着  
新詩筆教隨過海船

紫陽閣再咏

碧瓦朱甍動紫煙清風吹袂渺翩翩夢間憶得三生事悔落黃塵六十年

呈君美

上陽門外路日暮獨歸時齒髮已衰謝風塵仍別離斷雲橫紫閣急雨掠蒼陂地勝  
饒新句君將寄阿誰

望鄠

明康海

客謝艷橋道逶迤紫閣陰雲霞餘夕照花柳暗春林燈火城中出星河望裏沉不知  
王逸少何處賞偏深

漢陂宅逢歆湖

方作城南別重爲鄴杜逢豈期塵務裏今日見人龍邂逅非無意  
酖醕諒可從明朝予北去何處望仙蹤

陂頭

回首雙流細春疏萬木長遶溪蒲粉落夾路稻花香所向皆殊絕  
平看却渺茫幾時同鄴叟伐竹構茆堂

和杏村子遊草堂之作五首

王九思

春日來看雨後峯曉窗臥聽寺前鐘笑將紫閣頻凝眺誤作蛾眉翠歸空  
嘉客同遊此醉眠枕衾濕惹翠微煙曉來共覓仙人掌愛殺蒼崖瀑布懸  
泠泠鐘磬隔雲深烏鳥松杉入暮陰蒼徑共追蟾影步青鞵不覺露華侵  
卷將麗句袖中回默得南山馬上來臥展華牋閒把玩却於枕上看崔巍  
何物紅塵破悶幽可人惟有看山遊松篁滿院先投寺紫翠盤空一倚樓  
風外垂楊

來暮鳥門前流水泛春鷗胸中自看南山後小却人間百萬邱

南山詩

南山美康侯也維茲鄴學多歷年所日就頽壞官師失據士因廢業茂材俊異亦蹇於成侯用疚心作而新之以興禮樂施教化成人材裨治道焉

諸士樂而美之作是詩也

南山其崇豐水既東自昔蘊靈有周辟灘於皇明興作邑而墉維斯作邑以經以營以闢學宮以造我髦士以需帝庸維斯學宮其孰闢之師臣張子克勤於微既久既隳既否斯熙爰有徐令載興載作猗我髦士實繁孔碩 徐令徂矣歲月云邁無百斯年有築不壞有堂斯圯有草斯茂有令斯留不恫不慨瞻瞻昧昧告之曠曠是用因循以極于廢 嗟廢之極慘其戚矣虞堂斯傾師席離矣青青子衿止無室矣履跡息矣蒿萊殖矣行道嘖嘖爲我心惻 天啟斯文佑我鄴人康侯泣止懷保小民小民攸樂既豐既穫既康既廓其色沃若侯曰時我乃其有作 乃作講堂講堂翼翼乃作齋廡齋廡殖殖乃作肄舍肄舍戢戢乃作中門中門仡仡乃作繪壁爛其有色 學宮既成天降時雨我侯落之考鐘擊鼓有蒲斯蒨有鹿斯脯豈樂飲酒觀者

如堵猗我髦士載歌載舞 言言學宮既邃既新我侯涖止其從如雲於樂泮水言  
采其芹明明我侯淑慎其身其德不爽萬福來臻 言言學宮既新既邃我侯蒞止  
有鏘其佩於樂泮水言采其芟明明我侯克孝克義克友克類萬福攸暨 言言學  
宮我侯蒞止猗我髦士載瞻載喜載趨載止或問之經或質之史侯曰來爾爾究來  
歸洙泗之浚 侯曰來爾惟皇作士匪言用譽維才之需若構明堂爾棟爾榱若飭  
簠簋爾璠爾璫爾或匪璫亦徒只且 學宮既成侯心載寧會其政成入覲於京入  
覲於京天子是徵是翊是憑作耳目股肱士曰有誨言予小子是式是矜 豐水  
粼南山出雲我侯于邁其車鞞鞞其旆央央其御僉僉何以贈之點瑟回琴何日忘  
之山高水深 南山十三章十一句二  
章十二句下十一章十句

同康侯觀胡公泉歌

鄆西丈八村東側平地湧泉映空碧繞岸圓甃幾十圍澄波到底餘五尺石鑄暗瀉  
東北流旱亦不竭潦不溢東北萬頃樹秬稔歲資灌溉蒙膏澤泉頭廟貌祀胡公歲

集 卷之八  
久傾圯委岡脊康侯歎息語父老新廟亟成何煥赫侯來呼我共遊眺匆匆下馬日  
已夕刲羊醞醕妥靈畢下走覓泉憩苔石水面綠萍命掃拭雲影天光可指畫泉眼  
潸沸水見沙荇根淘泳鯁與鯽時維二月雨新霽花柳映帶春相拍汲泉煮茗試一  
啜頓覺清風生兩腋康侯興狂起欲舞笑歌聲激浪花白人言康侯文推世無匹只  
恐天子召之臺端簪白筆難戀此泉常挾客

雨中坐豐河小橋

明富平解元劉士龍

瑟瑟蘆花冷逼秋秋溪淺碧見沙洲冒寒攜酒堪乘興細雨偏宜一葉舟

草堂寺

一徑穿雲到草堂圃蕉坐語對空王蒼崖碧樹供詩料白腐青蔬換俗腸

高觀潭

飛泉千萬道併注峯前來空山瀑濺雨晴壑書喧雷塵慮應聲破奇情逐響開低回  
未忍去拂石臥蒼苔

漢陂西亭

進士韓期維

坐間竹色趁人來  
風戶雲窗四望開  
最愛多情天上雨  
久留客子到池臺  
千畝竹干碧落青  
池塘一見此君情  
倦來更醉陂頭酒  
不數猖狂阮步兵

三閣樓同諸友雨中秋望

柅林樓閣瞰平蕪  
杯酒登臨興不孤  
忽爾文星聚百里  
蕭然詞賦凌三都  
倚天戶牖雲來往  
滄雨峯巒色有無  
潦倒何妨人盡醉  
高秋欹枕即蓬壺

王氏縣城王九叙曾孫女幼聰慧與舅趙涵同學於外祖涵自爲弗及著有文集及煖泉八咏今僅錄四首於後

綠筠深處

閒庭曲徑遠芳叢  
無數幽篁掃碧空  
碎影篩銀千片月  
清音戛玉一林風  
儼依節士煙霞外  
恍睹神妃澤渚中  
最喜炎時堪布席  
涼生綠雪勝玄工

望舒先得

登臺喜見月如銀，洞口花枝夜未湮。  
拂榻坐邀花作主，飛觴笑倩月爲賓。  
月明亭榭花增豔，花映簾櫳月倍新。  
娥影四時無不可，獨幃秋字更無塵。

渭水秋濤

夜來風霜滿林臯，渭水連天浸野蒿。  
莊叟漫談濠上瀑，枚生莫賦廣陵濤。  
瞿塘象馬迷難辨，瓠子魚龍怒欲號。  
只爲耽奇忘坐久，詩情酒興倍增豪。

書臺別境

初誰築室傍清澗，仲蔚風流異世存。  
紫閣山人時命駕，汧東僊史共揚樽。  
當年此地誇龍臥，別業於今改鹿門。  
循吏勛名超往哲，里標道德望彌尊。

述懷

此豐川被徵不就所自書也。今其墨蹟尙存家中。

王心敬

月炯天光白，霜深夜氣嚴。  
兒童猶誦讀，爐火半紅燂。  
心與身雙寂，迂同病兩兼。  
山林吾分定，承詔擬龍潛。

登鄠邑大觀樓

李雪木



渺渺終南此共齊層樓天半鎖丹梯捲簾眼底乾坤小開牖空中日月低玉雁毛髡  
山鳥怨金龍甲落野猿啼憑欄忽墮幽人泪却爲王孫麥飯悽

天外曾聞彩鳳吟長空雲盡見遙岑九峻黛色老松桂三殿寒煙變古今

割耳庄竹林

誰家萬個玉成羣似向箕箒聘此君杖化葛陂龍甲動管裁嶰谷鳳聲聞漢宮有雪  
竿挑月秦苑無春節拂雲鹿裘吹簫人已去空傳一卷遺民文

鄆縣尋程明道先生主簿舊所書懷

賀復齋

孔孟道失傳有宋占星聚濂溪既開先伊洛屹砥柱明道鄰生知絕緒紹千古時年  
廿二三官秦爲鄆簿藏錢無証佐一問乃立剖欲斷石佛頭佛光遂不睹始爲令所  
輕神明誰敢侮獨此關學脉橫渠赤幟樹內外未能一定性答觀縷大公與順應敬  
義爲之主卓哉一篇書微言闡鄒魯豐水尙東注終南高莫伍斯文光燭天聖學開  
茲土所以朱晦翁欽佩深有取竭來此游歷官署今講武爲駐防營植槐不可見吾道

傷榛蕪愧我四旬餘無聞安足數遺書空誦讀歲月究何補誓將奮吾志終身奉繩  
矩自私用智習除之力宜努關洛本一轍期以振三輔

鄴縣尋明道先生主簿故宅有感

楊損齋

宋文四大篇其一答定性人心戒將迎天理貫動靜無欲則凝然行義乃中正金革  
百萬中不操自有柄自私非廓然用智豈順應二者日憧憧斯爲性之病橫渠豈不  
精內外欠合并恐是佛學餘措磨未瑩淨先生受太極脫然欲學聖咄咄弱冠年所  
見卓已定偶答一篇書遂與六經並此書在何許鄴縣簿佐令譬如萬斛泉隨地即  
瀉迸西峯亦醇儒胡不登邑乘鄴志西峯修未載此書我來久低回高山景仰行不見雙槐  
植僅有殘碑剩花柳暗前川搖落感秋興沈吟十二詩如聞舞雩咏學道愧五十尚  
爲怒所勝既憂見未明復磋力不競斯人不可作斯性即可証勉勉好學篇窮經與  
居敬

王季陵

賀復齋

自古開王業厥惟姬周盛太王初肇基王季乃篤慶因心友其兄德音自清靜所以  
太伯智獨能知其行三讓固至德季實感以性後世紛紛論無乃爲季病至人本公  
心豈曰覲天命我來拜陵下肅然爲起敬仰思豐鎬治偉哉聖傳聖

前題

楊損齋

鄂西四里餘王陵有陵樹拜謁眺平岡忽憶孟子註畢郢近豐鎬竟失文武墓遙遙  
咸陽原恐是秦家誤好事偶傳疑歷代遂襲故祀典或可更說本亭林顧目擊理斯  
存吾將學考據

鄂縣城南

賀復齋

明道當年簿鄂時天然風景天然詩傍花隨柳知何處欲起先生一問之

澇店道中

楊損齋

水繞村庄菜繞田寒鴉飛出曉林煙渭川風景天然好不爲兵戈滅舊妍

漢陂

賀復齋

鄂杜城西古漢陂徵歌載酒泛舟詩世事滄桑經幾變新篁空翠杜公祠

前題

楊損齋

子美祠前空翠堂亂後溪竹未荒涼昆明曲水俱塵土誰問唐皇並漢皇

草堂有感

賀復齋

草堂山寺太平東勝跡燒殘劫火紅惟有圭峯青不改晴巒千古插天空道體

稻塍麥隴望平蕪豐鎬西周此故都為憶緝熙心法在漢唐而後繼來無聖學

古今俯仰歷千秋唐宋題詩壁上留拂讀偏無明道句明道遊鄂寥寥正學有誰

求崇正

西來羅什此傳經殿圯臺荒一塔亭寂滅 僧脫生死徒留誕妄誤人聽黜邪

前題

楊損齋

草堂古名寺瀟灑萬峯前山映古皇閣石題唐宋年名僧皆化土有鳩摩羅什及圭峯塔翠竹

不知禪多少經遊者獨欽明道賢

遊太平峪訪明道先生遺跡

賀復齋

明道遺蹤此地傳，太平峪口萬花前。  
奔流波浪爭趨海，矗立巉巖欲倚天。  
霽月初更東嶺出，危橋百丈半空懸。  
祇嫌未到深山裏，雲際峯頭枕石眠。

太平峪觀瀑

楊損齋

清泉作怒走雷風，疑有潛龍臥雪中。  
坐久令人心浩浩，夜來月出海天空。

釣臺

賀復齋

桃花春水錦鱗肥，坐對南山釣未歸。  
豈有飛熊曾入兆，一竿風月老漁磯。

高冠峪龍潭用明道先生韻

千巖晴靄曉光紅，來看龍潭第一峯。  
崖噴怒濤飛冷雨，壑懸怪石吼陰風。  
驚疑天地幹旋日，指顧雲雷變化中。  
便是出山潤枯槁，淵泉深溥不論功。

高冠潭

楊損齋

破空神鬼闢奇觀，鐵壁陰森雪浪寒。  
到此何嘗有凝滯，更看東海現毫端。

豐川祠

陽明二曲是傳心制行高風世所欽老去山中經濟在下賢猶有鄂西林

攜酒飲瀑湍上

賀復齋

川原多少望霖人雷吼風狂信有神爲酌龍君一杯酒遍施甘霖澤三秦

遊靈臺作

秋晚南山陰曉行傍豐水訪舊來周京靈臺尋故址西風黍離悲偕遊適憩此徘徊  
咏雅什遐情生遙企庶民歌子來父母真孔邇囿沼環其側魚鳥亦欣喜世德仰作  
人鼓鐘懷前軌每慚百代下不爲辟癘士惜哉周道衰蒿目滿瘡痍凍餒復焉往草  
堂獨棲止內有草屋  
難民止宿聖學久無傳棧樸誰興起豈知敬止功關雎應麟趾民風兼儒  
術登高竊內耻猗歟太和休心渴何能已

輓多忠武祠

邑太史崔志道

煙雲萬隊繞秦庭掃盡檣槍馬未停食肉早推超奮勇不侯終惜廣飄零天開日月

銷兵氣斗大光芒落將星塞北軍書猶告急安危誰復濟生靈

晴窗咏四首

晴窗曉日上三竿坐擁重衾未覺寒野服不鏘蒼玉佩沉疴欲屑紫金丹何妨世俗呼牛馬豈有荆榛集鳳鸞介性從來恥爭席秋風蒲柳况衰殘

寵辱無驚有老聃留侯進履亦情甘先施常覺未能一內省深慚自反三畦皆較量誠不必愚頑唾罵究何堪許多聾瞶憑提醒爭忍冥心學海涵

黃農虞夏杳難追巢許夷齊誰肯爲爭食滿階忙鳥雀招賢何日夢熊羆一作鄴尼

山但作高山仰鄒國徒憂利國危濁酒一尊吾事畢伯倫自有錘相隨

醉死即佳奚用埋癡情仍未外形骸一身無處不秦越萬古何時非葛懷願與陶廬通菊徑欲從謝客借芒鞋二三釣叟如相訪白露蒼葭淺水涯

謁夏直臣關龍逢墓

在函谷關側

邑舉人趙繼聲

豔妻煽處夏祚傾社稷爲重命即輕逆鱗一批王赫怒驀地碧血流縱橫碧血精光

射牛斗忠骨委埋函關口耿耿丹心諒者誰惟許比干結死友我見豐碑便戾止口  
誦心維手爲指凜凜生氣今尙存吁嗟如公直不死

漢王拜將臺

在漢中南城外

項劉勢未分黔首仍塗炭蹶起跨下雄筆楚佐炎漢拜將甫登壇一軍盡驚歎將兵  
負異材背水握奇算威畧陋英彭勳名卑絳灌大功旣告成人誰甘爲叛烏盡弓斯  
藏臣罪憑鍛鍊不用蒯通言心迹已足辨惟挾震主功未退乃遺憾荒臺冷夕陽傍  
徨不忍看

靈寶縣俗於端午前以硃砂畫鍾馗名曰靈判癸卯赴禮部試罷歸行經靈寶  
感而賦此

君住終南中我居終南北本是同鄉人又皆下第客君死人爭畫我生誰物色榮辱  
相去間何可道里測吁嗟乎糠粃簸揚君不羨沙磔淘汰應我責

文



唐徐元弼靈囿賦

代間秦餘地仍周舊俯皇圖之近域有文王之古囿遙縈林麓之表遠抱川原之秀沼莫辨於窮流臺靡遺於層構往往歸鳥依依顧獸逢時之慶雖鍾思古之懷亦疚當昔周德資始靈臺是新繚以斯囿洽其至仁使芻牧畢入而獮狝皆馴目以靈知感通於異類大其囿見惠洽于蒸人固以垂耿光本亭育無私公共而有俟勿亟子來而以築不甞不卯仁叶于羽毛以薪以蒸惠昭於郊牧覆露功博誠明感深遂天性於物性即人心於己心白鳥不驚非觀於狎物非熊已兆奚事於從禽嗟乎遺址全平餘風可挹想千古之縱未昧歎三代之英不及猶欲恣窺臨淹佇立微芒似隔乎煙水邈迤半臨于井邑見魚躍想坎窞於衆流聞鹿鳴訪陂池于原隰竟以陰壑蕭條荒榛寂寥無人試問有路通樵悵望風煙之景沉吟黍稷之苗今國家以榮古爲心宗周是繼且欲儲休祉降嘉惠園苑資靈囿之規宮室擬靈台之制是以愛物之誠傳好生之德均仁政潛施于上苑之內靈德已播于率土之濱然簡闕遊于暇

日縱芻詞于賤臣稽制度于聖王百里猶小湖風流于前古千載爲鄰

姬宗世譜序

宋嘉祐四年歲次辛丑二月之吉鄆縣主簿程顥撰

孔子之道學於文武而文武之德實惟周公成之余自束髮受書心向周孔嘗東至闕里西至成周拜謁聖人故里親見其車服禮器以遂瞻仰之誠顧勢睽地隔而其願未償也嘉祐庚子之冬調主鄆縣簿竊念鄆爲豐京舊都周公退老告終之地意先聖遺蹟猶有存焉者乎蒞任亟爲採訪於古陵得拜王季於西郊於豐水之旁見豐宮辟雍遺址於東郊獲遇靈台靈囿靈沼舊基先聖遺蹟昭然在目恍然如見聖人於几筵也而畢郢祀典尤屬鄆邑分辦遂北至咸陽拜文武成康周公魯公陵寢聖君哲相洋洋如在仰止夙願已屬克遂而致祭之時見有衣冠來謁陪祀行禮者則姬公諱輔也詢其歷履乃元聖周公六十二代溫文儒雅洵有聖人遺風遂與訂交時相友善余益自喜幼讀聖人書今官聖人地獲瞻聖人陵復得聖人子孫而晤對一堂真屬快事天若體余私淑之衷而默爲之作合者訂交聖門信非偶然也

姬公出其家乘問序於余余閱其世系乃元聖仲子之裔世德衍慶雖微顯各異而其忠厚傳家世世象賢不愧家聲則一也我朝崇文重道超越前代酬功報德之典必有特加于聖門者矣余拭目望之因爲序以弁其譜

明劉士龍白沙泉遊記

泉莫勝於終南而鄠爲最泉莫勝于鄠而西南鄉爲最泉莫勝于鄠之西南鄉而白沙泉爲最蓋泉亦難言矣貌不難於澄而味難於甘神不難於寂而韻難於恬惟白沙泉則具有之色如銀而加湛味如飴而加冽其奮而上湧者如湯沸如波騰其翻而漚汎者如珠噴如璣躍溢而爲流其清激而雋快者如哀玉出聲霜鐘遞響滋而爲草其葱鬱而浮動者如鏡窺綠鬢風牽翠帶每風辰月夕晴日霜朝或孤往或偕遊流連忘歸率以爲常即人事紛錯書債糾纏未有不極力擺撥而偷閑一至者也聲色味俱佳耳目口皆適而深領之則肺腸都濯魂夢亦清我輩受益於泉者多矣因與克甫商所以酬泉者爲泉加護惜焉白璧砌而青玉闌毋爲頑石所辱也癸瓢

汲而定甃貯毋爲穢器所藝也戰茗取足于靈液漱灌不得輕試也標格欲稱其清  
容塵俗不得少著也又爲泉加點綴焉芝蘭叢種松竹環列而惡草不容託常木不  
容蔭也白鷗睡其旁朱魚戲其中而俗禽不容浴凡鱗不許泳也架築無貴於華整  
蓋頭一把取足庇風雨而已招呼無及于猥雜識韻一人取足供笑語而已泉主我  
賓我歌泉答而泉之常清者不受溷常靜者不及喧也泉受益於我輩者亦不少矣  
是泉於我輩相遇交相益而相酌也亦千百世一段佳語也

豐京姬支世系譜序

我周自后稷發祥以來賢聖相繼一十六世及我元聖承接道統功德昭著如日月  
經天江河行地以故長發其祥子孫蕃衍蓋本實者支自茂源遠者流自長也秦雖  
無道陵鑠前代而昭襄兩世猶念周德憚狐陽人之聚特予奉我周公之祀豈暴秦  
之獨仁亦我祖聖德之所感也顧當日以元公俾就侯封而次子留周侍我聖祖暨  
聖祖沒而世襲公爵爲王卿士于是東周西周代衍公嗣

沛然

忝東派七十三世之

裔守祀太廟每當春秋薦獻之際顧瞻族屬僅寥寥百人輒思東周西周故地代襲公爵必有公姓公族繁衍昌熾惜世遠地隔未能遠歷周秦之墟徧爲訪求鱗次譜牒骨肉天涯徒結遙情已耳迨甲子冬恭遇皇上東巡闕里具疏奏請特授世爵主鬯太廟遂於丙寅春入都奏請致祭祖陵奉旨給限前來及至鄴縣祭王季祖陵寓公署因思鄴爲成周豐京乃元聖祖退老告終之地豈無公族世居者乎訪之邑侯以姬姓諱籙者對遂爲先容見之其人儻豪邁洵聖詒克肖子也出其家譜印証乃七十四代孫余不禁輾然色喜以爲主廟祭者有予奉陵祀者有子歲脩時薦拜掃先陵責在子矣遂委奉王季陵祀事並陪祀畢郢諸陵嗚呼兩地一家旣分獲合夙心亦慰關情亦切瀕將東返乃執籙手而懇欵屬曰慎哉慎哉吾宗於今陵替衰微不可言矣然尊尊親親祖訓固昭昭在尙其恪守弗替以無忝家聲若置身聞達大振箕裘是又在教子揚名以顯祖德矣尙其勉之時康熙二十五年歲次丙寅嘉平月之吉元聖七十三代孫奉旨特授世襲翰林院五經博士主鬯東野沛然撰

壽言

賢哉鄴邑王母李夫人之教子世之鬚眉丈夫號稱善教者所弗若也世之善教者不過教以舉業期以科第以圖富貴利達已耳乃夫人之教其子王生心敬也則異是蓋自心敬能食能言即教之以正一言一動弗納於邪務令內謹心術外謹行履心敬凜遵母教從幼不羣年未弱冠遊庠食餼文名藉甚邑人嘖嘖稱羨咸稱夫人爲有子莫不起敬起仰期以巍科夫人謂人生要當以聖賢爲期科第固所以進身德業尤所本以立身苟德業不足即幸而擢巍科躋臚仕非所願也於是過聽虛聲誤以爲予於聖賢之道似粗有所聞遣心敬遠離膝下俾從予學其內外親眷及邑之素愛心敬者恐於舉業有妨交諷互阻譬引百端夫人則持意彌堅終不爲移脫簪珥以資繼晷心敬每歸覲省即促之旋館戒曰德業不成學弗底於聖賢吾恥見汝汝亦何顏見汝之妻孥及邑之故舊耶念之念之毋忝爾所生詔導諄至悉出世俗恆情之外既而以從事場屋終分精力遂命棄諸生俾一意斯道昔范孟博母幸

其子與李杜齊名不計其他蘇長公方十歲即願爲滂其太夫人即願爲滂母彼沾沾一節論者皆稱爲千載豔聞况夫人以宇宙完人望其子尤爲空谷足音絕無而僅有行且與孟母媿芳滂母云乎哉余竊以爲異而鄒之諸正人因爲余備述夫人平居事親之孝治家之嚴淑德貞操爲一方儀表余益竦然神肅歎未曾有乃心敬功密存省知行並進殷殷以不負母教不孤母望是勉可謂有是母乃有是子矣故予喜而記之甲子春仲二十五爲夫人設悅之辰爾緝告歸稱觴慶壽余生平未嘗爲文祝人茲嘉夫人之賢特破例題此以先爵者 二曲李顯題

按此文係二曲先生親筆現存豐川後裔王笠亭家

答王心敬

二曲先生

昨所論一一皆是足徵聰明諺云學道須要英靈子又云智過於師乃堪傳授汝聰明過人吾安得不喜竭生平所蘊而傳授之舍汝其誰耶顧聰明須要善用用之自反自視洞識眞我方是眞聰明若明于識人而暗於識己卜度成性明覺安在李延

平云二蘇聰明過人天地間道理不過只是如此有時見到皆渠聰明之發也語雖無病然縱語語皆是千是萬是終是舍己之田而耘人之田終靠不得一毫無病亦是病今而後須黜汝之聰墮汝之明昏昏冥冥自覷自覓務求終身靠得著者而深造之識得王心敬纔算王心敬一識永識一得永得超凡入聖其在茲乎一念萬年其在茲乎

又

學須剝皮見骨剝骨見髓洞本澈源真透性靈脫灑灑作世間快活大自在人方一了百了若不窺性靈自成自證徒摹倣成迹依樣畫葫蘆飾聖賢皮膚爲名教優孟後世有述焉吾弗爲之矣

豐川墨蹟格言

天地生人原賦以至善無惡之性人生于世只還得天命之本來令完全無虧便自浩然于天地之間窮通得喪匪所論也



易曰家人有嚴君父母之謂也故治家者必以治國之道治之庶賞罰是非井井不紊而上下之間恩明義美無意外乖忤之釁凡居家必須量置祭器藏之深處爲四時薦獻之具祖考有遺下手澤書籍切莫輕易狼藉損失視爲等閑無益之物有識者看人家興衰每於此等處卜之也

爲人子者須時時有顯親揚名立身行道之意

古云思貽父母令名必果思貽父母羞辱必不果此是人子終身莫解之大義死而後已者

我爲孝子則我子必孝此視傲之定理亦天道之好還這件公案爲人子者正須知之

同胞兄弟是曰天顯其人賢智固爲我切近師友即中材下愚亦我同氣連枝當倍加軫憐况父母鞠子之哀此意亦須深念豈可不兄友弟恭義厚恩深每見世俗厚妻子而薄兄弟甚者親他人而忘骨肉聞其人多後福不長其家每門庭日衰以其

傷父母之心即此傷天地之和天理不佑故也凡我子孫寧死不願爲之也

與鄉黨須相親睦至於吉凶大節尤以往來報稱爲要

家道離多起於婦人兄弟不和多由於婦人然皆是男子無識見無主張故婦人得作崇耳若男子見理分明中心有主遇婦人言善則聽稍涉乘戾即正色拒之何至有牝雞鳴晨之禍骨肉間離之釁

教子弟第一戒其虛浮禁其奢侈蓋虛浮不戒習以成性將來必至喪却人品壞忠厚家風奢侈不禁沿爲故然將來必至蕩業敗產困頓流離飲食不欲奢衣服無求美器具但取堅房屋但取固田產無太多亦止期於足用而已不特物忌太盈天地之福當爲愛惜亦恐子孫視爲固然志驕氣盈益求華美不知撙節愛惜則傾覆由之也

使僕婢須知其饑寒勞逸疾痛嗜欲所在所欲與聚所惡勿施蓋這事正君子養育仁心之道

王氏族譜八修序

咸豐九年舉人王夢燕撰

粵自髡王錫胤聯肩袂於神僊老將知兵播勳名於父子太原與瑯琊並望瑤環與  
瑜珥同光由漢晉以至六朝歷隋唐以迄兩宋王氏之族列史表之矣代遠年湮敢  
矜華胄之遙遙顧何得以數典而忘其祖太史公已言先世爲太康人夫太康者太  
原之裔也文獻雖亡傳聞匪謬流風餘韻之來推本窮源而上有志者穆然思焉然  
而欒郤降爲皂隸魏武亦爲青門至聖之經書曾遭煨燼前王之版牒半就消磨平  
陂往復物換星移竊恐吾宗之譜即有金櫃石室詎免蠹食塵封耶幸而世澤延洪  
子孫似續遠惟勝國壬辰之夏近接皇朝辛卯之冬閱四百祀遞六七脩又將三十  
年矣雲初之子姓初生者必記其名耄耄之衣冠既死者宜宣其德豈踵事而增華  
用繼作而爲述監於成憲率由舊章明以著承先之派嚴以行非種之鋤深之爲微  
顯闡幽之計大之爲敬宗收族之謀其所關係侯其偉而於戲仲叔季弟白叟黃童  
迪惟前人光無貽鞠子羞穆穆翼翼繼繼繩繩縱弗克泰山北斗學海經神文章報

國理學名家但能養廉恥於山林畎畝之中重脩能於術序黨庠之內詠常棣不詠角弓歌螽斯且歌行葦庶幾高曾啟佑丕茁靈芽芬烈鋪揚欽承令緒則善也若猶侈譚先世弗嗣其音昔之創斯譜也其謂之何今之續斯譜也又謂之何

請分別懲辦內務府太監以昭炯戒疏

崔志道

奏爲恭應詔命敬陳管見仰祈聖鑒事竊臣恭讀諭旨飭令中外臣工各抒所見仰見聖訓煌煌詳明剴切臣以是感激涕零敢披瀝肝膽一效涓埃伏維經邦要道不外用人行政兩大端而人存政舉則用人尤爲急務夫進賢退不肖所在皆然而密邇宮禁則有內務府其尤近者莫如太監內務府各員固不乏廉潔之選而貪污者亦廁其間往者園工經始之時必有諛佞之徒希圖漁利巧爲之辭以成其事者設也朝廷偶不加察使此輩始終得售其欺將國家受浮費之名宵小快中飽之計其流弊且有不可言者賴大行皇帝宸斷獨施決然中止至皇太后垂簾之初并三海工程立即徹銷天下同聲頌禱以爲茅茨土階之風復見於今日也夫工役當罷則

勸興工役者自當一并擯斥治以應得之罪庶幾懲貪人於既往即以警效尤於將來也太監即古之僕從日近宮闈實侍起居伏見大行皇帝聖躬本健屬以微疾遽爾升遐雖曰天命而失於奉侍之罪在太監必有任受之者請分別懲辦以昭炯戒則國法行而公憤洩矣方今皇上冲齡踐祚聖功以蒙養爲基而承弼先在近習就中老成端重者可使常侍左右反是者屏勿近此曹供奔走給洒掃大抵才能不如平庸慧黠不如遲鈍也允若茲太監皆正人而逸欲之漸不開內務府皆正人而奢靡之端不啟小人道消君子道長由是親賢任能亮功熙績薄海臣庶方將翹首跂足以觀新政之成也臣愚昧之見是否有當伏乞皇太后皇上聖鑒謹奏同治十三年十二月

請接濟陝省賑務以持危局疏

前人

奏爲陝西賑務需欸尙多請勉籌接濟以持危局仰祈聖鑒事竊維秦境慘遭奇荒朝廷軫念災黎於庫儲支絀之時發帑賑濟復屢蒙恩旨緩徵錢糧兼之疆臣借款

購運南糧並勸捐助賑全活固已不少奈災區甚廣籌項無多是以輾轉溝壑者仍不可以數計頃聞被災尤重各州縣民人飢死過半存者亦皆流亡有三四十家村落僅餘一二人者有竟無一人者前此猶以死人爲食近則食及生人甚者父母殺子食之去年渭水以北宿麥全未播種渭以南如西安之盩鄠咸長藍田同州之華州華陰及南山興漢商各屬雖間有種者然合全省農田計之十分止得一二况種後雨澤未霑麥苗多未出土然則萬目睽睽所望者惟秋成耳縱此後立沛甘霖恐牛種正不易辦即得牛種矣而秋稼登場已在七八月後自今至七八月來日不爲不多矣賑費不可不籌矣陝西賑款除帑銀外以本地捐輸爲大宗兵燹後富民多貧就中力尙可捐之家有捐糧者有捐銀者有一捐者有再捐者力盡筋疲勢難爲繼至四川山東等省協捐更屬無幾而數百萬垂斃飢民待哺情形日急一日若不早爲之所凶歲多暴禍患將不可言爲天下策治安不得不爲陝賑謀接濟伏思西師已報紅旗善後事宜固需經費未知現在兵費有無可裁如有可以酌裁之處擬

請旨飭下陝甘督臣左宗棠極力騰挪撥濟陝省賑災急需該督臣公忠表著見義  
勇爲去年陝民入甘就食曾經倡捐辦賑今日之事必能力顧大局也臣恭閱邸抄  
仰見皇太后皇上宵旰焦勞凡祈雨求言責躬減膳無非爲救災計也臣於桑梓荒  
政既有所見若復緘默避嫌何以答聖恩何以問清夜敬攄愚悃恭摺具陳伏祈皇  
太后皇上聖鑒謹奏光緒四年三月初四日

試資記

前人

聞之某觀察曰吾昔赴鄉試試三場往返四百里資五百錢游子代方伯則曰是裕  
如也吾鄉試三場往返六百里資四百文歸猶市龍眼三四十枚奉吾母是將爲長  
房之縮地歟留侯之避穀歟蚘之食壤而蟬之吸風歟不然必夷齊考生而後可不  
夷齊廢然返矣夫士不盡貧也即赴試不盡乏資也然實有平居伏案飢來輒驅之  
去東走西望營升斗之粟不可得尙望希紅綾餅餠乎吾鄉距鄉闈遠者三舍許近  
者不兩舍四十年前應鄉試者恆百數十人今則五六十人多亦無逾七十何寥寥

也蓋鄴本瘠區同治初屢經兵燹自縣治外四鄉殘破無餘甚而波及荒谷觸處皆爲瓦礫場舉目但見髑髏台比來垂四十年瘡痍未復首山之呼樂歲且然况在荒歉農商且然况在庠序恆產蕩然硯田惡矣牀頭之金告盡囊底之錢一空貧者士之常也自當安之若素所難爲情者蠹沒三年亦欲一觀秋賦而徘徊窘鄉何處是長安去路兼葭一水咫尺天涯翹首棘籬如海上三山可望而不可即矣邑侯吳公盡焉傷之恨不揮長策代王尊叱馭乃召縣紳數十輩飲之酒議集腋於縣鄉畧放辦裝故事並慨分鶴俸作爲先牛諸紳覩義斯居分募所知散利無待於大司徒勸分更殷於臧文仲縣紳士民見賢父母之首倡也相率解馬指困樂爲衆槩之舉不數月集錢數千緡發商權息分贈每科七十人人三緡仍有奇羨積之可推贈會試小場資斧格則募勒碑陰是舉也與不傷惠取不傷廉下以利寒峻之過行上以光賓興之盛典行一物而雙美具不其宜乎且夫士雖奇窮必嚴取予利也雖一介不爲少義也雖萬鍾不爲多吾鄴士尙風節飢不可得而食寒不可得而衣所在多有



即如嘉道之間有二士焉一爲諸生張比亭玉德一爲布衣王載叔建燾皆以書法擅重名求書者門闕爲穴非其人隻字不輕假張嘗作尺許大字一爲窶友攜去質典閣得五十金後自釀金授友贖取王爲某書錦屏未訖某許厚酬遂閣筆任敦懇決不復焉兩先生事多離俗即此二事以視韓昌黎不嫌諛墓唐子畏居然利市其狷介之操奚翅由旬過哉茲之嘉惠儒林清白吏之廉泉而義士人仁之分潤也亦猶設義塾建考棚置試館送卷資諸如書院之膏火長吏之獎賞上舍之旣稟舉人之旗扁進士之表裏此物此志也藉使兩先生在吾知坦然受之無疑也抑予更有以窺侯之深者下車伊始粗挈大綱即懇懇以培植學校爲先務舉昔之向隅者拔出泥滓扶上雲霄助風力而鼓其奮圖南之翼其非撥巍科躋廡仕之謂其謂階一第以行其所學爲詩書吐氣爲生靈造福爲宵旰分憂冀國家收數百年養士之報也今日時局艱危需才亦孔亟矣士果遭際非常斧柯在握於以決大疑捍大患措天下於磐石之安鳳麟榜中固當首屈一指即不爲鍾而爲鈴一官一邑小試牛刀

洗市人擲揄之羞謝處士虛聲之誚文學雅望何非政事通才此則侯所深幸大願而以滋溉試筆爲嚆矢也侯之志遠乎遠矣邑人士可以瞿然興矣若夫質劑結信明若丹青尤望後之君子行古轍焉侯名復元順天舉人

祭明道先生文

山東孫迺琨撰

維

民國二十一年歲次壬申夏曆四月丁卯朔越六日壬申主祭者後學鄆縣縣長趙葆真山東淄川孫迺琨涇陽柏堃本邑吳繼祖南恆治等謹以清酒庶饘致祭于明道程先生之神前曰猗歟先生有宋大賢廟宇一新氣象蔚然寰海板蕩聖學滅裂斯文正脈終不能絕仰維先生姿稟英奇立志卓犖師事濂溪粹如精金溫如良玉渾然天成優入聖域主敬窮理精義入神盡孝盡弟克完天倫年甫弱冠主簿鄆邑定性一書學已造極佛老管商廓清摧掃繼往開來厥功不小造詣近聖德並顏淵洞見道體擔荷薪傳傍花隨柳翛然自得道通天地人孰能測先生契友橫渠折

節勇撤臯比昭茲來葉先生胞弟厥維伊川棣華同輝今古實難蒿目宇內徧地妖氛揆厥禍本縱欲滅倫自古聖賢扶植綱常綱常漸滅劫罹滄桑獨我關中猶崇先哲講學明倫賴諸俊傑祠宇興復在天之靈焚香禱祝共慶落成謹以  
橫渠張子

配祀尙 饗

伊川程子

鄠縣舊志序 三首

漢陂先生既爲鄠志時南臯公

王堯封字伯圻號南臯定興人宏治乙丑進士

在陝西撫堂聞之取其稿付知

西安南埠李侯

名文昇北直寧山衛人

刻之以傳謂志者記也記其地之沿革風俗異宜與政

教文獻之大畧爾顧世多昧焉弗知猥繁冗雜漫不足視刻是志所以啓後之作者使知方也而民之疾苦役之繁簡政之得失官師之淑慝咸於是乎具之又所以昭鑒戒慎從違其訓遠矣李侯承命唯謹遂付之梓人刻將成漢陂公

起云漢陂先生此句公字可省下同

以書抵予謂予當序諸首予惟鄴古豐鎬之地周之王京其故蹟遺墟雖父老弗知也况其文獻乎予每以語漢陂公冀亟爲之乃南臯公有此佳舉豈非斯地之一幸乎遂序其歲月於首以示鄴之後賢君子知所自云嘉靖十二年癸丑正月念又一日甲子澣西山人康海序

其二

鄴劉侯有事中南過余偏園則謂余曰余將爲鄴志余曰獨不有王太史九思之書乎公曰志言之屬也使言者言不若使身者言也王太史言者也而不佞則身者也且志以志其時與事也王太史不能逆夫今也故不佞欲增於太史者也余曰然則又獨不有王令尹九皋之書乎公曰志又史之屬也史以記事貴詳史以爲文貴簡王令尹之爲志是欲詳於王太史而失之冗者也故不佞又欲損於令尹者也余聞而稱善久之公之志成則發使以示余余受而讀之而嘆焉夫鄴之爲邑其地則周豐鎬漢上林其事則毛詩司馬遷班固類能言之而其義則在公之志乎粵自

建國分郡以來建置無常百千餘年治民事神故典以具作建置志第一

建置不當在地理之前

沿革明矣旅山中南亦曰敦物導澧及澇以入於渭原隰藪澤民實利之唯是彈丸之地居中而治作地理志第二巖易見矣自文王遷王季於南山江漢汝墳實化斯

邦焉漢之林苑因秦賁陽

賁音倍竹書紀年帝孔甲畋於賁山漢宣帝甘露二年行幸賁陽宮賁又音附

隋宮唐囿禾黍離

離作古蹟考第三湮鬱表矣在書神禹之分九州雍賦中下鄠以抽繭析及米鹽兼之地震山崩當事貴人用魏營之術久假不歸民力告竭長民者憂之作田賦志第四苦窳覩矣設官分職異於建侯事居送往莫不傳舍視之加意於民瘼者亦有留召父之棠而永峴山之石作官師表第五廉貪昭矣鄉舉里選明經射策之制興而士挾其才以取世資十室之邑賢仁代庀作選舉志第六民譽著矣其間有不世出之士砥德修名川流岳峙垂於無窮雖遷客與婦人不乏特立作人物志第七卓行彰矣曹子桓之言曰文章經國大業不朽盛事旨哉其言實啓作者序記詩歌厥體雖異要之或指陳政事或托興山川皆足以備太史之採而歸吏治之偏者也作文

苑考第八第九述作成矣道派既分乃有九流釋氏西來羽流競起渡杯乘鶴於焉  
僑迹而顯異作異教考第十論議存矣至於滄海爲田不勝遷徙故其地古或然而  
今不然物怪人妖疑信相參吾猶及史之闕文也而於此有存而弗刪作雞肋集第  
十一緒言周矣凡爲卷十一爲目四十有四大要增於王太史者十之五而損於王  
令尹者十之六作者之事則纏纏然而其文則彬彬然是所謂身之者之言而非但  
言之之言也夫劉侯之立言也如其治治必殫其心力之所及而言必徵必信後之  
身是邑者其取而覽之於以致治蔑以加矣是爲序萬歷戊午秋九月望日中南敦  
物山人趙嶠子函父撰

其三

嘗聞阮亭王氏言近世郡縣志無愈秦者以其文簡事覈猶有黃圖決錄之遺而於  
康對山武功志外即推王漢陂鄠志洵鉅識也余自乾隆甲午攝鄠篆即訪漢陂志  
原本意欲重刻以公同好不可得次年聘武功太史孫酉峯先生主明道書院講席

先生至鄴亦即以漢陂舊志爲問余復懸重價購之終不可得今所存鄴志不知其於漢陂原志若何增刪無從讐校第以對山武功志律之所謂文簡事覈者安在且如對山鄴志序云云者安在也况錯訛假僞比比乎蓋自漢陂創志後續修者毀其原刻屢續而屢失其法則鄴志之宜作而不可再續審矣西峯先生深於志法者其所評對山武功志及所撰鄆陽志皆爲潛心斯道者共賞若欲彙集古今爲鄴新志以章聖朝文獻并考據文獻之在明以前者使漢陂之書已失如未之失舍先生其誰歟余以是請於先生者再四先生不得已遂任其事然先生年踰古稀講學之餘精力少減不欲率爾也自丙申春二月操觚至冬十有一月下浣始脫志稿而先生尙自謂不愜於心辭講席仍挾志稿歸今春家居重經筆削乃漸次寄來且囑余請正於撫憲秋帆畢大中丞而後授之梓人志凡八篇其文簡以馴其事覈以括其法之有倫如一篇焉觀自序亦思過半顧其義例又各詳見諸篇中非徹始終觀之恐未易知其精蘊茲特畧序作志之由以俟知者知之並俟他日漢陂原志出時一比

觀焉則古之作者與今之作者其相及否俱可知矣予不敢爲阿好之言也乾隆四十二年夏五月旣望知西安府鄠縣江甯汪以誠樸存書

武功孫景烈孟揚鄠縣志自序

序曰志法首地理次建置古今作者大較然矣地之山川形勝天作也而疆域古蹟亦茲地已具者述地理第一城郭學校官廨神祠均地理中建置事述建置第二諸建置爲民也民以田爲生有田則有賦故田賦編次第三教養斯民者官師也故官師編次第四官師能移風易俗故第五曰風俗風俗成而人物興故第六曰人物人物多以選舉顯故編次選舉第七懼其疏也以雜記終焉凡八篇而斯邑之志其殆庶幾足徵矣乎

鄠縣縣志卷之八終



# 重修鄠縣志卷之九

## 古蹟第二十四

鄠爲豐鎬舊都秦漢迄唐又爲近畿其間故宮苑囿與夫名流舊居別業山水勝槩足資游觀者所在多有亦博雅君子所宜知也分志于下

夏有扈氏國 孔安國曰甘有鄠郊春秋左氏傳夏有扈豐杜預曰始平鄠縣有扈鄉東漢志鄠縣有扈父亭書甘誓蔡傳甘地名有扈氏國之南郊也在扶風鄠縣又曰有扈夏同姓之國史記曰啟立有扈氏不服遂滅之

商崇國 史記崇侯虎譖西伯於紂

周豐宮 舊志一名豐宮在豐水西去縣三十里文王都豐史記紂囚西伯于羑里閔天散宜生之徒求美女奇物善馬以獻紂紂乃赦西伯賜之弓矢得專征伐曰譖西伯者崇侯虎也西伯歸三年伐崇侯虎而作豐邑詩曰既伐于崇作邑于豐朱傳崇國名在京兆府鄠縣伐崇之後自岐遷都于豐武王繼文雖遷于鎬而每

遇大事如伐商作洛之類皆步自宗周以其事告于豐廟不敢專也書曰夏四月王來自商至于豐左傳曰康有豐宮之朝則康王雖仍都鎬而其受朝仍在豐地是亦循武王宗豐之意也杜預曰鄆在鄆縣東決錄注曰鄆在鎬西相去二十五里又孫志秦渡鎮即周豐宮據前志皆以秦渡鎮爲豐宮所在父老相傳久矣而顧棟高春秋大事表謂縣東五里有豐宮顧祖禹方輿紀要亦云然今攷兆豐橋村東舊有文王廟在今治東五里似即其地又按書序言周公老于豐成王還歸在豐作周官逸書載惟十有二年六月庚午肫王命作策豐刑大名崔述豐鎬考信錄謂史記書序並云康王命作策畢公分居里成周郊作畢命崔玉理讀書劄記謂鄆有周官坊在周之郊當是成王曾作周官於此畢公因以居之命作畢命耳今兆豐橋村東三里許有村曰周貴坊或即周官坊之訛歟以在周郊証之兆豐橋爲豐宮似亦可信姑兩存之以待好古者考定焉

靈臺 舊志在豐宮北高二丈周百二十步臺上有文王閣劉向新序云周文王作

靈臺及爲池沼掘得死人骨吏以聞文王曰更葬之吏曰此無主矣文王曰有天下者天下之主有一國者一國之主寡人者死人之主又何求遂令吏以衣冠更葬之天下聞之皆曰文王澤及枯骨又况於人乎魏王泰括地志辟雍靈沼無復故基惟靈臺介然孤立今臺址尙存

靈沼靈囿

舊志距豐宮十五里

又孫志董村一名海子即周靈沼故址有文王廟

唐徐元弼有靈囿賦今按董村在縣東北二十里東界長安村南有窪地廣約數畝徧地湧泉匯而爲澤俗名海子相傳即古靈沼其水北流爲靈沼河其附近地當即靈囿元弼賦見藝文

辟雍 舊志亦曰璧廡王制天子曰辟雍註辟明也雍和也使天下之人皆明達和諧也康志云引豐水爲之水旋邱如璧以節觀者一云辟雍如璧之圓圍之以水象教化流行也按三輔會要云在長安西四十里灃岸上

周公退老明農之鄉 舊志史記周公退老明農于豐按周書洛誥周公教成王云

汝往敬哉茲予其明農哉傳云蓋公有歸老之志矣而洛誥之末則云王命周公後惟周公誕保文武受命惟七年傳云周公自留洛之後蓋七年而薨也據此則周公未嘗退老明農決矣

秦蕢陽宮 舊志在縣西三里秦惠文王所造秦王政九年嫪毐作亂族遷太后于雍蕢陽宮父老相傳今陂頭東嶽宮即其舊址

甘泉宮 舊志在鄠縣西南二十里對甘谷泉本紀曰始秦諸廟及章臺上林皆在渭南已而更名爲極廟道通酈山作甘泉前殿甬道自咸陽屬之則甘泉前後必近上林即酈縣也孫志云按唐書地理志酈西南二十二里有隋甘泉宮或即龔秦故址爲之者今考縣西南二十里老牛坡下有明陽寺故址係明英宗元年建有碑云即甘泉宮故址是矣

鐘宮 舊志縣東北二十二里有鐘宮城始皇收天下兵銷爲鐘鏐此或其處也今失考

漢宜春觀 舊志在澇漢二水之旁上林故地也水經曰澇水經漢宜春觀合漢陂入渭師古曰觀在鄠縣十道志曰漢武帝所造也

上林 舊志上林昉於秦其境難以詳究水經於宜春觀曰此上林故地也史記載上林所起曰作朝宮渭南上林苑中先作阿房前殿則宜春觀阿房宮皆秦苑故地武帝尙以秦苑爲狹命吾邱壽王舉籍阿城以南盤屋以東宜春以西悉除爲苑則所括比秦益廣以漢唐郡縣言之則盤屋一縣不盡入苑而鄠縣悉歸包并其曰舉籍阿城以南而阿城之北則不在此數是其境至渭水南岸而極也西京賦又曰抱杜欽鄠欽豐吐鎬則上林之境鄠之分數居多矣

鄠杜 舊志云今鄠人自稱曰鄠杜豈知鄠即鄠縣也杜即杜縣也宣帝以杜東原上爲初陵置縣曰杜陵而改杜縣爲下杜城使鄠可兼杜則杜亦可兼鄠孫志云按漢書東方朔傳武帝微行南獵長楊東游宜春常稱平陽侯馳驚禾稼稻稭之地民皆呼號聚會自言鄠杜令往欲謁平陽侯據此則鄠杜非兩縣明矣意者

茲縣始名鄠杜而尋改爲鄠歟再按唐高駢有寄鄠杜李遂良詩則鄠杜非兩縣愈明但他書未詳言耳

秦渡 舊志卽古豐地豐水之西岸也豐舊城在焉豐之北卽靈臺今屬長安與鄠界唐高駢寄李遂良詩云吟社客歸秦渡晚則其來遠矣今爲鎮

屬玉觀 通省志在縣治漢宣帝甘露二年幸葺陽宮屬玉觀

唐太平宮 見寺廟

婁敬菴 在縣東北五里婁村內有婁敬墓仙經圖志稱爲海內第二十五福地縣舊志婁敬齊人脫輓輅衣羊裘因齊人虞將軍見高祖前後凡四諫於漢初皆關大計敬之智計在當時蓋留侯之亞也然史記不詳所終而鄠之有婁敬菴則載諸仙經圖志者爲日已久意者高祖誅滅韓彭時敬見幾而作或高后晨鳴日敬超然遠舉故託以修仙養性之術擇吉居此如留侯之託於從赤松遊以避害耶

漢陂 孫志在縣西五里水經注陂水出宜春觀北東北流注潞水十道志

唐梁載言著

本五味陂陂魚甚美因名之說文漢陂在鄠縣周十四里北流入潞水長安志漢陂出終南山諸谷合胡公泉爲陂唐寶歷二年勅漢陂令尙食使收管不得雜人採捕其水令百姓灌溉勿令廢碾磑之用文宗初詔並還府縣明劉士龍富平漢人陂記山谷之水並白沙胡公諸泉合而北注漢陂受之自陂頭南至曲抱村可數里許高岸環堤一泓蕩漾層巒疊嶂影落數百頃波濤半陂以南純浸山此實際語也縣舊志云陂在縣西又有

錦繡溝 即漢陂之上遊自瓜牛臺北而下至漢陂二里許元季以陂魚可治痔漏遊兵決堤取之陂遂廢其地皆爲水田明崇禎己卯知縣張宗孟重加障築唐杜甫有漢陂行見藝文

按舊志明初有馮俊者字子英漢陂人以舉人遊太學上書中貴人被召問言不遜落籍爲民既歸於所居漢水上藝植竹木相錯如繡因名其地爲錦繡溝見人物

空翠堂 在陂上宋張伋有記 見金石 明末知縣張宗孟重修有記清康熙庚辰賈

觀察欽捐俸屬知縣朱文卿構杜工部祠堂有記文卿亦有記雍正辛亥教諭潼

關李滋重修空翠堂並建崇文閣於堂左有記唐杜甫有與鄠縣源大少府宴漢

陂詩 見藝文 又有城西陂泛舟詩岑參與鄠縣郎官泛漢陂詩韋應物扈亭西陂

燕賞詩韋莊過漢陂懷舊詩鄭谷漢陂詩宋李昉漢陂詩 俱見藝文

瓜牛臺 今稱玉蟾臺為玉蟾真人修道處在縣西南五里曲抱村唐杜甫有漢陂

西南臺詩 見藝文

巢閣 在縣西七里白樂天讀書處村名割耳莊有白沙諸泉長安逸士張光裕匯

泉為湖種竹十畝倚樹為樓高七丈故曰巢閣馮恭定講學其上富平劉解元士

龍有記

章莊舊居 舊志在漢陂按莊字端己京兆杜陵人見素之後昭宗乾寧元年進士

授校書郎王建開僞蜀莊奉使入蜀為蜀相有浣花集傳於世弟謁為之序再按



莊有鄴杜舊居詩又有過漢陂懷舊詩 俱見藝文

鄭谷別業 舊志在漢陂今無考 鄭谷見官師

蘇旦園 舊志載章惇 字子厚建州蒲城人豪俊博學善文再舉甲科調商洛令 題草堂云惇自長安率蘇君旦

安君師孟至終南謁蘇君軾因與蘇遊樓觀五郡延生大秦仙遊旦師孟二君留終南因遂與二君過漢陂漁于蘇君旦之園池晚宿草堂云

柳塘 舊志在南山下元楊奐隱居教授處 楊奐見流寓

十畝園 舊志即漢陂書院內有春雨亭康對山爲之記又有且坐亭紫閣峯今俱亡

龍臺觀 在縣東北二十五里龍臺坊舊志上林賦登龍臺掩細柳方輿記在灃水西北近渭水三輔故事云去豐水五里今有龍臺正當其處疑即其故址舊有龍臺廢驛亦在此處

馬祖壇 舊志在龍臺澤中今攷龍臺坊五堡間有馬王廟臺址高五六尺其南有

三角潭當是其地

二曲書院 在縣西孫家磴孫志始王徵士心敬為別墅于此期以成日邀其師二曲李徵君頤講學維時學使昆陵嵩侶高公聞其事為之建坊大書二曲書院扁其堂曰斯文未墜嗣前令金君廷襄建後堂學使長洲儼廷陸公為懸堂聯今廢

釣臺 在縣南八里遙指頭舊志縣南十里許澗水中流起一洲高二尋有奇名曰

釣臺建廟宇繚以欄杆堪登眺不知昉於何時明富平劉解元士龍有游釣臺記

見金石

陳兵坊 舊志相傳此即唐柴紹妻李氏歸鄠縣別墅散家資聚徒衆處

詳見紀事

志道觀 一名四真堂舊志載秦渡仙柳在四真觀宋冲陽王真人演教之所馬譚

丘劉自山東來受業於重陽分志插柳各自為蹤遂名四師堂春夏之交仙柳爭

榮綠葉茂密更宋元柳枯洪武初勅賜應夢真人孫碧雲遊覽終南太華經歷于

此仙柳枯而復榮乃復立觀今秦渡有志道觀即其地也元至元二年有重修四

眞堂記

見金石 又有四師堂仙柳詩 亦見金石

丹陽井 在志道觀舊志宋眞人馬丹陽取此水煉藥因以名焉

姚秦三藏法師鳩摩羅什舍利塔 在草堂寺內按塔高七尺許八面十二級其石舊志稱西域所貢上覆以亭髮回之亂塔頂毀于賊後寺僧以山石補之今其下層亦多毀損上刊鳩摩羅什之舍利塔權邦彥侍親來禮而作偈言丁酉仲秋晦  
字塔西南面題有孫陽來三字其銘詞錄入金石

草堂寺禪宗世系碑 在羅什塔前光可鑑人

煙霧井 亦在草堂寺竹林中井係以磚砌成者中腰有石一塊相傳昔時每見一蛇臥石上輒有白氣一股由井上騰繚繞于省城西南所謂草堂煙霧爲鄴八景之一者此也寺僧云改革後此井不復有煙氣矣

神仙路 在縣南終南山麓並山東西一小徑名神仙路相傳爲唐玄奘法師取經所由之道

殷家坡 在澗峪內爲唐殷開山故里至今殷姓猶緜緜不絕

教場 亦在澗峪內地勢平廠縱橫約十餘畝相傳爲殷開山練兵處

拔環崖 亦在澗峪內石崖高數十丈上有鐵環一枚大徑尺每遇大風則釘鐺作響聲相傳爲殷開山繫馬處

黃龍洞 在縣北什王村勝光寺內相傳爲黃龍真人修道處

箭門 縣治東南隅南宅堡明末李自成圍鄆以箭射穿南宅城門作三孔至今宛在俗呼箭門

太白石 在縣北三過村東有石突出地面約五尺許相傳掘之不能得禱雨輒應石前有太白廟

龍碾 在縣南白雲寺前其碌磳石色青有紋蜿蜒若龍故名碾米甚速土人利之相傳其上蓋屋輒焚云

石鏡 在縣東南化羊廟有方石一塊光鑑百步

淨土樹 在縣南羅什寺詳見寺廟

雙槐 在縣署大門內東邊主簿舊宅前宋程明道先生主鄂簿時所手植者舊志云至今已數百年狀若虬龍邑令王九皋立坊題詩記之至民國十八年周師駐鄂伐木拆廟今根株盡矣

雙檜 在草堂寺名人詩刊甚多另錄入金石今其樹已絕迹矣

陵墓亦古蹟也鄂之古陵及先賢墳墓有必不可沒者今備錄于下

王季陵 戰國策云魏惠王死葬有日矣天大雨雪羣臣請弛期更日太子曰勿復言惠公駕而見太子曰昔王季歷葬于楚山之尾欒水齧其墓見棺之前和文王曰嘻先君必欲一見羣臣百姓也夫固使欒水見之於是出而爲之張朝百姓皆見之三日後更葬史記周本紀皇甫謐注云葬鄠縣之南山舊志云陵在漢陂西護陵地爲民侵占知縣王九臯從公丈量陵內地共九畝八釐內除陵塚占地二畝一分五釐實有護陵空地六畝九分三釐門外西南角地一段該地五釐永爲

拋荒復將牆垣四角并門兩旁俱立封堆埋界石仍刻碑豎儀門外春秋致祭  
國策註爨漏流也和棺兩頭木張朝張幕帶如朝廷然 按和廣韻作牀玉篇作  
耕皆云棺頭也

九女塚 在陂頭東北舊志在漢陂之陽諸史會編秦二世用趙高之言僂死十二  
公子於咸陽市斫死十公主於杜縣塚今落鄠縣漢陂其一塚水崩去鄠人相傳  
爲九女塚今又崩其一止餘八塚斫與磔同音窄

枯骨塚 在秦渡北門外舊修有廟以祀孤魂年久傾圮嘉慶間重修鎮人張有記  
之曰聞之周文王作靈臺掘地得人骨王曰更葬之天下曰王賢美澤及枯骨况  
於人乎相傳吾秦鎮此塚即當年葬枯骨處也以有孤魂像訛傳孤魂塚今扁其  
門曰枯骨塚云 下略

韓仙塚在縣北韓村西北隅高約一丈廣可五份里人呼爲韓仙塚村之得名以此  
秦司馬靳墓 舊志靳事武安君白起坑趙長平軍俱賜死杜郵葬於華池晉灼注

曰華池地名在鄆縣今不知其處按靳太史公遠祖俱詳見史記

漢建信侯婁敬墓

詳見前婁敬菴

曲逆侯陳平墓 宋敏求云在縣南十里通志云在方勝村

崔府君墓 在縣北崔村

宋楊樞密礪墓 在縣東南龐光鎮北

宋焦將軍贊墓 在縣東南焦將村村之得名以此

明關按察焯墓 在古家寨

張布政賢墓 在牙道村太史王九思補撰墓表

王太史九思墓 在六老菴今稱王家墳廣約頃餘柏檜成林望之蔚然

王副史九峯墓 亦在六老菴

張學使宏襟墓 在陂頭西

王徵士心敬墓 在縣城外西北隅三里許南河頭鵲鵠原

系

系

系

系

古蹟 紀事

八一

張大令宋薪墓 在終南山下大悲寺西

崔太史志道墓 在崔家灣

王大令恆晉墓 在縣北門外北極宮西

紀事第二十五

鄠古有扈氏國也唐虞時禹父鯀受封于崇爲崇伯亦居扈地夏初有扈氏威侮五行怠棄三正夏后啟誓師大戰于甘滅之後併爲崇國殷末崇侯虎譖西伯于紂紂囚西伯後西伯伐崇詩稱既伐于崇作邑于豐豐今鄠縣秦渡鎮蓋西伯伐崇崇服不滅其國而于豐作京邑也文王在豐發政施仁民愛戴之爲作靈台在秦渡北不日而成掘地得人骨王曰更葬之天下曰王賢矣澤及枯骨况于人乎今鎮北門外有枯骨塚即文王葬枯骨處又爲靈囿靈沼使芻蕘雉菟者皆得往來射獵于其間故民歡樂之後武王嗣立伐紂有天下遷都于鎬而于豐則立廟以祀文王故其後嗣王雖嘗在鎬有大事則必至豐告廟而後行焉周書召誥王朝步自周則至于豐左傳



康有酆宮之朝是也又左傳富辰曰酆文之昭也竹書紀年云成王十九年黜酆侯東遷後頃王五年晉欲成于秦趙穿曰我侵崇崇急秦必救之吾以求成焉冬趙穿侵崇秦弗與成蓋崇至是尙未亡也春秋僖公十有五年冬十有一月壬戌晉侯及秦伯戰于韓獲晉侯左傳秦獲晉侯以歸乃舍諸靈台杜注靈台在京兆酆縣周之故台亦所以抗絕內外令不得通史記秦本紀云襄公元年以女弟繆嬴爲酆王妻蓋武王遷鎬後于酆復置國焉諸史會編秦二世用趙高之言僂死十二公子于咸陽之市砒死十公主于杜縣塚落縣西之漢陂其一塚水崩去酆人相傳爲九女塚今又崩其一止餘八塚又秦王政九年嫪毐作亂遷太后于雍葺陽宮父老相傳今陂頭東嶽宮即其舊址前漢書東方朔傳武帝建元三年微行始出北至池陽西至黃山南獵長楊東遊宜春微行常用飲酎師古注三重釀醇酒也已八九月中與侍中常侍武騎及待詔隴西北地良家子能騎射者期諸殿門故期門之號自此始微行以夜漏下十刻迺出常稱平陽侯旦明入山下馳射鹿豕狐兔手格熊羆馳騫禾稼稻稭

之地民皆號呼罵詈相聚自言鄠杜令令往欲謁平陽侯諸騎欲擊鞭之令大怒使吏呵止獵者數騎見留迺示以乘輿物久之迺得去時武帝使吾邱壽王籍阿城以南盤屋以東宜春以西提封頃畝及其價值欲除以為上林苑屬之南山又詔中尉左右內史表屬縣草田欲以償鄠杜之民吾邱壽王奏事上大悅稱善時朔在旁上疏諫歷陳三不可上乃拜朔大中大夫給事中賜黃金百斤然遂起上林如壽王所奏云

漢宣帝甘露二年幸蕢陽宮屬玉觀 通省志在縣治

三國志魏書董卓傳後漢初平二年董卓第旻為左將軍封鄠侯

晉書成帝咸康三年 後趙石虎建武三年安定妖人侯子光易姓名為李子揚遊于鄠頗見其

妖狀聚眾數千人於杜南山下作亂趙將石廣擊斬之

十六國春秋咸康九年 秦王苻堅皇始三年冬秦寇鄠陷之清河王發與左衛將軍飛克鄠斬

劉珍夏侯顯

縣舊志鳩摩羅什天竺人善經律論化行西域苻堅遣驍將呂光伐龜茲以求之堅  
爲姚萇所害什客光所譚興敗屢驗及萇僭關中挹其高名光以什智計多解不許  
東入姚興即位遣使敦請什至長安待以國師之禮使入西明逍遙園

即草堂寺

譯出衆

經  
隋大業二年李淵爲子世民祈疾記稱鄭州刺史李淵爲男世民目患先於此寺求  
佛蒙佛恩力其患乃捐敬造石碑像一鋪願此功德資弟子男合家大小福德興足  
永無災障弟子李淵一心供養見石墨鐫華跋草堂寺石刻後署大業二年正月八  
日按是時太宗才九歲耳而史稱高祖爲燕隴岐三州刺史不曰鄭州此亦可証史  
之闕

隋唐書高祖本紀高祖從父弟神通起兵于鄠柴紹婦高祖女也亦起兵于司竹與  
世民會盩厔賊何潘仁向善思等皆來降

舊唐書柴紹傳平陽公主高祖第三女也義兵起紹間行赴太原公主乃歸鄠縣莊

所遂散家資招山中亡命得數百人時京師留守頻遣軍來討公主率家僮馬三寶暨何潘仁屢挫其鋒掠地至盩厔武功始平皆下之得兵七萬人營中號曰娘子軍通鑿綱目柴紹之赴太原也謂其妻李氏曰尊公舉兵今偕行則不可留此則及禍奈何李氏曰君第速行我一婦人易以潛匿當自爲計紹遂行李氏歸鄠縣別墅散家貲聚徒衆淵從弟神通亦在長安亡入鄠縣山中與長安大俠史萬寶等起兵以應淵西域商何潘仁入司竹園爲盜有衆數萬劫李綱爲長史李氏使其奴馬三寶說潘仁與之就神通合勢攻鄠縣下之神通衆踰一萬以令狐德棻爲記室李氏又使馬三寶說羣盜李仲文向華志邱師利等皆帥衆從之徇盩厔始平武功皆下之衆至七萬左親衛段綸娶淵女亦聚徒于藍田得萬餘人各遣使迎淵淵使柴紹將數百騎並南山迎李氏關中羣盜皆請降淵以書慰勞使受世民節度今縣南有村曰陳兵坊相傳即李氏聚徒衆處也

唐書宗室世系表大鄭王房有鄠令豐士

通鑒代宗廣德元年冬十二月築城于鄂縣及中渭橋屯兵以備吐蕃以羅奉先爲鄂縣築城使遂將其兵

本紀武宗會昌四年冬十月帝獵于鄂縣

宋史楊礪傳廣順中周世宗節制澶州礪贄文見之館接數日世宗入朝礪處僧舍夢古衣冠者曰汝能從乎礪隨往覩宮衛若非人間殿上王者秉珪南向總三千餘礪升謁之最上者前有按置簿錄人姓名礪見已名居首因請示休咎王者曰我非汝師指一人曰此來和天尊異曰汝主也當問之其人笑曰此去四十年汝功成予名亦顯矣礪再拜寤而志之礪初名勵以籍作礪遂改之端拱初授命謁見藩府歸謂子曰吾今見襄王儀貌即所夢來和天尊也

嘉祐五年程明道先生遊鄴山詩序云僕自幼時已聞秦山多奇占

舊志作古誤

有扈者

尤復秀出常恨遊賞無便嘉祐二年始應舉得官遂請于天官氏願主簿書於是邑謂饜飶雲山以償素志今到官幾年矣中間被符移奔走外幹者三居其二其一

則簿書期會倉廩出入固無暇息惟白雲特在山面最爲近邑嘗乘間兩至其餘佳處都未得往變化初心辜負泉石五年二月初吉聞貳車晁公來遊諸山先是晁公見約同往會探吏失期二日早晁公以書見命始知車騎已留草堂走白邑大夫張君時有民產在山麓者以罪沒官府符方命量其租入之數因請以往鞭馬至山而晁公已由高觀登紫閣還憩下院見待已久遂奉陪西遊經李氏五花莊息駕池上夜宿白雲精舍詰旦晁公西首僕復並山東遊紫閣登南山望仙掌回抵高觀谷探石穴窺石潭因周視所定田徜徉于花林水竹間夜止草堂是晚雨氣自西山來始慮不得徧詣諸境一霎遂霽明日入太平谷憩息于重雲下院自入太平谷山水益奇絕殆非人境石道甚巖下視可悸往往步亂石間入長嘯洞過虎溪西南下至重雲閣訪鳳池觀雲頂凌霄羅漢三峯登東嶺望大頂積雪復東北來雲際下深澗白石磷磷於水間水聲清冷可愛坐石掬水戀戀不能去者久之遂宿大定寺凌晨登上方候日初上西望藥山北眺大頂千峯萬巒目極無際下山緣東澗渡橫橋復憩

于重雲下院出谷遊太平宮故基而歸馬上率爾口語往往成詩章自入山至歸凡四日得長短詠共十二篇姑存之以誌遊覽之次第云

詩見山川門

明景泰二年四月初二日勅西安府鄠縣民侯峪曰國家施仁養民爲首爾能出麥豆三百石用助賑濟有司以聞朕用嘉之今特賜勅獎勞以羊酒旌爲義民仍免本戶雜泛差役三年尙允蹈忠厚表勵鄉俗用副朝廷褒嘉之意欽哉故勅

正德庚辰春三月大復山人何仲默景明校士于鄠杜暇與邑檢討王九思遊南山諸勝處有記詳見山川門

資政錄萬曆甲辰回回倡亂盤屋之白龍溝鄠縣之龐家村聲勢相應窟穴其中鄠令劉璞捕沙倉等十一人置于法而探囊穿窬之輩久之乃戢

紀事本末崇禎七年春正月總督洪承疇率總兵曹文詔等先後剿諸賊斬獲甚衆李自成張獻忠敗走盤鄂

甲戌六月賊混世王八大王張胖子隨山虎等自鄠安出過鄠縣至盤屋馬召村殺

掠甚慘

九年知縣張宗孟創立團堡自志其事曰不佞涖任時賊寇徧三秦而鄠縣特甚野無所庇只得望城爲歸然民之愚也寇逼門庭始踉蹌奔蹶逃遁不及輒膏賊斧淒魂號月燐火飛原舉目遙睇寸腸幾裂不禁淚淫淫下也乃聚諸父老諭之與其望城爲庇何不自爲庇建堡則人自爲庇矣首事于曲抱村親與畫批圖形民皆踴躍爭先不日告竣復諭之練鄉兵立團長設火器四鄉相繼版築紛起其制悉如曲抱村于是遍野皆城賊七過鄠而無隙可乘民永賴以安諸父老相率請命其名不佞因其首事于西也遂由西而南而東而北總其額曰永保安寧願與吾民世世倚之

舊志崇禎間陝西盜起上授張宗孟知鄠縣時寇薄城下宗孟聞警兼程進至則四

門皆土擁遂野服從間道登陴

音皮城  
上女牆

鼓勵守者賊宵遁乃治城四隅建敵樓重葺

四門叔懸樓二十四座建堡六十六處設火具賊過城下輒相戒毋犯又建市心樓



以聯絡聲氣察城西三里陂頭鎮有高阜上爲空翠堂其地可拒寇因建堡濬壕時左帥奉命征諸賊兵過處俱入城至鄆則宗孟拒之一切供億置城外扃其門

論曰明末之亂流賊徧三秦鄰縣如盩厔且殘破無遺而吾鄆獨完則以賢令宰守禦有方保民如赤故也廟祀至今宜矣

清順治二年賀珍之亂賊自漢中寇西安所經郡縣靡不殘破鄆城陷男女死難者甚衆

康熙十三年十月遊擊程福亮聞蜀變自西鄉縣退兵三河口盩鄆兩縣運糧給之

明年八月漢中失守遊擊梁鼐屯兵黑水谷十五年六月賊衆三千出盩厔駱谷及

黑水谷屯仙遊寺大掠七月初十日梁鼐遇賊于姚村敗還

按漢中至十八年十一月始恢復

嘉慶三年白蓮教匪齊王氏李全等由寶鷄出山攻郿縣不克寇掠盩鄆將直犯西安總兵李文雄擊敗之賊卻退入山時出抄掠巡撫陸有仁奏請行堅壁清野法令各村堡築城禦寇民力不足者官助之自是賊至無所掠始引去

十一年固原提督楊遇春入覲移寧陝鎮總兵楊芳署理以副將楊之震護總兵七月因停扣米折遂有新兵悍卒陳先倫陳達順等戕官之變九月賊攻孝義廳分隊窺子午峪芳聞變星夜兼程馳扼峪口賊西出斜峪圍鄠縣城芳出子午峪赴援與城中夾擊鏖戰竟夜矛貫芳臂身受數創城始獲全而城中終疑爲新兵不敢納乃營於城外賊亦不知爲芳兵也力攻黎明見芳旗始解圍遁入南山

見聖武記

時鄠縣知縣胡晉康有碑記其事云予是秋回鄠任適寧陝新兵滋擾沿山郡邑九月六日竄入鄠率數千人薄城下晝夜攻圍幸把總王君祿教諭冀君饋典史金興等相與努力共守兵民効命登埤捍禦斃賊甚夥然賊恃衆屯聚不退至七日薄暮楊公芳率援兵至賊分隊迎拒攻城益急內外兵勇踴躍奮擊聲震山谷達旦城上矢集如蝟未傷一人而城外之土色已血漬殷然矣城西北隅陂迤易登是夜賊緣城及堞城上矢石交發賊多顛仆楊公亦殲擒頗衆賊力屈乃西竄

同治初元粵寇闖入陝境壬戌三月出大尼峪逼省垣全陝震動時邑令沈公淦奉

檄練團推邑紳張源澈爲紳董以僑寓會稽顧孝廉壽楨爲副募勇置械督飭訓練入城守禦城賴以完而縣境所在焚掠一空後經旗兵逐出陝境

是年秋回難作先是各縣多漢回雜居積久不相能因之鬥爭之案迭起爲官吏者亦往往右漢而左回以故愈鬥愈憤愈壓愈烈而亂端起矣其兆亂也始於涇原而同朝長安沙河一帶之回民雲合響應鄠邑回民村落止灰渠一村先發殲之而回族同時蜂起所在燒殺勢炎猖獗銳不可當其時瀕渭居民亦所在辦團大者十數村小者數村各立一團堡習技擊以爲抵禦計九月賊鋒至咸陽擾渭北不敢渡瀕渭各團合數千健兒列渭以待名曰堵禦然起于烏合不相統屬有饒勇者擅率數百人或數十人徑渡河殺賊賊聚而殲之無得脫者是役也先後死難者近千人經此敗衄各團瓦解潰散賊遂乘勝渡渭而南橫刀躍馬所向披靡男婦老幼無留者而尸橫蔽野村舍成墟矣縣東鄉牛東村民有賈七者時以俠聞察賊勢張甚官軍不能禦乃說鄰村十數里降賊計全人命賊亦利其供養受之據牛東爲巢窩蹂躪

四鄉朝出暮歸以爲常縣北西南三鄉益無噍類矣時邑令張公景福新蒞任有剛斷惡賈七降賊誘其來縣殺之賊憤甚遂焚縣東關攻縣城賴城守把總胡永祿奮死抵禦連發大炮斃賊甚夥賊始却退諜知五竹村副貢張源澈辦城防又攻五竹村屠之由是間日攻縣城終不利迨二年正月元旦賊意城守必懈復悉銳來攻不克其目孫元帥亦被我勇擊斃賊氣餒矣至三月初四邑紳復率團勇出城誘賊至與戰西郊斬獲甚衆賊始引去

三年四月洪軍藍二順由楚入陝陡至秦渡鎮時屆農忙促不及避被害尤甚

五年捻賊張總愚號小燕王於臘月二十日突至縣境號四十萬衆撲城數次不克遂盤据鄉村南至南山北盡渭河無處不有賊蹤凡四十餘日至次年二月始竄出境

聞之同治軍興鄠城防諸紳一日設壇降神扶乩問吉凶乩云三星在戶何懼之有均不解事後思之其時知縣爲張公景福經制外委爲胡公永祿而典史爲柏

公天壽三星者此三公也福也祿也壽也世所謂福星者而一時乃畢集于我鄆此三公者各占其一又均能協力禦賊使賊百攻而不可克以與鄆造福天之湊合亦巧矣往歲予任通志採訪時會稽顧太守家相因其兄壽楨昔年寓縣時曾佐邑紳辦城防作傳述其事以兄壽楨當之殊不倫特爲說明如此

論曰予聞諸長老言同治初元以至六年前後五六年間賊盜縱橫滿山蔽野髮匪則謝大脚曹沛時等回則馬二元馬化龍等倏忽剽掠來去如風吾民之死于水火及斃于鋒刃者不可勝數即逃難縣城幸而不與賊遇又往往死于疫焉其轉徙流離之餘亂定歸鄉而廬舍蕩然鞠爲茂草蓬蒿沒人矣百家之村求其父母俱存兄弟妻子無故者無二三焉不可謂非空前之浩劫也嗚呼豈非天哉

宣統三年九月一日陝西革命軍起于省垣推新軍統領張鳳翽爲都督而哥老會首領張雲山爲副於是會黨所在蜂起於省垣立總碼頭各縣立分碼頭威福自雄謀操政權而吾鄆無賴子亦麇集蟻附擾亂治安縣知事莫敢可否城防局紳某赴

省上控始將碼頭取銷

民國三年春豫匪白狼竄入陝境全省震動夏曆三月九日突由省南至鄂時城內無駐防軍隊促不及備城遂陷大肆屠殺男女死者四百餘人東南南鄉一帶所在殘破越兩日西竄官軍尾擊先後過鄂者約數十營供億搜掠爲害尤甚五月匪復由西路回竄過鄂南境沿山一帶備受蹂躪

按自狼匪擾鄂後政變無常戎馬倥偬而鄂城朝秦暮楚兵匪迭據南山各峪竟成匪穴氣炎猖獗以十三四兩年爲最拉票勒贖日至數起死亡轉徙破產蕩家者比比也北則渭灘一帶萑苻潛藏瀕渭居民時受劫掠駐防軍隊每多視爲固然不肯加力防勦鄂民日陷水火矣攷自民四以後兵匪經過者指不勝屈僅就名目可指者約畧記之

五年夏逐陸之役起全陝擾亂不逞之徒揭竿而起時有長安亂民張四等糾合無賴千餘衆盤据縣城人呼捶頭隊索款派糧備極騷擾未幾潰散嗣後曹世英軍一

連駐縣北灘有地名鼈蓋者匪巢也匪首徐半吊等聚衆百餘人據澇店謀起事駐軍擊戮之

六年陳樹藩督陝郭堅據鳳翔叛約耿直在省發難夜攻督署不克潰圍出至縣西竄未幾胡笠生亦應靖國軍據三原遣將據鄂謀攻省城

七年廢曆正月二十八日陳樹藩率師及嵩軍數萬衆悉力來攻凡三日餘不克而退靖國軍營長張義安死之

八年夏嵩軍馬耀羣一連駐鄂七月樊鍾秀由藍田至據東鄉北鄉一帶攻縣城凡三晝夜不克遂盤据崔村四出抄掠越二十餘日嵩軍愍司令玉琨由咸陽援鄂樊始西去遂陷盤屋而嵩軍各路以全力攻之前後經過者約十餘萬衆糧秣供應悉取給于鄂是九年十年事也後盤城下愍司令駐鄂自是之後鄂遂爲鎮嵩軍常駐地張治公柴雲陞愍玉琨嚴際明更相調換惟嚴治軍有法保境息民至今頌之有德政碑豎文廟前東側

十二年柴司令駐鄆是年北京變起張慙東開慙與豫督胡笠生啟豐陝督劉鎮華率師東下柴雲陞從之以吳新田代理督軍後劉軍失敗于東其部何夢庚旅由商洛來駐鄆李雲龍軍起率師逐吳吳率部西竄縣北一帶抄掠一空何夢庚孤守鄆城後同時圍攻者有姜宏模張萬盛姚震乾及麻振武部之段懋功等約十餘營盤據縣境凡兩閱月縣北各村堡受害尤甚後何夢庚降麻東開接防者爲張萬盛其年冬張復移鄆鄆遂爲何毓斌駐防地

十五年李雲龍督陝春劉鎮華率嵩軍數十萬衆圍省城約吳新田出師漢南爲兩路夾攻之策及吳師至攻鄆何毓斌一面納款于劉悉力抗拒吳師鄆城被圍者二十日閭閻騷擾爲歷年所未有

是年冬馮軍援陝號四十萬時縣北大王鎮及真守村等處尙爲嵩軍佔據馮軍渡河先圍攻大王鎮下之遂據鎮進擊馬王村先後十餘日數十萬衆畢集一隅民間糧秣爲之一空後馮軍東開而軍需亦多取給于鄆焉



十七年夏何毓斌叛與駐盩赤炳文起師圍攻省城弗克何退保鄂赤退據縣南丈八寺及縣北崔村姚村等堡馮軍遣高魏兩師分兵圍攻凡二十餘日後何部窮蹙投誠檻致省垣戮之赤部亦次第擊退

是年六月三十八師師長周永勝率部駐鄂九月東開合縣牲口搶拉殆盡嗣後復有趙旅來接防兵少械缺盤屋硬匪數百人于十月二十一日竄入城內乘夜竊發凡殺傷兵民一百餘人燒東南兩城門樓及西街圖書局

其秋周永勝復率所部來鄂冬十月天雨雪深尺餘經冬不消竹木多凍死周軍以民間薪柴不給遂拆毀廟宇如興國寺及縣城內外之寺廟至是多殘破不堪

十八年二月省變起楊虎城率師入關主席劉郁芬出走山西駐鄂之趙旅亦率部東去鄂無駐軍城防事宜乃責成公安局

按鄂自十七年以至十九年三年荒旱麥禾無收人民死亡流離者不可勝數據縣賑分會所調查全縣災民共七萬七千餘人設廠施粥全活無幾至二十年雨

場稍適收成僅六七分而征斂重重動數十萬以人口平均計之每人已負債六七元有賣妻鬻子以償者矣

二十一年大旱二月至六月不雨麥收僅二成秋禾未種入七月有奸民四布徧施毒藥于飲水及食料受之立死捕獲則死無口供

八月初虎疫來自東方初起於潼關二華繼而西行不一月徧及全省惟潼關最甚流行我鄠則自秦渡始旬日之間蔓延全境當劇烈之時一日之內一村之中往往死亡十數人以至數十人徧覓棺不得席捲以埋者多矣就中秦渡水寨縣城大王鎮等處爲最甚絕戶亦復不少統計合縣死亡人數至四五千之多蓋千百年未有之浩劫也

按此疫類于吾國舊有之霍亂上吐下瀉然吾國患霍亂傷人者正不多見至此疫來患之者往往不一二小時死矣雖有醫藥亦不及救其劇烈實甚于猛虎西人名曰虎疫豈其然乎

八月連落透雨宿麥安好

冬十一月紅匪徐向前犯藍田省方遣王太吉一團駐鄠以備之二十八日匪出大峪灃峪等擾鄠境盤据龐光鎮一帶越日中央討赤軍跟追至鄠與匪戰于爐丹村南匪軍西竄官軍尾擊縣南及縣西二十里間烽火徧地至月之晦日匪軍擾盤屋入駱谷而第四十四師師長蕭之楚率萬餘人由澇峪出遠行疲甚暫駐西鄉曲抱村丈八寺等堡以資休息越十餘日紅匪賀龍又由東西竄蕭師奉令東開進子午峪以截擊之而各營連落伍病號尙七百餘人命王副旅長留守鄠城以收容之嗣後沿途落伍及開差回鄠者復絡繹不絕中途並將張營一營開回駐鄠至十二月十八日始全數東開

是役也吾鄠西鄉及南鄉一帶無貧無富悉歸於盡尤痛心者四十四師遠行深山窮谷之中出峪以來凍餒交迫雖嚴令防範不能禁其搜括民食之自由行動騷擾已甚及奉令東開復濫拉民夫至數百人凍餒之民責以重負力不能勝而

委填溝壑者無在無之嗚呼可不傷哉

去秋九月不雨至今春二月麥苗全枯民多流亡幸春分日

二十日

始雨越日又雨人

慶更生

鄂縣縣志卷之九終

重修鄆縣志卷之十

雜記第二十六

按事非一端語不一類集之皆不足成爲專門而棄之則又確有其事者故以雜記收之亦王嘉拾遺之意耳但前志雜記多金石古蹟藝文之類今則各有專門分載其事其餘存者又鷄肋之屬也

縣舊志隋唐間星隕於鄆人家園中化爲巨石後移府城九耀街唐時舉人就試以鐵釘釘之驗其中否後復置藩署以卜官曰官清者釘入之又曰官大者釘入之否則弗入因號定官石督學陳公有頌載碑

唐申歡不知何許人開元中進士張佐嘗遇鄆杜逆旅乘青驢背鹿革囊言扶風人生字文周時見全唐詩

唐寧王

唐書宗室世系表讓皇帝房亦曰寧王府睿宗子

天寶中常獵於鄆搜林麓見茂草中一櫃扃鎖甚

固發視之乃一少女也問之曰姓莫氏叔伯庄居遇賊賊中二僧劫我至此王命載

之後乘時適獲一生熊遂置櫃中局之如故而去越二日二僧以櫃舁之鄂逆旅舍

中夜久隔平入膊音博有聲翌日主人怪僧不起撤戶視之一熊衝人而立二

僧骸骨露焉上知之大笑莫氏表入宮為才人能為秦聲當時號為莫才人嚙焉

新唐書孝友列傳序云唐時陳藏器著本草拾遺謂人肉治羸疾自是民間以父母

疾多刲股肉而進有京兆鄠屬張阿九趙言及奉天趙正言滑清泌等或給帛或旌

表門閭皆名在國史善乎韓愈之論也曰父母疾烹藥餌以是為孝未開毀肢體者

也苟不傷義則聖賢先衆而為之是不幸因而且死則毀傷滅絕之罪有歸矣安可

旌其門以表異之雖然委巷之陋非有學術禮義之資能忘身以及其親出於誠心

亦足稱者故列十七八焉

韓昌黎鄠人對曰鄠有以孝為旌門者乃本其自於鄠人曰彼自剔骨以奉母疾瘳

大夫以聞其令尹令尹以聞其上上俾聚土以旌其門使勿輸賦以為後勸鄠大夫

常曰他邑有是人乎愈曰母疾則止於烹粉藥石以為是未聞毀傷肢體以為養在

教未聞有如此者苟不傷於義則聖賢當先衆而爲之也是不幸因而致死則毀傷滅絕之罪有歸矣其爲不孝得毋甚乎苟有合孝之道又不當旌門蓋生人之所宜爲曷足爲異乎旣以一家爲孝是辨一邑皆無孝矣以一身爲孝是辨其祖父皆無孝矣然或陷於危難能固其忠孝而不苟生之逆亂以是而死者乃旌表門閭爵祿其子孫斯爲爲勸已矧非是而希免輸者乎曾不以毀傷爲罪滅絕爲憂不腰於市而已黷於政况復旌其門

吹笛生舊志云吹笛生者鄆人也祥符中范文正遊終南與邑人澶淵王鎬道士海南周德寶臨海屈元應遊周精於篆屈深於易鎬常帶小冠衣白紵跨白驢相與嘯傲鄆杜之間開樽鳴絃或醉或歌語未嘗及榮利一日相與宴坐圭峯之別墅暮山紫翠橫絕天表樂甚已月高露下羣動漸息忽有笛聲自西南依山而起上拂雲漢下滿林壑清風自發長煙不生聽之天地人物灑然如在冰壺中也范公大異之間鎬吹笛者何人也鎬曰此一書生貧且老每風月夕輒操此笛奏數曲自娛如是者

四十年矣范太息往就之其人去不得見而反其後鎬舉進士中甲第忽遭疾旅死周道士親視藥餌卒爲飯含齋其柩行哭於道中歸葬之後范位通顯賓客滿座鐘鼓在庭白髮憂邊對酒鮮歡遇周道士至涕下沾襟曰嗟乎安得如圭峯月下倚高松聽吹笛乎彼吹笛生何其遠也

康對山武功志張山甫偃師人熙寧間除武功主簿時朱光庭簿萬年程伯淳簿鄠三子者齊名關中號三傑焉

河間劉立之言明道先生釋褐主永興軍鄠縣簿永興帥府其出守皆禁密大臣待先生莫不盡禮見二程遺書附錄

游酢書明道行狀後云張子厚視先生雖外兄弟之子而虛心求益之意懇懇如不及逮先生之官猶以書抵扈以定性不能不動致問先生爲破其疑使內外動靜道通爲一讀其書可考而知也見二程遺書附錄

上蔡謝氏曰學者須是胸懷擺脫得開始得有見明道先生在鄠縣作簿時有詩云



雲淡風輕近午天  
傍花隨柳過前川  
時人不識予心樂  
將謂偷閒學少年  
看他胸懷直是好  
與曾點底事一般  
見上蔡語錄

舊志程頤洛陽人與兄顥講學河南顥官鄆縣簿頤嘗從兄入關所著有雍行錄  
宏治十三年陝西都御史熊翀等遣人獻玉璽一云鄆縣民毛志學等於兆倫村泥  
河水濱所得其文曰受命於天既受永昌玉色純白微青背有螭紐周廣一尺四寸  
厚二寸狝等以爲秦璽復出也事下禮部尙書傅瀚等覆自有秦璽以來歷代得喪  
存毀眞贋之跡具載史籍今所進璽其篆刻之文既與輟耕錄模載魚鳥篆文不同  
其螭紐又與史傳等書所記文盤五龍螭缺一角及旁刻魏篆者不類且又與宋元  
所得之璽色各不同蓋秦之舊璽更歷變故亡毀已久今陝西所進與昔宋元所得  
疑皆後世模倣秦璽而刻之者竊以璽之爲用以識文書防詐僞非以爲寶玩也自  
秦始皇得藍田玉刻爲璽漢以後傳用之自是轉相因襲巧爭力取意謂得此璽者  
乃以受天之命否則歉然愧怍以爲天命去之不知受命以德不以璽爲輕重也故

求不得則私爲刻造務以欺人或得之輒譁然以爲秦璽君臣色喜交慶徧祀以誇示天下貽笑取譏千載一律洪惟我太祖高皇帝神謨睿鑒高出千古不師前代之刻製爲一代之璽文必有義隨事而施真足以爲聖子神孫一代受命之符而垂法萬世者矣列聖相承率由祖訓百餘年來別無古璽而受命永昌之福愈隆愈盛皇上大德懋昭天命匪懈聖躬萬福宗社奠安正無俟璽而得天之眷有足徵者今此璽出於陝地乃遂以爲天錫聖符交獻愉悅蓋不自知其非耳宜姑藏之內府以備展玩以彰聖德以正人心臣等不勝至願上從之仍命薄賞志學等白銀五兩

按明史傅瀚傳宏治十三年瀚代徐瓊爲禮部尙書陝西巡撫熊翀以鄠縣民所得玉璽來獻以爲秦璽復出也瀚率同列言秦璽完毀具載簡冊今所進璽形色篆紐皆不類蓋後人倣爲之且帝王受命在德不在璽太祖製六璽列聖相承百三十餘載天休滋至受命之符不在秦璽明矣請姑藏內府帝是其言薄賞得璽者

明史文苑傳王九思

與康海同附李夢陽傳

字敬夫鄆人宏治九年進士由庶吉士授檢討尋

調吏部至郎中亦以瑾黨謫壽州同知復被論勒致仕海九思同里同官同以瑾黨廢每相聚汧東鄆杜間挾聲伎酣飲製樂造歌自比俳優以寄其拂鬱九思嘗費重貲購樂工學琵琶海搗彈尤善後人傳相倣效大雅之道微矣

列朝詩集云敬夫德涵同居同以瑾黨放逐汧東鄆杜之間相與過從談讌徵歌數曲以相娛樂敬夫將填詞以厚貲募國工杜門學按琵琶三絃習諸曲盡其技而後出之德涵尤妙於歌彈酒酣以往搗彈按歌更起爲壽老樂工擊節自謂弗如也萬歷中廣陵顧小候所建遊長安訪求曲中七十老妓令歌康王樂府其流風餘韻關西人猶能道之敬夫漢陂集粗有才情沓拖淺率續集猶爲冗長李中麓云敬夫詞曲新奇得元人心法王元美云敬夫詞曲與德涵齊名秀麗雄爽康大不如也評者以爲不在關漢卿馬東籬下大率康王皆工詞曲而秦人推其詩文以爲一代宗匠鄉曲之言君子存之而已

康海序漢陂集曰予觀漢陂先生之集其序事似司馬子長而不屑屑於言語之末其議論似賈太傅而能從容於抑揚之際至其因懷陳放寄景道情則出入乎風雅選騷之間而震迅於開元天寶之右可謂當世之大儒斯文之巨擘矣

王阮亭蠶尾集新城縣新誌序云以予所聞見前明郡邑之誌不啻充棟而文簡事覈訓詞爾雅無如康對山誌武功其他若王漢陂誌鄠呂涇野誌高陵韓五泉誌朝邑喬三石誌耀胡可泉誌秦趙俊谷誌平涼孫立亭誌富平汪來誌北地劉九經誌鄆張光孝誌華其地率秦地其人率秦人也故予嘗謂前明郡縣之誌無愈秦者以其猶有黃圖決錄之遺焉

阮亭又曰近世志書能文簡事覈訓詞爾雅無如康對山之武功志次則王漢陂之鄠志呂涇野之高陵志韓五泉之朝邑誌喬三石之耀志胡可泉之秦志趙俊谷之平涼志孫立亭之富平志張光孝之華志皆秦人皆比美於對山者翁萬達序漢陂續集曰漢陂續集者漢陂先生垂老之作也先生齒德既高踐履純篤凡所應酬罔

不協道若集中歎禹夫之貨殖善鶴夫之生農惜瀛也之宦成戒羨也之土木概可見矣外則論學論師諸書牝晨孤兒諸吟隕霜警火諸賦蓋拳拳於希聖學古移風易俗之意也

康海序碧山樂府曰山人舊不爲此體自罷壽州後始爲之其才情之妙可以超絕一世矣余往來鄴杜間苟有所得則命童子彙輯之其聲雖托之近體而其意則悠然與上下同流宕而弗激迫而弗怒讀其曲想其意比之聲和之譜可以知其所懷矣

弇山堂別集史乘考誤中山狼傳撰自馬左都中錫而雜劇則出自王太史九思以爲譏獻吉或云九思家藏親筆極稱空同雜劇似別有指

邑令劉璞云名宦自許君而下止兩三人後豈無治行循卓者如前令白應輝密謀捉諸回賊功不可泯尙俟久論如馬呈圖申免灞夫賈待價力主條邊呂仲信修河永利皆宜尸祝恐久而忘故著於此又云鄉賢自王冲而下百年寥寥豈無其人現

存諸君金質玉相可法可傳遵例不書孝行如曹環陳普舉人段遇徵亦未敢入志

姑記之以俟後賢

孝行俱  
無考

馮歷序張正就正錄曰擇中語錄純粹以精良由其殫力精究故能深入理窟有此實落學問也

花仙者居鄴終南山之圭峯嘗有武弁某裹糧訪之三日始至洞口鳥道險絕與之言但勸以孝弟更無他語清梁敏壯公化鳳供養甚誠仙嘗往來其家每至則聞風自庭樹而下唯啖果實不火食自言在山中恆與康對山王漢陂諸公往還其貌瘦健而長髯聲甚尖利不類人殆猿獍之屬也見王漁洋池北偶談及梁敏壯公家傳龐光鎮有關雅義者少失怙恃嘗傭身糊口既而得異人傳以遁甲術人莫知也嘗寄宿鎮城隍廟中一日晨起有傭爲耕作者隨之去早餐時主人往餉相遇於途問其傭皆關某也羣相駭異入廟闕之關則鼾睡如故其傭人者化身也後入山樵採不知所終

呂公寨有張森者好讀書能文章未弱冠應童子試輒冠其曹然性迂怪不欲以科名顯例縣府試第一院試必獲雋森縣試頭場冠軍二場即故避不赴如是者屢縣宰知其然而愛其才試輒令殿軍迄終場而始冠焉乃至府試院試則又故避不赴如是卒老牖下教授終身晏如也晚年自爲傳記述其生平及懸擬死後各情形語頗逸趣人多誦之

明天啟二年北鄉鑿齒村道安寺鑄鐘一口忽霹靂一聲天龍下降昂首於鑪掉尾於殿祥光綉縕移時始去見道安寺碑記茲補志之

清道光十五年大饑二十六年大饑

咸豐三年秋大雨水傷田害稼

同治元年彗星見西北方長竟天二年蝗飛蔽天食田苗立盡

光緒三年大饑人相食十三年南鄉柿園堡民袁某生子牛蹄十五年忽傳白蓮教以邪術作紙人馬剪人頭髮來時黑風一陣當者輒暈倒醒則髮已無存斷髮每出





按前志不載災異故自乾隆以前無考茲僅就當時採訪所得者姑附記於此  
錢法清康熙乾隆間銅色極高爲一般人所歡迎名曰制錢洎咸豐軍興國用不足  
鑄有當百當十等錢又有鐵錢民間使用與銅錢各半未幾廢止至光緒二十五六  
年間奸商市儉私販小錢如鵝眼榆莢等類每一貫中竟居多數錢之複雜至此極  
矣厥後嚴刑禁止而制錢通行及光緒末葉與宣統時又改鑄銅元有當十二十五  
十暨百枚者更有種種銀元名色初興時每元約值錢兩串迨後錢法復壞純用紙  
幣省局若有變動則直同廢紙故民國十六七年每一銀元竟值錢一百餘串而市  
面由此不復用錢矣

紙幣分私帖官帖二種私帖係本邑及各鎮商號所出流行最早官帖至清末爲秦  
豐字同心字之官錢局所出市面通用者惟此二帖互相交易至於大清銀票鈔票  
等省垣利用而外縣鎮實少用之者民國以來私帖懸爲厲禁而遠近通行者純爲  
官帖後官銀行又出有銀元票而官錢帖遂爲無用矣



跋

改革後省脩通志命各縣採訪戊辰余協段君濟安任吾鄂採訪之役將竣中央適令各縣重新邑乘時朝邑張君耀亭長吾鄂即以是屬之堅辭再三弗敢任也越二年華陰強君雲程洺任銳意圖治百廢俱興爰集各機關復申前議聘書凡三至往返逾兩月段君與余終弗敢應強君乃屬老友張君子甲敦勸張君知其不可勸也因密接聘書遲之久始出以告焉為既不能辭又不得勉強珥筆徒滋愧赧竊維鄂之前志其開始創脩者為邑王太史漢陂其最後重脩者為武功孫太史酉峯兩太史皆文章大家後先輝映珠玉在前蕪穢易形踵其後者不免佛頭著糞狗尾續貂之誚其難一鄂志凡七脩矣明四王漢陂王九臯清三康如璉魯一率皆數十年一脩間有十餘年而修者一佐去如璉自孫志隆於乾後至於今百五十餘年矣歷嘉道咸同光宣之世經髮捻花門革命之劫時閱七朝事隔兩代其風俗之變遷人心之思想社會之潮流政教之紛更今昔迥殊滄桑屢易兼以災祲連年兵匪不

息老成淪謝擋案無存徒攷遺蹟於斷碣殘碑之間徵軼事於成卒野夫之口以視前志之數十年十餘年一修其相去何如也其難二况志史之屬也史以記事事宜詳史以爲文文貴簡褻貶在於一字袞鉞嚴於千秋非兼才學識之三長而復以簡老之筆爾雅之詞出之不足以稱爲文簡事覈信今而傳後其難三有此三難此余與段君所以反覆愧懼至再至三而堅辭不敢承應者也雖然志者記也所以記一邑已往之事也居百五十餘年後而記百五十餘年一邑已往之事已屬恍恍惚茫得諸傳聞涉於影響而非耳目所親歷若畏其難而遷延失修恐并此恍惚渺茫傳聞影響者亦且杳乎不可得焉不幾於斬焉中絕後有修者將何從而記之孔子曰辭達而已矣中央令各縣修志之概要曰詞取詳明不貴艱深故此次之修第記事已耳而筆之繁簡不計也詞之雅俗弗論也共分二十六門都爲十卷彙成八冊以俟後之兼擅三長詞筆簡老爾雅者出焉採其事不取其文刪繁就簡易俗爲雅以直追兩太史之盛則所謂三難者不一難焉此段君與余之志也稿旣成呈政於縣

長趙公欲存諸擋以備採擇乃趙公留心典章關懷文獻恐歷久散佚不及待諸後人也遽命付印且屬余二人董其役因誌其崖畧如此癸酉夏六月邑人王汝玉子如謹跋於古青門旅寓之酉山書局



陝西省西安西山書局印